

Абдулла ҚОДИРИЙ

МЕҲРОБДАН ЧАЁН

*Худоёрхон ва муншийлари ҳаётидан
тарихий роман*



**«ШАРҚ» НАШРИЁТ-МАТБАА
АКЦИЯДОРЛИК КОМПАНИЯСИ
БОШ ТАҲРИРИЯТИ
ТОШКЕНТ — 2007**

НО 34209
282

Кодирий. Абдулла

Меҳробдан чаён: Роман. — Т.: «Шарқ», 2007. —

256 б.

20_18

2417

Alisher Navoly

номиди

O'zbekiston MK

ISBN 978-9943-00-187-9

© «Шарқ» нашриёт-матбав акциядорлик
компанияси Баш таҳририяти, 2007

Рўмоннинг мавзуи тўғрисида

Туркистон феодалларининг кейинги вакили бўлған Худоёрнинг ўз хоҳиши йўлида дәҳқон оммаси ва майда ҳунарманд — косиб синфини курбон қилиши, мамлакат хотин-қизларини истаганча тасарруф этиши, бунга қарши келгучиларга, тиласа ким бўлмасин, раҳмсиз жазо бериши-рўмоннинг мавзуиъдир. Худоёрнинг бу йўлдағи биринчи истинодгоҳи бўлған уламолар, уларнинг ички-ташқи аҳволи, ахлоқи, мадраса ва оила ҳаёти, уламода инсоний ҳис битканлиги ва қолғани ҳам хабосат пардаси остила сезилмас даражага етканлиги мундарижа сифидирган қадар баён қилинадир. Булар рўмоннинг номаргуб — манфий қаҳрамонлари. Иккинчи тарафда мазкур қора кучларга қарши «тубан» синф — камбағаллар, уларнинг хонлиқ тузилишига, қора куч — уламо алайҳига чиқиши, меҳнаткаш камбағалларнинг ахлоқи, сажияси, оиласи, турмуши ва бир-бирига алоқаси, самимияти.

Албатта, мен бу сўнгги марғуб қаҳрамонларни ўзбек тарихининг ҳазми кўтарган қадар ўз ҳолича олишқа тиришим. Уларнинг хон ва уламоға қарши исёни табиъий — шарьийдир. Чунки шундан ортиғи соҳта бўлиши устига, китобнинг қадрини ҳам тушурар эди. Шу икки синф курашини тасвир қилиш воситасида хон ҳарами, хотинлари, қирқ қизлар, тарихий ва этнографий лавҳалар, ўзбек ҳаёти, қизиқчилиги, танқидчилиги, ўзбек хотин-қизлари орасидаги истеъод, шоирлар, аскиячилик ва бошқа яна кўб нуқталар қамраб олинди.

Рўмонда яна бундан бошқа бир кўб жиҳатлар бор. Уларни бу ерда санаб ўлтуриш ҳожат эмас, улар муҳтарам ўқуғучининг назаридан қочиб қутилмас.

*Абдулла Қодирий (Жулқунбой)
Тошканд, 1928 нчи йил, 5 феврал*

— Агар Фарҳоднинг Ширин, бўлса Мажнунларнинг Лайлоси,
Насиб ўлмиш менга гулшан аро гулларнинг — Раъноси,

(Мирзо)

Агар ор етса Лайли ҳақлидир Қайснинг жунунидин,
Не бахт, Раъно, харидоринг талаб аҳлиниңг — Мирзоси.

(Раъно)

1. РАЪНОНИНГ ЭГАСИ

Солиҳ маҳдум бу қун одатдан ташқари ечилиб кетди, масжиддан чиқиб тӯғри қассобнинг олдиға борди, бир тангалик гўшт, саккиз пуллик пиёз олиб ҳавлисига келди. Мактабда ҳусниҳат машқ қилиб ўлтурғучи болалар ичидан иккитасини гулзорни супуриб, сув сепишса буюрди ва ўзи гўштни кўтариб ичкарига кирди.

Нигор ойим ҳозирғина қизларни озод қўюб, кўкрак боласини бағриға олған эди. Раъно ҳавли юзида иккита укасининг ўртасиға тушиб, уларнинг лой йўнуниға иштирок етар, ер супуриб ётқан соч ўрумларининг тупроққа белашканидан хабарсиз эди.

Гўшт кўтариб йўлакдан кирган Солиҳ маҳдумнинг кўзи Раъононинг шу ҳолига тушди:

— Балли Раъно, ана жиннилик! — деди маҳдум, — атлас кўйлак сенга ҳайф, сенга бўздан бошқаси, албатта ҳайф!

Раъно ўрнидан турди, дадасидан уялиб лойлиқ қўлларини орқасиға яширди.

— Уят эмасми, юв қўлингни, юв! Укаларингни бола десам, сен улардан ҳам ошиб тушасан!

Раъно югуриб ариққа кетди, Нигор ойим ўлтурган жойидан «Раъононинг ақли тушсин» деб кулиб қўйди. Солиҳ маҳдум ҳануз Раънодан койиб келар эди:

— Ишинг бўлмаса китоб ўқи, ҳусниҳат ол, сен куолнинг қизи эмассанки...

Солиҳ маҳдум гўштни Нигор ойимнинг ёниға қўюб, ўзи зина билан айвонга чиқди.

Маҳдум томонидан Раъононинг тергалиши Нигор ойимни унча машғул этмади. Аммо ҳозир унинг

кўнглига келган масала эрининг чиқум важига фав-
қулодда ечилиб кетиши эди. Тўғри, Нигор ойимнинг
ошхонасиға шунингдек бир неча чораклаб гўштлар кўп
келар эди, фақат эри томонидан эмас. Солиҳ
маҳдумнинг жўмардлиғи кўпинча йигирма пайса¹ эт-
дан нариға ошмас, шунда ҳам болалардан мўмайроқ
«озодлик» келиб қолса ёки «панжшанбалик» куткан-
дан ортироқ тушса.

Шунинг учун Нигор ойим бу жўмардлик ҳақини
эрига беролмади:

— Гўштни кўброқ олибсизми... Анвар буюрганми-
ди? — деб сўради.

— Йўқ, — деди маҳдум салласини қозиққа ила-
ила, — бир манти қилайлиқ, — дедим, — манти
еганимизга кўб бўлди, валлоҳи аълам...

Раъно ювиниб келди, дадасига уят аралаш бир қараб
олди-да, Нигор ойимнинг ёнига ўлтурди ва онасининг
бағрида эмиб ётқан чақалоқнинг кичкина мимит қўлла-
рини суюб ўпди.

Солиҳ Маҳдум ечиниб келиб, она-боланинг устида
тўхтади.

— Сен мундан кейин кичкина бўлмайсан қизим,
Раъно, — деди маҳдум насиҳатомуз, — шу укаларинг
 билан қилиб ўлтурган ишингни киши кўрса нима дейди.
Иншоolloҳ уй эгаси бўлишға яқинлашиб қолдинг. Энди
тош-тарозуни ҳам шунга қараб қўйишинг керак, қизим.

Раъно қизариниб онасиға қаради, яна мимит қўлни
ўпиш카 машғул бўлди.

— Раънони эгасига топширмагунингизча, — деди
Нигор ойим, — қюлмайдирғанға ўхшайдир.

Бу сўздан Раъно уялиб, бошини чақалоқнинг бағ-
рига тиқиб олди. Солиҳ маҳдум кулимсиган кўйи даҳ-
лизга юруб борди ва оёғини кафшига узатди.

— Тур, ётма Раъно! — деди даҳлиздан, — гўштни
онангға тўғраб бер, пиёзни арт! Анвар аканг ҳам келиб
қолар, таом асрга тайёр бўлсин!

Раъно дадасини узоғлатиб, бошини кўтарди, она-
сиға ўпка аралаш кулиб қаради. Унинг бу қарашидан
онасининг бояғи сўзига қарши ризосизлиқ онглашил-
мас, балки шодлиқ маънолари ўқулур эди. Дарҳақи-
қат, эру хотин ораларида ўткан икки калима сўз шу
оила гулшанида ўскан Раънонинг истиқболини очик

¹ Пайса — таҳминан 50 грамм.

белгилар эди. Нигор ойим «Раънони эгасига топшир-мағунингизча...» деб гарчи бир мунча қўполроқ таъ-бир билан бўлса ҳам «Раънонинг эгаси» борлигини сўзлар, Раъно эрса «эгаси»нинг ким эканлигини яхши билгани ва уни қанот қоқиб қарши олғани учун жоду кўзида ризосизлиқ эмас, сурур маънолари ўйнатар эди.

Дадасининг — «Анвар аканг ҳам келиб қолар, тао-минг асрга тайёр бўлсин!» жумласи Раънога яна очик, яна равшан таъминот берар эди...

2. АМИР УМАРХОННИНГ КАНИЗИ

Солиҳ маҳдум 1230—1290-нчи ҳижрий йилларда «Ҳўқанди фирдавсмонанд»да яшаган бир муаллим ва имом, ўз замонасининг истилоҳи¹ билан айтканда «мактабдор домла»дир. Солиҳ маҳдум синфи жиҳатдан уламо оиласига мансуб бўлиб, бобоси Олимхон² ва Умархон³ даврларида муфтилик, қозилиқ мансабларида хизмат қилған, отаси эрса Қўқоннинг Мадали (Муҳаммадали) хон⁴ мадрасасида неча йиллар мударрис бўлгандир. Қисқаси маҳдумнинг ота-боболари хонлар қошида мумтоз ва ҳалқ назарида «шарафлик ва муҳтарам» мавқиъни ушлаб келганлар. Бироқ бу мумтоз силсила бизнинг маҳдумгача етиб келалмай, Мадалихоннинг қатли билан бирга кесилган, бунинг можароси эрса қўйидағичадир:

Туркистон хонлиғи тарихидан хабардор кишиларга маълумдирким, Амир Умархон охир умрида ўз саройидаги ёш канизлардан бирита мухаббат қўядир. Каниз ёш бўлғанлиги ва балоғатка етмаганлиги учун уни ни-коҳига ололмай вақт кутадур. Шу кутиб юриш йилларида Умархон муродига еталмай вафот қиласидир, таҳтка ўғли Мадалихон минадир. Орадан бир неча йиллар ўтиб бояғи каниз қиз балоғатка эришадир ва бир ҳуснига ўн ҳусн қўшулиб отанинг боласи бўлған Мадалихонни

¹ Истилоҳ — атама.

² Олимхон Норбўтабий ўғли (1775—1811) 1798—1811 йилларда Қўқон хони бўлган.

³ Умархон (1785—1882) Олимхоннинг укаси. 1811—1822 йилларда Қўқон хони бўлган.

⁴ Мадалихон (Муҳаммадалихон) Умархон ўғли (1806—1842) 1822—1842 йилларда Қўқон хони бўлган.

ҳам ўзига ошиқ қиласыр. Ўз саройида ўскан бу қизни ёш хон ҳамиша күз ўнгидеги юритса ҳам бироқ... тарихнинг бизга хабар берисига қарағанда Мадалихон шу қизнинг дардидеги неча йиллар ёнадыр. Чунки уламолар бу гүзални Мадалига она мақомида ҳисоблаб, нима учундир хоннинг орзусига күндаланға келадырлар:

«Отанғиз, агарчанди канизни ўз никохларига олмасаң бұлсалар ҳам ва лекин балоғатка эришкак оларман, деб ният қылғанлар. Бинобарин бу каниз сизге она мақомида, шариъат рухсат бермайды!» дейдирлар.

Мадалихон бу фатводан кейин дардини ичига ютишға мажбур бўлиб, аммо иккинчи тарафдан ўзинин орзусига қарши борған уламони секин-секин «илмий» ишлардан олиб улар ўрниға янгиларини қўя бошлайдыр. Ўз орзусига замин ҳозирлағач, бир неча йилни ўтказиб, яна уламоға шу тўғрида фатво сўраб мурожат қиласыр. Табиъий, яқиндағина оғзи ошқа еткан янги уламолар ўз валийи неъматлари бўлған Мадалихонга хиёнат қилмайдирлар-да:

«Ба назди мужтаҳидини киром асли зътибор ақди шаръийдир.¹ Отанғиз марҳум — никохланаман деб айткан бўлсалар ҳам никохландым, деб айтмаганилар. Бас, амиралмўминин мазкурани худ нафсларига² ақди шаръий³ қиласалар жоиз ва дурустдир. Валлоҳи айлам биссавоб», деб фатвономани «бинни муфти марҳум», «бинни мударрис марҳум», «бинни Ҳўқандий марҳум» — муҳри баҳайбатлари билан қалашидириб берадирлар ва Мадалихон гўй ва томошалар билан мурод мақсадига етадир...

Кимларнинг воситаси биландир мазкура іўзал канизнинг таърифи Бухоро амири — амир Баҳодир (Ботур)⁴ хонға етиб, ул ҳам илғаридан ҳалиғи канизга ғойибона ошиқ бўлған эди. Аммо қайси йул билан бўлса ҳам шу канизни кўлға киргизиш Фикрида бош оғритиб, нос чакиб юрган Баҳодирхон қулогига бу хабари жонсўз ютиб думоғидан дуд чиқадыр ва дарҳол Бухоронинг забардаст уламо, муфти, айлам, ҳоказо ва

¹ Ба назди мужтаҳидини киром асли зътибор ақди шаръийдир — ҳурматга лойиқ дин алломаларининг назарича асосий зътибиғ шарнага қонунларига қартилиши керак.

² Ҳуд нафсиға — ўз нафсиға.

³ Ақди шаръий — шаръий никоҳ.

⁴ Амир Баҳодир (Ботур) — Насруллохон (1826—1860 йилларда хонлик қилиган) назарига айтилувчи лақаб.

ало-ҳозалқиёс пешволарини ўз хузурига чорлаб, дарғазаб воқиъани сўзлайдир ва улардан дарҳол бир «фатвойи баҳайбат»ни талаб қилғанида уламои киром ҳам дарон ботаҳорат-бетаҳорат, масалани эшитар-эшитмас фатво ёзадирларким:

«Бир жамоа мўминларга амир бўлған зотнинг вазифаи шаръийси шулдурким, исломда устивор турғай, аҳкоми исломни¹ камокон² ижро қилғай. Ҳар бир амирлик аркони исломдан³ заррача юз ўгурса, ул кимарса жамоаи ислом устига амир эмас, шарирдир⁴. Наузанбилаҳким Фарғона ва Туркистон мамлакатининг алҳол⁵ амири бўлған Муҳаммадалихон волидининг⁶ манкуҳаси,⁷ яъни волидаи айни ва ризотисини⁸ ўз ақдиға олибдир, наузанбилаҳи, наузанбилаҳи. Оят ва аҳодиси шарифа ва ба чаҳори мазҳаб⁹ ва ба назди мужтаҳидини киром ва уламои зул-еҳтиром¹⁰ муттафақун¹¹ алайҳи кофиридир. Казолика¹² ўшандоғ муртаднинг қатли аввали дигар¹³ ислом амирларига ва баъд аз¹⁴ барча мўминларга фарзи айндор!»

Дарвоқиъ «холисона» бу фатвога амир Баҳодирхон «бетарафона» қиймат бериб, «дин йўлида холис бир жиҳоди акбар»¹⁵ деб жамиъи қўшунлари билан Фарғона устига юриш қиласидир. Амири Баҳодирнинг бу «холисона» жиҳоди Туркистон хонлиги томонидан қандай муқоваматларга¹⁶ учради ва икки тарафдан қанчада бошлар кесилди, албатта, бу тўғрида бизнинг ишимиз йўқдир. Фақат бу можародан бизга кераклик нуқта шундаким, натижада Мадалихон шикаст топди, ҳам амири Баҳодир томонидан қатл қилинди. Мадалихонга фат-

¹ Аҳкоми ислом — ислом ҳукмлари, қонунлари.

² Камокон — бекаму қўст.

³ Аркони ислом — ислом руҳнлари, асослари.

⁴ Шарир — ёмонлик қилувчи, зарапкунанда.

⁵ Алҳол — ҳозирги, бутунги.

⁶ Волид — ота.

⁷ Манкуҳа — никоҳли хотира.

⁸ Волидаи айни ризови — ўз ва эмизган онасини олибдир... (муал).

⁹ Ва чаҳори мазҳаб — суннийлик йўналишидаги шаритъатнинг ҳанафия, маликуя, шофиъия, ҳанбалия мазҳаблари.

¹⁰ Зул-еҳтиром — эҳтиром эгаси.

¹¹ Муттафақун — келишилган.

¹² Казолика — шунинг учун.

¹³ Дигар — бошка, ўзга.

¹⁴ Ватъдаз — кейин, сўнг.

¹⁵ Жиҳоди акбар — улуғ юриш, уруш.

¹⁶ Муқовамат — қаршилик.

во ёзиб берган Кўқон уламоларидан бир нечалари ҳад урулдилар¹ ва бир нечалари қочиб қутулдилар. Амири Баҳодирхон бўлса Фарғона ҳукуматига ўз кишисини қўйди, фатҳу нусрат² билан канизни олиб Бухороға қайтди.

Мақсадға келсак, Мадалихонға фатво ёзиб беришда иштирок қилған ва Баҳодир томонидан ҳад урулған уламоларнинг бири шу бизнинг Солиҳ маҳдумнинг отаси эди. Ҳад урулғандан сўнг кўб яшолмади, ўлди ва шунинг билан бу оиласининг бурунғи имтиёз ва шарафи ҳам битди. Чунки мундан сўнг Туркистон таҳтига ўлтурған хонларнинг ҳаммалари деярлик Бухоро амирининг ҳимоясида каби эдилар. Ва Мадалихоннинг фатвосига иштирок қилған уламолар ҳамиша эътиборсиз, мардуд³ бўлиб қолдилар.

3. МАҲДУМНИНГ УЙЛАНИШИ ВА МАКТАБДОРЛИГИ

Солиҳ маҳдум отасининг вафотида йигирма ёшлиқ талаба эди. Отаси марҳум бўлғандан сўнг ўзидан бир неча ёш каттароқ оғаси Марғилонға имом бўлиб, оиласи билан кўчиб кетди. Солиҳ маҳдум онаси ва ўн олти ёшлиқ Наъима исмлик синглиси билан Кўқонда қолди. Бирар жойдан келим бўлмағаниқдан бу оила кўб танглиқка тушиб охирда Солиҳ маҳдум таҳсилни тарқ этишкан, қорин тўйдирарлиқ бир касб излашкан мажбур бўлди.

Албатта, Солиҳ маҳдум оғирроқ касбни ухда қилолмас, имоматка бўлса соқоли чиқмағаниқдан яролмас эди. Кўб озор чекиб ниҳоят қориндош-уруг ва маҳалла кишиларининг кенгашлари билан ўз уйига мактаб очди, маҳалладан беш-ўнта бола йиғди ва енг шимариб мактабдорлиққа бошлади.

Бир неча йил мактаб ривожга минмади, яъни болалар ўн беш-йигирматадан нарифа ўтмай, «панжшанбалик» аранг ит азоби рўзгорға стиб турар эди. Маҳдум ва оиласининг шундан бошқа даромад манбаълари бўлмағани учун ҳар ҳолда, яна шунга қаноат қилмоққа мажбур эдилар.

¹ Ҳад урмоқ — ҳукуқузислантирмоқ.

² Фатҳу нусрат — ғалаба.

³ Мардуд бўлмоқ — ҳайдалмоқ, қувилмоқ.

Ўгул йигирмага, қыз ўн бешка етдими — оналарнинг дарди келин ва куяв савдоси бўлиб қоладир. Шунга ўхшаш маҳдумнинг онаси Моҳлар ойимнинг касали гўё «дард устига чипқон» эди: маҳдумнинг ёши йигирмадан ошти, Наъима ҳам ўн саккизга тўлди, яъни келин ҳам керак, куяв ҳам. Наъима тўғрисидан ташвиш йўқ, хусн, одоб, юмиш, ҳаммасидан кўнгил тўқ, бек бўлмаса — бекзода, мударрис бўлмаса — мукаррир¹.

Аммо маҳдум масаласи бир оз мушкилроқ эди: тошиш-тутиш маълум, отасидан қолғани фақат ички-ташқи ҳавли, мундан бошқа ҳеч гап. Бас, Моҳлар ойим ўзирикчилигига маҳдумнинг «бошини икки» қиласа, ўзиридан сўнг унинг уйлана олиши амри маҳол. Шуни кўзда тутиб Моҳлар ойим маҳдумнинг уйланишига мазкура Наъимани восита қилмоқчи бўлди. Яъни Наъимани узатиб эвазига узатилган жойдан келин олмоқчи эди. Қарши қуда бўлмоқ учун қизлиқ ва ўгуллиқ ҳавлини учратиш ва бунинг устига «наслу насабда текислик», олинадирған келиннинг силлиқина бўлиши — ана шундай мушкилотлар орқасида икки йил чамаси Наъиманинг умри сарғайиб ўтди. Юрт эмасми, дегандек, юртчиликда юрак оғриғига даво топилмай қолмас. Шунга ўхшаш Моҳлар ойимнинг яраси ҳам ниҳоят учунчи йилда давосини топди:

Хон ўрдасининг мутаваффо² мирзоларидан биттасининг мадрасада ўқуб юрган ўғли бор эди ва уйида чақич чайнаб ўлтурган ўн олти ёшлиқ қизчаси ҳам бор эди. Бу оила Моҳлар ойимнинг таклифини маълмамнуният³ қабул этди. Чунки «ўхшатмай учратмас» дегандек нариги тараф ҳам Моҳлар ойимнинг биттаси эди. Соғчилар Наъимани ёқтириб, Моҳлар ойимнини таклифини қабул қилиб кетдилар. Моҳлар ойим марҳум мирзонинг уйига қиз кўргали бориб ул ҳам «қизи жажжигина экан» деб келди. Куявлар кўрулиб унар ҳам зарарсиз топилдилар. Шарту шароит сўзлашилди. Икки орада қалин-налини деган гаплар йўқ, ҳар ким ўз улушига тушкан ош-сувини қиладир, келинни ўраб-чирмаб оладир, вассалом.

«Ҳай этти, ҳуй этти, икки коски тўй етти» деган-

¹ Мукаррир — ассистент.

² Мутаваффо — вафот этган.

³ Маълмамнуният — мамнуният билан.

ларидек ҳар икки тўй ҳам бир ҳафта ичиде ўтти, Наъимахоним ўёққа кетиб, Ниғорхоним буёққа келди. Шундай қилиб, Солиҳ маҳдум хотинлиқ бўлди.

Солиҳ маҳдумнинг мактаб иши ҳам учунчи йилдан бошлаб бир оз жонланған, болалар ҳам ўттуз-қирққа еткан эдилар.

Солиҳ маҳдум ўттуз ёшларга борғанда мактабдорлифи ҳам яхшигина шуҳрат топадир, шогирдлар сони бир юзга етадир. Мөҳмонахона торлиқ қылғанлиқдан мактаб учун маҳсус бино ёладир, имло, иншо ва ҳусниҳат машқи учун алоҳида хона айирадир. Маҳдум ёлғиз шунинг билангина қаноатланмай хотини Ниғорхонимни ҳам ишқа соладир, яъни унинг саводини тузатиб, «отин биби» қиласадир. Икки-уч гузарнинг қизлари Ниғорхонимнинг сабогиға йигиладирлар. Қисқаси, маҳдум мактабдорлиқда яхши шуҳрат қозонғанидек, уй-рўзғорини, юриш-туриш, кийим-солим ва бошқа тарафларини ҳам тузатиб оладир.

Қирқ ёшларида маҳаллага имом бўладир ва мактабини яна ҳам кенгайтириб, шу даҳанинг ҳар бир табакаси ичиде «устоз мулла Солиҳ маҳдум» бўлиб таниладир. Масалан, ўзида савод чиқарған косиб, савдогар, муллабачча (мадраса талабаси) ва шунингдек янги бўғимларга устозлик унвонини оладир. Ҳатто кейинги вақтларда унинг шогирдларидан хон ўрдасигача бориб кирганлари бордирким, маҳдумнинг бу муваффақиятини бошқа бобларимизда ўқурсиз.

4. МАҲДУМНИНГ БАЪЗИ ХИСЛАТЛАРИ

Юқоридан ўқуғучиға бир даража онглашилған бўлса керакки, яқин йигирма йиллардан бери маҳдумнинг келими шаҳар ёки қишлоқ сўраб турған бир бекча бўлмаса-да, ундан қўйироқ, ҳар ҳолда шаҳар мадрасасида дарсгўлик қилиб, вақфни ўз қабзига¹ олган бир мударриснинг тушимидан албагта кўб. Келимнинг шу йўсун яхши бўлишиға қарамасдан унинг табиъатида ҳарчанд тиришилса ҳам маҳтаб бўлмайдирған ҳусусиятлар бор: ҳасисликка ўхшаған ҳолат, тамаъгирилик каби одат, ичқоралиқ сингари ҳаракат ва амсоли...

Ёш чоғида отаси ўлиб, қаттиғчилиқда ўсди, унинг баъзи ярашмаған ҳаракатлари балки ўша қаттиғчилиқ-

¹ Қабз — тутам; чангаль; қўл ости.

нинг руҳка сингиб қолған ёмон таъсиридир. Ҳар ҳолда бизнинг мундаги вазифамиз маҳдумни таҳдил қилиш эмас, балки унинг шахсига хиёнат ва бўхтон қилишдан сақланиб, яъни ортдирмай ва камитмай ўқуғучига бутун тақдим эта билишдир.

Ойни этак билан яшириб бўлмайдир. Маҳдумнинг хасисликка ўхшаш ҳолатлари, албатта бор эди. Маҳдум топиб-тутмаған йилларда бу ишни йўқлиқдан қила-дир, десак-да кейинги вақтларда ҳам шу одатини тарк этмагани учун табиъатида бир мунча хасислик бор экан, деймиз.

Кўйлак-иштонининг аксар етти-саккиз жойидан ямоғи бўладир. Етти қишдан бери гуппи — чопон ян-гилагани маълум эмас, фақат қиши келиб кеткан сайин алак гуппининг енги ўзгарибкина турадир ва астари йил сайин янгидан-янги ямоқлар билан бойийдир, шу гуппи бутун умрида биргина мартаба ва шунда ҳам маҳдумдан беруҳсат аммо Нигор ойимнинг зўри билан тоғораға тушиб чўмилди. Бу кунда бўлса тўрт йил бу-рунғи гусли¹, етти йиллик тузи, турлик-турлик ямоғи билан саккизинчи қиши маҳдум поччасиға содикона хизмат қилиш учун бўғжома ичидаги ўзига куч йиғиб ётадир. Маҳалла кишилари маҳдумнинг бу чопонига «молтопар» деб исм берганлар, гуппи кийилиб чиқил-ған кун маҳдумга сездирмай «молтопар савдодан қай-тиби... ҳали бақувват, иш қилиб ямоқга чарчамасанг яна ўн йилингми, Мамарайим!» деб кулишадирлар.

Қисқаси: беш-олти қайта бошлатилиб қўнжи бир қаричға келган айбаки² маҳси, чарми уст-устига уюлиб ердан уч эллик чамаси кўтарилган икки чорак вазнлик кафш, ёши маҳалла кишиларининг кўбларига маълум бўлмаған, ҳарчанд эҳтиёт қилинса ҳам неча жойидан попилтириғи осилған оқбўз салла маҳалла кишиларининг эрмакларидандир. Булардан бошқа ҳайит кунлари ва тўйлардагина кийиладирган банорас тўни, совуқ қаттиғроқ бўлғанда ичидан киядирган адрес гупписи ҳам бор. Маҳалла кишилари банорас тўнни «зарурат» деб атаған бўлсалар ҳам, адрес гуппига ҳали ном кўйғунча йўқлар, чунки бунинг дунёға келганига фа-қат тўрт-беш йилгина бўлғандир.

Кези келганда маҳдумнинг ёзлиқ кийимларини ҳам

¹ Гусл — ювинмок.

² Айбаки — мол терисидан ишланган сифати паст чарм.

бир сидра айтиб кетайлик: йўллуқ, қизил қалами бўздан яхтак, оқ бўздан жиҳақ ёқалиқ кенг кўйлак (чунки тор бўлса йиртиладир) ва лозим (яъни иштон) ҳамда сарпойчан кийишкага енгилча сағри¹ кафш, аммо салла қишин-ёзин битта.

5. ОИЛА ВА КИШИЛАР БИЛАН МУОМАЛА

Махдум оиласини ҳам кийим-кечак вожидан ўзи каби тутар эди. Кийим-кечакдагина эмас, ҳатто озиқ-овқат тўғриларида ҳам унинг анчагина келишимсиз қилиқлариға йўлиқилар эди. Масалан, бир ой тўлмасдан кир ювишга рухсат бермас, агар Нигор ойимнинг бир ойсиз кир ювганини кўриб қолса — «кийимни тогорада чурутасан!» деб, ғовға солар эди. Икки ҳафта-сиз паловни кўрмаслар (озодлик ошлари, албатта мундан мустасно), кўб овқатлари угра, туппа, мастава, кўғурма шўрба бўлар эди.

Нигор ойимнинг қозони йўқча, елча гўштни фақат палов шарофати билангина кўрар эди. Лекин махдум баъзи нарсалар билан ошхонани яхшигина мўлиқдирар, масалан: шалғам, қовоқ, лавлаги. Бу тўғрида хотини ҳарчанд рад қилса ҳам, қоплаб шалғам, йигирма-ўттузлаб қовоқ харид қилишини кўймас — «шалғам — Биби Фотимаи Зухранинг дуолари баракати, қовоқ бўлса ҳазрати Юнуснинг мўъжизалари», деб баҳоси арzon ва лекин хосияти кўб бўлған бу маблағлар² билан ошхонани тўлдира берар эди. Ҳар ҳафта бир-икки мартаба қовоқ сомса ёпдирмай қолмас, аммо — «ёғни кам сол, қовоқнинг таъмини бузадир!» деб таъкидлашни ҳам унутмас эди. Уйда нон ёпилмағанидек, бозордан ҳам сотиб олинмас, чунки, панжшанбалик нон етиб, ортиб ётар, ҳатто баъзи вақтларда бозорга ҳам чиқар эди.

Маҳдумнинг ўқуғучи болалар билан муомаласи жуда яхши эди. Савоғини билмаган ёки шўҳлиқ қилған болаларни ҳар қанча сўқиб, койиса, дўйқ уриб, давара қилса ҳам урмас, бу жиҳат билан бутун Кўқон болала-рининг муҳаббатларини ўзига жалб эткан эди. Аммо «озодлик» масаласида болалардан ҳеч кимни ҳам афу этмас, бой боласига «озодлик» лозим бўлған бўлса,

¹ Сағри — от терисининг дум томон қисмидан тайёрланган чарм.

² Маблағ — бойлик.

албатта ундиришка, камбағал боласидан мүмкін қадар узіб олишға ҳаракат қылар; болалар Ҳафтияқ, Куръон, Сұфи Оллоёр ва шунга ўхшаш китоб бошласалар озодлик мажбурий, мактабдан маъзун¹ бўлғанларнинг зиёфат қилиб маҳдумга сарупо беришлари қоидада бор бўлса ҳам, лекин аксар болалар бу тўғрида домлани — «ана-мана» билан алдаб кетарлар, сахиyroқ оталар бу маросимни адо этиб, «устоз»ни рози қилмасалар, аммо кўбчилик маҳдумни ранжитар эдилар. Панжшанбалик бўлса мактабнинг асос ҳаққи ва булардан бошқа, «Кулёға қўймоқ — Аммага бўғирсоқ — Ёсинга юпқа»² деган гаплар ҳам бўлар эди. Болалар ҳар йили бир марта «бўрё пули» ва ойиға бир неча бора «супурги пули» ҳам тўлаб турад эдилар.

Маҳдум мүмкін қадар болаларни ўз мактабига жалб қилишға тиришар, айниқса, бой ва бек болаларини ўз кўлиға олиш учун ҳар бир чорани кўрар эди. Масалан, бой ва аъёндан бирининг ўғли бошқа мактабда ўқуб юрган бўлса, уни болалар воситаси билан ўз мактабига чақирав, нима ўқуғанини, нималар билганини сўрар, бола савоғидан яхши жавоб бералмаса «сизда айб йўқ, ўғлим, устозингиз бир оз шундайроқ одам... хўб, хўб; бизнинг мактабларга ҳам келиб юринг! Мен ўзим сизни жуда дўст тутаман-да!» дер эди. Табиий, боланинг шу кундан бошлаб ўз домласидан кўнгли совур, тез кунда маҳдумнинг мактабига келиб кирап эди. Баъзи вақт чет мактаб болалари билан шундай муомалани кўчаларда ҳам қылар ва ўғли бўлған бой ва ашрофларга ҳам жуда сертакаллуф, хоксорона салом бериб, танимаса ҳам улар билан сўрашар, нечта ўғли борлиғини ва уларнинг ўқуб-ўқумаганликларини, ўқишига ихлосларини текшириб, ўзининг таълимида қўлланған енгил усулларини ҳам бир мунча тиқиллатиб ўтар эди. Табиий, маҳдумнинг бундай ҳаракатлари кўпинча фойдасиз бўлмас, мактабига янгидан-янги шогирдлар тўпланиб турад эдилар.

Ўз қаторидағи мактабдор домлаларни асло кўралмас, уларга қарши юрагида умрлик кек сақлар эди. Баъзи мажлисларда йўсуни келиб қолса — «ҳа, мулла фалончими, кўб болаларнинг умрини зойиъ қиляпти, деб эшитаман... шогирдларидан бир нечаси шикоят

¹ Маъзун — рухсат, изн бериш.

² Кулё, Амма, Ёсин — Куръондаги суралар номи.

қилишиб менга келишкан эдилар... Қандай қилай, шоғирдларим ўзимдан етиб ортсалар ҳам умрлари зойиъ бўлмасин, дедим», дер ва эшикучиларга сездирмай рақибини чимчилар, кези келди дегунча иккинчи мактабдор тўғрисида шу ёсун замзама сўзлар эди.

Махдум бўйчан, олагўшт, сийрак мўй, оқ тан, истараси иссиф бир домла эди. Ёши элликдан ошқан, соч ва соқолида бир мунча оқлар кўринар эди. Киши билан сўзлашканда, айниқса, бир нарсадан таажжубланганда сийрак ва лекин тўғри, бақувват ўсан соқолини тутамлаб, ўнг кўзини бир оз қисиб қарап, одат қилғандан бўлса керак, гап орасида «ҳабба» деган сўзни кўпроқ ишлатар эди. Домланинг бу «ҳабба»си нима маънода қўлланилар, ўзидан бошқа ҳеч ким билмаганидек, ундан бу тўғрида изоҳ ҳам сўрамаган эдилар. Ҳар ҳолда «ҳабба — ҳабҳали» ёки «ҳа, баракалла» бўлса керак. Чунки ул бир нарсадан хурсанд ва рози бўлғанда аксар «ҳабба» деб юборадир.

Шу ергача бир неча саҳифаларни маҳдумнинг тарьифи билан тўлдирдиқ. Эҳтимолки, домланинг гийбатини ҳам қилдиқ ва қиласмиз. Лекин шунисидан хотиржаммизки, йўқни-йўндирамидиқ, маҳдумнинг шаънида бор гапларнигина ёздиқ ва ёзармиз. Маҳдумнинг ҳамма нуқсонини ювиб кетарлик бир жумладан сўнг яна ўз ишимизда бўламиз: — нима бўлғанда ҳам маҳдум ўз замонасининг энг олдинги домлаларидан, Кўқон аксариятининг саводхон бўлишлариға сабабчи устозлардан, ҳатто улуғ хизматларга киши стишдириб бергучи нодир муаллимлардан эди.

6. НИГОРХОНИМ

Нигорхоним бешда эрдан ёлчимади. Аввало эрининг фақирлиғи, бойигандан сўнг бўлса унинг зарбул масал бўларлиқ хасислиги бечорани кўб йиғлатди «Хотин кишининг боши ўй ичининг оғир тоши» эмиш... Ҳозир ўзи қирқ ёшқа кирган бўлса, йигирма беш йилдан бери шу мумсук эр билан тириклиқ қилиб келадир. Бу кун ўн ети ёшлиқ Раъно каби қизға, саккиз ёшлиқ Маҳмуд (Раъно билан Маҳмуд орасида икки бола нобуд бўлған), олти ёшлиқ Мансур ва бешикдаги Масъудларга она бўлди.

Нигорхоним Кўқоннинг кўб хотинлариға қарағанда

сабрлик ва қаноатлик экан. Дунёда ўз ўғлининг хасислигига чидалмаган она бўладими, ҳолбуки маҳдумнинг онаси — Моҳлар ойим ўғлининг бу қадар ихна¹ ва сиқиқлигига тоқат қилолмай норозилиқ юза-сидан Марғилондағи ўғлининг ёнига кўчиб кетиб, ўша ерда вафот этди. Нигорхоним эрса тишни-тишкага кўйди, эримдан яйраб-яшнамаған бўлсан, қизимдан ва олдим-ға кўйған ўғулларимдан ёлчирман, деб умидланди. Да-рҳақиқат, сабрлик бу хоним ҳозирданоқ шу ўз олдига кўйған болаларининг бири ва тўнғучи бўлған Раъноси-нинг туфайлидан бир қадар рўшнолиқ кўриб бошлади ва ойнинг ўн беши қоронғи бўлса, ўн беши ёруғ эканига ишонди.

Бир ямоқчи ёки мардикорчи ўз хотинини урадир, сўқадир, тепкилайдир. Бу ҳол уларда аксар фақирлиқ авжиға мингандар кезларда воқиъ бўладир. Агар ямоқчи кекираплик даражада томоқни бопта қилса, иши ўнгидан келиб истиқболи бир мунча таъминлангандек бўлса, дарҳол вазият ишонмаслиқ равишда ўзгариб кетадир: гап-сўз жойида, хотинни уриш ўрнига орқасини силаш, сўкиш ўрнига ялиниш ва арзи муҳаббат. Хотин ҳам кечаги калтак зарбини унуткан, кина ўрнига садо-қат; гўё айтарсизким, Юсуф Зулайхоларми деб.

Юқори табақа оиласарга кириб қарасақ, мунда та-моман бошқача манзара кўрамиз: қорин тўқ, бирав нарсага эҳтиёж йўқ, истиқбол таъмин ва лекин бояғи фожиъа буларда кучлирак, шунинг каби бу фожиъалар муваққатий² ҳам эмас, сабабини топиш ҳам қийин. Яхши, ямоқчику ярамас тузулишкага қарши бўлған кекини кўзи тиниб хотинидан олған эди. Аммо кейин-гиларнинг турмуш шароитлари яхши, ҳамма нарса ўз орзуларича, бас, шу ҳолда уларнинг уй можаролари ва бола-чақани ит каби сиқишлиари нимадан?..

Шунга ўшаш бизнинг маҳдумнинг ҳам фояси бирни икки қилиш, бешни ўн қилиш эди. Яхши кечиниш учун турмас, аммо кўпайтириш учун яшар эди. Нигорхонимни урмас ва лекин ургандан беш баттар қилиб сиқар эди. Икки юз тиллодан кўб оқчаси (бу оқчаларни ҳусули³ тўғрисида кейин сўз бўлур) ва са-водлик бўлған болалар зиёфатидан кийган икки сан-

¹ Ихна — сиртги кўринишига зътибор бермовчи.

² Муваққат — вақтингча.

³ Ҳусул — ҳосил бўлиш.

диқча сарпоси бор эди. Олтиндан сарф құлмағанида ҳам лоақал шу кийимлардан на хотинини ва на болаларини фойдалантирап ва на ўзини иxналиқдан қутқарар эди. Буни ҳам қүйиб турайлиқ, Нигор ойим йигирма-үттүз қызни ўқутиб улардан тушкан «озодлик» ва «панжшанбалик» пулларга ҳам эга бўлолмас, ҳар кун деярлик мұхтарараб маҳдум поччага ҳисобини батамом топшириб туришқа мажбур эди. Маҳдум бунинг эвазига ҳар йил бозорнинг энг дағал бўзидан бир пар кўйлак, лозим олиб берар, янги гуппи билан ёзлиқ мурсакни бўлса, Нигор ойим беш-олти йилсиз кўрmas эди.

Нигор ойим қисқа бўйлиқ, писта пўчоқ тарғил кўзлик, зарча танлик, юзидаги онда-сонда чечак ўрунлари бўлмағанда ҳусндор бир хотин эди. Ўз болалари билангина эмас, ҳатто шогирдлари бўлған қизлар билан ҳам жуда юмшоқ муомала қилас, ортиқча аччиғиланған кезларда «бетинг қурсин» деб, қошини чимириб олар эди. Эрига ўхшаш «озодлик» учун болаларни сиқмас, билъакс «бўшлиғи» учун ўзи маҳдум томонидан сиқилар эди. Оз ва маънолиқ қилиб сўзлар, хотинлар билан муомаласини бошқа отинби билардек юқоридан туриб қилмас, соддача сухбатлашар эди. Хотинлар маҳдум домланинг баъзи қилиқларидан кулишсалар ҳам Нигор ойимнинг орқасидан фийбат сўзламаслар, олдида қандай ҳурматласалар, кейинидан ҳам ўшанча эҳтиромлаб, унинг маҳдумдек зиқна кишининг қўлиға қарам бўлғаниға ачиниб «пешана-дея айланай, қолу бало», дейишар эдилар.

7. РАҲНО

Исм билан жисм аксар бир-бирисига мувофиқ тушмайдир. Меним ёш вақтим, айниқса, гўзаллик қидирған мағрур чоғларим эди. Оиламиздами, бошқа ердами, баҳарҳол хотирамда яхши қолмаған, Лола отлиғ бир қизнинг чеварлиги тўғрисида сўз бўлди. Мажлис аҳли менга яқин, яъни улар олдида ҳусндан баҳс очиш уят бўладирған кишилар эдилар. Шунинг учун менга Лоланинг чеварлигидан кўра мұхимроқ бўлған «ҳусн»и масаласида изоҳот сўрашнинг имкони бўлмади. Лекин Лола исмининг остида бир малакни кўрган — «Лоланинг исмига ўхшаш ҳусни ҳам бор», деб ўйлаған эдим.

Шу кундан бошлаб Лолани кўриш ҳажрига тушдим. Бўйи еткан қизларни кўра олиш бу кунларда ҳам амри маҳол бўлғанидек, мундан ўн йиллар илгарида яна мушкилроқ, эди. Неча вақт «ҳижрон ўтида ёниб», кўча пойлаб, ниҳоят, Лолани сув олиш учун кўза ушлаб кўчага чиқсан ҳолатда учратдим. Бурнидаги булоқисидан бошқа (агар булоқи ҳуснга қўшилса) «Лола»ликка арзийдирган ҳеч гап йўқ эди.

Яқиндағи бир боладан сув олғучининг ким эканини сўраған эдим:

— Лола опам, — деди.

Боланинг талафғузи менга «Мола опам» бўлиб эши-тилди. Бир неча кунлар бу қизнинг отини «Лола» деб қўйғанлари учун аччиғланиб юрдим. Чунки, афу эта-сиз, ўша кезларда аччиғланишга ҳаққим бор эди..

Аммо Раъононинг исми — жисмига ёхуд ҳуснита жуда мувоғиқ тушкан эди. Мен рассом эмасман. Агар менда шу санъат бўлғанда эди, сўз билан билжираб ўлтурмас, шу ўрунда сизга Раъононинг расмини тортиб кўрсатар, кўяр, фақат менга Раъно гулининг сувигина кўпроқ керак бўлар эди.

Солиҳ маҳдум хасис, таъмагир, ҳар ҳолда сажияси зътибори билан уни яхшилар қаторига қўйиб бўлмайдир. Ва лекин табиъат хасис эмас, тикандан гул, арилан бол яратаберадир. Шунга ўхшаш тиканлик ёғочдан хуш ислик, латиф кўрунишлик Раъно яратилған эди.

Бизнинг ўзбекларда, айниқса Кўқонға маҳсус бир тус, сариққа мойил бир тус бор. Лекин бу тусни кесдириб сариқ деб бўлмайдир. Чунки биз оғриқ кишининг тусини сариқ деймиз. Зарча, заъфар туслари ҳам бунга ҳагалиқ қиласидирлар. Таъбиrimiz кўпол тушмаса, бу гўзал қиз, оч раъно гулининг тусида ёки оқ сариқ тусда яратилған эди. Аъзода ўскан тукларга ҳам ҳалиги тусининг таъсири бўладир. Раъононинг сочи гунгурт қора, яни қўёшсиз жойларда қора қўринса ҳам қўёшда бир оз саргиш бўлиб қўринар эди. Шунга ўхшаш Раъононинг кўзида ҳам бунинг асари кўруладир: мудавварга¹ мойилроқ жоду кўзи кишига қаттиқ қарағанда қоралиқдан бошқача яна бир турлук нур сочар эди. Киприклари остида нафис бир сурма доираси бор эди. Қоши туташ каби қўринса ҳам кўндаланг ётқан икки қилич орасини нафис бир қуюлиб кўтарилиш ажратиб

¹ Мудаввар — тұғарак.

туарар эди. Бурни ҳеч бир мунакқидға¹ беришмаслик мутаносиб, ҳар замон уялиш табассумига ҳозир турған нафис иринларининг юқориги қисмида сезилар-сезилмас туклар кўкарған эди. Юзи чўзиқ ҳам эмас, ой кулча ҳам деб бўлмас, кишига кулиб қарағандла қизил олма осталарида иккита замма равишлик шакл ҳосил бўлар, гёй бизга чин раъно гули очилған ҳолатда кўринар эди. Сочлари жуда қуюқ, саноқсиз кокиллар Раънонинг орқа, ўнгини тутиб ётар, қадди узунлиқ билан қисқалиқнинг ўртаси, дўндуқ бармоқларининг жимжилогида хина гуллари, ҳар ҳолда бу қиз ёлғиз Кўқоннинггина эмас, умуман Фарғонанинг куйларига қўшулиб маҳталадирған гўзалларидан эди.

Раъно Нигор ойимнинг тўнгучи, бу йил ўн етти ёшни тўлдурадир. Саводни отасидан ўкуб, ўн тўрт ёшида ибтидоий мактаб прўграмида бўлған барча дарсларни битирган, масалан: диний қисмдан — «Ҳафтияқ», «Куръон», «Чаҳор китоб», «Сўфи Оллоёр», «Маслаки муттақин», адабиётдан — Навоийнинг барча асарлари, девони Фузулий маъа² Лайли Мажнун; Амирий, Фазлий ва шулардек, чигатой-ўзбек катта шоирларининг асарлари; форсийдан — Хожа Ҳофиз Шерозий ва Мирзо Бедил, хусниҳат, иншо ва бошқалар. Бу кунларда бўлса бир томондан, қизларға сабоқ бериб онасиға кўмаклашса, иккинчи тарафдан, отасида кофия (араб наҳв ва сарфи) ҳамда Шайхи Саъдийнинг «Гулистон»идан дарс оладир ва шунинг қаторида ўзи яхши кўрган чигатой-ўзбек шоирларининг бадиъа асарларидан алоҳида бир мажмуъя тузуб юрийдир. Баъзан «овлогроқ жойларда» ўзича манзумалар тўқуса ҳам, бироқ буларнинг иси ўзидан четка чиқмайдир. Агар тўқуған шеър ёки манзумаси ўзига маъқулдек тушса, фақат бир кишигагина кўрсатиб оладир. Ва ул киши ҳам бу сирни четка чиқармайдирған ишончлик ўз кишиси.

Қисқаси биз юқорида Раънонинг шеърий бир хуснини кўрганимиздек, уни фазл ва заковатда ҳам ўткан хон замонлари асрининг нодир учрайдирған якто фозила қизларидан санаймиз ва санаашга ҳам ўзимизда мажбурият ҳис этамиз.

Раъно қанча жиддий бўлса ҳам яна унда болалик табиъати бутун кўйи сакланадир: укаларининг ўюнига

¹ Мунакқид — танқидчи.

² Маъа — билан.

комил ҳуқуқли бир аъзо тариқасида иштирок этадир, онасининг кўзини чалғитиб ўкуғучи қизлар билан жанжаллашиб оладир, қизлар сабоқларини билмасалар аразлаб, уларни ўқутмай ташлаб кеткан чоғлари, арзимаган гапдан тез мутаассир бўлған кезлари кўб бўладир. Раъно ўзининг мундай ҳаракатларига қарши онасидан яхши-ёмон мукофот олмаса ҳам, кўпинча отасидан танбиҳ эшитадир. Койиш эшиткани учунгина эмас, уй-рўзгор тўғриларида онасини сиқиб ушлаганидан ва фоҳиш танглигидан¹ ранжиб отасини унча хушламайдир. Отасидан аччиғланған кезларда онасига жиддий қилиб: «Ҳамма айб ўзингизда, отамдан кўра тузукроқ эрни топиб тегсангиз мунчалик қийналишиб юрмас эдик», деб бўғилған Нигор ойимни кулдурадир.

Қаттиғ ранжиган бир кун отаси — Солиҳ маҳдумга бағишлиб қизиқ бир ҳажв ёзған ва «ўз кишисига» кўрсашиб уни кулдурган эдиким, биз кулгулик учун бу ўрунга бир неча мисраъини кўчирамиз:

*Ёғлар тўқилса ерга ётиб ялар тақсирим,
Бўлса бозорда пастлик сотиб олар тақсирим.
Меним учун бир зирақ, Раънбонуға жевак²,
Деса ойим — «Не керак?!» юмма талар тақсирим.
«Кулоқ тешиш фазл эмас, пулни топиш ҳазл эмас,
Жевак тақиши фарз эмас!» гавғо солар тақсирим.*

Мұхтарам ўкуғучини қаҳрамонларимизнинг бир қисми билан танишдиришни шу ерда тўхтатамиз. Уларнинг ички ва ташқи табиъатлари яхши ечилемаган бўлса, ҳикоямизнинг давомида яна ҳам очилиб ва кенгайиб борар, деб ортиқча тафсияга киришмадик.

8. БИР ЎРДАЛИҚ

Маҳдумнинг ҳавлиси уч қабат эди. Кўчадан биринчи қабатда меҳмонхона, мактабхона ва машҳона эди. Иккинчи қабат мураббаъ³, ярим таноб чамаси боқча, бунда шафтолу, олма, анжир каби мевалик дараҳтлар

¹ Фоҳиш танглиги — ортиқча сиқув.

² Жевак — қизларнинг бу кунда истиъмолдан қолған қўқрак зийнати (муал.)

³ Мураббаъ — гурт бурчак, квадрат.

ва бир неча кекса сўри токлар қулп уриб ўсқан эдилар. Махдумнинг болалар кучидан яхши фойдаланғани учун бўлса керак, боқчанинг ҳар бир қариши бўш қолмаган, унда ҳар турлук кўкатлардан бор эди. Ўртадаги сўрининг ости бир ярим газ кўтарилиб ишланган суфа, суфанинг уч тарафига ёз гуллари экилган, район ва бошқа чечаклар атрофка ўз атриётларини онгқитиб ётар эдилар. Биринчи қабатдан киргач, боқчанинг суфасига ҳамда ичкарига юруладирган йўлкалар бор эди.

Хозир мезон¹ ойининг иккинчи ҳафталари, боқчанинг мевалари етилинқираған, айниқса сўридаги қора ҳусайнин узумлардан гўё боллар томиб ётар эди. Йўлкаларга сув сепилган, суфага гилам солинмаса ҳам гуллик кийиз тўшалиб, уч тарафига кўрпачалар ёзилған эди.

Махдум этни уйга бериб чиқғандан кейин икки соат чамаси ҳусниҳатдаги болалар билан шуғулланди, орадан «абжад» сўзини дуруст ёзиб чиқарған бир боланинг қўлини боғлаб уйига юборди. Бола уйидан «қўл эшар» олиб келгандан сўнг ҳаммага жавоб бериб, бу кунги вазифасини тамомлади.

Махдум машқхонадан чиқиб ичкари киришга адим узған ҳолатда дарбозадан сипоҳи кийимда бир киши кирди ва маҳдумга табассум билан салом бериб, яқинға юриб келди. Ўрданинг девонхона хизматчилари кийимида бўлған бу кишини маҳдум ўз умрида биринчи мартаба кўрар эди. Жавоб саломдан кейин кўришдилар. Маҳдум тараддулланиб, мақсад сўрашдан ўнгайсизланиб, меҳмонни меҳмонхонаға бошлади. Меҳмон ҳам такаллуфланмай домланинг орқасидан меҳмонхонаға кирди, ўлтуришдилар, сўнг фотиҳа ўқулди. Ўрдалик табассум ичиди маҳдумга қарагандан сўнг йиғишириниб олди.

— Хато қилмасам жаноблари мирзо Анварнинг устозлари бўлсалар керак?

— Фақир...

— Уй иchlари билан хўб саломатмилар?

— Алҳамдулиллоҳ.

Маҳдумга кутулмаган равишда меҳрибон муомала қилғучи бу ўрдалик қирқ ёшлар чамасида, узун бўйлиқ, қора узун соқоллиқ, симоби салласининг пешини туширган қорача туслик бир йигит эди.

¹ Мезон — 22 сентябр — 21 октябр.

— Каминалари ҳам, — деди ўрдалиқ, — мирзо Анвар билан бирга девонхонада ишлайман. Балки қулоқлариға чатылған бўлса керак, исмим Султонали миризо...

— Хўб, хўб, — деди кулиб маҳдум, — Анвардан эшиктаним бор эди, жанобларининг тавсифларини эшиктанман. Начук худо ёрлақади? Фақирхонаға ташрифлари билан бисёр хушнуд бўлдим.

— Адабсизлик бўлса ҳам, — деди мирзо Султонали, — муборакхоналариға бостириб келдим. Бунга ҳам буродарим мирзо Анварнинг муҳаббати мажбур қилди.

Султоналиниг бу кейинги сўзи мақсадни бир даржа домлаға онглата ёзди. Кайфланиш, ҳузурланиш маҳдумнинг юзида ўрунлашқан эди. Кўзини қисинқираб Султоналига қаради.

— Хўб, хўб, — деди маҳдум, — мулла Муҳаммад Ражаб марҳумнинг ўрнига бош мунший таъйин қилинди, қўлим тегиб бу тўғрида Анвар билан сўзлашолмадим?

— Ҳозир таъйин қилинғунча йўқ, эрта-индин таъйин қилинар, деб турамиз.

— Қўй яхши, номзадлар бордир?

— Бор, — деди Султонали, — бир неча номзадлар ҳазрати хонға манзур қилинғанлар, жумладан шоир Мадҳий, мулла Шаҳодат муфти ва бошқа яна бир нечалар. Масмухъингиз¹ бўлса керак, гарчи ўзи ризолиқ бермаса ҳам бир неча мирзолар шогирдингиз мирзо Анварнинг ҳам номзадини холис ариза билан жанобга манзур қилған эдик. Умид худодан, ёрлиғ мирзо Анварга қойим² бўлур, деб турамиз.

Маҳдум соқолини тутамлаб шипка қаради. Гўё Султоналиниг кейинги икки жумласига қайси ёсун мұқобала қилишдан ожиз эди.

— Бир неча яхшиларнинг Анварга бўлған ҳусни таважжуҳларини эшиктан эдим, — деди маҳдум миннатдор оҳангда, — аммо фақирға шуниси мушкилроқ кўринадирким, башарти Анвар бош муншийлик вазифасига ёрлиғ олғундек бўлса, бу лавозимотни адо қила олурми, каминанинг назаримда бош муншийлик алалхусус ул жанобнинг ҳузурларида беҳад улуғ ва мушкил кўринадир?

¹ Масмухъ — эшитилган.

² Қойим — қарор.

Султонали ентилча қулиб қўйди:

— Бош муншийлик лавозимоги борасидаги фик-
рингиз, дарҳақиқат тўғри, — деди, — аммо мирзо
Анварнинг уҳда қила олиши муҳаққақдир¹. Зоро,
Анварнинг бу борадаги истеъоди жанобларидан кўра
каминага маълумдир, бу тўғридан хотиржамъ бўлсин-
лар.

— Дарвоқиъ, Анварга кўб меҳнатим сингган, —
деди маҳдум маҳтандансумон, — бир қариш ёшидан
бошлаб каминанинг таълимида ўсти, ўз қўлимда тар-
бия топкан неча юз, балки минглаб шогирдларим ичидা
кўб таважжуҳим² шу болага бўлди. Ушбу сабабдан ҳам
мунчалик мустаъид³ бўлған бўлса ажаб эмас, деб ўйлай-
ман.. Ва лекин ҳолори⁴ сўзим шунинг учундирким,
фазли ва истеъоди кофий⁵ бўлса ҳам ёшлиқ, кам таж-
рибалик қилмасмукин, деб мулоҳаза қилурман.

— Бўстони маърифат ва гулшани ҳақиқат, — деди
Султонали, — Имоми Аъзам раҳматуллоҳи алайҳи⁶ ўн
икки ёшларида дарсгуллик қилиб ва ҳоказо кутуби мұ-
табаррака таълифотига ҳам ибтидо қўлған⁷ эканлар-
ким, бу каромат жанобларидан нўшида эмасдир. Баъ,
индалъуқало⁸ ёшлиқнинг ҳеч бир нуқс ва адамияги
йўқ, аммо фазуу заковат лозимдир. Масалан, ками-
нантиз таҳсилда «Ақоид»⁹ бордим ва қарийб ўн
йилдан бери мирзолик қилурман. Ўз ҳунаримда яхши
тажриба ҳам орғидирдим, шунинг билан бирга нағси-
ламрни иқрор этишкан мажбурманким шогирдингиз
мирзо Анвардан кўб даража қўйидаман: таҳрирда¹⁰, тақ-
рир¹¹ ва фаронизда¹² Анварнингизнинг ёрдамиға мухтоҷ-
ман Ҳолбуки ёшим ундан баробар катта, мен ўкуған

¹ Мұхаккак — ҳаминкада

² Таважжуҳ — зэтибўр

³ Мустаъид — қубилнитли, истеъодоти.

⁴ Ҳолори — ҳолиги.

⁵ Кофий — старайи

⁶ Имоми Аъзам (такаллуси, исходий — 699–767) — исми Абу Ҳанифа
Нуумон ибни Сабит. Исломдаги ғанағий мазҳабийини асосчисин

⁷ Кутуби мұтабаррака таълифотига ҳам ибтидо қўлған — табарук китоб-
лар езишга ҳам бошлабсан эканлар

⁸ Индалъуқало — оқивлар наслида

⁹ Илгариги таҳсилда толибнин масалан «Озомил», «Кофии», «Шарғи

мулло Жомий», «Мухтасар» юқорироқ даражаси «Ақоид» (Оллоҳнинг борли-

гини тасдиқловчи илм), сўнгтида эса «Тағсир» илмларини ўқиганлигига қараб

илем болгиланган

¹⁰ Таҳрир — ёзув

¹¹ Тақрир — Матнининг мазмунини тушунтириш

¹² Фарониз — мусулмончилик қондаларини ўрганиш илми

дарсларни эҳтимол Анвар ўқумаған... Анварнинг заковатига ёлғиз мен эмас марҳум мунший мулла Муҳаммад Ражабнинг ўзи ҳам таҳсин қилар, ажойиб ўғлон деб қўяр эди. Мени мирзо Анварни бу ўрунға саъи қилиш¹ бўлса бир бараз юзасидан эмас, холисонадир. Агар баразға ҳисобланса, масалан: «Бирарта ноаҳлнинг қўл остида ишлагандан, аҳлининг жағида тишланган маъқул» сўзига биноандир. Лекин мирзо Анвар нима учундир биз бир неча мирзоларнинг раъйимизга қарши тушиб, биздан ранжиб юрийдир. Ҳатто жанобға бир ариза киргизиб, меним номзадим янгилик кўрсатилибдир, мен бу вазифани уҳда қилолмайман, деб узр баён қилмоқчи эмиш. Унинг бу йўсун иноди нима учун, билалмадик... фақир, оғайнилар тарафидан гарчи адабсизлик бўлса ҳам ҳузурларига илтимос учун келдим. Аввало мирзо Анварга оталиқлари, сониян устозлиқлари бор. Сиз жаноб тарғиб қиласанғиз ва кенгаш берсангиз қабул қилар, деб ўйладиқ.

— Ҳабба! — деди маҳдум хурсандлик билан, — бу тўғрида яхши сўзлашмаған эдик, сўзлашармиз, иншоolloҳ кўнар.

— Саломат бўлингиз, тақсир.

Маҳдум соқолини ушлаб кўзини қисди:

— Боя пешин асносида, — деди, — қавмлар каминадан истифсор² қилишдиларким, «ўғлингиз Анвар мунший таъйинланар эмиш, ушбу ахбор тўғрими?» деб... Мазмуни шаҳарга ҳам машҳур бўлған экан-да?

— Балки, — деди кулиб Султонали ва бир оздан кейин оҳиста сир йўсунидаги қилиб сўзлади, — ўрда ичидан бир нечаларимиз устоз мулла Муҳаммад Ниёз домлаға³ ва ҳарамдан Оғача ойимға⁴ Анвар тўғрисида илтимос қилишдиқ. Шунинг учун мирзо Анварнинг бош мунший таъйин қилинишиға шубҳа қилмаймиз. Фақат уни кўндирилса бас.

— Ва лекин, — деди маҳдум ниҳоятда очилған қиёфатда, — бу тадбирларингиз беандоза маъқул бўлибдир, яъни масалан, жанобға домла шоғовул ва малика хонимларни восита қилишларингиз...

¹ Саъи қилиш — ундаш, даъват этиш.

² Истифсор — сўрамоқ.

³ Ҳудоёрнинг шоғовулбошиси — илмия вазири, «Тарихи Шаҳруҳий»нинг муаллифи, шоир (муал.).

⁴ Ҳудоёрнинг суюкли хотини (муал.).

— Биз ҳам шундай ўйлаймиз. Энди умид худодан, натижа ҳам орзумизча бўлғай.

— Инишооллоҳ.

— Демак, мирзо Анварни кўндириш вазифаси одоб-сизлиқ бўлса ҳам сизга қолди-ла, тақсир? — деб Султонали такрор сўради.

— Хотиржамъ, — деди, маҳдум қаноат билан, — албатта, ноинсофни кўндириксамиз керак.

Шундан сўнг Султонали ўзининг бу ерга келганини Анварга билдирилсанликни таъкидлаб, ўрнидан турди. Маҳдумнинг азтаҳидил «моҳазаримиз¹ бор эди» деб қис-ташиға қарши узр айтиб хайрлашди. Маҳдум аксар ўз уйига келгучи кишиларга қилмайдирған фавқулодда бир такаллуф билан уни дарбозагача узатиб чиқди.

9. ЎПКА ВА ҲАЗИЛ

Истиқболнинг ширин хаёллариға кўмилган ҳолда маҳдум аср намози учун таҳорат олар эди. Таҳоратда тартибни риоя қилиш суннат,² аммо маҳдум тарки суннат қилмоқда. Ҳатто ўқуладирған дуоларни ҳам ўрун-сиз ишлатмакда эди. Маҳдум шу йўсун бетартиб таҳо-ратланиб ичкарига кирди. Нигор ойим ошхонада мантиларни қасқонға териб қозонға уяр, Раъно бўлса айвонда кичкина укалари орасида ўлтуар эди.

Дадаси йўлакдан кўриниш билан Раъно Масъудни кўтариб турди. Ва қозикдағи салла-чопонни олиб айвон муюшиға келди. Болалар ҳам дадалари олдида адабланишдилар.

— Анвар аканг келмади, суфа ёлғиз, — деди маҳдум, чопон, саллани кия-кия, — асрга бориб келгунимча, сен суфага чиқиб тур-чи, Раъно.

— Хўб.

Отаси чиқиб, кеткач, Раъно қўлида укаси билан ташқариға йўл солди. Унинг кетидан Маҳмуд ва Мансурлар ҳам чопишидилар.

— Раънапа, Раънапа! — деб Мансур йиғи аралаш ўзидан чопиб ўтмакчи бўлған Маҳмуднинг устидан Раъно опасига арз қилди. Раъно боқчанинг суфасига ета ёзған эди. Мансурнинг йиғи шовқуни яна ҳам кучайиб

¹ Моҳазар — таом.

² Суннат — одат.

рақобат ўти ёниб кеткач, Раъно тўхтаб Маҳмудни койишка мажбур бўлди:

— Маҳмуд, Маҳмуд, эси йўқ Маҳмуд!

Маҳмуд тўхтади, аммо Мансурдан олдинға ўткан эди. Мансур бу мағлубиятка чидалмай асабийланиб, ерга ўлтуриб олди ва дунёни бузуб фарёд қўпорди. Раъно келиб Мансурни турғизди ва кийимига ўлтурган чангларни қоқти:

— Йиғлама, опаси, йиғлама, — деди, — ҳали дадаси Маҳмудни дум дум! Қараб турчи, сен Маҳмуд, отанг келганда айтмасамми?!

Мансур «Раънапа»сининг ҳимоясидан сўнг унинг этагида суфага қараб юрди Аммо Маҳмуд анча эзилган эди:

— Дадам йима¹ қиласарди? — деб сўради турған жойидан.

— Келсинчи, ҳали. Тунови кунти чивиқ эсингдан чиқдими?

Маҳмуд жавоб бералмади. Унинг кўзида аччиқ аралаш қўрқув бор эди Раъно кичкина укаси бағрида суфага чиқиб ўлтурди Мансур «Раънапа»сининг елкасига суюниб, йўл устида серрайиб қолған Маҳмудга ғолибона бир турда истеҳзо қиласар эди. Маҳмуд бу ҳолга ортиқ чидағ туролмади. Ўзининг енгилишига сабабчи бўлған Раънодан ўч олмоқ мақсадида:

— Муллатанинг хотини, муллатанинг хотини... ей, ей, ей!

Раъно кулди:

— Қараб тур, қараб тур, сен адабсиз, — деди ва Маҳмудага ҳужум қиласадирғандек кўзғалиб қўйди.

— Бийдим, билдим, муллатанинг хотини, муллатанинг хотини! — деди Маҳмуд ва ичкарига қараб қочти.

Раъно кулимсираб Мансурга қаради:

— Шундайми, мен муллатанинг хотиними? — деб сўради. Мансур жавоб ўринига иулакка қаради ва сўюнчи ичига сиғмаған ҳолиға суғанинг зинасига югурди ва қичқирди:

— Муллата, муллата телли, телли!

Раъно ҳам йўлакка қараб қизариниб кетди ва ол дига 1ushiб тартибсизланган сочини орқасиға ташлаб тузатинци. Йўлакда кўринган ёш йигит («муллата») су-

¹ Йима — нима (муал.).

фанинг йўли бўйинча келмакда эди. Қора чивиқ беқасамдан ҳарир тўн кийган мавзун қад Анвар биринчи қарашдаёқ кўзга дўндиқ ва кўркам кўринар эди. Қора сурмалик кўзи Раънода экан, ўзига югуриб келгучи Мансурга йўл устида чўнқайиб қучоғини очти. Мансурнинг юзидан ўпкач, кўтариб суфага юрди. Анварни қаршиламоқ учун бўлса керак, Раъно ҳам ўрнидан туриб суфанинг зинасига яқинлашди. Ва табассум аралаш — «Ҳорманг» деди.

— Соғ бўлинг.

Анвар суфага чиқиб, Мансурни ерга қўйди. Кафшини еча-еча Раъно томонға энгашиб, ўзига талпиниб турған Масъуднинг юзидан ўпти ва уни Раънодан олди. Масъуд Анварнинг қўлиға ўткач, сапчиб гувранди ва қийқириб товланди. Раъно икки қўлини узатиб «кел менга, кел» деди. Масъуд буралиб Анварнинг бағриға сиқилди. Кулишдилар. Анвар болани ўпиди сўйди. Раъно Масъудни янди: «Сен қараб тур, бижи бола» деди. Анвар болани кўтарғанча кўрпачага ўлтурди. Чап тизасига Мансур ёпишди ва унинг ёнига Раъно қўшилди... Шу йўсун икки орада бир мунча вақт Масъудни сўйишидилар: Анвар болани Раъноға бергандан кейин симоби шоҳи салласини олиб ёстиққа ташлади ва рўймоли билан қопқора бўлиб чиқа бошлиған муртини тузатди. Раъно қаршида тик турар эди.

— Тинчликми?

— Бетинчлик, — деди кулиб Раъно.

— Айни муддао экан бўлмаса... Ҳа, айткандек,— деди Анвар ўлтурған суфасига ишорат қилиб, — бу кун жой катта солинган?

— Мехмон келар эмиш.

— Ёлғонинг қурсин, Раъно, — деди Анвар кулимсиб, — қандай меҳмон?

— Мен қаёқдан билай, қандай меҳмон... фотиҳага кишилар келар эмиш, деб эшилдим.

— Фотиҳаси қанақа?

— Билмасам қанақа?

Анвар ўйланиб, яна кулимсиди:

— Сенинг фотиҳанг бўлмасин?

— Меним қандай фотиҳам бўлсин, мен ҳали тирикман.

— Тескарига бурма, Раъно, балки сени эрга бермакчиidlар?

Раъно қизариб турди-да, яна гапни кулгуликка олди:

— Мени кимга берар эмишлар?

— Сеними? — деди кулиб Анвар, — сени хондан бошқа ким олсин?

Раъно қўлидағи укасига қараған ҳолда:

— Сиз шунга маслаҳат берсангиз... мен қандоғ қилий,— деди ва Мансурни чақирди, — тур Мансур, кетамиз.

Раънода аччиғланиш намойиши бор эди. Анвар Раънодаги бу ўзгаришдан ўнгфайсизликқа тушди:

— Раъно, — деди. Раъно зинадан тушиб бошлаган ҳолда тўхтади, — чинини сўзла, меҳмон келиши аниқми?

— Меҳмон келиши аниқ, ҳам келди, — деди Раъно жиддий.

Анвар ажабланди:

— Меҳмон келди?

— Келди.

Анвар теваракка қаранди:

— Қани меҳмон?

Раъно қўли билан Анварнинг ўзига ишорат қилди:

— Ана меҳмон, — деди.

Анвар кулди:

— Мен меҳмонми?

Раъно жиддий равиш билан:

— Албатта, сиз бизга меҳмонсиз.

Анвар яна кулди. Бироқ унинг бу сўнгги кулишида кучланиш бор эди:

— Мен сизга меҳмонми?

Раъно кулимсиб ер остидан Анварга қаради ва қўлидағи харҳаша қилиб бошлаган болани овитиш учун тебранди.

— Билмасам...

Раънонинг юзидан бояғи жиддият йўқолғандек эди.

Анвар ҳам маънолиқ ҳазилни ташлаб чин ҳазилга ўтди:

— Меҳмоннинг қорни оч, Раъно, — деди, — албатта қадрлик меҳмон учун тансиқроқ таом пиширеандирсиз, деб ўйлайман. Бу кунги таомингиз исмини лутфан марҳамат қилсангиз эди.

— Меҳмоннинг вазифаси, — деди Раъно жавобан,— иззати билан ўлтуриш ва олдига қўйған нарсани маҳтаб-маҳтаб ейишдир...

— Тўғри айтасиз, отин биби, — деди Анвар, —

бироқ бу кунги меҳмондорчилиғингиз ҳам кечагидек убра билан бўлса, маҳтаб-маҳтаб қўлингизга қайтариб беришим ҳам аниқдир.

Раъно бутун товшини қўйиб кулиб юборди:

— Бу кун қўғурма шўрбаға, — деди Раъно кулги ичида, — қаттиғ нон тўғраб ейсиз, жаз ўрниға шалғам чайнайсиз.

— Офарин, — деди Анвар, — бу кунги меҳмондорчилиғингиздан қарийб мамнун бўладирғанға ўхшайман. Агар мумкин бўлса, шуни ҳам билсанки, бу кунги шалғам шўрба катта отин бибининг қўлларидан тановул қилинадирми ёки кичик отин бибининг?

— Меҳмон учун бунинг фарқи йўқдир...

— Бир оз янгишасиз Раънобону, — деди Анвар,— чунки қўлдан-қўлнинг катта фарқи бор.

— Фарқи бўлса... бу кун кичик отин бибининг қўлларидан шалғам шўрба тановул қиласиз.

— Бу ҳолда афу этасиз, Раънобону... Башарти кичик отинбибининг қўлларидан тановул қиладирған бўлсақ, шалғам шўрба эмас, бизнинг учун куш шўрбадир.

Бунга қарши Раъно нимадир айтмоқчи бўлған эди, ташқаридан оёғ товшини сезди, Анварга бир кулиб қаради-да, Мансурни етаклаб ичкарига чопди.

10. ХАЙРИХОҲ БИР ОДАМ

Раъно ичкарига қайрилмасдан боқчаға маҳдум кирди ва ташқарини чақирди:

— Марҳамат Шаҳидбек, марҳамат!

Раъно ичкарига кириши билан домланинг орқасидан ҳарсиллаган, гурсиллаган элли ёшлар чамалиқ семиз бир киши кўринди. Кўк салласи манглайининг усти билан ўралиб, ўсиқ қоши қовоғига ётқан бу бекнинг белидаги кумуш камари бениҳоят ўсиб тушкан қорнини юқорига кўтариб туриш вазифасини адоқилар эди.

Эшик остида Шаҳидбек билан маҳдум ораларида онглашилмаслиқ юз берди:

— Сиз юринг!

— Сиз юринг!

— Мен рози!

— Адабсизлик бўлади-да, қхррр...

Ортиқча такаллуфни Шаҳидбекнинг ўзи қабул қиласа ҳам гүшти қабул қилмас эди. Такаллуфланиб ўлтурса борған сайин ўзига беҳузурлик ортар эди. Шунинг учун маҳдумнинг олдига тushiб жўнади ва йўл устида «Мирзо Анвар ҳам келган экан, қхррр...» деб қўйди.

Анвар уларни қарши олди, суфага чиқдилар. Шаҳидбек Анвар билан энтика-энтика кўришкач, жой кўрсатилмасданоқ суфанинг тўриға ўлтуриб олди. Чунки зинадан чиқиша анча эзилган, такаллуфгача кутишкага тоқати қолмаған эди. Фотиҳадан сўнг ўлтурган ерида уст тўнини ечди, белидан камарини олиб ёнига қўйди, салласини чиқариб ёстиқнинг устига ташлади ва рўймоли билан манглайидағи терларини артиб ўзини елпиди:

- Хўб саломатмисиз, мирзо, қхррр?
- Шукур, ўзларидан сўрасақ?
- Алҳамдулиллоҳ.

Сўнгра маҳдум Анвардан ҳол сўради:

- Бир оз кечикдингизми, Анвар?
- Зарурроқ ишлар бор эди.
- Сармунший қазо қилиб, — деди Шаҳидбек, — ҳамма оғирлиқ сизнинг устингизга тушкан бўлса керак, мирзо?

— Шундай, — деди Анвар, — лекин баъзи вақт вилоятларга ошиғич юбориладирған нома ва фармонлар чиқиб қоладир. Шундай кезларда ҳатто тунаб ишлашка ҳам тўғри келадир.

Шаҳидбек қайта бошдан манглайиға терилиб қолған терларини артди:

- Иложи йўқ, иложи йўқ...

Анвар ер тегидан маҳдумга кўз қирини ташлағач, ўрнидан турууб тўнини ечди ва зинага бориб кафшини кия бошлиған эди, маҳдум буюрди:

— Ичкарига кириб, хабар олинг, таом тайёр бўлған бўлса, олиб чиқсангиз ҳам маъқул.

- Хўб.

Анвар ичкарига кетди. Унинг орқасидан кузатиб турған Шаҳидбек маҳдумга қаради:

- Мирзонинг тарбиянгизга келганига кўб бўлған чиқар?
- Қарийб ўн тўрт йил.
- Ўз фарзандлариdek бўлиб қолған-да?
- Ундан ҳам афзал.

- Ожизалари ҳам етиб қолған бўлса керак?
- Иншооллоҳ.
- Худо ёш берсин, — деди Шаҳидбек, — мирзони ўзларига домод¹ қилсалар ҳам бўлар экан...
- Ушбу мулоҳазамиз ҳам йўқ эмас, — деди маҳдум.
- Модомики, болани ёшлиғидан ўз фарзандимиздек парвариш қилдиқ, эндиликда ўзимизга домод ҳам бўлсин, деб ожизамизни сўратғучи кўб олий насаб хонадонлардан қатъий назар қилиб келамиз...
- Баракалла, — деди Шаҳидбек, — асли инсоф шудир... Иккиланчи, домодлиқ учун насабдан илгари илму адаб, фазлу камол лозимдирким, бу ҳам ўзларидан маҳфий эмас, қхррр...
- Ҳабба, — деди маҳдум қўзини қисиб, — биз ҳам шу гапларни мулоҳаза қилиб қолдик.

Шаҳидбек маҳдумнинг маҳалла аҳларидан бўлиб, Худоёрхон закотчиларининг биридир. Мундан илгари Шаҳидбекнинг маҳдум билан унча яқинлиги йўқ ва ҳатто ўзған йилларда маҳалла кишиларидан баъзиларни маҳдумнинг имоматига қарши қўзғатиб юрган эди. Домла билан дўстлашиш тарихи эрса икки-уч кундан беридир. Чунки шу кунларда Анварнинг сармунший бўлиш эҳтимоли шаҳарнинг катта-кичиклари орасида сўзлашиб қолди. Шу эҳтимол натижасида маҳдумнинг дўст ва душманлари ўйлашға мажбур бўлдилар. Жумладан, бизнинг Шаҳидбек закотчимиз ҳам шу бир неча куннинг орасида қарийб бир чорак этини йўқотаётди. Чунки закотчилар қисман бош мунший қўл остидағи молия бекларидирлар Агарда Шаҳидбек маҳдум билан алоқасини тузатмаган ҳолатда Анвар мунший таъйинланиб қолса, бирар «фожиъа» бўлиш эҳтимоли бор эди. Шаҳидбек фикрича, гўё маҳдум Анварга: «Фалончибек фалон вактда менга мундай адоват қилған эди. Энди фурсат келганда сен уни закотчиликдан бекор қил», деб буюрар, Анвар ҳам устозининг сўзини ерда қолдирмай сармунший бўлған кунидаёқ Шаҳидбекни хизматдан бўшатдирар эди...

Шаҳидбек Анварнинг сармунший бўлишини, табиъий, хоҳламас эди Аммо Анварга қарши бир иш қилиш кучига ҳам молик эмас эди. Гарчи, ҳозирда Анварничига сармунший белгиланиши бир эҳтимол бўлса ҳам, Шаҳидбек ҳар эҳтимолга қарши чора кўриб

¹ Домод — куёй.

қўймоқчи бўлди. Мундан уч-тўрт кун илгари маҳдумга яқинлашиш андишасида аввало унга иқтидо¹ қилиб, намоз ўқуди (илгари маҳдумнинг орқасида намоз ўқумас эди). Ҳуфтан намозидан кейин ҳалқага кириб маҳдумнинг тиловатига сомъ бўлди. Иккинчи кун эрталабки намоздан сўнг маҳдумга салом берди ва ундан аҳвол сўраб: «...Эшитиб жуда хурсанд бўлдим, ҳар начук сармуншийнинг ўз кишиларимиздан бўлғани яхши, бу тўғрида ўрдалиқ оғайниларға илтимос ҳам қилиб қўйдим», деди. Маҳдум ўз ишида қанча пишиқ бўлса ҳам, лекин дўст билан душманни ажратолмас, яна тўғриси — неча йиллик адоватларни икки оғиз ширин сўз ёки беш пул манфаат эвазига унутиб юборгучи эди. Бунда ҳам шундай бўлди: «Баччаталоқ адovатни ташлаб, шайтонга ҳай берибди. Анварнинг сармунший бўлишифа сўюнибdir, шайтони зўр бўлса ҳам, инсофи чакки эмас», деб Шаҳидбекка дўстона муомала қилди ва Анварнинг иши тўғрисида билганини сўзлади; ҳали аср намозига чиққанда яна Шаҳидбек билан учрашиб сўзлашди ва Анвар «аҳмоқ»нинг бу ишқа норизолигидан шикоятланди. Шаҳидбек бир оз ўйлағандан кейин: «Мен ўзим мирзо Анвар билан бир сўзлашай, бўлмаса...», деди. Чунки башарти Анвар бош мунший бўлиб қолса ва бунда ўзининг ҳам иштироки бўлса, албатта... ҳа-дея. Шу мулоҳазада Шаҳидбекнинг кўзи аллақанча жойларни кўриб олди.

— Мирзонинг уйда бўлиш вақтини айтсангиз, ўзим олдиға кирап эдим, — деди.

Анвар «бекор гап, анчайин бўлмағур гап», деб маҳдумнинг бу тўғридағи саволларига аҳамиятсизгина қилиб жавоб берар ва шунинг учун маҳдум ҳам бу кунгача масалага ишончсиз қараб келар эди. Алҳол эрса бу гап бутун Кўқон ҳалқи оғзида сўзланиб қолди ва бунинг устига Султоали мирзо маҳдумдан жиддий илтимос ҳам қилиб кетди. Шу сабабларга биноан маҳдумнинг назарида Анварни кўндириш масаласи жиддийлашкан ва Шаҳидбекнинг ҳалиги сўзидан кейин ўз ёниға кўмакчилар, кенгашчилар олиш лузумини ҳам ҳис эткан эди. Шу мулоҳаза билан Шаҳидбекнинг ҳалиги таклифини маълмамнуният қабул қилди:

— Ҳабба... алҳол Анвар уйга келган бўлса керак, лозим топсангиз мен билан бирга марҳамат қилингиз,— деди.

¹ Иқтидо — тақлид қилиш, эргашиш.

Шаҳидбек Анвар билан сўзлашкали ва уни кўндиригали келгандек кўринса ҳам, аслида фаразсиз одам эмасдир.

11. МАҲДУМНИНГ ТАҲДИДИ

Анвар ўртаға дастурхон ёзиб, икки лаган манти чиқариб қўйди, уч киши қамти ўлтуриб, манти тановул қилишдилар. Таом асноси Шаҳидбек секин-секин мақсадға ёндашиб келди.

— Халқ оғзида дув-дув гап, — деди манти чайнаб, — гўё сиз мархум сармунший ўрнига насл¹ қилинар эмишсиз, деб... Бу ҳақиқат гапми ёки овозами, яхши пайқолмадиқ. Бу сўзнинг ҳақиқатини ҳозир ўзи сиздан эшитамизку ва лекин сизга хайриҳо бўлған тақсирим ва мендек кишиларни бу шойиња² бениҳоят хурсанл қилди, қхррр... Дарҳақиқат, бу мартабага ниҳоятда лаёқатингиз бор эканини ўрда арбобларидан ҳам эшитамиз...

Шаҳидбек сўзни шу жойға келтириб маҳдумга қаради. Маҳдум соқолидағи ҳамир ушогини олиб, меҳмонни лаганга тарғиб қилди.

— Кечак ва ўткан кунларда, — деди маҳдум лагандан олған мантисини қўлида ушлаган кўйи, — бу шойиаъларға мен ҳам ишонмағандек эди. Аммо бу кунги довруқ мени ҳам таажжубка қўйди. Воқиъян Анвар сармуншийликка мансуб қилинса не ғаройиблиги бор? Алҳамдуиллоҳ, фазли кофий, ақли солим,³ истеъодод бўлса боз инчинин...⁴

Анвар қўли лаганда экан, кулимсиб қўйди. Шаҳидбек кеч ҳарорати ва манти иссиқлиғи таъсирида яна ўбдан терлаган эди. Рўймоли билан манглай ва бўйин терларини артар экан, Анварга қаради:

— Хўш, мирзо Анвар?

— Шундай гаплар бор, — деди Анвар, маҳдумга қўз қирини юбориб, — аммо бу гаплар меним хоҳишими ва рағбатим хорижида бўлмоқда. Шунинг учун бу шойиъаларға аҳамият беришка арзимайдир.

Шаҳидбек маҳдум билан кўз урушдириб олди.

¹ Насб — тайинлаш.

² Шойиња — ёйилган, тарқалган ҳабар.

³ Ақлисалим — соғлом ақл.

⁴ Инчинин (инчунин) — шунингдек.

— Яъни сиз сармуншийликни хоҳламайсиз? — деб сўради.

— Албатта.

— Сабаб?

— Сабаби шулки, — деди Анвар, — мен бунингдек масъул, айниқса, тантаналик вазифаларга ҳаваскор эмасман.

— Албатта, шундай-ку, — деди Шаҳидбек, — аммо киши, алалхусус¹ сизга ўхшаш йигитлар ҳамиша бир ўрунда ўлтуриб қолмайдирлар. Тажриба, истеъдодлари ўскан сайин, юқорироқ мартабаларга мина борадирлар. Шунингдек, сизни ҳам юқори мартабага кўтармакчига ўхшайдирларким, буни сизнинг ҳаваскорлиғингиз эмас, фазлингиз тақозо қилиб, бунда сиз асосан ҳар қанча қарши бўлсангиз ҳам, қхррр... лаёқатингиз яна сизни бу хизматни қабул қилишга мажбур этадир.

— Кишилар муболаға қилғандек менда истеъод йўқ, — деди Анвар, ерга қараған ҳолда. — Ундан кейин ўрдаға кечагина борған менга ўхшаш ёшларнинг «бош мирзо бўламан», деб умидланишлари айни бир кулгидир. Яъни, демакчиманки, бу вазифа тамаъида ўн, йигирма ва балки ўттуз йиллаб кўзини тўрт қилиб келган муншийлар, муфти ва шоирлар бор. Уларнинг ёнида менга ўхшаш бир ёш тажрибасизнинг ҳам тамаъланishi кулги эмасми? Айниқса, ўрдадаги урфи-одатларни ва тажрибаларни ўз кўзидан ва бошидан кечириб турған кишилар томонидан бу шойиъани дуруст деб ишонилишига таажжуб қиласман...

Шаҳидбек кўлини артар экан кулди:

— Шу ишончсизлиғингизнинг ўзи ҳам бир болалиқ.

— Болалиқ, болалиқ, — деб қўйди маҳдум.

Манти тановул қилиниб битди. Маҳдум лаганлар тегини ичиб-ялади. Фотиҳадан сўнг лаган ва дастурхонларни ичкарига элтмакчи бўлған Анварни Шаҳидбек тўхтатди:

— Лаганларни қўйиб туриңг-чи мирзо, илгари ҳалиги масалани ечайлик.

Анвар қўлидағи дастурхон ва лаганни суфа лабига қўйиб ўлтурдиди. Маҳдум гулдурос билан кекириб, устидан «алҳамдуиллоҳ» ҳам деб олди.

¹ Алалхусус — хусусан.

— Хўш, мирзо Анвар?

— Гап бояғиға, бек ақа, — деди Анвар, — бу масала аҳамият беришкә арзимайдир.

Шаҳидбек маҳдумга қаради. Маҳдум Анварни жеркти:

— Арзийдирми, йўқми, ахир, сўзга қулоқ бер-да, Анвар болам.

— Хўб, марҳамат қилсинглар.

— Эшишишимизга қарағанда, — деди қўлини ўйнатиб Шаҳидбек, — жанобга манзур қилинғанлар орасида сизнинг номзадингиз бор экан.

Анвар кулимсиди:

— Бор деб эшитдим.

— Ўрдадағи ишончлик кишиларнинг сўзларига қарғанда, ёрлиғ сизнинг отингизга бўлар эмиш.

— «Бўлди» билан «бўлар эмиш» орасида катта фарқ бор.

— Хўб, — деди ўзини елпиб Шаҳидбек, — биз бу иккисини бир ёққа қўяйлиқ-да, икки орадан «башарти бўлса» феълини олайлиқ, хе-хе-хе... Башарти ёрлиғ сизнинг исмингизга бўлиб қолса, сиз шунда нима қиласиз?

Анвар кулиб маҳдумга кўз қирини ташлади.

— Сиз бу «башарти бўлса»ға ҳам ишонманг, бек ака.

Маҳдум ҳўмрайиб Анварга қараб қўйди. Шаҳидбек яна сўради:

— Ахир, шу эҳтимолга қарши жавоб беринг-да.

— Мен истеъфо ва узр аризаси берар эдим...

— Ҳамоқат!¹ — деди маҳдум ва тескари қараб олди.

Шаҳидбек таассуф қилған каби бошини чайқади:

— Бу сўзингиз билан бояғи гапингизга қарши бордингиз. Боя «мендан бошқа бўладирғанлар ҳам бор, мен бу ишқа умидланмасам ҳам бўладир», дегандек қилған эдингиз, ҳозир эрса бошқа нарсани айтасиз, қхррр.

— Куфрони неъмат, нон телкулик, — деди маҳдум. Анвар яна кулимсиди, аммо жiddий тус олған эди:

— Хайр, кишилар ўйлағандек, меним мирзобошлиққа истеъдод ва лаёқатим ҳам бўлсин, агар ёрлиғ берсалар, бу вазифани қабул ҳам қилайин, — деди, — аммо анови — йигирма-ўттуз йилдан бери шу мансаб-

¹ Ҳамоқат — аҳмоқлик.

нинг қайғусида келган кишилар тинч ётадир, деб ўйлайсизми, ҳар замон оёғимдан чалмайдирлар деб ишонасизми? Мана шу андишада тубан ва аҳамиятсиз бўлса ҳам, ҳозирғи хизматимни аъло кўраман ва шу мулоҳаза билан тақсирим айтканларидек, куфрони неъмат қилмоқчи бўламан.

Шаҳидбек маҳдумга қаради, маҳдум Анварга қарши чиқди:

— Сен ўз ишингни билиб қилсанг, вазифангда су-стлик кўрсатмасанг, — деди, — сенга бутун олам душман бўлғанда ҳам бир мўйингни ҳам қилолмас. Чунки ҳақ ҳамиша ғолибdir, ҳақсизлик эрса мағлуб. Туҳмат ва бўхтон ҳавфида маъракадан¹ юз ўгуриш — йигитларнинг иши бўлмас. Чунончи, ушбунинг мисоли туркӣда ҳам бор: «Чумчуқдан кўрқиб, тариқ экмаган», деб қўрқоқ кишиларни масхара қиладирлар. Шунга ўхшаш сен ҳам чумчуқдан кўрқиб, тариқ экмагучилар хилидан бўлсанг... мен янгишиб юрган эканман-да, болам!

— Ҳақиқат... — деб кулди Анвар ва бир оз ўйланиб тўхталди. — Ҳақнинг ҳақсизлиққа ғолиб келганини оғизда эшитсан ҳам, шу чоқҷача амалда кўралмадим, — деди, — масалан, мендан ҳам ўзингизга равшанроқдирким, мирзолардан Сайдикон, мулла Сиддиқ ва Мўминжонларнинг бошига қандай фалокатларни солмадилар, ҳолбуки ҳақиқатда улар хон ўйлағанча хиёнатчи кишилар эмас, фақат бу учавининг ёмонлиқлари бир неча адватлик мирзоларнинг тўкума туҳмат ва бўхтонлари эди². Айниқса, ўзим бир неча йил-

¹ Маърака — жанг майдони.

² Бир вақт Худоёр, «одил подшоҳ» бўлмоқ ниятида мазкур уч мирзони маҳфий равища вилоятларга жўнатиб. уларга: «Золим бекларим, пораҳўр қози ва бошқа амалдорларим бўлса, менга билиб берингиз, мен уларнинг жазоларини бераман», деб буорадир. Сайдикон, мулла Сиддиқ ва Мўминжон — бу учави вилоят, туманларда неча вақт маҳфий кезиб, бек, қози, умуман, мансабдорларни текшириб чиқадирлар. Уларнинг тўғри баҳо беришлари натижасида маълумурлардан қарийб тўқсон фоизи золим ва пораҳўр кўрсатиладирлар. Хон бу ҳолға ҳайрон бўлиб. ўрдалан бир неча кишиларга сирни очадир. Бу кишилар бояғи уч мирzonинг рақибларидан бўлиб, хонга иғво қиладиларким: «Мирзолар ўзларига пора бергучиларни яхши кўрсатиб, бермагу-чиларни ёмон кўрсатадирлар. Еқса сизнинг овони адолатингизда шунчалик ёмонлар бўладими? Бу кўрнамаклар нафс сўзига кириб, жанобингизнинг аксар содиқ қулларингизни сиздан юз ўтуришларига ва салтанатнингга раҳна солишия сабабчи бўлмасинлар», деб «одил подшоҳ» бу иғвога лаққа учиб, мазкур уч мирzonинг қулоқ-бурунларини кесиб, ўзларини ўрдалан ҳайлашка ва улар кўрсаткан ўн фоиз яхши кишиларни ҳам ишдан олишга буорадир. Анвар эса юқорида шу воқитаға ишорат қилмоқдадир.

дан бери ўрдада ишлаб, шунингдек ўз ора фисқу фасодларни ҳар кун учратмакдаман ва шунинг учун булғанч бир муҳитда мундай талашлиқ вазифани ўз устимга олишдан хазар қиласман.

— Сенинг мисолинг, — деди маҳдум, — нодиран воқиъадир... Агар шундай ҳодисаларни ўйлаб турсанг, ўрдада эмас, ҳатто кучада ҳам юришинг маҳолдир. Бахтинг бунчалик кулган экан, жабонат¹ билан давлат кушини кўлдан учуриш куфрони неъмат, болам!

— Ҳа, тақсир, — деди Шаҳидбек, — айни ҳикмат сўзлайсиз... Укам мирзо Анвар, бахт деган нарса йигитка бутун умрда фақат бир мартаба қарайдир, қхррр, агар шунда маҳкам тутиб қолсангиз, хўб, бўлмаса ҳамиша отнинг кейинги оёғисиз-да.

— Тилак ва ташвиқотларингиз холисона бўлғани учун ташаккур айтаман, — деди Анвар, — яна шу ҳолда мени маъзур кўрасиз...

Маҳдум яна қизишиди, ўнг кўзини қисиб, бир ёқлама Анварга қаради. Чунки ул жуда аччиғи чиққан кезларда кишига шу хилда қарап эди.

— Мен ким, Анвар?

— Сиз... Сиз устозим...

— Бас, устозингнинг, — деди маҳдум, — шу кунгача қайси таълимидан зарар ва қайси кенгашидан зоеғлиф тортдинг?

— Ҳафдан бошқа ҳеч. Лекин ўз умримда бир густоҳлик² қилмоқчиман.

Маҳдум яна аччиғланиб, бир-икки тамшанди:

— Бошқа нарсага густоҳлик қилсанг қил, илло ҳозирғи инодинг айни ҳамоқат! — деди Қўлини пахсалаб, — агар мен сенга устоз ва ота бўлсам, бу ишка кулоқ қоқма, илло ўзинг бил, тузукми?!

Анвар индамади, чунки маҳдум кейинги жумла билан маълум бир таҳдидгача бориб еткан эди.

— Қизишимант, қизишимант, — деди Шаҳидбек, — мирзо Анвар сиз ўйлаған йигитлардан эмас. Албатта, мирзо Анвар айткандек, ўрдада ўшандай гаплар ҳам йўқ эмас ва лекин мен азмойишчи³ бўлсам, шуни айтиб қўяйки, ўрдадаги каттадан-кичик мирзо Анварга хурмат билан қарайдир. Чумолини оғритмаған кишига ким ҳам адоват қилисин — қхррр...

¹ Жабонат — юраксизлик, қўрқоқлик.

² Густоҳ — адабсиз, андишасиз; эркин, эрка.

³ Азмойиш — мушоҳада, ўйлаш.

— Ҳабба! — деди маҳдум, — энди нима қолди; орада гўдаклик хавфидан бошқа ҳеч гап йўқ... Ойига қирқ тилло вазифа, анвоёни ҳадия шоҳона, яна— элдан кўриладирган обрў, ҳурмат, ҳай, ҳай, ҳай...

Маҳдумнинг кейинги жумласи Анварни кулимситди. Кучланиб жиддиятини сақлаған ҳолда:

— Ҳозирча мени бош мунший қилиб ёрлиғ берганлари йўқ, — деди, — шунинг учун бу тўғрида сўзлашиш, менга қолса, ҳали эртароқ кўринадир.

— Мен ҳам буни билиб турибман, болам Анвар — деди маҳдум. — Башарти бу мартабани худойи таоло сенга насиб қилса, ҳалигидек болалиқ ақлинг билан нобуд қилиб қўймагил, деб сўзлайман. Эшитишимга қарағанда, жанобға бир ариза ёзиб, узр баён қилмоқчи эмишсан...

— Ким айтди?

— Ким айтканини қўябер, аммо бояғи ҳаракатларинг бу кори баддан ҳам қайтмаслиғингфа бизни ишонтирадир. Дарҳақиқат, ушбу хабар тўғрими?

— Сизга арз қилған киши балки билиб сўзлагандир... Башарти сиз бу фикримни маъқул топмасангиз... албатта, мажбурман.

— Ҳабба, — деди маҳдум тамом очилған қиёфатда, — гўдаклик лозим эмас, жабонат кўб мазмум¹ суфат, «Осилсанг ҳам баланд дорға осил» мақоли кўб пурҳикмат сўз.

Маҳдум шу гапни айтиш ораси қонеъ² ва мағрур Шаҳидбекка қараб олди. Чунки ул бу мағруриятка икки жиҳатдан ҳақли эди; «башарти сиз маъқул кўрмасангиз...», деб Анвар ўз ризолиғини маҳдумнинг ёлғиз шахси билан билдириди, ҳам шу жумла билан устозидан бошқаларнинг ўз раъйига қарши бора олмаслиқларини онглатди.

Яхшиғина тушурилган манти ва одатдан ташқари энтикиб, ҳаллослаб кўб сўзлаш натижасида Шаҳидбек чарчаб, ёстиқقا суюниб қолған эди. Шунинг учун ул икки орадаги онглашишни ёнбошлиған кўйи табрик этди:

— Балли, мирзо, балли, гап шундай бўлсин, қхррр...

Бир-икки пиёла чой ичишкандан сўнг, маҳдум билан Шаҳидбек фотиха ўқуб, шом намозига қўзғалишиш

¹ Мазмум — айб, ёмон.

² Қонеъ — рози.

дилар. Анвар Шаҳидбекни ўрта эшиккача кузатиб борди. Шаҳидбек Анвар билан хайрлашар экан:

— Иншооллоҳ ёрлиғ оларсиз, деб ўйлайман... Бир неча закотчилар тўғрисида сиз билан кенгашадирган гаплар ҳам бор. Ўз фарзандимиздек йигитсиз, сизнинг мирзобоши таъйинланишингиз бизга айни муддао, — деди.

— Ёвда бўлса, тезаги тегар эмиш. Анвар ўз болангиз-да.

Анвар уларнинг сўзига қарши мажхул бир вазият саклаған ҳолда бош қимирлатиб, суфага қайти.

12. БАХМАЛБОФДА ФАҚИР БИР ОИЛА

Анвар 1267¹-нчи ҳижрия миёналарида Кўқоннинг Бахмалбоф маҳалласида² фақир бир оиласида дунёға келди. Оналар туққан болаларини сизга «тилаб-тилаб олған фалоним», деб, оталар «худой берган ўгулча» деб тақдим этадирлар. Аммо бизнинг Анвар бўлса онасининг «тилаб-тилаб олғани» эмас ва отаси ҳам уни «ўғилчага» ҳисобламаған эди. Отасининг касби бўёқчилик, ҳамиша ярим белидан нил сувига чўмилиб ётқан бир камбағал ва бир қарич, икки қарич болалардан бештасига дада эди. Шу беш боланинг ёнига иззатсиз, ҳурматсиз олтинчи «меҳмон» бўлиб, бизнинг Анвар қўшилди. Яъни Анвар тилаб олинған бола эмас, дадаси билан онасининг тилакларига қарши, фақат уларнинг бахтсизлик ва қашшоқликларига хизмат қилғучи бўлиб туғилди. Бола тилаб олинса, сўйинч-кувонч, новорачи-сурнайчи ва шунга ўхшаш чўзма-чалпак, исчароғ маросимлари нуқсонсиз ижро этиладир. Аммо Анварнинг дунёға келиши мундай маросим, тантаналар ва орзу-ҳаваслар билан бус-бутун алоқасиз эди. Масалан, онаси ўз ёнига доя чақириб тақаллуфланмади, тўнгуч қизи Нодиранинг кўмагида түгди; болаларини қўни-қўшнига сўйинчи учун чиқармади. Чунки қўшниларнинг «қайси ҳолингга түғдинг?» ёки «ўзи ўлгур ит мизожми?», деб таъна қилишларидан чўчили.

Шу ҳолда етти-саккиз кунлаб Анварнинг дунёға «ташрифи» сир бўлиб кечти. Анвар оҳорлиқ янги йўргак

¹ Милодий ҳисоб билан 1850-51-йиллар.

² Бахмалбоф маҳалла — духоба тўкуйдурғанлар маҳалласи (муал.).

кўрмаганидек, оғаларидан бирининг эски бешигига тўққузинчи кун беланди эмас, тиқилди.

Анварнинг «чилласи чароф кўрмаган» бўлса ҳеч борки йўқdir, бироқ йигирма кунлаб бешикда исмиз ётиши қизиқdir, чунки янги «қадрлик меҳмон»га от қўйиш на отасининг эсига ва на онасининг хотирига келган эди. Орадан йигирма кун ўтса-ку, болага исм қўймасалар, деб ота-онани айблаш оғир. Балки Салим бўёқчининг тириклидан қўли бўшамағандир. Анорбибининг бўлса олти боланинг хархашасидан кулоғи тинчимай мияси суюлгандир, ҳар ҳолда бу «қадрлик» боланинг оти муҳтарам маҳалла имоми тарафидан қўйилмағанидек, ота-она томонларидан ҳам насиб бўлмади. Исм қўйиш вазифасини йигирма иккинчи кунларда ўн икки ёшлиқ Нодира адо қилди.

Нодира ўз яқинларидағи маҳдумлардан бирининг боласини яхши кийими, айниқса, ёқимлиқ эшитилган «Анвар» исмига сукланиб, ҳавасланиб юрар эди. Ўйлаб-нетиб турмади-да, янги чақалоқ укасининг отини ҳам «Анвар» деб атади ва бешикда чалқанча ётиб, нурсиз қора кўзлари билан дадасининг факир ҳаётига «разм қўйған» бу чақалоқнинг теварагидан айланиб, «Анваржон, Анваржон!» деб хитоб қила бошлади. Шуни ҳам айтиб қўйиш керакки, Анварнинг дунёға келишини бирдан-бир табрик этиб сўйингган шу Нодира эди. Сўнгроқ яна унга оналиқ мартабасида қолгучи, ҳатто шу кунгача Анварнинг энг меҳрибон кишиси бўлиб келгучи яна шу Нодирадир.

Шу юсун Салим бўёқчининг мавридсиз лайлаклари ичida бемаҳал гуррак бўлиб Анвар ҳам яшай бошлади. Болалари кўпайган сайин Салим аканинг иши ҳам кейинга кетканидек, кундан-кун, эҳтиёждан-эҳтиёжга ўтиб борар эди. Анвар уч ёшқа киргандан беш йиллардан бери Салим акага ёпишиб олған бобосир касали унинг ёқасидан олиб, йиқитишга муваффақ бўлди. Яъни Салим aka қонсираб, дармонсизланиб ётиб қолди. Муолажага пул керак, мундан ҳам илтари оиланинг умумий касали бўлған озиқда ҳам шу нарса керак. Салим бўёқчи сармоясидаги нил, туз ва шунга ўхшаш дастмояларни сотиб муолажа қилдирған бўлди. Дард анча улғайған эди. Бу чиқимлар фойда ўрнига зарар келтирдилар. Дўкон дастгоҳини сотиб, рўзғор қилди. Булар ҳам биткандан кейин бу

оиданинг оғир күнлари бошланди. Очлиқ, яланғочлик, айниқса, касал боқиш.

Шу қиши, айниқса, қаттиқ келган эди. Совуқдан сақланиш учун уларнинг ҳозирликлари йўқ. Ўлкасига совуқ тегдириб, Салим аканинг тўртинчи боласи ўлди. Кўкламга чиқар-чиқмас Салим бўёқчининг ўзи ҳам дунё билан видоълашди. Бунинг устига Анвар, яна икки оғасиға қизамиқ тошиб бир бола мунда ҳам ўлиб берди. Шу йўсун олти ой ичидаги Анербиби эридан ва икки боласидан айрилиб, тўрт гўдак орасида тирик бева бўлиб қолди. Нодиранинг бўйи чўзилиб қолған, ҳар начук бир жойини топиб кетар, аммо учта ёш боланинг иши қийин эди. Эридан болаларнинг тарбиясига ярарлиқ ҳеч гап қолмаған, бир-иккита хум, уч-тўртта мўнди ва шунга ўхшаш резров, бошқа бир бало ҳам йўқ. Анербиби меҳнат билан яшаб, етти-саккизни туғиб, ёши ҳам қирқларга бориб, тусига ажин кириб, кексаймаса ҳам қаримсиқ бўлиб қолған, шунинг учун бирартага тегиб олиши тўғрисида ўлаш ҳам бехуда.

Анербибига ўхшаш тул хотинларнинг қиласидирган ишлари ҳар кимга ҳам маълум: маҳаллада дастурхончилик, бойлар эшигига оқсошлиқ, ҳунармандроқ бўлса — кинначилик ва ҳоказо. Анербиби шу ҳунарларнинг ҳаммасига ҳам қобилият эълон қилиб, болаларини боқиши фикрига тушди. Ва бу орада қизи Нодирани бир бўзчи боласиға узатиб, юкини ҳам бир озенгиллатди.

13. ТАНИЙСАНМИ, ШУ ЖАЖЖИ ҚИЗНИ?

Фалакми кажрафтор, турмушми bemaza, ҳар ҳолда Анварларнинг толеъи яна пастлик қилди. Бир кун Анербиби биравникида юмуш қила туриб тўсиндан оғриб қолди, бир соатнинг ичидаги тилидан ҳам айрилди. Занбилга солиб, ўз уйига келтириб ташладилар. Болаларнинг фифони фалакка чиқди. Куюви табибга югурди. Натижада юрак фалажига йўлиққани маълум бўлиб, шу кун кечаси ҳатто уч гўдаги тўғрисида бир оғиз васият қилолмай вафот этди. Мозорға элтдилар. Тобут олдида икки оғаси билан олти ёшлиқ Анвар ҳам йифлаб борди.

Ўн бир ёшлиқ Темир, тўққиз ёшлиқ Қобил ва Анварларни тарбия қилиш оғирлиғи Нодиранинг ус-

тига тушди. Марқума онасининг ёдгорлари бўлған бу уч болани бегоналар қўлида хор қилиб қўйиши Нодира истамаса ҳам, эрининг фақирлиги бунга монеъ эди. Таъзия кунлари ўткандан кейин ўғуллиққа деб сўрағанларға икки болани бериб юборди ва Анварни ўзи билан олиб, онасининг қақир-қуқурларини бир аравага ортиб, эрининг уйига келди.

Нодира онаси ўрнига Анварнинг бошини силади, ювиб-таради ва Анварнинг истиқболи учун қайғирди. Отаси ва ўз эрининг касбларига яхши баҳо бермагани учун Анварни бошқа киши қилмоқ фикрига тушти. Уни ўқутмоқчи, ҳатто мадрасаларга юбормоқчи ва шу йўсун муллалиқ даражасига еткузиб, отасининг уйига чароғчи қилмоқчи эди. Анварни ўзлари турған маҳалладан бир гузар нари бўлған Солиҳ маҳдумнинг мактабига берди. Анвар «тахта»дан ўкуш бошлади, зеҳнининг тиниқлиғидан бўлса керак, ўн бир ёшида саводи чиқаёзди. Бироқ ўқиша қанча баҳтли бўлса, пешанада ўшанча баҳтсиз эди. Шундоқки, Нодира икки болалиқ бўлған эди. Эри: «Укангга едириб-кийдирайми ёки ўз болаларингними? Укангни кишига шогирд бериб юбор», деб Нодирани қисташға турди. Бечора Нодира оғир ҳолда Анварни кишига шогирд бериб, ўқушини зоеъ қилишға кўзи қиймайдир, эрига муқобала учун ҳеч бир мантиқ тополмайдир. Чунки эрининг ҳоли ўзига маълум. Шу юсун яна бир йил ўтиб, Анвар тўғрисида эри билан аччиғ-тизиқ бўлған бир кун паранжисини ёпиниб кўчага чиқди ва тўғри Солиҳ маҳдумнинг уйига борди. Шу вақтларда Солиҳ маҳдумнинг онаси Марғилонға кетмаган эди.

Нодира Моҳлар ойимға йиғлаб ҳасрат қилди. Ҳамма саргузаштларини бирма-бир сўзлади. Шу бола учун эридан чеккан изоларини чизиб:

— Улуғ даргоҳларингизга шу етим боланинг умри зоеъ бўлмасмикин, ўкуши жуванмарг қилинмасмикин, деб келдим. Бир парча нонларингизни аямай, етим бошини силасаларингиз, деб келдим, — деди.

«Куш тилини куш биладир», деганларидек, Нодиранинг самимий арзи бандачилиги Моҳлар ойим билан Нигор келиннинг юракларини эзди ва шу онда Моҳлар ойим мактабхонадаги болалар ичидан Анварни чақиртириб олди. Анвар келишкан, дўндиқ бола эди.

— Домласи мақтайдирған ўзимнинг зеҳнлик бо-

лам-ку, — деди Моҳлар ойим Анварни кўриш билан ва Нодираға таскин берди.

— Хўб, қизим, хўб, поччаси боқмаса боқмасин, мен ўзим боқаман, ўкутиб, катта мулла қиласман.

Анвар поччасининг кейинги кунлардаги дағал муомалалари сабабини ўйлаб, хафаланиб юрар эди. Моҳлар ойимнинг ҳалиги сўзи билан масалага тушунди ва ятимона бошини қўйи солди. Бу ҳолдан опаси таъсирланаб, кўзига ёш олди.

— Йифламанг, жувон, — деди Моҳлар ойим, — ўйқлиқ курсин — йўқлиқ. Поччаси камбағал бўлса, унда ҳам гуноҳ йўқ, ҳамма гап тақдирни азалдан. Яхши: бу кунданоқ бола сизнига бормайдир, ўз ёнимда ўғлим бўлиб ётадир. Отинг нима, катта йигит?

— Анвар...

— Оҳ, отинг ҳам ўзингга ўхшаш чиройлик экан... Манови дўндиқ қизни танийсанми?

Шу ўртада ўйнаб юрган олти ёшлар чамалиқ Раъно югуриб келиб, Моҳлар ойимнинг бағриға кирди. Анвар ўзидан ҳам дўндиқроқ Раънога қараб кулди:

— Раънохон, — деди.

Моҳлар ойим Раънони бағридан чиқариб буюрди:

— Бор, Анвар акангта салом қил!

Раъно келинларча Анварга салом қилди ва жазб қилингандек Анварнинг яқинига бориб тўхтади.

— Кўриш, Анвар! — деди ойим.

Анвар Раънони бағриға олиб қучоқлади. Шу ҳолда Моҳлар ойим кулимсиди.

— Агар ўлмасам, шу дўндиқ қизимни бериб, Анварни ўзимга куяв қиласман.

Анвар уялиб бағридагини бўшатиб юборди. Хотинлар кулишдилар. Шу йўсун Нодира Моҳлар ойимдан жуда хурсанд бўлғани ҳолда уйига қайтиб кетди.

Ўз уйида бир нонхўр ортиши маҳдумга, албатта, ёқмас эди. Бироқ, онасининг раъйини қайтаришдан ҳам ожиз эди. Шундоғ ҳам бўлса, «томоғи-ку, енгил, кийими оғирроқ. Кийимини опасининг устига қўймаб-сиз-да» — деди. Моҳлар ойим: «Кийими бир гап бўлар. Кишилар масжид, мадраса солғанда, биз бир етим боқсақ, арзимайдими? Сенга оғирлиқ қилса, ўз бисотимдан кийинтиарман, болам», — деди.

Анвар ўн икки ёшида учунчи оилани кўрди. Лекин бу охирғиси Анвар учун ҳар жиҳатдан ҳам қулай бўлди:

ўқушини давом этдирап, қорни панжшанбалик нонлар билан тўқ, уст-боши ямоқ бўлса ҳам, яланғоч эмас эди. Бу учунчи оиласа кўчишда Анварни энг хурсанд қилган нарса мактабдаги болаларнинг озор беришларидан қутилиши ва домланинг асранди ўғли мақомини олиши бўлди. Болалар уни эҳтиром қилмасалар ҳам, унга бурунғича ёмон муомала қилишдан ҳайиқиб қолдилар. Анварга бу уйда ортиқча юмиш ҳам йўқ, чунки ҳар қанча уй хизматлари мактаб болаларидан ортмас, ўкушдан бўшаған вақтини Раънони ўйнатиб кечирар эди.

Ўн уч ёшида мактаб прўграммасини битириб, ёш бўлса ҳам ҳалфалик, яъни домлаға кўмакчилик қила бошлади. Ва ҳар кун болалар озод бўлғандан кейин маҳдум унга кофиядан¹ дарс берар ва «Гулистони» Саъдийдан бир неча банд ўкутиб, маъноси билан ёдлатар эди.

Ўн беш ёшида мактабни ёлғиз ўзи идора қилиш даражасига етканидек, яхшифина форсийхон ва бир даража араб тилига ошно бўлди. Маҳдум мундан бир неча вақт илгарилар Анварни мадрасага узатиш тўғрисида сўзланиб юрса ҳам, ҳозир бу гапни оғзига олмай қўйди. Чунки мактаб ишида ялқовланиб Анварга суюниб қолди ва мадраса масаласини унутдириш мақсадида, араб, форс наҳъя сарфидан² ўзи дарс беришка киришди.

Маҳдум Анварга шу жиҳат билан иноқ эди. Аммо Моҳлар ойимнинг Анвар билан муомаласи холис ва самимий бўлиб, ул Анварга ўз боласидек меҳрибон ва ҳар вақт: «Кўнглингни бузма, Анвар йигит; кўрасанми шу жажжи қизни? Албатта сенга бердираман!» дер эди. Лекин Моҳлар ойим ваъдасига еталмади. Маҳдумдан аразлаб Марғилон кетишкага мажбур бўлди. Бироқ, кетар чоғида ҳам Анварни унутмади. Ниғор келинни ўз ёниға чақириб: «Куявлик учун Анвардан яхшироқ йигитни тополмассиз, Раъноға худойим умр бериб, бўйи етса, албатта, Анварга бердиргин» — деди.

14. ЧИН ЎРТОҚ

Анвар ёшлиғида бўшангина бир бола эди. Ўз тенгги болалар билан оз алоқа қилар, уларга кам аралашар ва

¹ Кофия — араб тили грамматикаси.

² Наҳъя — синтаксис, сарф — морфология.

ортиқча ўйнаб-кулмас, ҳамиша унинг кўзида бир мунг ётар эди. Бу ҳолат балки оила баҳтсизлигидан, ота-она бағрида яйрамағанлиқдан туғилғандир, десак, унинг икки оғаси мундай эмас эдилар. Бир онадан неча хил бола туғиладир, деганларидек, Анварнинг яратилиши оғалариға нисбатан бошқача эди. Маҳдумнинг уйида тура бошлағач, Анварда бир оз ўзгариш кўрилди. Шунда ҳам болалар билан алоқасини эскича юрутиб, фақат Раъно ёнидағина ўйин-кулки боласиға алишинар, Раънони етаклаб боқчаға, кўчадаги катта сув бўйларига чиқиб ҳамроҳини боқчадаги гулларнинг исми, учеб юрган қушларнинг навыи, катта оқар сувлар ва айниқса, Раъно каби ёш қизчалар учун бу сувларга йиғилиш хавфи ва шунингдек, бошқа масалалар билан уни танишдирав, кўчада ўлик кўтарғанларни кўрса, бирарта боланинг отаси ёки онаси ўлганлигини сўзлаб, бунинг орқасидан: «Меним ҳам онам ўлганда ўшандоқ қилиб кўтарған эдилар... Мен ҳам шу боладек мозорга йиғлаб борған эдим», деб қўяр эди. Раъно ҳам Анварнинг сўзига диққат билан қулоқ солар ва кўпинча ҳисобсиз саволлар ила уни кўмиб ташлар, лекин Анвар зерикмас, ҳар бир сўроққа жавоб бериб, Раънони қаноатландиришға тиришар эди.

Анвар ёш бўлса ҳам жиддий ва кичкина мияси муҳокамага қобил, бошқа киншилар устига тушкан баҳтсизликдан ҳам мутаассур бўлғучи эди.

Бола чоғиданоқ энг яхши кўрган нарсаси гулзор ва ундаги гуллар эди. Маҳдумнинг оиласига келиб тура бошлағандан сўнг боқчанинг гулзор қисмини ўз идораси остиға олди. Гулларни суғориш, ўтларни юлиб, тозалаш вазифаларини ўзи бажарди. Гуллардан ҳеч кимга уздирмас, бир боланинг узиб олғанини кўрса, ўзи хафа бўлғанидек, болани ҳам хафа қилар эди. Болаларнинг дараги билан ҳар кимнинг уйида бўлған янги гуллардан кўчат ва уруғ олиб, йилдан-йилга гулзорни бойитди. Ёз кунлари келса, болаларни капалак ва олтин кўнғуз тутиб келишкабуурап; қийнамай, озор бермай заҳасиз капалак тутиб келғанларга сабонини ўқутиб кўйиш билан мукофот берар, капалак ва олтин кўнғузларни гулзорда учуриб юборар, агар улар гулларга қўниб қолсалар, ўзида йўқ суюунар эди. Шунинг учун аксар ёз кунлари маҳдумнинг боқчаси оқ, нимранг, ола, зангор, малла, ложувард ва бошқа тус капалаклар-

нинг ялт-юлт учишлари билан алоҳида бир кўриниш-ка кирав, Анварнинг ўқушдан бўшаған кезлари гуллар ичидаги шу капалаклар орасида кечар эди.

Анвар ҳар ким учун ҳам суйимлик ва хушмуомаласи барчага баробар эди. Аммо, айниқса хуш кўрган кишиларидан биринчиси Раъно ва иккincinnси мактабдаги шогирдлардан сабоқдош шериги Насим исмлик бола эди. Насим билан Анвар жуда яқин дўст, бир-бiriни онглағучи сирдош ўртоқ эдилар. Гарчи Насимнинг отаси Кўқоннингфина эмас, бутун хонлиқнинг танилған кишиларидан ва бу икки боланинг синфий айирмаликлари ер билан кўкча, лекин ёш дўстлар бунинг фарқига етмаслар, Насим «хоннинг мирзабошининг ўелиман», деб ҳаволанмаганидек, Анвар ҳам «Салим бўёқчининг ятими, Солиҳ маҳдумнинг асрандисиман», деб андиша қилмас эди. Бу икки бола бир жойда сухбатка киришсалар, четдаги бир киши Анварни йиртиқ бўз кийимлар ичидаги шоҳи-адраслар билан гарқ ҳолда кўриб, албатта «бу гадойбачча билан бекбаччанинг ўзаро нима муносабатлари бор?» деб тажжубланар, лекин дўстлар ҳали бунинг айирмасини идрок қилмаслар эди.

Аксар жумъя кунлари маҳдумдан изн олиб, Анвар шу ўртоғининг уйига борар, кечкача Насим билан «сұхбатлашиб» қайтиб келар эди. Анвар шу муносабат билан Насимнинг отаси Мұҳаммад Ражаб пойгачининг илтифотига ноил ҳам бўлди. Насим ўртоғи Анварнинг ятимиғини отасига билдириб, мажбур қилған бўлса керак, бир неча ҳайит мавсумларида Мұҳаммад Ражаббек Анварга кийимлар ҳам берди. Бу илтифот икки дўстнинг алоқаларини бир-бирларига яна қаттироқ боғлади, айниқса, маҳдумнинг димоғини чоғ қилди. Зоро, Анварнинг Мұҳаммад Ражаб каби бир кишининг ўғли билан дўстлашиши бир камолат бўлғанидек, дўстлиқнинг ҳатто сарполар кийишкacha бориб етиши маҳдумнинг назарида яна айни фазилат эди... Шу сарпо кийиш воқиъасидан сўнг маҳдум Анварга бошқача қараб қолди ва ичидан «сен одам бўладирған кўринасан», деб қўйди.

Бахтка қарши, бу дўстлиқ алоқаси узоқ давом эталмади. Бир кун орадаги дўстлиқ риштасини ўлим яғомтари келиб узди. Насим ўн беш ёшлар чамасида чечак касали билан оғриди ва ўша кезларда давосиз ҳисоблан-

ған бу касалдан ўнглалмай вафот қилди. Мұҳаммад Ражаббек ва оиласи учун бу мусибат, албатта, оғир эди. Бироқ, улардан ҳам Анвар учун оғир бир ҳасрат бўлди. Ҳатто, кўз ёшини мархумнинг ота-онасидан ҳам кўброқ Анвар тўқди десак, муболаға қилмаған бўлурмиз. Уч кун мактаб ва маҳдумни унутиб, Мұҳаммад Ражаббек ҳавлисида туриб қолди. Ҳар оқшом Насимнинг қабри устида бир соатлаб йиглаб ўлтурди. Бу ёшнинг самимий чин дўстлиғи ва ўртоғиға садоқати ҳар кимни таажжубка кўйди.

Анварнинг биринчи мартаба мархум дўстига атаб ёзған марсияси мотамлик ота-онани яна бўзлатқан эдиким, биз марсиядан бир неча мисраъини қуида кўрсатамиз:

*Очилмай сўлса ҳар гул гунчаси пиру жувон¹ йиглар,
Эмас пиру жувон, балки ҳамма аҳли жаҳон йиглар.*

*Ажал яғмогари боғи зако² ичра узид занжир,
Раҳмсиз эзса маъсум лолаларни, чун ҳазон йиглар.*

*Насимим кетди оламдин мени қайғу аро ташлаб,
Кўзимдин оқса хун ҳеч бир ажаб йўқ, чунки қон йиглар.*

*Жаҳонда эрди танҳо мен етимга ҳамнишин, дилдор,
Фарибликнинг диёрида адашкан нотавон йиглар...*

Мулла Мұҳаммад Ражаббек пойгачи ўғлиниң со-диқ дўстига шу кундан эътиборан бошқача қараб қолди. Бир жиҳатдан маъсумият, иккинчидан кўриниб турған истеъодод Мұҳаммад Ражаббекни Анварга илтифот этишкага мажбур қилди. Гарчи Анварнинг юқоридағи марсияси болалиқ хархашасидан иборат эди эрсада, яна унинг истиқболидан хабар олиш учун яхши мезонлиқ вазифасини ҳам ўтар эди.

Мулла Мұҳаммад Ражаббек аввало ўз илтифотини Анварнинг марсиясидан бир байтини Насимнинг қабр тошиға олиш билан бошлади. Сўнгра Анварнинг «дунёда мен етим ўртоғингға танҳо сирдон ва дилдор (кўнгил кўтаргучи) эдинг. Бу кун мен сендеқ дўстдан айрилиб, яна фурбат диёрида нотавон йиглайман!» деб афсус ва

¹ Пиру жувон — кексаю ёш.

² Боги зако — акл боғи.

надомат қилишиға қарши, яъни Анварнинг ятимлик ва ғариблигига йўл қолдирмаслиқ учун мулла Мұҳаммад Ражаббек ўғлининг содик дўстига ўз оталигини кўрсатмакчи бўлди.

Анвар уч ҳафтагача хатми қуръон кечлари Мұҳаммад Ражаббек уйига келиб турар эди. Охирги хатми қуръон кечи Мұҳаммад Ражаббек Анвардан аҳвол сўради:

- Домлангиз саломатми?
- Шукур.
- Ўқушингиз яхшими?
- Бирмунча.
- Домланинг уйида турасиз?
- Тақсир.
- Сиқилмайсизми?
- Йўқ.
- Илми ҳисоб ўқуғанингиз борми?
- Йўқ, тақсир.
- Домлангиз илми ҳисобни билурмикин?
- Билмаслар деб ўйлайман.
- Агар мен бир домла таъйин қилсанам, ҳисоб ўқуйсизми?
- Устозим рухсат берсалар, албатта ўқуйман.
- Хўб... бўлмаса эрта кечка домлангиз шу ерга келиб, менга учрашсин.
- Хўб, тақсир.

Эртаси куни маҳдум келди, Мұҳаммад Ражаббек маҳдум билан сўзлашиб, Анварни ўрда хизматига олиш фикрида бўлғанлигини, бунинг учун арабча, форсийчадан яна ҳам чуқурроқ маълумот олиши лозимлигини ва ҳисоб ўрганиши кераклигини айтди. Маҳдум Мұҳаммад Ражаббекнинг Анварга мунчалик марҳамати учун бир оз шошиб қолса ҳам, лекин бу меҳрибончилик сабабига яхши тушунганлиги жиҳатдан аввало бекнинг етимпарварлигини, сўнгра Анварнинг зако ва истеъодини маҳтади. Анварни одам қилиш йўлида чеккан ўз машаққатларини ҳам шикоят юсунида сўзлаб чиқғач, бу кунларда эҳтимоми том¹ бирлан Анварга форс ва арабийдан дарс бериб турғанини ва алҳол ҳам Анвар форсийча тазкира ва таҳрирлар ёза олишини баён қилиб, неча хил узрлар ичидаги ўзининг илми ҳисобдан баҳрасизлигини билдириди, яъни Ан-

¹ Эҳтимоми том — бутун диққат билан.

варнинг илми ҳисоб ўрганиши учун бошқа муаллим керак бўлур, деди. Муҳаммад Ражаббек бу тўғриға ўзи домла топмоқчи бўлиб, маҳдумга рухсат берди.

15. МАҲДУМНИНГ БАХТИ

Шу кундан бошлаб Анварнинг ҳаётида янги саҳифа очиладир. Яъни маҳдум Анварга илгаригича— истиқболи қоронғу бир етим, деб қарамай, балки Анвар каби ўз ўғли бўлмағаниға ўкуна бошлайдир. Дарҳақиқат, унинг ўкунишига арзийдирган чигил масалалар ҳам туғуладирким, масалан: Анвар ўрда хизматига кириб қолса, ойиға беш тилло, ўн тилло нақдина даромад қилиб турса, бу маблағлар...

Шундай истиқболдағи бу «маблағлар» масаласи маҳдумнинг ичини ари бўлиб талайдир. «Ўн ёшдан бери ўқутиб, едириб, кийдириб келаман: албатта, даромад маним ҳаққим бўлур», деб ўйласа ҳам, бу ҳукмидан ўзи унча рози бўлинқирамайдир. Ҳар ҳолда масала чигил...

Моҳлар ойимнинг Раъонони Анварга бериш тўғрисидаги «аҳамиятсиз» сўзлари ўша вақтларда маҳдумнинг энсасини қотирған бўлса, ҳозир шу ҳақда чинлаб ўйладигина эмас, балки «ҳалигидек Анварнинг баҳти очилиб кетса, нима маломати бор. Етимлик айб эмас, инсон учун фазлу камол лозим, кулиб турған баҳт ҳожат, наслу насабнинг ҳеч аҳамияти йўқ. Раъононинг хуснига ҳар ким ҳам таҳсин қилур: Анвар албатта йўқ демас... Бу борада мол ва жонни бир қилишдан бошқа маслаҳат йўқ», деган қарорға дафъатан келиб қолди. Мундан бирар ойлар илгари Нигор ойимға: «Анвар балоғатға этаёди. Сен билан Раъонога шаръян номаҳрам, ундан қочишиларинг лозим», деган бўлса ҳам, бу буйруқ ҳозирғача амалга ошмаған эди ва бундан кейин ҳам амалга ошмайдирған бўлди. Зоро, маҳдумнинг фикрича Анварга оғир туюлиш эҳтимоли бор эди...

Анвар Муҳаммад Ражаб пойгачи тарафидан белгиланган бир муфтида ҳисоб, иншо (таҳрир) қоидаларини ўргана бошлади. Маҳдум ҳам жон отиб араб ва форсийдан таълимни кучайтирди. Анвар бир йил ичida ҳисобни ўрганди. Ва бошқа дарсларида ҳам яхши муваффақият қозонди, ҳам шу кўкламдан эътиборан ҳар кун ўрдаға бориб, Муҳаммад Ражаб мунший қўл

остидағи мірзолар ёнида дафтардорлик, номанавислик усулларини тажриба қила бошлади. Бир йил чамаси маошсиз тажриба күрди. Шунда ҳам ҳафта сайин Мұхаммад Ражаббек ўз киссасидан уч-түрт танга чой пули бериб турар эди. Анвар шу арзимаган уч-түрт тангани ҳам махдумнинг қўлиға келтириб берар ва ҳафта сайин ўзига устозининг умидини каттароқ боғлатиб борар эди.

Анвар бир йиллик тажрибада ўрдалағи дафтардорлик, форсийча ва туркча номанавислик¹ ҳунарларини тамоман деярлик ўрганиб, тажрибалик мірзолар қаторига кирди. Сармуншийнинг оғзидан чиқсан маънони тартибка солиб нома, ёрлиғ ёки бошқача бир тазкирани таҳрир қила олар, мірзолар жумлани ғалат ифода қилиб, сармуншийдан аксар танбеҳ эшитканларида, Анвар бундай танбеҳка жуда сийрак учрар эди.

Иккинчи йилдан бошлаб етти тиљло моҳона² билан маошлиқ мірзолар қаторига ўтди. Моҳонадан ташқари солиқлардан ҳам дарҳонлиқ³ қофози олди. Солиқлардан дарҳонлиқ махдумнинг рўзгорига катта енгиллик эди. Чунки сўнғи йилларда хонлиқ томонидан ҳалқ устига тушкан ва тушиб турған солиқлар беҳад ва тўлаб бўлмаслиқ эдиким, бу ҳақда келаси бобларимизда сўз бўлур. Шу курсандлик баробарида биринчи ойнинг етти тиллоси яхлит ҳолда махдумнинг қўлиға тегиши гёй тўй устига тўй эди. Домланнинг етти тиллони олғандаги ҳолини тасвир қилиш, албатта қийиндир; кўзлари филайлашқан, афтида қизиқ ўзгариш кўрилиб, оғзининг танопи узоқ саёҳатни ихтиёр қилған — «ҳабба... ҳосилинг дуруст, Анвар болам, лекин пулга эҳтиёт бўл, бўтам!»— деган эди. Етти тиллонинг кўлдан чиқиши хабари Нигор ойимнинг қулоғига етишкак, Анвардан ранжиди: «Ҳамма пулингни домлангға чакки берибсан, Анвар; устбошингни, кўрпа-ёстиғингни, ортиб қолса Раъно уканнинг устини тузатишинг керак эди. Домланг туфлаб тутишдан бошқани кошки билса!» — деди.

Махдум етти тиљло «нақдина»ни олиб қанча шодланған бўлса, ўшанчалик ташвишқа ҳам тушди. Унинг фикрича, замона ёмон, бузуқилар бениҳоят; мумкинки, Анварни ўзидан айнатиб оғзи ошқа етканда, бо-

¹ Дафтар ва номалар ҳар иккى тилда юритилар эди (муал.).

² Моҳона — ойлик.

³ Дарҳон — озод этиш.

шини тошқа тегдирсалар... Раънони Анварга никоҳлаб бошини боғлаб қўяйми, деб ўйлади. Бироқ, Раъно ҳали ўн бир ёшда эди. Иккинчи кун Анвар ишдан қайтиб келгач, маҳдум уни боқчага олиб кирди. Боқчадан кунтай ҳам кўкрак бир ўрунни кўрсатди:

— Ана шу ерга сенга атаб бир уй, бир айвон, ошхона ва ахтахонаси билан иморат солсам дейман... Ҳабба, Анвар? — деб сўради. Анвар кулди:

— Иморатка элли тиллодан кам пул етмайдир. Маним бўлса бир пулим йўқ. Бўладирғани ҳам фотиҳа бергунингизча, албатта, сизники ва ойимларники, — деди.

— Ҳабба... ҳимматингга! — деб юборди маҳдум,— албатта-ку, шундай ва лекин ўша ниятларингдан кейин бояғидек алоҳида пул йифсанг дейман-да... Албатта, бу гап уч-тўрт йилсиз эмас-да.

Шу вақт Раъно нарида бола кўтариб турар эди. Маҳдум Раънони ўз ёнига чақириб, унга ҳам ҳалиги ўрунни кўрсатти:

— Ҳабба... мана шу ерга Анвар акангга уй солиб берамиз, Раъно. Бу сенга қалай ўхшайдир, қизим?

Раъно отасининг сўзига тушунмади:

— Анвар акамнинг ётадирған меҳмонхонаси борку,— деди.

— Хе-хе-хе, боласан, қизим, боласан, — деб кулди маҳдум, — Анвар акант токай меҳмонхонада ётади дейсан. Ахир бир кун уйланади, бамисоли сен бўлсанг эрга тегасан... Ахир уй керакда, қизим.

Бу сўздан Анвар қизариб кетди. Раъно Анварга қараб олди ва дадасига аччиғ қылған каби бурулиб ичкарига жўнади. Маҳдум Анварга усталиқ билан бир маънони онглатиб, таъминот берганидек, бузуқиларнинг васвасига қарши дам ҳам солған эди... Бу дам солиш Анварга ҳам таъсирсиз қолмади. Шу кунгача Раъннинг ёш, маъсум ҳуснига умидсиз қарайдирған бўлса, бундан кейин унга умид ва истиқболнинг ширин хаёллари билан термуладирған бўлди.

Маҳдум ўзининг чеккан ташвишида ҳақли бўлиб чиқди. Анварнинг теварагида «холис» маслаҳатгўлар ҳам кўринишиб қолдилар. Айниқса, бу «холис»лардан бири поччаси эди. Поччаси етти тилло дарагини эшитиб энтиқди. Эрининг тазиёки остида Нодира ҳам кенгашка турди.

— Поччанг, бизнинг ҳавлиға келиб турсин, ўзим уйлантириб қўяман, дейди.

Анвар бошқаларнинг кенгашига қулоқ солманидек, опасининг сўзига ҳам илтифот қилмади. Махдум жавоб бермагунча бу уйдан кетмаслигини билдириб, фақат поччасига ёрдам бериб туриш ваъдаси билан опасини тинчитди.

Анвар иккинчи ой маошидан уч тиллони ўзида қолдириб, уйга кийим-кечак олиш учун изн сўраған эди, махдум «шу иш чаккида, болам. Хайр, бундан сўнг шу номаъқулчилик бўлмасин!» — деб аранг кўнди. Анвар Нигор ойим, Раъно ва ўзига кийимликлар сотиб олди. Нигор ойим шолпар, Раъно атлас кийдилар.

Нигор ойим Анварнинг пинжига кириб олиб, ўз йўлиға сола бошлади. Маошининг ҳаммасини махдумга бермасликка, шунга ўхшаш кам-кўстларга ҳам яратиб туришға ундар эди. Анварнинг андишасини рад қилиб: «Ҳар қанча берсанг ҳам дадаси ола берадир. Лекин берганингни сен билан бизга миси ҳам юқмас. Шундай бўлғандан кейин, ишни ўйлаб қилиш керак», — дер эди. Чунки Нигор ойим эрининг Анварга қаттиғ ботина олмаслигини сезар эди. Шундай бўлса ҳам Анвар етти-саккиз ойғача топқанини махдумга бериб, дуосини олиб турди. Лекин махдум шунчалик даромад билан ҳам эски табиъатини бир зарра ўзгартмас, ҳамон эски тос, эски ҳаммом: ҳар кун суюқ ош, худо ёрлақаған кун озодлиқнинг палови, шунда ҳам Анвар кеч келиб совиған ошни ер, уйда иссиф нон ёпилмас, ҳамиша панжшанба кун йигилған нон суви қочиб, тарақлаб келаси панжшанбагача кафолатни ўз устига олар эди. Бора-бора Анвар ҳам бу ҳолдан сиқилиб, Нигор ойимнинг кенгашича иш қилмоққа мажбур бўлди. Олтин бериб қуруқ дуо ва миннатдорчилик олишдан, дуосиз еб-ичишни аъло кўрди. Уйга гўшт ва бошқа масаллиғ олиб бериб, хоҳлаған таомини буюриб турди; ўзи яхши кийинганидек, Нигор ойим, Раъноларни ҳам яхши кийинтириди. Нодира опасига, жиянларига кийимлар олиб берди; икки тиллони Марғilononda оғриб ётқан Моҳлар ойимга совға-салом қилиб юборди.

Бу ўзгариш махдумни довдиратиб қўйди ва қўрқаписа «бу ой харожатлабсизми, болам?» — деб сўраған эди, «кам-кўстларни тузатиб олдиқ» — деган жавобни берди. Иккинчи ойда, кўрпа-ёстиқларни тузатиб,

махдумнинг кўзи тўрт бўла бергач, икки тиллолиқ «холис» дуо ҳам олиб қўйди. Лекин маҳдум бу ҳолдан анча шошқан эди. Бирар шайтон йўлдан оздиридими, деб астағфируллоҳ ўқур эди. Анварнинг эскича очиқ юз билан муомала қилиб фақат «нақдина» важҳидан-гина дам бўлиб қолиши, топқанини «бемаза» овқатлар-ға, кийим-кечак ва бошқа «бехуда молояъни»ларга¹ сарф қилиши маҳдумни кўб тангликка солған эди.

— Бўтам Анвар, — деди бир кун маҳдум, — дунё деган кўб ноёб нарса; кишининг бир куни бўлса йиф-лаб-сихтаб ўтиб кета берадир, ишлло, зар қадрига етиш керак... менда бўлса ўзингда турғандек гап, болам.

Бундай «муассир» насиҳатлар ҳам Анварга кор қилмади. Чунки Нигор ойим ва Ръянолар билан бу тўғрида қатъий битишиб қўйған эди. Шу билан бирга маҳдумнинг ойлиқ вазифасини икки тиллодан ҳам камайтиrmади. Инсон ҳар нарсага қобил... бора-бора маҳдум шунга ҳам қаноат қиласидирған бўлиб, ҳисобкитобни эсидан чиқарди. Бироқ, ой сайин икки тиллони олғанда «қолғани» тўғрисида бир оз юраги ачишиб кўяр эди.

16. ХОННИНГ ИЛТИФОТИ

Девонда расмий мирзо бўлишининг учунчи йилида Анвар жуда катта эътибор қозонған эди. Айниқса, туркий таҳрирда мирзоларнинг ҳар бирисидан устун: чиройлик услуби, осон таркиб² ва ифодаси бор эди. Буни мирзолардан бошлаб сарой шоирлари, сарой муфтилари, бош мунший Муҳаммад Ражаббек, ҳатто хоннинг ўзи ҳам эътироф қилар эдилар.

Худоёр муҳр босиш асноси ёзилған ёрлиғ ва номаларни ўкутиб эшитар, муншийларнинг эшитилмаган араб ва форс сўзлари орқалиқ тўкуған ярим туркий жумлаларига аксар вақт тушунмас: «Эналаринг арапқа текканма?» деб мирзо, муфтиларни койир эди³. Аммо,

¹ Молояъни — қийматсиз нарса.

² Таркиб — жумла тузиш.

³ Худоёр қипчоқлар ичига ўскани учун тили ўзбекчадир. Эналаринг сўзидаги «нг» ҳарфини «нғ» равишида қалин сўзлайдир. Бу кунги фаргона ўзбеклаврида ҳам (айниқса қишлоқларда) юмшоқ «нг» ўрнида қалин «нғ» ишлатиш кўб эшитилладир. Ҳозирги ислоҳ қилинган ҳарфимизда бу қалин «нғ» нинг маҳсус шакли ёъқдир. Ёзганда (н-ғ) ҳарфларидан бир товуш ясалса ҳам, бироқ ўқуғанда ҳар ким буни ўз маҳражидан чиқаролмас, янглиш ўқур. Бу қалин «нғ» ўзбекча бир неча сўздатина ишлатилмай кўб элилаб сўзда истеъ-

Анварнинг ёзған ҳар бир жумласини мусиқий каби роҳатланиб, тушуниб тинглар ва «шу бала барилариндан ҳам ўқуғанрақ чиқар!» деб, бошқа мирзоларнинг юрагига ўт ёқар эди.

Мұхаммад Ражаб мунший кейинги күнларда мұхим тазкиралар таҳририни Анварга топширадырын бўлди. Ўзи бирар жойға кетадырган бўлса, девон идорасини Анвар қарамоғиға қолдирар, ҳар бир тўғрида ҳам бошқалардан кўра Анварга ишонар эди. Зоро, Анвар ҳар бир ишни тўғри ва холис адо қилар, вазифасидан ташқари ишларга киришмас, оладирган маошидан ортиқча тамаъға тушмас эди. Бу ўрунда Анварнинг бир хусусиятини атайноқ ёзиб ўтишкан бурчлиминиз: ўрус истибодид идораси ёнидағи мусулмон қозихоналари ва улардаги мирзоларни ҳам ким хотирлайдир. Ўша мирзоларнинг унар-унмаска «қалам учи» сўрашлари, кичкина ишни улгайтиб мазана¹ чиқариш ҳаракатлари ҳам бизга маълумдир.

Шу қозихона мирзолари, байни ҳикоямизнинг мавзуи бўлған Худоёр саройи муншийларининг кичкина нусхалари эдилар. Хонға ёзиладырган арзи-додлар сарой мирзоларидан ташқаридан таҳрир қилинған бўлса, аксар вақт ишка ошмас эди. Яъни четда ёзилған ариза қабул қилинса ҳам, ариза эгаси қалам учини бетона қилғани учун аризани хонға ва сармуншийтга кўрсатмай, йиртиб ташлар эдилар. Ариза эгаси натижада сўраса, «аризангизни саводсиз киши ёзған экан; жаноб илтифотсиз қолдирдилар», — деб саводиқ кишидан бошқа ариза ёздириб беришкан маслаҳат кўрсатар эдилар. Ариза бергучи иккинчи мартаба ҳаражатланиб, сарой мирзоларининг ўзларидан ёздиришга мажбур бўлар эди. Мундан бошқа, бир-бирлари устидан хонға шикоят қилиш, ўз аро битмас адоват ҳам давом этиб, аксар бир-бирларининг тегига сув ҳам қуйиб турар эдилар. Яна аксарият мирзолар хоннинг хуфиялик хизматини ҳам адо қилиб, шахсий адоват ёки хонға яхши кўруниш учун фуқародан нечаларнинг гуноҳсиз қонига чўмилиб, мудҳиш фожиъаларга ҳам сабабчи бўлар эди-

мол қилинғани учун манимча алоҳида бир шакл қабул қилиш эҳтиёжи ҳис этиладир. Масалан машҳурлари: занғ, панғ, ланғ, даранғ, қаланғи-қасанғи, данғ, тўнгуз, шанғи, тўнгигилламоқ, тўнғ, тўнгуч ва анғиз, тинғ бошқалар... Эски «нинг» «н» равишида ислоҳ қилинган. Бу ёъғон «нғ» ҳам «ғ» ҳарфининг устига уч нуқта қўюлиб ёзилсамикин... (муал.).

¹ Мазана — шириңкома.

лар. Шунинг учун халқ, айниқса, камбагаллар сарой мирзолариға нафрат билан қарап, улар ёниға яқинлашишдан күрқар, иложсизликдан икки букулиб салом берар эди.

Лекин Анвар тамаъни, шайтанатни, адоватни айниқса, хуфияликни билмас, девонда ўзига топширилған вазифанигина адо қылар, алалхусус мазлумлар додномасини хонға әшитдиришканда ва яхши натижалантиришканда тиришар эди. Ул ўзининг шу тұғрилиғи соясида ҳамиша анови мирзоларнинг ишига билоқас¹ халал берип, чиришни² бузуб турар, ҳам шу ва бошқача сабаблардан уларнинг адеватига яхшиғина ҳадаф³ ҳам бўлған эди. Бироқ, Анварнинг ҳомийси — Мұҳаммад Ражаббек катта эътибор ва нуфузга молик, ҳам хонға инобатлик, шунинг учун мирзолар Анварга қарши ҳеч нарса қилолмас эдилар. Мирзолар орасида Анварга тишириноғи билан қарши бўлған Шаҳодат муфти каби кекса мирзолар яшаганларидек, унинг истеъдод ва зақосига холис мафтун бўлған Султонали каби мирзолар ҳам бор эдилар.

Шу йўсун тажриба йилидан ташқари беш сана саройда ишлаб келар эдиким, мундан ўн беш кунлар муқаддам сармунший Мұҳаммад Ражаб пойгачи бир ҳафтагина оғриб, вафот этди. Анвар ўзига самимий меҳрибон бўлған бир кишидан айрилди. Неча йиллардан бери Мұҳаммад Ражаббекнинг ўлумини ёки бошқача бир фалокатини кутиб, ундан сўнг бош муншийликка ўзини чоғлаб юрган Шаҳодат муфти хизмат билан қишлоққа чиқиб кетканлиги учун, мувакқат равишда бош муншийлик вазифасини Анвар адо қила бошлади. Ва шу бир неча кун ичидан Анварнинг бош мунший бўлиш шойиъаси юриб қолдиким, ҳозирга бу тўғрида бир мулоҳаза айтиш қийиндир. Чунки бу мансабга интилгучи казо ва казолар, шоир ва фузалолар кўбдир.

17. АНВАРНИНГ АНДИШАСИ

Анвар Шаҳидбек билан маҳдумнинг сўзларига қарши мажхул бир вазиятда бош қимирлатиб суфага қай-

¹ *Билоқасд* — қасдсиз, ният қилмай.

² *Чириш* — битаётган ишни бузиш.

³ *Ҳадаф* — нишон.

тди. Уларнинг чиқиб кетишлигини кутиб турғандек ички эшикдан Раъно кўринди. Ҳар замон титраб, учеб кетишка ҳозир турған бошидафи сариф атлас парчасини (рўймолни) бир қўли билан босиб ушлаган эди. Анвар Раънони шу ҳолда кўриб, суфа ёнидафи очилған гуллар устида тўхтади. Раъно келар экан, ўпкалик кўз билан Анварга кулимсиб қарап эди. Келиб суфа лабида турған бўш лаганларга тақилди.

— Бу кунги меҳмондорчилиғимиздан рози бўлған ўхшайсиз, Анвар ака, — деди қайрилиб Раъно.

— Жуда рози бўлдим, — деди Анвар ва Раънонинг ёнига келди, — айниқса, сенинг қўлинг билан тугилган мантилардан жуда мамнун бўлдим, Раъно.

Раъно лаганлардан қўлини олиб, тирсаги билан суфага суюнди:

— Маним қўлим билан тугилган мантиларни қаёқдан билдингиз?

— Қаёқдан билдингиз? — деб Анвар кулди, қўлида бир дона қашқар гули бор эди, — айниқса, сенинг қўлинг нимага теккан бўлса, мен ўшани даррав сезаман.

— Мен туккан мантилар қандай экан?

— Танимайди дейсанми?

— Танимайсиз.

— Чоклари диққат билан чимтилган, тўрт бурчага иккига қовиширилған, дўндиқ... танимайди, деб ўйлайсанми? Мен нуқул сен туккан мантиларни танлаб едим...

— Мазалиқ эканми?

— Мазалиқ нима деган сўз, — деди Анвар, — мана шу қашқарнинг қизил гули ёдингдами, биз бу гулни келтириб ўтқузған йилимиз пушти ранглик бўлиб очилған эди. Икки йил ўтмай қизил туска кирди. Биласанми бу нимадан?

Раъно Анварнинг жиддий қилиб берган бу саволига тушунмади:

— Офтоб қизартирғандир.

— Янглишасан, Раъно, — деди Анвар, — мен бу гулнинг қизариш сирини ҳам биламан, бунинг қизаришига ҳам сен сабаб, сенинг қип-қизил лабинг...

— Ҳазилни кўйинг, — деди шу гулдек қизарған Раъно — Шаҳид семиз нима учун келган экан, сизни мирзобоши қилмоқчилар шекиллик?

— Бу тапни кўй, Раъно, ишонмасанг ойнаға қара,

сенинг лабинг билан шу қизил гул ранти орасида фарқ борми, мана қара?..

Анвар томонидан лабига тегизилган гулдан Раъно ўзини олиб қочди:

— Ҳазил ўлсин... Сизни мирзобоши қилмоқчиларми?

— Мени ҳар бало қилмоқчилар... Лекин бўлмаған сўз.

— Нега бўлмаған сўз, шаҳарга овоза бўлған эмишку?

Анвар орқаси билан сакраб суфа лабига оёқ солинтириб ўлтурди. Раъно бояғича унинг ёнида суфага суяниди.

— Овоза ҳақиқат эмасдир.

— Шамол бўлмаса, теракнинг боши қимирамас эмиш. Балки сизни мирзобоши таъйин қилурлар.

— Мени мирзобоши, таъйин қилсалар яхшими, Раъно?

— Яхшими, ёмонми, мен қайдан билай?

— Ёмон, Раъно.

— Нега ёмон?

— Ифлос иш. Агар бошқа касб топсан, ўрдани бутунлай ташлаб кетар эдим.

— Ифлос иш?.. Сизнинг бек поччангиз ҳам шу хизматни қилар эди-ку?

— Мен бек почча бўлолмайман, Раъно, Ўрдадаги тўкулиб турған гуноҳсиз қонлар, доим теваракдан эши-тилиб турған оху зорлар маним юрагимни эзадир, тинчлигимни оладир. Яна мен мирзобоши бўлиб қолсан, бу оху зорларнинг, тўкилган маъсум қонларнинг ичida билғеъл¹ сузарман. Бу вақт маним азобим бевосита бўлур. Балки бунда иштирок ҳам қиларман. Чунки хонға яхши кўруниш учун кўб ишларни унинг истагича кўрса-тиш, зулм пичогини қайраб бериш, шу мансабда узоқ яшамофимнинг асос шартидир. Лекин мен бундай виждонсизлик учун яратилмаған ўхшайман. Мадҳу сано, олқиши ва дуо замирига яширингандан зулмдан фарёд, ҳақсизликдан дод маънолариға малҳам бўлиш, албатта маним қўлимдан келмас. Чунки «соябони марҳамат» виждон кенгашига қулоқ солғучи «аҳмоқ»лардан эмасдир. Дадангнинг феъли сенга маълум, Раъно. Дунёда «манфаат»дан бошқани кўрмайдир. Маним нима учун

¹ Билғеъл — амалда.

бу мансабдан қочқанлигимнинг фарқига бормай, «куфрони неъмат қиласан, ойига фалон тилло», деб дафъатан қўрқоқлигимға ҳукм чиқарадир. Дадангга бояғи узрларни кўрсатиш тошнинг қулогига азон айтиш билан бир бўлғани учун сукут қилдим. Агар орада бир киши бўлмаса эди, гарчи, бош мирзолиқ ҳозир бир хаёл эрсада, ўшандаги шу овозага бўйин сунмас эдим, Раъно.

Раъно Анварнинг кўзига тўғри тикилиб, сўзни тинглади. Унинг тусида Анварга ачиниш вазияти бор эди:

— Яхши ният билан мирзолиқни қабул қилсангиз,— деди, — аҳолидан ёрдам қўлингизни йиғмасангиз, шу ҳолда барча гуноҳ сизнинг бўйнингиздан соқит бўладир, Анвар ака.

— Тўғри, — деди Анвар, — лекин гап бунда эмас, Раъно, мен шундай бўлишини тилар эдим. Бошқалар мен тилаганча қилмайдилар, биноан алайҳи, масъулият маним бўйнимдан соқит бўлди, деб тинчланиш мумкин эмасдир. Сен тамоман бошқача тушунган бир масала, сенинг ҳаракатинг ва истагинг аксича натижаланиб турса, руҳан ёзиласан, вижданан азобланасан. Мана асли мушкилот шу нуқтададир. Йўқса гардандан соқит қилиб кўйиш ҳар нарсадан ҳам қулай вазифа, аммо маънавий мағлубият оғир масала, Раъно.

Раъно Анварнинг мақсадига тушунди шекиллик, бир неча вақт жим қолди ва қаршисидағи йигитнинг ўйчан юзига бир-икки қараб олди.

- Демак, мирзобошилиқни қабул қилмайсиз?
- Агар топширсалар, қабул қиламан.
- Шунчалик мушкилот ичидা?
- Чунки отанг буни мендан талаб қиладир.
- Отамнинг қандай бийлиги бор?

Маъсум бу саволдан сўнг Анвар энтикиб қўйди ва Раънони бир фурсат кўздан кечириб турди:

- Жуда катта бийлиги бор, — деб яна энтикли.

Раъно қайтиб сўрамади. Гўё ул ҳам бундаги бийликка тушунган эди. Секингина лаганларга қўлини юбориб, Анварга бўштоброқ қаради:

- Чой ичасизми?
- Кейинроқ ичаман.

Раъно лаганларни кўтариб жўнади. Атлас кўйлак ичидаги тўлқинланиб кўринган унинг латиф гавдаси ал-ҳол Анварнинг кўз ҳадафи эди.

— Мен хуфтанга чиқмайман, Раъно!
Раъно ярим йўлда тўхтаб, кулимсираган ҳолда
Анварга қаради:
— Чиқарман! — деди.

18. ЖИЛОВХОНАДА БИР ЖАНЖАЛ

Аср намози учун масжид жиловхонасиға энди уч
киши йифилған эди. Жиловхонанинг тўрида ўлтурган
қора тўнлик, ўттуз ёшлар чамасида рангсиз ва ёшли-
ғига қармасдан қуюқ соқолини баҳайбат ўстуриб, бир
бурдагина юзига от тўрба осқан каби бир киши эди.
Унинг ёнида бўз яхтак бобичини осилтириб, ханд-
лакдек бўқоғи билан ўнг томоғини зийнатлаган ўрта
яшар яна бир «ҳусни Юсуф» кўринар эди. Унинг қато-
рида ошловдек чўзуқ юзлик, оқ бўз кўйлаги ердан
тўрт еллик кўтарилиб, бўз салласи гардани аралаш
ўралған учунчи нозанин ўлтураср эди.

Булардан биринчи муҳтарам шу масжиднинг ёш
имом ва хатиби Абдураҳмон домла жаноблари бўлиб,
иккинчиси маҳалланинг ширин сўз гийбатчиларидан
Самад бўқоқ, учунчиси масжиднинг муаззини Шукур
сўфи эди. Самад бўқоқ билан Шукур сўфи имом афан-
дининг мулойимона, ҳам битта-битта айни мақомига
чертиб ва қатор териб борған сўзига сомиъ эдилар:

— Ўрда ичиди шунчалик оқил ва донолар тўлиб
ётқан бир фурсатда, таҳсил кўрмаган, нодон бир гўдак-
ка бундай улуғ бир вазифа, валлоҳи аълам топширил-
мас деб ўйлайман. Бу вазифани уҳда қилмоқ учун кўп
гап керак. Аввало ақли солим, сониян, таҳсили том
лозим, ваҳоланки, сиз айткан йигит ўткан саналар
Солиҳ маҳдумда савод ўқуб, биздан ҳижжа¹ ўрганиб
юрат эди. Баҳарҳол бу хабарга ақл бовар қилмайдир...

— Ҳа-а, тақсир, — деди Самад бўқоқ ва Шукур
сўфини тирсаги билан турртти, — бу бала киму, ўрдаға
мирзабошилиқ ким. Замонанинг зайлли минан, бояғидек
Мамаражаб мирзабошининг ярдамида ўрдаға киришиб
қоған-да... баяғидек оппоқина бўлса Мамаражаб ўз ёниға
оган-да...

Имом бўқонинг сўзини тинглаган ҳолда, икки
кўзини ерга қаратқан эди.

— Юртнинг сўзига қараб айтаяппан-да, — деди

¹ Ҳижжа — собак.

Шукур сўфи, енгилган оҳангда, — ҳарчи бир неча кундан бери катта-киччикнинг оғзида шу гап.

— Кўбчиликнинг оғзини тикиб бўлардима, сўфи.

Самад бўқоқнинг бу сўнгги фийқиллашида томоги остидағи йўғон томирлари туртиб чиқди. Имом ҳамон икки кўзи ерда бўлғани ҳолда кичкина бошини қимирадид:

— Ўрдалан бирар киши масхара учун хабар тарқат-кандир.

— Ҳа-а, тақсир.

Шу ҳолда жиловхонаға тўртингчи киши кириб келди. Буниси жиккак, қирқ билан эллийнинг ораси, елкаси туртиб чиқған Сафар бўзчи исмлик эди. Имомга салом бериб, сўфининг ёнига ўлтурди ва сўзга бир оз қулоқ солғач, тушунар-тушумас баҳска аралашиб қолди.

— Иншоолло, шу йигит мирзабоши бўлар, — деди Сафар бўзчи сұҳбатнинг руҳини билмаган ҳолда, — ўзи ажаб зукко йигит, фуқаропарвар бола: бўғани маъкул, а, лаббай, тақсир?

Имом ерга қараған ҳолда бошини қимирадатиб кўйди. Самад бўқоқ ҳўмрайиб Сафар бўзчига қаради:

— Э, акиллай берасанда. Сафар, — деди бўқоқ, — биз нима деяпбиз-ку, сен нима деяпсан.

— Хўш, нима деяпсанлар?

— Овоза гап деяпмиза, мирзабошлиққа катта милла керак деяпмиз-а.

— У милла эмас эканми?

— Милла бўлса ҳам, хашаки миллалардан-да.

— Ашунга қофанды чалғибсан, Самад, — деди Сафар бўзчи, — хат битишка келганда кўявур, камбағалга қайишқанини кўрсанг, ҳа, бўлди дейсан.

— Занталагинг кимга қайиша қопти?

— Ҳаммага, ҳаммага, — деди Сафар, — мени ўзимга ҳам ёрдам қилди-да, яшагуринг.

— Ҳа-а, хўш?

— Бултур ана шу кезда, — деди Сафар энгашинқираб, — бозорға саккизта бўз олиб тушкан эдим. Бираста мушкит иғво қилдими закотчининг томоги тақилладими, ҳарчи фалакат, қўлтуғимдағи бўзни ёппо олди, кўйди; «отанг яхши, онанг яхши, косибман, савдогар бўлсан уйим куйсин»... Асти қўйса-чи... Бир йиллик закотинг деб кўтарди, кетти. Қўлингдан нима келади, Самад. Хафалигим ошиб, уйга куруқ қайтдим. Майдан

чуйда кутиб ўлтурган бола-чақанинг қути учти. Мол кетти — жон кетти, ишқа ҳам қўлим бормайди. Энди бўлар иш бўлған десанг юрак ачийди, дастмоя ҳам ғалтакка чиқадиган. Арза-парза биттирсамми дейман. Кўчада унга-бунга кенгаш солсан, арзанг маъқул дейишиди. Шу яқинда, ўзи ўрдада турадиган бир арзачи бор эмиш. Кеткан устига кеткан деб дўкон теги яримта бўз бор экан, қўлтуғимга тиқиб олдим. Ана шу тобларда сўроғлаб арзачи миরзоникига борсан, ҳозир ўрдалан келиб, энди тўнини ечиб турған экан. Ёш, навқирон йигит, «салом, алик», «ҳорма», «бор бўл». «Шундай, шундай гап; бир парча арза биттирсан, деб келган эдим». Ўрдалиқقا гап уқдириш қиёматдан кейин, тақсир. Лекин бу йигитда гаврлик¹ сиёқи йўқ, Шукур сўфи. Гапка қониб олиб, қулоқ қоқмай «хўб». Арзанинг бир ерига закотчининг оти тушар экан, неча қайта сўраса ҳам билмадим, ундан кейин афти башарасини уқдириб эдим, тусмоллаб биттасининг отини ёзди, чоғи. «Энди кета беринг, арзани ўзим топшираман», — дейди. Жавобини ҳам икки кундан кейин ўзидан олар эмишман...

— Манави осонлиқни қаранг, тақсир. Дуо қилиб қалам учисига бўзни бердим, олмайди. «Ёпирај, оз-синдиёв, қурғур» деб қўрқдим. «Арза ўрунласа, яна хизмат қиласмиз, миrzабоши». Яна йўқ, «тоза фалакат бости» — деб турсам, «арзага ҳақ олмайман, бўзингни олиб кетавур» — дегани экан. Барака топқурни қаранг, тақсир. А, шундақقا одам ҳам бўладими, Самад оға. «Олтин олмасанг, дуо ол» — деб қўлимни очтим. Ҳа, энди буни қўявлуринг. Эртаси кечкурун гула тўғрилаб ўлтурсан, эшикни бирав тақиллатади. «Ҳа, келавуринг». Дўконхонага бўз қўлтуқлаған бир киши кирди.

- Сафарбой сизми?
- Ҳа, биз.
- Арза берганмидингиз?
- Берган эдим.
- Отангизнинг оти нима?
- Маматбой.
- Кўлтуғидағи бўзни олдимға ташлади. Худда кечаги бўзларим: таппа-тақ саккизта.
- Бўзларингизни олдингиз-а?
- Ҳа, олдим.

¹ Гавр, габр — оташпарат, исломни танимаслик.

— Хайр.

— Хўш.

Бу яхшилиқ арзадан ҳам бурун мирзабошидан бўлди, деб ўйладим. Балаларнинг кенгаши билан икки бўзни кўтариб шом пайтида мирзанинг уйига бордим. Чакирдим, чиқди. Миннатдорчилик билан икки бўзни узатдим; асти олса-чи. «Яхтакка бўзим бор, кетавуринг», дейди. «Сотиб, пулинни берайми», десам «пулим ҳам кўб» дейди. Ақалли биттасини ҳам олмади. Яна дуо қилиб бўз билан қайтдим. Фаришта ҳам шунчалик бўлар, деб ўйлаб қолдим, Шукур сўфи! А, шундай йигит мирзабоши бўлмай ким бўлсин, Самадбой! Кўбни дуоси кўл деганлар, ишонмасанглар, ана тақсиримдан сўранглар!

Ҳикояни эшлитиш асноси имомда бир ғижиниш вазияти бор эди. Ҳикоя биткач, заҳарханда билан Самад бўқоққа қаради, дами кесилаёзган бўқоқ бундан руҳланди.

— Ёлғонни ҳам ямламай ютадиган бўлибсан-да, Сафар, — деди бўқоқ.

Сафар бўзчи тўсундан ўзгариб кетди. Ранги ўчин-қиради:

— Азбаройи худо, қасамми?

— Иккита бўзни икки қўллаб оборсанг, — деди Самад бўқоқ, — қайси аҳмоқ олмай қайтарар экан? Ёлғонни сал киши ишонадиган қилиб гапириш керак, Сафар!

— Азбаройи худо, олмади! — деди Сафар ва асабийланиб ўрнидан туриб кетди, — шу каъбатуллонинг ичидаги ўлтуриб ёлғон гапирган одам мусурмон эмас, кишининг қасамиға ишонмаған ҳам етти маҳзабда мўъмин эмас!

Сафар аканинг азтахидил аччиғланғанини сезган имом ораға тушти:

— Бундай яхшилиқни ҳар ким ҳам қила оладир, Сафар ака, — деди, — шунинг учун мирзобошининг сизга қылған яхшилиғига мен ишондим. Аммо бизнинг баҳсимиз унинг бева-бечорага қылған яхшилиғи тўғрисида бўлмай, бу одам ўрдадаги мирзоларга бошлиқ бўла оладирми, яъни ўшандоғ катта ишнинг уддасидан чиқадирми, устидадир.

— Баракалла, тақсир, — деди Сафар бўзчи турган еридан, — менга қолса, иншоолло, уҳдасидан чиқади!

Имом Сафар бўзчиға тушана олмай, бир оз тикилиб турғандан кейин сўради:

- Унинг уҳда қилишини сиз қаёқдан биласиз?
- Худой билдирса, биламан-да, тақсир?
- Хўш?
- Ахир, кўбчиликнинг дуоси кўл-да, тақсир!
- Кўбчиликнинг дуоси кўл бўлса яхши, — деди имом, — аммо бу хизматка унинг илми кофийми?
- Ковфий, тақсир, ковфий!
- Ахир, сиз кофийлигини қаёқдан биласиз?
- Ахир... ковфий эмаслигини сиз ҳам қаёқдан биласиз, тақсир?
- Кофий эмаслигини мен шундан биламанки, — деди имом аччигини ичига ютқан ҳолда, — бундай мансабга минадирган киши Бухоройи шарифда таҳсил кўрмаганда ҳам, лоақал Ҳўқанд мадрасаларида ўкуған бўлиши керак, аммо сизнинг мирзобошингиз саводхонлиқдан бошқани билмайдир.
- Билмаганини сиз қаёқдан биласиз тақсир?
- Чунки мен уни ўз қўлимда ўқутқанман... бир етим бола эди.
- Худонинг бериши, тақсир, — деди Сафар, ўйлабнетиб турмай, — жанобингиз Бухоройи шарифда неча йил ўқуб ниҳояти маҳаллага имом бўлдингиз... Худой бермаса шундай, тақсир. Ул бўлса мадраса кўрмасдан мирзаларнинг мирзаси бўлмоқчи; худой берса шундай, тақсир.

Сафар бўзчининг бу сўзидан имомнинг қонсиз ранги яна қонсизланған, оламинчоқ кўзи алланучка ҳолатка кирган эди.

- Аблаҳ одам экансан! — деди.
- Сиз ҳам аҳмоқ мулла экансиз! — деди Сафар бўзчи.

Имом ғазаби билан ўрнидан туриб Сафар бўзчиға хезланған эди, уни Самад бўқоқ ушлаб қолди.

- Падар лаънат, адабсиз! — деди Самад, — домлаға шундай сўзни айтасанми-я?

Сафар бўзчи турған ўрнидан силжимади:

- Ҷўзма кекиртагингни, бўқоқ, — деди, — қани қўйиб бер-чи тақсирингни, ёқалашсин-чи мен минан! Андишанинг отини кўрқоқ кўйдингми?!

Шукур сўфи ўрнида бақа бўлиб қолған, имом бўлса гўё ҳужум қилмоқчидек Самад бўқоқни итарар эди.

Самад бўқоқ фийбатдан бошқа ишқа ярамагани учун, имомнинг ёрдамиға етиш чамаси йўқ эди.

— Шу адабсизлиғинг билан, — деди Самад насиҳатомуз, — яна домланинг орқасида намоз ўқйисанми, Сафар, а!

— Ўқумасам қутиламанми сенлардан!

— Ўқумасанг бор, жўна!!!

— Ҳе... — деб сўкинди Сафар бўзчи ва жиловхонадан чиқиб жўнади. Унинг орқасича «падар лаънат жоҳил» деди имом ва илгариги ўрнига борди. Бир неча вақт учавлари ҳам сўзсиз ўлтурдилар.

— Бир ит-да, тақсир, хафа бўлманг.

Имом жавоб бермади. Яна бир неча киши келиб кўшилғач, Шукур сўфи мезанага чиқиб аzon айтди. Асрни ўқуш учун масжидга кирдилар.

19. ИФЛОС БИР МОЗИЙ

Имомнинг табъи жуда сустланди. Шом ва хуфтан асноларида ҳам ҳеч ким билан сўзлашмади. Сафар бўзчининг «Бухоройи шарифда неча йил ўқуб келиб, ниҳояти маҳаллага имом бўлдингиз. Худой бермаса шундай бўлади, тақсир» — деган сўзи заҳарли ханжар каби унинг юрагида янгидан-янги жароҳат очар эди.

Дарҳақиқат, Сафарнинг бу сўзи имомнинг эски жароҳатини мудҳиш тузлаб ташлади. Бу жароҳат шу кунгача ичдангина фасодланиб юрган бўлса, бу кун Сафар бўзчи каби бир «бемаъни» бу ярани раҳмсиз суратда ёриб юборди. Самад бўқоқ ва Шукур сўфи каби bemазалар олдида имомнинг обрўсини тўкли. Бу бир ёқдан. Иккинчи тарафдан, Сафарнинг «ул бўлса, мадраса қўрмасдан мирзоларнинг мирзоси бўлмоқчи...» жумласи яна дард устига чипқон. Яъни имомнинг ҳасад ўти тўрт томондан пуфланди, гўё ул икки олов ўртасида қолғандек бўлди.

Анварнинг бош муншийликка ярамайдирғанлиғини, илмсиз, фазлсизлигини нега бунча исбот қилишга тиришди? Сафар бўзчи каби бир «аблаҳ» билан баҳслашиб, ўзига нега бунча хафалик ортдирди? Гарчи, Анварга холис қиймат бермакчи бўлғанида ҳам буни Сафар каби илмсиз, нодон бир кишига тушундирмоқ учун қандай ҳожат бор эди? Бунинг сабабини сўзлашдан илгари имом афандининг ўткин тарихига бир оз

кўз ташлаб олишга мажбурмиз. Чунки бусиз ўқувчи-
мизни таъмин қилиш мумкин эмасдир.

Хозирги имомимиз — мулла Абдураҳмон мундан йигирма йиллар муқаддам, қисқафина, аҳамиятсизгина «Раҳмон» исми билан аталар эди. Абдураҳмоннинг отаси уламо наслидан, аммо бу шараф нима сабаб биландир, унинг отасиға насиб бўлмоған, бироқ Абдураҳмоннинг амаклари ота касбини ушлаб, таҳсил кўрган жойлари Бухорода катта мударрислардан саналар эдилар. Абдураҳмон ёш бола экан, отаси ўлиб, онаси ва ота томонлари тарбиясида қолди. Ўн беш ёшларғача Солиҳ маҳдум мактабида савод ўқугач, мударрис амакларидан Бухоройи шарифка келиб таҳсил қилишға даъват хати олди. Хатда Абдураҳмоннинг бобо касблари уламолиқ эканини, шунинг учун бошқа касбларга уруниб умр зоеъ қилиш абаслиги¹, ўз тарбияларида таҳсил қўриш лузуми сўзланар эди. Бу даъват Абдураҳмоннинг онасиға ва бошқа яқинлариға жуда маъқул тушиб, уни Бухороға жўнатиш қарорига келдилар. Абдураҳмон ҳам истиқболдағи мударрис, муфтилик ширин хаёллари ичидаги Бухороға сафар қилди.

Катта амак Бухоронинг «Хўжа Порсо» мадрасасининг мударриси бўлиб, Абдураҳмон шу кишининг тарбиясиға келган эди. Абдураҳмон силлиқина бола, мадраса муллабаччалари албатта шундай силлиқ болаға ўч... Шунга биноан домла мударрис гарчи мадрасадан ҳужра бериш мумкин бўлса ҳам, мазкур ишончсизлиқ мажбуриятида Абдураҳмонни ўз меҳмонхонасиға жойлаштируди. Шу ҳолда Абдураҳмон таҳсил бошлади.

Домла мударрис «замона бузуқлигини» назарга олғани учун Абдураҳмонни ҳалиги тўғрисидан жуда қаттиғ назорат қиласар эди. Бироқ, домлаларнинг бундай бузуқлиққа қарши бора олишлари мумкинми эди? Уларнинг ўzlари шу «маҳрам» балосига гирифтор, яъни бузуқлиққа манбаъ бўла туриб ҳам яна «замона бузуқлиги»дан шикоят қилишлари ўша вақтлардағи «мадраса мантиқи»ға ҳеч бир баҳссиз сиға олур эдиким, бу тўғрида менга осила кўрмангиз. Кишининг боласини бузиш ҳар бир салласи муazzам, илми «фавқалодда», ўзи «варасатул-анбиё»² саналған зотлар назаридаги виждонида маъфу, аммо ўз ўғлиға бошқалар ўшандоғ ҳай-

¹ Абас — бефойда, бехуда.

² Варасатул-анбиё — пайтамбарлар авлоди.

вонликни қиладирған бўлса: «Замона бузук, эҳтиёт шарт!»

Шу юсун домла мударрис буродарзодасини яхши эҳтиёт билан, ҳатто шомдан кейин дарбозага қулф солиб тарбия қилас, мадрасадаги оти ёмонға йиртилган хоҳ ёш, хоҳ кекса умуман, талабалар мажлисига яқинлашдирмас эди.

Киши аввало моҳхов ёки пеc бўлмасин: бўлдими, бетдан бўлмаса — елкадан, қўлдан сув очмаса — оёқдан, ҳар ҳолда оқаберадир. Шунга ўхшаш жамият ҳам бир касал билан оғридими, унинг ҳар бир табақа ёки синфига, яна тўғриси, фардига¹ шу касал сироят² қилмай қолмайдир. Домла мударрис буродарзодасини мадраса муллабаччаларидан ҳар қанча эҳтиёт қилса ҳам, яна амният³ остида эмас эди. Мадрасадан ташқарида ҳам Абдураҳмонни кўз остига олғучи «муллабаччалар» йўқ эмас эдилар, масала четларнинг кўз олайтиришифа етканда, табиый, домла мударриснинг кўлидан њеч иш келмай қолди.

Домла назоратни эскича давом этдириб, хотиржамъ юрганда бир неча жувонбоз савдогарлар Абдураҳмон билан алоқа қилиб қўйған эдилар. Домла мударрис эрта-кеч Абдураҳмонни кўз ўнгидан юбормас, хуфтандан кейин дарбозага қулф солар, Абдураҳмонни меҳмонхонада ётқузиб, сўнгра ўзи ичкарига ухлагали кирап, зиёфатка бориладирған бўлса, ўзи билан бирга олиб юрар эди. Яна шу ҳолда Абдураҳмонни қандай қилиб буза олсинлар? Таассуф, бузган эдилар. Баччабозлиққа маҳсус ҳунар ва найранглар ижод қилған омилкор савдогарлардан бир нечаси «Абдураҳмонча»ни йўлдан оздирған эдилар.

Домла мударрис хотиржамъ ичкарига ухлагали киргандан кейин меҳмонхонанинг кўча томон даричасига кичкина бир кесак тиқ этиб тегар, гўё ечиниб ётқан Абдураҳмонча бу ишорадан сўнг туриб кийинар ва секингина даричани очар, эшик очилған кўчадан бир ўрим арқон тўп этиб меҳмонхонаға ташланар эди. Абдураҳмонча арқоннинг бир учини меҳмонхонанинг дарчасига боғлаб, иккинчи учига ўзи осилиб кўчага тушар, арқонни бўй етарлик қилиб яширгач, нарида

¹ Фард — шахс, кимса, киши.

² Сироят — таъсири.

³ Амният — тинчлик, хотиржамлик.

кутиб ўлтурган «одам ўгриси» билан бирга базм ўрниға жүнар эди. У ерда бўлса беш-ўн «ошиқлар» Абдураҳмончани келиши он билиттифоқ «Бухоро амрлиги»га кўтариб, амру фармонига итоат қилурлар:

«Мулла Абдураҳмонжон, жаноби олий, гарам, аз сарашон гардам, балонгни олай!»¹ каби мадху саноларга кўмилган «Абдураҳмонча» ҳар бир ишни ўз тилагича юритар: май учун соқий бўлар, заифона кўйлак, лозим ва бошиға кокил кийиб ўн олти ёшар қиз суратига кира; чойға лабини тегизиб «табаррук» қилар; дутор, танбургра йўргалаб ўюнчи бўлар; бошидаги кокил билан «ошиқлар»ни раҳмсиз қамчилаб ситамгар ва золимга айланар, энг охирда.. Қисқаси бу бобдаги бор чорамиз учун ҳам ярарлиқ ҳолға келган ёки келтирилган эди.

Уч йилгача шу юсун «ошиқлар» кўнглини овлаб келиб, бир кун сир очилиб қолди. Домла мударрис бу номуска чидалмай Абдураҳмонни ўз уйидан қувлади. Абдураҳмон тавба қилиб, домла мударрисдан лоақал мадрасада туришни сўради. Восита-васоит билан изн ҳосил қилиб, мадрасада истиқомат қила бошлади. Энди ишрат навбати мадраса жигар сўхталарига...² Икки йил чамаси мадраса афроди³ орасида чандир каби саккиз тарафдан тишланиб юргандан кейин соқол-мурти чиқиб, ҳусн сармояси заволга юз тутди ва қундан-кун «бозор касодланиб» харидор озайди. Абдураҳмон уч йил бўйи савдогарлар орасида «ахлоқ тузаткан» бўлса, яна икки йил мадрасада туриб шу тузалган ахлоқни «камолатка» эриштирди. Шунинг учун анвоъи эркаликка, неча хил муқайифотка, ранг-баранг «иззат, ҳурматка» ўрганган кўнгли бу харидорсизлик балосига туз сепкан ярадек ачири эди. Кўбни кўрган бу кичик бош баъзи уят найрангларга ҳам уриниб кўрар, масалан «вақтсиз чиққан» соқол-муртларини мўйчинак билан териб, ҳар кун ўн қайта ойнага қарар, янги харидор топиш мақсадида кун сайин бозор-растада, кўй-гузарлар сайрига чиқар эди...

Маълумдирким, дўндиқчалар аввало оқчаси кўб, бел оғриғи кўрмаган бойларға насиб бўлурлар. Улар

¹ Гарам, аз сарашон гардам, балонгни олай — айланай, бошингта жоним фидо, дардингни олай.

² Жигар сўхта — ошиқи бекарор.

³ Афрод — шахслар, кишилар, кимсалар.

зерикиб ташлағач, ўрта ҳол «ташна»лар домиға тушарлар. Соқол-мурт чиқиб давангиликдан¹ хабар келгач, учунчи табақа, яъни бўйни йўғон, гўлабурлар истифодасига кечарлар. Шунга ўхшаш бизнинг Абдураҳмон ҳам мўйчинак ушлаган даврида шу учунчи табақа — чойхонанишин, тавкарғир² ва бобоий банглар орасидан ўзига замин топди. Унинг бу учунчи давридаги аҳволини ёзишга қалам маъзурдир. Шу йўсун бу кейинги табақа орасида ҳам уч йил чамаси иш кўргач, ажойиб бир дунёдийда, мисли озшалоқ, ҳамма шароитлари билан мадрасалик бир безори ва чапан ҳолда баччалик даври билан видоълашди. Чунки, башара нонға чумомли ёпишқандек соқол мурт билан тўлиб, мўйчинакка сўз берарлик бўлмади.

20. ҲУШЁРЛИҚ

Ҳозир Абдураҳмон ўзининг яқин мозийсида усти ширнига беланган от тезакдан бошқа бир нарса кўрмаганидек, истиқболида ҳам эпақалиқ бир ҳол тасаввур қилолмас эди. Бир неча ойлар ниҳоятда руҳсиз, кайфсиз ва дарсига ҳам ҳавсаласиз давом этиб юрди. Гўё бу кунларда бениҳоят ичкулукдан сўнг бош оғрифи даврини кечирап эди. Шу йўсун кўб вақт руҳий хасталиқ кечириб, кутилмагандан жонланиб кетди. Яъни «Ақоид»нинг шарҳига яхши тушуниш учун беш бармоғини оғзига тиққандек енг шимарди.

Юқоридағи руҳ тушиш даврида ул мозийсидағи каби эркалиқ, амру фармон ва шуҳрат учун қайғирған, кўб бош оғритиб эндиғи шуҳратни мўйчинак истеъмоли билан эмас, балки ақоид, шарҳ ва ҳавоший³ воситасида топмоқчи бўлған, яъни фарди гоясиға диний олимлиқ либосини кийдириш фикрига келган эди⁴. Беш йил «ғоя» учун қаттиғ берилиб, рутубатлик ҳужрада захлаб, саломатлиги учун умр бўйи аримайдирған ориғлиқ, рангизизлик ортдириб, йигирма саккиз ёшида «хатми кутуб»⁵ қилишға муваффақ бўлди. Беш йиллиқ

¹ Давангиллик — ўсмирлик даври.

² Тавкарғир — қиморда ютуқлан чўтал олувчи.

³ Ҳавоший — ҳошиялар, бирон китобнинг шарҳига берилган шарҳ.

⁴ Фардгояси — Оллоҳнинг бирлигини англаш гоясилир. Юқоридағи жумлада мана шу гояни, яъни Оллоҳнинг яккаю ягоналити гоясини диний илмлар билан исботлаш назарда тутилади.

⁵ Хатми кутуб — китобларни ўқиб тутатиш.

ўзгаришдан сўнг домла мударрис Абдураҳмоннинг эски гуноҳларини кечирган эди. Уз ёнидан бир мунча сарф этиб, Абдураҳмон учун хатм тўйи қилиб берди.

Мулла Абдураҳмон Кўқон сафарига ҳозирланар эди. Кўнгли Кўқонда ўзини кутиб турған уламолиқ шухратига; муфтилик, қози ва аъламлик мансабига ошиқнанар эди. Унинг фикрича, Кўқондаги қариндош-урулар ҳам ёш олимнинг истиқболига ҳозирлик кўргандек эдилар.

Шу йўсун ошиқлар ёр васлига ошиқкандек мулла Абдураҳмон ҳам ўз шаҳрига елиб-югуриб етди. Ул ўйлаганча истиқболға бутун Кўқон кўчиб чиқмаса ҳам, қариндош-урудан уч-тўрт киши, маҳалла кексаларидан иккита савобталаб чол дарбоза ёнида кутиб олдилар. Бу соддacha истиқбол қилиниш Абдураҳмоннинг Бухорода туриб қилған ширин хаёлиға биринчи зарба эди. Уйига бориб тушти. Бир неча кунгача фотиҳаҳонлиқ, ҳордиқ чиқариш маросимлари давом этди. Лекин бундан ҳам қаноатлана олмади, билъакс, жини отланди. Чунки зиёрат қилғучиларнинг аксариси мертуқсертуқ қавму қариндошлар, узоқ-яқин кўз таниш мадраса талабалари ва бир неча маҳалла имомлари бўлиб, ул куткан асосий моялар¹, яъни мударрис, пешволар, муфти-уламолар ва бек-бекзодалар, бообрў ашроф ва боёнлар зиёратчилар орасида ақалли кўз оғриғи учун ҳам кўринмадилар. Бу иккинчи зарба эди.

Зиёрат қилишга «қўли тегмаган» бальзилар узр мақомида ўз уйларига «махсус зиёфат» билан чақираплар, деб кутди. Бахтка қарши, бу умил ҳам бўш чиқди. Бир неча қариндошларнинг титраб-қаҳшаб қилған зиёфатлари билан «уйдан уйга ўтиб неъматлар ичиди сузуб юриш» хаёли ҳам «бир хаёл» бўлиб қолди. Бу учунчи зарба эди.

Бир ой ўтмай қавму қариндошларнингда зиёфатлари ниҳоятига етиб, бева онасининг туппасига қаноат этишқа мажбур бўлиб қолди. Бухорода ўйлаганча бирар мадрасанинг мударрислиги ёки бу топилмағанда мукаррирлигигина эмас, ҳатто нариги маҳалланинг имоматини олиш ҳам қийин келди. Ўзидан икки маҳалла нарида бўлған ҳозирғи масжид имоматига таъйин қилмоқчи бўлған эдилар, бунга ҳам мониъ чиқди; мулла Абдураҳмон алҳол суннатни бажо келтирмаган,

¹ Моя — аслзода, асл одамлар.

яъни, уйланмай, тарки суннат қилған кишининг имоматида нуқс бор, дейишиб, маҳалладаги баъзи тақвадорлар эътиroz қилдилар. Шундан кейин бир неча ёрдўстлар, тўй чиқимини ўзаро устларига олишиб, уни уйландириш фикрига туштилар. Бухородаги «хаёллар» зеру забар¹ бўлған ҳолда, мулла Абдураҳмон уйланиш шарти билан ҳалиги маҳалла имоматига ўтди. Ҳозир шунчалик паст ишка ҳам бўйин эгиш зарурати бор эди...

Мулла Абдураҳмоннинг совчилари ибтадаан² Солиҳ маҳдумнинг қизи — Раъно учун бордилар. Чунки Раънонинг ҳусни бу даҳада машҳур, ундан кейин Абдураҳмоннинг ўзи Солиҳ маҳдумда савод ўқуб юрған фурсатда ёш Раънони кўрган, учунчидан — ёш олим кекса домланинг қизига уйланса, яна бир ҳусн бўлар эди. Айниқса, мулла Абдураҳмон ҳануз Раънонинг эрга берилмаганлиги хабарини эшиткач, бу тасодифни истиқболининг хайрлик фоллари сирасига киритди. Раъно бу ўн йил ичидаги яна етилган бўлса керак, деб тўйни кутмаёқ унинг хаёлий сиймосини қучоқдай бошлади. Мактабдор домлаларга қарағанда ўз илм ва мартабасини аллақанча қори қўйғанлиқдан, Солиҳ маҳдумнинг қулоқ қоқмай домод қилишига ишонар ва бу кунми, эртами, Раънони чиндан дар оғуш этиш учун ошиқар эди. Лекин тақдир бунда ҳам уни алдади. Совчилар Нигор ойимдан бўлмаған узрни олиб келдилар: «Қизлари ҳали ёш эмиш, энди ўн икки ёшқа кирган эмиш...»

Мулла Абдураҳмон хотинлар сўзига ишонмай Солиҳ маҳдумнинг ўз олдиға маҳалладан бир-иккита кексани совчи қилиб юборди. Бу совчилар ҳам яна аччиғроқ жавоб билан келдилар. «Солиҳ маҳдум қизини ўрдада мирзолик қиласидирған Анвар исмлик бир йигитка фотиҳа ўқуб қўйған экан. Фотиҳа қиласидан, албатта сизга берар экан, кўб афсус чекти».

Бу жавобдан кейин Абдураҳмоннинг дами ичига тушиб, ўз тақдириға лаънат ўқуди. Аммо кўнглида Раънони оладирған Анвар исмлик йигитка қарши бир кек туғилди. Бу жавоб чиндан тўғрими, найранги йўқми, деб ўрдада хизмат қиласидирған Анвар отлиқ мирзони сўраштириди. Тўғрилигини билиш устига ҳатто бу

¹ Зеру забар — остин-устин, вайрон

² Ибтадаан — бошлаб, дастлаб.

Анварни кимлигини ҳам хотирлади: ўзи Бухороға кетар олдида Солиҳ маҳдумнинг мактабида ўқуб юрган ўша етим бола эмиш. Уч-тўрт йиллардан бери ўрдада мирзолиқ қилиб, неча тилло моҳона олар эмиш... Бу сўрашириб билишдан кейин Абдураҳмоннинг ичи яна ёниб кетди; Бухорода хатми кутуб қилиб келган бир «олим», ақалли бир маҳалла имоматига хархашасиз ўталмасинда, унинг ҳаром тукига арзимаган бир бесавод етим ва баднажот исқирип ўрдадан фалон тилло вазифадор бўлсин ва шу туфайлда Раъно каби бир қизни ҳам ўзиники қиласин: бу айниқса, киши чидарлик гап эмас эди...

Мулла Абдураҳмон бутун камолатини ишка қўйиб, имомат ва хатибликка шурӯй¹ қилди. Ҳар кун қавмлариға амри маъруф, наҳий анилмункар² айтиб, хусусан, ҳар ҳафта жумъя куни амри маъруфни кенгроқ доирада юритиб, кўбларнинг кўнглини эритишкага муваффақ ҳам бўлди. Изҳори фазл ниятида қилинған бу кўз бўяш кўбларнинг диққатини ўзига жалб этиб, ҳатто унинг амри маъруфини тинглаш учун жумъя кунлари чет маҳаллалардан оғиб, кишилар кела бошладилар. Бу муваффақиятдан чатнаёзған мулла Абдураҳмон кучангандан кучанаар, айниқса, орада хонға тегишилик ҳукumatдор беклардан кўриниб қолса, жаннат ва жаҳаннам устидаги масалани дарҳол хонға итоат, бекларга ҳурмат билан айрибошлаб олар эди. Ҳаммабоп бўлишға қарағанда, айниқса, хонбоб бўлишға тиришар эди. Унинг бу жонбозлиғи бошқа тўғриларда бирар амалий натижага эришмаса ҳам, фақат бир важида ниҳоятда яхши самара берди. Унинг «дарёи фазли»га мафтун бўлған савдогарлардан бири қиз қариндошини бериб, ўзига куяв қилди. Яхши оиласа куяв бўлғанидек, шаҳардаги бошқа давлатмандлар билан ҳам алоқа боғлади ва уларнинг зиёфатлари воситасида баъзи мадрасаларнинг мударрислари, мукаррирлари билан ҳам танишди, қисқаси, бир оз бурни кўтарилаётди. Фақат энди ўрдаға яқинлаша олса... Аммо ҳануз бу мұяссар эмас-да.

Имомнинг кўнгли Анвар қаршисиға оғина кирлик эканини ўқуғувчи юқоридан онглади. Унинг кўнглида-

¹ Шурӯй — бошлати, ишга киришиш.

² Наҳий анилмункар — ёмонликдан қайтариш.

ти шу озгина кир Анварнинг кўтарилишидан тинчсиз эди.

— Нодон Анвар ўрдадан қувланиш ерида сармуншийлик маснадига минмакчи.

Холис муҳокама кўпинча муҳокама бўлиб қоладир. Аммо фаразлик фикр аксар сўзлагучини шарманда қила-дир. Шунга ўхшаш, мулла Абдураҳмон ҳам муҳокамасига озгина фараз аралаштириб, Сафар бўзчининг ач-чиғ ҳақоратига ҳадаф бўлди.

Шундай, ул Анварга кекли эди. Шунинг билан бирга Анварга қарши амалда бир иш қилиш кучидан ҳам маҳрум эди. Балки сиз «энди И мом афанди уйланиб олибdir, Раънога эҳтиёжи қолмабdir, бас, шу ҳолда кек сақлашға қандай мантиқ бор?» дерсиз. Бу жуда содда муҳокама. Аслида бу кек Раъно билан бошланған бўлса ҳам, ҳозирда доирани бошқача ушлаган. Масалан, дейсизми? Масалан, Сафар бўзчи жуда билиб сўзлади: «Сиз шунча йил Бухорода ўқуб келиб, ниҳояти маҳаллага бир имом бўлдингиз, ул бўлса...»

Битишка маҳкум бўлған кекни мана шу «неча йил Бухорода ўқуб келганлик ёки Бухорога бормаса ҳам кимсан фалоний бўлғанлиқ» сақлаб турар эди. Агар сиз содда бўлсангиз, масалага Сафар бўзчи каби қараб «худой берса шундай» дерсиз, яна гапга тушунмассиз. Абдураҳмон каби кишиларнинг табиъатига тушуниш албатта, қийин ва тушунмаган маъқул.

21. ЁРЛИФ БЕРИШ МАРОСИМИ

Ёрлиғнинг кимнинг исмига ёзилғанлигини эрталабданоқ ўрдада ҳар ким сезиб қолди. Девонда эски одатича ўз ишини қилиб ўлтурғучи Анварнинг ёниға дам-бадам мирзо ва гайри сарой ходимлари келиб, оҳистагина уни табрик этиб кетар эдилар. Анвар табрикларга илтифотсиз, оддий вазиятда, хонга эшиддирилиши зарур, атроф ҳокимларидан бу кун келган нома ва аризаларнинг муҳимини аҳамиятсизидан ажратиб, худайчига топшириш учун тайёрлар, баъзиларини биринчи хонада олдиға давот-қалам қўйиб дафттар устида ўлтурған мирзо, муфтиларга ҳавола қиласиди.

Сармунший хонасида Анвардан бошқа яна икки номанавис бор эди. Бу иккиси қофозга михлангандек

гап-сўзсиз савағич қаламни қирр-қирр қофоз устидан юритиб турар эдилар. Бу қовоқ-тумшуғи осилиб кетканларнинг биттаси Шаҳодат муфти бўлиб, номзади хонға манзур қилинғанлардан эди. Иккинчиси шоир «Мадҳий»нинг сармунший бўлишини орзу қилған Калоншоҳ отлиф яна бир пешқадам мирзо эди.

Биринчи хонадаги ўн бешка яқин мирзолар ҳам турлиси турли вазиятда: Султонали мирзоға ўхшағанлар ер остидан ёнидағисиға кулиб муомала қилас ва баъзилари Шаҳодат муфти каби тўнини тескари кийиб олған кўринар эди. Анвар ёнидағиларнинг бу ўзгаришлиридан сиқилғансумон ҳар бир аризани кўриб чиқиш ораси уларга қараб олар эди. Қаршисидағи иккиси гўё мум тишлиған каби сўзсиз эдилар.

— Бу кундан мени мазоҳ қилиб бошладилар, — деди ниҳоят Анвар, — гўё мен сармунший бўлар эмишман...

Шаҳодат муфти савағич қаламини давотка бир-икки тиқиб олғач, кўзи қофозда экан, жавоб берди:

— Бўлсангиз ажаб эмас...

— Йўқ, — деди Анвар ариза буқлаб, — сиз қишлоқда бўлғанингиз сабабдан келгунингизча ишлар тўхтаб қолмасин, — деб вазифамдан ташқари ишларга уриндим. Эртадан бу вазифани ўзингиз олингиз, тақсир, мен бу мазоҳларга чидай олмайман.

Шаҳодат муфти қарийб бутун кўкрагини ёпқан баҳайбат мошгуруч соқолини қалам билан таради:

— Мазоҳ бўлмаса керак, — деди билинтирмайгина энтикиб, — алҳол ёшсиз, муҳофазангиз бутун, зерикиш сизнинг учун айб бўлади... Биз энди бу ишни кўп қилиб зерикканимиз...

— Албатта, — деди муфтининг ёнидағи Калоншоҳ мирзо кўзини қофоздан олмаған ҳолда, — мазоҳларга қулоқ солиш керак эмас.

Анвар табрикларни бир қадар ҳақиқатка яқин кўтар эди. Аммо уларга «мазоҳ» деб таъбир қилиши, ўзини маълум ўнгтайсизликдан қутқариш ва уларга ҳам енгиллик бериш учун эди. Бироқ Калоншоҳ мирзонинг кейинги сўзи яна уни эзиб, очиқдан-очиқ бўлған бу адоваратка қарши қандай муқобала қилишдан ожиз келди. Шу ҳолда биринчи хонанинг даҳлизидан худайчи кўринди ва турған жойидан Анварни чақирди:

— Мирзо Анвар!

Анвар, худайчи учун ажратқан аризаларни қўлиға олиб ўрнидан турди:

— Аризалар тайёр... Ҳузурингизга чиқармоқчи бўлиб турған эдим¹.

Худайчи бошини чайқади:

— Аризаларни ҳозирча қўйиб турингиз, — деб ерга ишорат қилди, — ўзингиз мен билан бирга келингиз.

— Қаёққа, тақсир?

— Ҳузури муборакка.

Мирзолар бир-бирларига қарашиб олдилар. Шаҳодат муфти бўзрайиб ҳамроҳига қаради. Анвар эса қўлида аризалари билан ҳайрат ичиди эди. Даҳлизда уни кутиб турған худайчи яна танбех қилди:

— Мен сизга айтаман, Анвар.

Анвар, қўлидағини ўз жойига қўйиб, худайчи орқасидан чиқди.

Хон таҳтда эди. Ўнг тараф курсида Абдураҳмон офтобачи² ва сўлда шоир мулла Ниёз домла қўл боғлаб ўлтураг эдилар. Биринчи хонадан Худоёр ҳузурига кирадирган эшикнинг икки ёнида ойболта кўтарган икки жаллод сурат каби қотқонлар, улар қаторида хон улуғлари — аъён ва сарой беклари чизилишиб ўлтурғанлар эди.

Худайчи «ҳузури муборакка» кириб таъзим қилди...

— Чақирдинғма? — деди хон.

— Тақсир.

— Изн берамиз.

Худайчи қуллиқ қилған кўйи орқаси билан юриб, биринчи хонанинг даҳлизига келди ва даҳлизда кутиб турған Анварни «ҳузури муборак» сари йўлга солди.

Анвар «ҳузури муборак»нинг эшигига тўхтаб, таъзим адо қилди ва унинг ёнидағиларға ҳам ярим таъзим ишорасини берди.

— Ишларинг яқшима, мирза? — деб сўради хон.

— Дуолари баракасида, қиблагоҳ, — деди Анвар.

Хон мулла Ниёз домлаға қаради:

— Бу жигит бизнинг миразалар орасида ўбдан кўринади, — деди.

Домла Ниёз ўрнидан қўзғалиб олди.

— Файзи шаҳаншоҳий.

¹ Ариза ва бошқа гаплар хонга фақат худайчи томонидан тақдим қилинадир (*муал.*).

² Машҳур офтобачи — Мусулмонқулнинг ўғли (*муал.*).

— Мен бу жигитни мирзабаши қилмақчи бўлдим,
— деди хон ва тизаси тегидан бир қоғоз олиб, домла
Ниёзға узатти, — ўқунғ, домла.

Домла Ниёз ўрнидан туриб, қоғозни олиб ўпди,
Абдураҳмон офтобачи ва унга эргашиб биринчи
хонадаги аъёнлар баробар ўрунларидан туришдилар.

Домла Ниёз турған кўйи ёрлиғни ўкуди:

«Ба исми субҳонаху. Амрulloҳи фаризатун ва амру-
но вобиж¹. Бизким Фарғона мамлакатининг хоқони
султон ибни султон, аъни Сайд Ҳудоёрхон сўзимиз:
Жулуси солисамизнинг² учунчи санаси мутобики³ 1287-
нчи ҳижрия⁴ моҳи сафарнинг 25-нчиси⁵, ушбу ёрлиғи-
мизни бердик хўқандлик мулла мирзо Анварғаким, маз-
кур мулла мирзо Анвар бинни Салимбой шаъри ша-
риф узра устивор туруб, амримизга инқиёд⁶ этиб
девонбеки унвон дигар садри муншийлик умури⁷ ва-
зойифаларимизни кама янбаги⁸ адо қилғай деб. Адойи
ҳадама⁹ асноси биз амири вазифа мутлақальинон¹⁰ до-
рус-салтананинг¹¹ ҳаққи шаръийсиға ҳиёнат қилишдан
ижтишоб¹², адолатимиз ойинасини даноат¹³ губороти
бирлан халалдор айлашдин парҳез, арзи доди фуқаро-
миз суръати истимоъида¹⁴ иҳмол¹⁵ ва сустлик кўрсатмай
интишори¹⁶ адолатимиз кўшишида субҳи шом машғул
ва мабзул¹⁷, диққат ва эътибори том қилғай деб ва яна
мазкур исмига ёрлиғ мактаб бўлмиш итоатига афро-
дил¹⁸ девонхонамиз маъмурлар¹⁹ деб, муҳри шоҳонамиз
бирлан ушбу ёрлиғни таъкид ва тақрир²⁰ этдик».

¹ Оллоҳнинг амри фарзидир, бизнинг амримиз вожибdir.

² Жулуси солиса — учунси марта Ўлтуриш (тактта).

³ Мутобик — мувофиқ, ўйғун.

⁴ Мелодий ҳисоб билан 1872 йил.

⁵ Моҳи сафар — сафар ойи, қамария йил ҳисобида иккичи ой номи.

⁶ Инқиёд — бўйсуниш.

⁷ Умур — ишлар.

⁸ Кама янбаги — талаб даражасида, кўнгилдагидек.

⁹ Адий ҳадама — хизматларни бажариш.

¹⁰ Мутлақальинон — ўз-ўзига мустақил.

¹¹ Дорус-салтана — мамлакат.

¹² Иҷтишоб — четланиш.

¹³ Даноат — паскашлиқ, тубанлик.

¹⁴ Истимӯ — эшитиш, қулоқ солиш, тинглаш.

¹⁵ Иҳмол — эътиборсизлик.

¹⁶ Интишор — ёйилиш, тарқалиш.

¹⁷ Мабзул — бағишламоқ.

¹⁸ Афрод — одамлар, кишилар.

¹⁹ Маъмур — амр қилинган.

²⁰ Тақрир — қарор.

Домла Ниёз ёрлигни тугатиб, қоғозни манглайига күттарди ва икки қўллаб Худоёрға узатди.

Худоёр ёрлигни олиб қаршида бош букиб турған Анварга ишорат қилди. Анвар югуриб келиб, ёрлигни олиб ўпти ва уни салласига санчиб, орқаси билан юриб, илгариги ўрниға бориб тўхтади.

Домла Ниёз Анвар тарафидан дуоға қўл очти:

— Давлати шаҳаншоҳи рўз-барўз афзун, душманони амир-алмўминини сарнигун бошад. Оллоҳи таоло сояи зиллаллаҳиро, аз сари раиятон кам накунад...¹

*Нудовандо, бигардоний балоро,
Зи оғатҳо, нигаҳ дорий ту моро.
Ба ҳаққи ҳарду гисӯи Мұҳаммад,
Забун гардон забардастони моро²*

Дуо асноси, айниқса, биринчи хонадаги аъённинг йиги ва риққат оҳанглик «омин, омин» садолари «хузури муборак»ни титратти. Дуодан кейин худайчи икки тўн келтириб, кимхобни домла Ниёзга ва қора бахмалдан тикилган мирзобошлиқ хильъатини Анварга кийдирди. Кимхобни кийиб олғач, мулла Ниёз «саҳоватда Ҳотамитойдан, адолатда Нўширавони одилдан» ортиғроқ ул жанобнинг ҳаққига янги дуо ва санолар тўқуди, гўё «амиралмўминин»ни кўмди ва ўзи ҳам қайнади. Бундан сўнг маросим итмолига³ этиб, Анвар секин-секин орқаси билан юриб биринчи хонага ва ундаги аъённинг табрикларига кўмилиб, даҳлизга чиқди.

Анвар девонхона саҳнига етканда ичкаридаги каттадан кичик мирзо, муншийлар янги бошлиқларини муборакбод қилғали ўрунларидан қўзғалдилар. Ҳозир баъзиларининг устида бояғи «онглашилмовчилиқлар» гўё бўлмагандек, ҳатто мулла Шаҳодат муфти ҳам ҳеч нарсани кўрмагандек, ўз умрида биринчи мартаба Анварнинг ҳурматига ўрнидан турди.

¹ Шаҳаншоқнинг давлати кун сайин кўпайиб, амиралмўмининнинг душманлари ёъқ бўлсин. Оллоҳ таоло худо соясини фуқаро бошидан кам қилмасин.

² Эй худо, сен балоларни қайтарғучидирсан,
Оғатлардан бизни сақлагуҷидирсан.

Мұҳаммаднинг икки кокили ҳурматига,
Бизга ғолиб келгучиларни забун қил (муал.).

³ Итмолом — тамомлаш, туталлаш.

— Муборак, муборак! Боракалло, мирзо Анвар! — деди.

Баъзи муншийлардаги ярим соатлиқ бу ўзгаришдан таажжуб қилинмасинким, бунинг сабаби оддий ва очиқдир. Сармунший — демак, агарчи соқоли кўксини тутқан Шаҳодат мафти кабиларнинг бўлса ҳам хўжасидир. Шу соатдан бошлаб уларнинг тақдири шу бир кишининг қўлидадир.

Анвар самимий ва риё аралаш табриклардан анча унгайсизланған эди. Бошидағи ёрлиғни қўлиға олиб, ўз-ўзидан таажжубланганнамо атрофидаги мирзоларга қаради:

— Жанобнинг амирлари билан, — деди Анвар уларга хитобан, — энг оғир ва жавобгарлик бир хизматни ўз устимга олишқа мажбур бўлдим. Бу мажбуриятим ўзимга эътимод қилғанимдан эмас, балки сизнингдек оталарим, оғаларимга такягоҳ деб ишонғанимдандир. Ўйлайманким, бундай мажбуриятда қолған бир укантизни албатта ерга қаратмассизлар ва ундан марҳаматларингни аямассизлар... Мен сизларнинг сояларингизда тарбияландим, менга ўз шогирдларингиздек муомалада бўлиб келдингизлар. Бу кун мен расман сизларга бошлиқ бўлиш мажбуриятида қолған эканман, яна ҳеч аҳамияти йўқдир. Мақсад: мундан кейин ҳам менга кечаги Анвар каби такаллуфсиз муомалада бўлишларингиз ва ҳўрматлар билан мени ранжитмасликларингиздир. Чунки содда муомала яқинлиқ ва меҳрибонлик белгисидир.

— Бу кунгача биз сизни марҳум мулла Муҳаммад Ражаббекнинг шогирди бўлғанилингиз учун эҳтиром қилмадик, — деди жавобан Султонали мирзо, — балки сизнинг истеъдодингизни ҳурмат қилдик. Мундан сўнг ҳам бош мирзолингизни эмас, мирзо Анвар-лиингизни эҳтиром қиласмиз.

Мулла Шаҳодат муфти ер остидан Султоналига ҳўмрайиб қаради ва нос отиб ўз жойига бориб ўлтурди.

— Сиз ҳамиша мени муболағангиз билан уялтирасиз, мулла Султонали ака, — деди Анвар. — Агар менга ҳурмат лозим бўлса, муболаға билан эмас, яна тақрор айтаман, бир қариндошингиз қаторида такаллуфсиз муомала қилиш билан бўлсин.

Фотиҳадан сўнг ҳар ким ўз ишига ўлтурди. Анвар

ҳам бахмал түнни еча бошлаган эди, ёниға Султонали мирзо келди:

— Анвар, сиз уйга борсангиз яхши эди.

— Нима учун?

— Ёрлиғ олғанингизни хабар қилиш учун шаҳарга ҳозир жарчи чиқар. Уйнингизга сизни муборакбод қилғали кишилар келса...

— Аввало меним уйим йўқ. Ундан кейин мени муборакбод қиласидирган танишларим ҳам йўқ. — деди Анвар қўл силтаб, — бундан хотиржамъ бўлингиз.

— Ёшлиқ қиласиз, Анвар.

Анвар жавоб бериш ўрниға кулимсираб қўйди ва жойига ўлтуриб, аризалар қўра бошлади.

22. АДРАС ТҮН ВА ИССИҒ НОН «ФОЖИҲАСИ»

Ёрлиғ олишнинг иккинчи соатларида бутун шаҳарга бу хабар тарқалиб кетди. Ўрда жарчиси бозор ва уруниш жойларда тўхтаб:

— Айюҳаннос! Билмаган билсин — эшитмаган эшитсин:

*Вақтики, ажал паймонаси тўлди,
Мунший мулла Мұхаммад Ражаббек ўлди!*

*Ғазл боғида очилған бир гул,
Яъни гул шоҳига қўнған булбул.*

*Ба номи мулла мирзо Анвар,
Камолига мусалламадир¹ аксар.*

*Ҳузури муборакдан олиб ёрлиғ,
Майдони қаламкашиликда қилур сухандонлиғ.*

*Ҳар кимсанингким баҳти кулса,
Шоҳига жону дил ила хизмат қилса.*

*Лутфу шоҳонага сазовор бўлғай.
Атрофи зару зевар ила тўлғай!..*

манзумаси билан жар солиб юрар эди.

¹ Мусулмам — тан бермоқ, қойил бўлмоқ.

Кечаги хабарларга кулги ва мазох тариқасида қараған шаҳар уламо ва ашрофлари бу кунги ҳақиқат олдидә ҳар замон ёқа ушлаб: «Тавба, бу қандай бемазалик? Бир беному нишонга бунча илтифот!» дер эдилар. Шаҳарнинг аксарият қисми бўлған камбагал-косиблар бу масала устида бир хилдароқ фикр қилиб «ким бўлса ҳам ўзи инсофлик бўлсин, нима дединг-а, Мамарайим?» каби содда жумла билан ўз орзуларининг нимада эканини гавдалантирар, аммо Анварга иши тушиб, унинг шафқатини кўрган Сафар бўзчи кабилар бу хабардан жуда ҳам хурсанд: «Қылмишидан топти бу йигит, бўғани жуда маъқул» деб, янги мирзобошининг таърифини қиласар эдилар.

Махдум бу хабарни илгаридан кутиб турған бўлса ҳам, яна шошиб қолди. Сўйинчига келган йигитни тўхтатиб қўйиб, дарҳол икки болани меҳмонхонани супуриб жой солишқа буюрди ва бошқа болаларни ёппа озод қўйиб юборди. Алпанғ-талпанғ ичкарига кириб, ўқуғчи қизлар ичидаги Нигор ойимни ўз ёнига чақирди:

— Ҳай, — деди, — Анварингдан киши келди, сандифингни оч-чи!

Нигор ойим маҳдумнинг шошиб айткан бу сўзига тушунмади.

— Анвардан нима учун киши келади, сандиқни нега очай?

— Ҳай аҳмақсан, — деди маҳдум энтикиб, — Анвар ёрлиғ олған, сўйинчига йигит келди; сандиқни очиб, шунга бир нарса бериб юборайлиқ, дейман, тез бўл!

Нигор ойим ҳам шошилинқиради, уйга кириб, сандиқнинг калидини тополмай тўрт томонни излар, маҳдум даҳлиздан туриб уни койир эди. Калид топила бермагач, маҳдумнинг тоқати тугади, чиқиб қизлар ичидан Раънони чақирди.

— Топдим, топдим! — деди Нигор ойим.

Махдум уйга қайтиб кирди. Нигор ойим сандиқни очиб сўради:

— Қандай тўндан олай?

— Бўздан ол, бўздан.

Шу вақт Раъно ҳам уйга кирди. Маҳдум қизиға қараб кулди:

— Бахтинг-да, қизим, — деди, — Анвар акант сармунший бўлибдир.

Раъно кулимсираб четка қаради:

— Мени нега чақирған эдингиз?

— Сандиқнинг калидини биласанми, деб чақирған эдим, калид топилди.

Нигор ойим бир бўз тўнни олиб, эрига кўрсатти:

— Шуниси бўладими?

— Ҳа, бўлади, ташла.

— Ўрдадан келган кишига шу тўнни бериб бўлармикин?

Раъно ҳам бўз тўнга эътиroz қилди:

— Бериб бўлмайди, уят.

Махдум ўйлаб қолди:

— Бўлмаса, — деди иккиланиб, — жўнроқ адрасдан ол-чи, — Нигор ойим бир адрес тўн олиб махдумнинг қўлиға берди. Махдум тўнни ёруққа солиб кўрди:

— Йўқ, адрес ҳайф, Раъно, — деди тўнни тахифа солиб, — ҳалиги бўзни беравур.

— Бўз тўн бергандан, бермаган яхши, — деди ачичгланиб Раъно, — арзимаган нарса учун Анвар аками уялтирасизми?

Раъононинг ёниға Нигор ойим ҳам қўшулди:

— Киши уялғулиқ бўлмасин, Раъно.

— Ҳайфда, ҳайф, — деди махдум, адрес тўнни салмоғлаб кўриб. Бояғи шошилиш ҳолати ҳозир йўқ, аммо юзида ачиниш вазияти бор эди. — Увол-да, увол, қизим, ипаги жуда қуюқ экан.

— Ипаги қуюқ бўлса, ҳеч нарса қилмас, — деди асабийланиб Раъно. — Кишининг иззати-нафси ундан ҳам қуюқ.

— Хайр, хайр, — деди махдум, адрес тўн билан видоълашқандек. — Сен қизларингни озод қўй, Нигор, дастурхон тайёрлаб, чой қайнат. Фотиҳага одамлар келса керак. Сен Раъно, соchlaringни ювиб, сал одамшаванда бўлиб юрсанг бўлмайдими, қизим?

Махдум шу сўзни айтиб чиқди. Раъно махдумнинг орқасидан нима учундир кулиб юборди. Нигор ойим югуриб эрининг орқасидан чиқди:

— Ҳай, Раъно! — деди ҳавлида кетиб борған махдумга, — нонларимизнинг суви қочқан, ҳамир қилишға вақт оз, бозордан иссиф нон олдирасизми?

Бу гап махдумга адрес тўннинг алами устидан туз сепкан таъсирини берди.

Ҳавли ўртасида бош қашиниб қолди ва кўзини қисиб, хотиниға қаради:

— Жуда қаттиғми? — деб сўради.

— Жуда қаттиғ, ҳатто ушатишқа ҳам қўлнинг кучи етмас.

Жавоб яна фалокатлироқ эди. «Хўб, нон олдираман» дейишка ҳам маҳдумнинг мажоли қолмаған ҳолда бошини қуи солиб, жавобсиз ташқариға жўнади. Меҳмонхона саҳнида кутиб ўлтурган йигитка ўз қўли билан адрес тўнни кийдирди. Йигит дарбозадан чик-қунча ҳам маҳдумнинг кўзи «хайф кеткан» адрес тўнда, ҳатто ундан Анварнинг келаётқан хабарини сўрашни ҳам унуткан эди. Ҳавли супургучи бола сув сепмай чангитиб юборғани учун уни «аблаҳ, кучук!» деб койиди. Меҳмонхонада кўрпача ёзиб турған боланинг ёниға кириб, кўмаклашди ва боланинг уқувсизлиғидан ранжиб, буни ҳам бирмунча ачитиб олди.

— Сен чопиб гузарга чиқ, — деди болага, жой солиниб бўлғандан кейин. — Катта толнинг тегида Со-вур новвойнинг дўкони бор. «Маҳдум домлаға йигирма дона нон керак экан. Ҳархи қанчадан?» деб даррав сўраб кел. «Маҳдум домлаға» дегин, «арzon қилиб айтар эмишсиз, пули нақд эмиш» дегин... «Янги мирзобошининг ўрдадан меҳмоңлари келар экан» дегин... Югур!

Болани нарҳ билишкага жўнатиб, ҳавлига чиқди. Ҳавлидаги бола сувни кўб сепиб, ерни лой қилиб юборған эди, яна койиди ва дарбоза олди — кўчага ҳам сув септириб, ичкари кирди.

— Қизларни озод қўйибсан, яхши, — деди маҳдум Нигор ойимға. — Биз-ку, шу хабарни кутиб турған эдик. Шундай бўлғандан кейин, нон-понингни тўғрилаб турмайсанми; ун бўлса-ку бор, аглаҳ, қани менга уч-тўртта нонингдан олиб кўрсат-чи.

Раъно онасининг сўзи билан қутидан беш-олти дона нон олиб, дадасининг қўлиға берди. Дарҳақиқат, бирбирига ўхшамаған нонлар тарашадек қотиб қолған эдилар. Маҳдум уруниб кўриб, биттасини ҳам синдиришға кучи етмади. Раъно юзини четка ўгуриб, кулиб турар эди. Маҳдум урина-урина ниҳоят ўзи ҳам кулди.

— Зор қолгуринг жуда ҳам қотипти-да, кун ҳам иссиқ-да, Раъно?

Бу сўздан Раъно баттарроқ кулиб юборди. Нигор ойим ҳам кулимсиди:

— Ахир, ўзингиз кечагина мен хамир қилас десам койидингиз, — деди Нигор ойим. — Биз-ку майли, куни бўйи ишлаб келган Анварга жабр. Шунчалик рўзгор қилиб, лоақал юмшоғроқ нон едирмасак... Киши жуда ҳам уялади.

— Мен иссиқ нонга бола юбордим, — деди маҳдум қаттиғ ноңларни Раънога бериб. — Анварга жабр бўладир, деб ўйласанг мундан кейин ўзига лойиқ, оз-оз нон ёпиб тур. Сен билан мен бўлсақ қаттиғ нонни ҳам я берамиз: жаззаси чойға бўклириш-да.

Маҳдум айтмаса ҳам Нигор ойим Анвар билан Раънога яширинчи юмшоқ нон ёпиб берар, фақат бу кун ўша нондан бир-иккита қолған эди. Маҳдум энди нон сотиб олишни бўйниға олиб, ташқариға чиқди. Нарх билиб келган болага йигирма пул бериб, орқаси куймаганини олиш шарти билан нонға юборди.

Анварнинг «танишсизлик ва уйсизлик» фикрининг аксича фотиҳаҳонлар ҳам кўриниб қолдилар, иккичи, учунчи дурукум фотиҳаҳонлар келгандан сўнг, маҳдум Анвар олдиға киши юбориб, уни чақиририб келишкә мажбур бўлди.

Шу кун кечкача шаҳарнинг ҳамма табақаларидан ҳам фотиҳаҳонлар келиб турдилар. Ҳатто Анварнинг нодонлиғидан кулиб ёқа ушлаган уламолар, бой ва ашрофлар муборакбодчиларнинг аксариятини ташкил этар эдилар. Чунки бу кейинги табақа замонасозлиқ, мувосо¹ ва тадбир орқасида яшагучидирлар. Анвар ўзини табрик қилгучи уламо ва ашрофлар юзидан очиқ радиша риё, шайтанат ва тамаъ ўқур, камбағаллардан содда самимият кўрар эди.

23. КИТОБ СЎЗИ

Асрдан бир оз илгарироқ эди. Маҳдум дарбоза ёнида муборакбодчи мударрислардан бирини икки букланниб таъзим қилған ҳолда узатар эди. Ҳазрати мударрис хайрлашқан жойида яна тўхтаб томоқ қириб олди.

— Ҳай, мулла Солиҳ, яна бир гапни саҳв қилибман, — деди ҳазрати мударрис. Солиҳ маҳдум югуриб ҳазратнинг ёниға келди. — Мирзога айтишни эп кўрмадим; масалан, ривоят ва ҳоказо масалаларга ҳожат туш-

¹ Мувосо — муроса қилиш, келишиш.

са, биздан бегона қилмасин... Жанобингиз шуни ҳам таъйинлаб қўясиз.

- Хўб, тақсир, хўб.
- Фаромуш қилмассиз, албатта?
- Хотиржамъ тақсир.

Махдум уламо, амалдор ва ғайрилардан шунинг каби сипоришларни тўрт-беш соатдан бери қабул қила-қила жуда мияси суюлған эди. Ҳозирғи илтимосни ҳам ўшалар қаторида бўйнига олиб, ҳазрат мударрисни жўнатди.

Нари-бери бўз салласини бошиға чулғаб, сарпойчан кафшини шап-шуб босиб, дарбозадан ичкарига кириб бормоқда бўлған Сафар бўзчини маҳдум тўхтатди:

— Хўш, хўш, ука, — деди Сафар бўзчиға. — Йўл бўлсин сизга?

Чунки маҳдум муборакбодчи камбағаллар ўёқда турсин, ҳатто уламо ва бойлардан ҳам ҳозир зериккан эди. Бу зерикишкага иккинчи мартаба нон олдиришнинг ҳам алоқаси бор эди. Сафар бўзчи остона ёнидан маҳдумга қийшайиб қаради:

- Лаббай, тақсир? — деди.
- Йўл бўлсин сизга?
- Мирзо Анвар инимга худо мартаба ато қилған емиш деб эшийтдим, — деди Сафар бўзчи, — пиrimни зиёрат қилий, деб келяппан.

— Келганингиз маъқул, илло ўзи ҳозир жуда чарчаб қолғанда, четдан дуо қилиб турсантиз ҳам кифоя, ука.

Сафар бўзчи бошини қашиб, яна маҳдумнинг афтига қараб қўйди:

— Зиёрат қилиб чиқа бераман, тақсир. Бошқа гап йўқ, тақсир.

Махдум Сафар бўзчининг илгарисига ўтти:

- Майлику, ука, ранжитасиз-да.
- Садағаси кетай мирзонинг, — деди Сафар бўзчи маҳдумнинг қаториға бориб, — барака топқурнинг ўзи ранжийдирган йигит эмас, хоксор-да, тақсир, кўрсангиз биларсиз-ку, мен минан жуда қадрдон-да, тақсир.

Махдум асабийлашиброқ Сафар бўзчининг бетига қаради. Сафар бўзчи ҳам маҳдумга бир оз тикилиб турғач, илжайди.

— Кўрсангиз биларсиз, мен минан жуда қадрдон-да, тақсир, — деди яна ва маҳдумга илтифот қилмай,

ичкарига юруй берди. Бир неча мартаба келиб Анварнинг меҳмонхонасиға ўрганиб қолған, шунга биноан бу тўғрида маҳдумнинг ёрдамиға муҳтож ҳам эмас эди.

Анвар меҳмонхонада Шаҳидбек ва яна бир саркарданамо билан сўзлашиб ўлтураср эди. Сафар бўзчини даҳлизда кўриб ўрнидан турди. Иккиси неча йиллик қадрдонлар каби самимий кўришдилар. Сафар бўзчи кўзида ёши билан Анварни табрик қилди. Анвар унга ўз ёнидан жой кўрсатиб ўлтуришдилар. Сафар бўзчининг фотиҳасига анови икки бек аранг қўл кўтариб қўйдилар.

- Закотчидан тинчмисиз? — деб Анвар қулди.
- Худойға шукур, давлатингизда, мирзам.
- Бозорлар яхшими?
- Бир навъи... ҳарчи тириклик тебраниб туради, ука.

Сафар бўзчининг бояғи ҳаракатидан аччиғланниб ташқарида қолған маҳдумнинг кимни ҳам бўлса ичкарига таклиф қилған товши эшитилди. Сафар билан Анварнинг сўzlари бўлинишка мажбур бўлди.

Мулла Абдураҳмон Анвар билан ёнма-ён ўлтургучи «дўсти» Сафар бўзчини меҳмонхонанинг даҳлизига киришидаёқ кўриб қолди ва сариқ туси бўзарив кеткан ҳолда ичкарига қадам узди. Сафар бўзчининг ҳурмати учун лоақал қўмир этмаган беклар ҳам мулла Абдураҳмоннинг истиқболиға қўзалишдилар. Маҳдум мулла Абдураҳмон билан Анварни бир-бирларига танишдирди.

— Балки хотирларсиз, мирзо Анвар, — деди маҳдум,— сиз маним қўлимға келган йилларингизда мулла Абдураҳмон акангиз ҳам бизнинг мактабда ўқур эдилар.

— Хотиримда. Хўб саломатмилар, тақсир?
— Алҳамдуиллоҳ, — деди Абдураҳмон ва ер остидан Сафар бўзчиға қараб қўйди, — мартabalари муборак бўлсин.

— Кутлуғ, тақсир, қани, марҳамат қилсинашлар.

Ўлтуришдилар, фотиҳадан сўнг яна бир даражага аҳвол сўрашилди. Ҳозирги тасодуф жуда қизиқ тушкан эди. Мулла Абдураҳмон бу учрашишдан ниҳоятда ўнгғайсизланған. Анварни табрик етиш учун оғиз очишга қолир эмас ва ҳар замон қаршисидағи «бемаъни»га

қараб қўяр эди. Шу ҳолда бир неча фурсат сўзсиз ўлтуришкандан кейин Анвар қўбчиликни дастурхонга тақлиф қилди ва Шаҳидбек мулла Абдураҳмонни сўзга тортди.

— Нима лавозимотдалар, тақсири?

— Имоматда, — деди Абдураҳмон ва ер тегидан Анварга кўз юбориб олди, — Бухородан келганимиздан бери имоматдамиз...

Мадрасада ҳам бирмунча мукарриргимиз бор...

— Кўб яхши экан; имоматлари қайси маҳаллада?

— Бизнинг маҳаллада, — деди сўзга аралашиб Сафар бўзчи, — тақсириминг илмлари жуда дарё, ўзлари Бухорода хатим китоб қилғанлар.

Шаҳидбек гўё кўнгил учун яна:

— Кўб яхши экан, — деди.

— Мулла Абдураҳмоннинг илми дарҳақиқат яхши бўлған деб эшитаман, — деди маҳдум.

Сафар бўзчи мулла Абдураҳмоннинг тилагига қарши яна сўзлаб кетди:

— Яхшилиқка келганда — яхши, бироқ тақсиримининг толеълари бир оз пастлик қилиб туради. Бўлмаса мударрислик, муфтилик, мирзолик — буларнинг барисига ҳам тақсирим етук... Фақат толеъ паст-да, бек бобо. Мана энди мирзам оталиқ қилиб ўрдадан бирар иш топиб берсалар, тақсиримға ҳам офтоб тегса ажаб эмас. Ўзлари ҳам бир ҳафтадан бери мирзамнинг ҳақлариға дуода эдилар... а, тақсири, шундай эмасми?

Мулла Абдураҳмон Сафар бўзчининг қаршисида ҳозир ҳар бир разолатка ҳам бўйин эгар эди. Манглайидағи терини артиб, бесаранжом аҳли мажлиска қараб чиқди ва гулдирагансумон: — Шундай, — деб юборди.

Маҳдум Сафар бўзчини мулла Абдураҳмон тарафидан воситачилик учун жўрттага келган, деб ўйлади.

— Мулла Абдураҳмон ўзимизники, — деди маҳдум, — албатта мирзо Анвар қўлидан келган ёрдамини аямас.

— Албатта, мунший тариқасида ўрдага олинса ҳам бўлади — деди утта¹ бек.

Анвар ваъда бериб қўйишни эп билмаганиликдан, сўзсиз ўлтурап эди. Мулла Абдураҳмон ҳар замон манглай терини артиб олар эди. Сафар бўзчи тунови кунги алабсизликни тақсиримининг кўнглидан чиқардим, деб

¹ Утта — нариги, анови.

мулла Абдураҳмоннинг кўзини учратишкага ва озғина бўлса ҳам тақсиридан миннатдорчилик олишга тиришар эди. Бир мунча вақт шу кўйи сўсиз ўлтиришкандан кейин беклар фотиҳа ўқуб кўзғалмоқчи бўлдилар. Сафар бўзчининг яна оғзини очиб юборишдан қўрқиб, ҳатто қимир этмай ўлтурган имом ҳам бекларнинг фотиҳасига қўшулишиб ўрнидан турди. Сафар бўзчи ҳам мирзонинг ҳақига дуо қилиб имомга эргашти. Чунки имом билан биргалашиб кетиш орзуси, шу баҳонада тунови кунги паст-баланд гапларни мулла Абдураҳмоннинг кўнглидан чиқариш нияти бор эди.

Анвар билан хайрлашиб, тўрт киши баробар кўчага чиқдилар. Ўттуз қадам чамаси бирга бориб, Шаҳидбек ўз ҳавлисига бурулди. Яна бир оз борғандан сўнг иккинчи бек ҳам бошқа кўчага кириб кетди. Мулла Абдураҳмон ҳам Сафарбой «дўсти» билан бирга юришни хоҳламади шекиллик тез-тез адим ташлаб ҳамроҳлик алоқасини узмоқчи бўлди. Бунга қарши Сафар aka уч ҳатлаб бир босиб, Абдураҳмоннинг ёнидан чиқди. Бу ҳолдан яна имомнинг феъли айнаб, йўл устида бирдан тўхтади ва Сафарнинг афтига бир турли мушук қараши қилди:

— Нега тўхтадингиз, боравуринг.

Сафар бўзчи Абдураҳмоннинг тўхтағанидан хабарсиз икки-уч адим нарига ўткан эди:

— Биргалашиб борамиз-да, тақсир.

— Мен сиз билан юришни хоҳламайман, жўнанг, жўнанг!

Сафар бўзчи тушунолмай бир оз қараб қолди:

— Нега, тақсир?

— Нега дейди-я, аҳмақ одам...

— Ўзларингизни айтишларингизга қараганда, мусулмон киши учун кина сақлаш бир рўймолни ювиб қурутқанча экан, — деди Сафар бўзчи, — бизлар бўлсақ тўрт кундан бери шайтонни апичлаб юруймиз... Шуниси ҳам кифоя-да, тақсир.

— Астаффирулло, — деди имом, — сиз ўша куни маним устимга уч кунлик гап қилдингизми?

— Шайтоннинг ишида, тақсир, — деди Сафар, — ахир, яна маним айтканим бўлди-ку, мен бунга бир нарса деяпманми? Недир кинани қўйайлиқ деяпман-да.

Мулла Абдураҳмон истиғфор айтиб, йўлга тушти.

Сафар бўзчи ҳам мулойимгина унинг ёнида қўл қовуштириб жўнади.

— Хўш, кинани ташлаған бўлсангиз, — деди йўлакай имом, — нега боя уларнинг олдида оғзингизга келганини ўтладингиз?

— Яхшилиқдан бошқа ҳеч гап айтмадим. Фақат илмингизни мақтадим.

— Бошқа гап айтмадингизми?

— Нима дедим, ахир? Шунчалик илмлари бўлса ҳам, толеълари озфина пастлик қилиб турардир, дедим. Бу тўғри гап эмасми, тақсир?

— Мен сизга мирзодан хизмат сўраб беринг, деб ваколат берган эмас эдим-ку.

— Ваколат-ку, йўқ... Ахир, токай илмингизни хор қилиб масжидда ётасиз... Ахир, биравни ука, биравни aka деб сиз ҳам тузукроқ ишка қатишинг-да, тақсир.

— Астағфирулло... Балки менга подшоҳлиқдан ҳам шу имомат яхшидир.

— Бе-е-е, гўрними, тақсир — деди Сафар бўзчи,— у гапни қўйинг, нафси замон гап яхши. Шаҳардаги бирарта мударрис домлани ўшандака мирзобоши қўтарсалар йўқ дерми?.. Вой-боёв, тақсир, сизга ҳам ўрдадаги бир мурзаликни берса, деб, «сизнинг ҳаққингизга тақсирим дуода бўлдилар», дедим-да. Маним холислигимни шундан ҳам пайқасангиз бўлар эди, ука.

— Астағфирулло, — деди яна имом, — дараҳақиқат, мен уни шундай, деб дуо қилғанмидим... Ёлғоннинг нима кераги бор?

— Тақсирим бўлсангиз ҳам ҳали ёшсиз-да, — деб кулди Сафар. — Башарти ростини сўзлаб «сизнинг мурзобоши бўлишингизни тақсирим кўралмаган эдилар» десам, хурсанд бўлармидингиз, вах-хах-хах, хех-хех-хех... Йўқ, тақсир, ўзингиз ҳам Бухорода ўқуған бўлсангиз керак: китоблар икки жойда ёлғон айтишни маъқул деган эканлар; биттаси — эру хотиннинг орасида, иккинчиси — икки мўъминни битириш учун. Буни худо раҳмати домлам ўқуб берар эдилар. Шу гап қулагимда қолған экан, мен дуруғ¹ айткан бўлсам китоб сўзига амал қилдим-да, икки мўъминни битиштириш учун сўзладим-да.

Мулла Абдураҳмон яна оғиз очолмади. Чунки Сафар бўзчи «китоб сўзи» билан уни енгиб қўйди.

¹ Дуруғ — ёлғон.

Маҳаллага келиб етдилар. Сафар бўзчи кинани тамоман кўнглидан ювиб ташлаған эди. Шомни мулла Абдураҳмон орқасида ўқуш учун масжидга кирди. Жиловхонадаги намоз кутиб ўлтурган қавмлар ичидан Самад бўқоқ, Шукур сўфилар ҳам кўринар эдилар. Сафарнинг имом билан бирга масжидга киришидан тажжубланган Самад бўқоқ уни туртиб сўради:

— Ярашдингларми?

— Кина деган рўймолни ювиб қуритқунча, — деди Сафар бўзчи, — янги мирзобошининг уйидан домла билан бирга фотиҳа ўқуб келамиз. Ҳали эшитдингми, ўша маним мирзам ёрлиғ опти-я.

Самад бўқоқ индамай четка бурулиб кетди. Шукур сўфи шом намози учун такбир тушура бошлади.

24. ШОИРНИНГ СИРРИ

Ўн беш куннинг ичida маҳдумнинг меҳмонхонаси расмий бир маҳкамага айланәёзди. Ўрдаға ариза билан мурожаат қиладирған ҳар ким, ҳатто расмий кишилар ҳам аввал маслаҳат сўраш учун Анварнинг ёнига келар эдилар. Кундузлари ўрда девонини бошқариш, эрталаб ва кечкурун ўз уйида хусусий кишиларни қабул қилиш, албатта. Анвар учун оғир эди. Аммо бу оғирлик бурундан сармунший бўлған кишининг устидаги қонуний вазифаси ҳисобланиб келганликдан кишиларни уйда қабул қилишфа Анвар мажбур эди. Бу хусусда камбағалларнинг берадирған заҳматлари Анварга унча оғир тушмаса ҳам, беклар, уламо ва бойларники аксар чучмал ва машаққатли бўлар эди. Чунки камбағалнинг кенгаш сўраб келиши жуда муҳим ишлар устида, масалан: бир бекнинг қилған зулми устидан шикоят, жуда камбағал бўлғани учун солиқлардан дархонлик сўраш ва ҳоказо... Кейингилар эса, масалан: бир мударрис иккинчи мударрис устидан шикоят қилиб, бу тўғрида домла Ниёз Муҳаммад шоғовулбошининг қулоғига андаккина тингиллатиб қўйишни сўрар; бир закотчи иккинчи бир закотчининг хиёнатидан «холисона» шикоят қилар, бир савдогар ўзининг жуда фақирлиғидан ҳасратланиб, закотдан озод қилинишини сўрар; агар закотдан қутқазиб юборса, Анварнинг «қўнглини тўлятиш»ка ҳозирлигини ҳам билдирап эди. Анвар бу кейинги илтимосчилардан гоҳ аччиғланиб,

тоҳ қулар, ҳар ҳолда бир неча дақиқалиқ ваъдалар билан уларни жўнаткунча эси кетар эди.

Бу сўнгиларнинг ташрифлари Анварга қанча бехузурлик берса, маҳдумга ўшанча мағрурият ва лаззат багишлар, ҳатто Анвар ўрдада бўлған кезларда ҳам уларни меҳмонхонага қабул қилиб, Анвар келгунча унга қанча сифоришилар ва аксар сифоришиларнинг ўзларини тўплаб туради. Юқорида Сафар бўзчи билан воқиъ бўлганидек, маҳдум ариза ва кенгашка келгучи косиб ва тўни эскилар ила чиқиша олмас, ўлгунча уларни ёмон кўриб, «мирзо бу кун келмайди, сиз билан гаплашишкан фурсати йўқ, бемаъни бўлманг» каби гаплар билан камбағалларни эшикдан қайтаришфа тиришар эди. Анварнинг бирарта камбағал билан «эзилишиб» ўлтурганини кўрса, ичидан аччиғланиб «куллушайъин яржига ило аслиҳи... паст ҳамиша пастлигини қиладир... Сут билан кирган — жон билан чиқар, мақоли қўб тўғри сўз», деб ўйлар ва энсаси қотиб, четка кетар эди.

Маҳдум шу кунгача Анвар билан Раъноларнинг тўйларини қилишга шошилмасдан келар эди. Аммо бунда бир қанча сабаблар бўлиб, жумладан — Анварнинг Раънога қаттиғ боғланғанини яхши сезганлиги ва шунинг орқасида Анвардан «хотиржам»лиги эди. Шошилмаслиқнинг иккинчи, ҳам кучлик сабаби мумкин қадар тўйни узоққа чўзиб, шу воситада Анварни соғиши... чунки тўй қилиниб, Раъно Анварга берилса, бу даромаднинг қатъиян кесилиш эҳтимоли бор эди.

Анвар бош муншийлик даражасини олғандан кейин маҳдум илгариги «сиёsat»ни яна давом этдириш ва этдирмаслик тўғрисида иккиланиб қолди. Зоро, Анвар ҳозир бутун шаҳарга донғ тортқан, шаҳарнинг уламоси, ашрофи, бек ва беквасҳаси Анварни танийдир; Анварга мазкур олий табақаларнинг ҳар қайсиси ҳам ўз қизини бериб, куяв қилишга тайёр. Бас, шу ҳолда яна маҳдум эски тадбир билан амал қилса мумкинми?

Маҳдум ноилож сармунший бўлишни йигирманчи кунларида Нигор ойим билан кенгашиб, мирзо Султоналига мурожаат қилиш мажбуриятида қолди. Токи мирзо Султонали Анварнинг ризолигини олиб берсин.

Анвар кечқурун ўрдадан қайтишга ҳозирланар эди. Хон аўёнларға рухсат бериб ҳарамга кирган, ўрданинг кундузлик ходимлари тарқалишиб, фақат кеча беклари,

хон соқчилари, доимий ходимлар қолған әдилар. Энг кейинга қолиб Анвар билан Султонали мирзо ҳам ўрдан чиқдилар. Уларнинг орқасидан ўрда дарбозаси ёпилди.

Султонали мирзо Анварнинг ташқи аҳволи билан яхши таниш бўлса ҳам, унинг ички сиррига воқиф эмас, чунки Анвар хусусий ҳаёти, айниқса, Раънога алоқасидан ҳеч кимга оғиз очмас эди. Анварнинг маҳдум ҳавлисида туришини жойсизликдан ва ёшлиқдан, шунда ўсиб ўргангандан, деб юрган Султонали мирзо бу кун эрталаб ўз уйига келган маҳдумнинг сўзидан кейин бир оз ҳақиқатка тушунгандек бўлди. Айниқса маҳдумнинг ҳеч бир муқаддимасиз «Ожизамиз билан мирзо Анварнинг тўйларини қилмоқ ниятимиз бор эди. Шу тўғрида жанобингиз мирзо Анвардан тўйға урунишимиш учун бир калима жавоб олиб берсангиз» деб, тўғридан-тўғри фақат тўй вақтини белгилашини сўраши Султонали мирзога яна бошқа сирларни онглатқан эди.

Иккиси йўл бўйлаб сўзлашиб борар әдилар:

— Маним сўзимга кирсангиз, албатта, бир от олингиз,— деди Султонали мирзо, — айниқса, сизга энди пиёда юриш келишмайдир.

Анвар боягича яна кулди.

— От минишнинг нима ҳожати бор, модомики, тайёр оёғ отимиз бўлғандан...

— Маъқул-ку, мундан сўнг яхши эмас-да.

— Ҳозир яхши эмас экан, — деди Анвар, — мен бу хизматдан тушкандан сўнг пиёда юриш яхши бўладими?

— Нега тушар экансиз... Кўб йиллар шу вазифада қоласиз.

Анвар қулиб кўйди:

— Лекин, манимча, бир йил ҳам қололмасман... Агар оғам бўлсангиз, худодан сўрангки, бўйнимға би-пар бўхтон ортилмай, азл қилинайин.

— Бўлмаған васвасаларга тушасиз, Анвар.

— Шаҳодат муфтингизнинг афтига сира қарайсизми, шоирингизнинг пичингларини пайқайсизми? Агар шу жонворлар мендан сармуншийликни тинчлик билан олсалар, ўзимни жуда ҳам баҳтлик кишилардан санар эдим... Шунчалик зўр харидорлари турған бир замонда бу вазифани менга келиб тўхтағанига ҳануз ақлим бовар қилмайдир... Бу воқиға ё мени ўта

бахтиёрлиққа ёки фожиъ бир фалокатка олиб борар. Сиз айтканча васвасамга ёхуд бошқа бир бадбиңлигимга биноан кейинги әхтимол...

— Ҳа Шаҳодат муфти ва на шоирнинг қўлидан бир пуллик иш келса, мендан домангир бўла берингиз, — деди Султонали, — сизнинг сармунший бўлишингиз ҳар ҳолда бир ҳақиқат эди. Негаки, кўб йиллардан бери хиёнат, иёво билан кун кечириб, етти ёшлиқ гўдакнинг ҳам назарида икки пуллик обрўси қолмаған муфтининг сиррини ёлғиз менгина эмас, бутун шаҳар, ҳатто хоннинг ўзи ҳам биладир. Бас, бу жиҳатдан унинг ёрлиғ ололмаслиғи аниқ эди. Домла Бурҳон маҳдумнинг бўлса, шоғовул домла билан оралари бузук; агар хон ёрлиғни унинг исмига буйюғанда ҳам шоғовул домла ёзмас эди. Мундан бошқа домла Бурхоннинг лоқайдилиғи, девонхонани ост-уст қилиши бўладирған савдо... Шоир «Мадҳий»нинг бўлса яна аҳволи маълум: хонни маҳташ, ўзига ёқмағанни ҳажв қилиш, хотинбозлиқ, баччабозлиқ билан овора бир бетаъин. Мундан ташқари, «Мадҳий»нинг ёрлиғ ололмаслиғига яна бир сабаб бор эдиким, бу сирни ўрдан дағдан фақат биз бир неча кишиларгина билар эдик...

— Хўш?

— Буни сўраманг-да, кулманг.

— Хўш, хўш?

Султонали мирзо кулди ва товшини секинлатиб деди:

— Шоир ҳарамдаги канизларнинг бири билан алоқа боғлаған экан...

— Хўш, ундан сўнг?

— Бу ҳолни сезган иккинчи бир каниз хонни бу алоқадан хабардор қиласидир. Хон канизни ҳарамдан ҳайдаганидек, шоирни ҳам ҳузурига чорлаб, ўбдан оғизбўғзига, ҳатто энасининг ўсма-сурмасигача қолдирмайдир... Шоир аранг тавба қилиб қутиладир.

Анвар кулди:

— Шунинг учун унга ёрлиғ берилмади, дейсиз?

— Албатта. Шоирнинг эси бўлса бўйини бошоққа узатмай, саройдан ҳайдалмаганига ҳам шукур қилса бўлар эди. Бинобарин, сизнинг хаёлларингиз тамоман ўрунсиз, Яхши, ҳозир кўнмассангиз ҳам пиёда юриб зерикканингиздан кейин от минишга мажбур бўларсиз. Шунинг учун буни қўйиб турайлиқ-да, отдан ҳам за-

рурроқ масалага ўтайлик, масалан, бошингизни икки қилиш учун, албатта вақт еткандир, деб ўйлайман?

— Қаёқдағи гапларни топасиз, Султонали ака.

— Ҳазили йўқ. Уйланиш сизга ҳам фарз, ҳам қарз. Бунга қолғанда, албатта бир узр кўрсаталмассиз.

Анвар кулимсиб қўйди:

— Уйланишни ҳам бекор бўлишгача тўхтатиб турсақ, дейман.

— Ана гап, — деди Султонали, — балки умр бўйи шу вазифада қолиб кетарсиз. Шу ҳолда бутун умр хотинсиз юриш, хах-хах...

— Ким бир вазифада умр бўйи қолған бўлсин.

— Қолғанлар кўб. Масалан, Муҳаммад Ражаббек марҳум; Муҳаммадалихон замонидан бери девон билан олишиб келар эди. Мен сизга жиддий айтаман: шаҳардан кимнинг қизини ёқтирангиз ҳам биз олиб беришкага ҳаракат қиласиз.

— Раҳмат...

— Чиндан сўзлайман, Анвар.

Анвар ярим жиддий Султоналига қаради ва унинг ўзидан жавоб кутканини сезиб:

— Хўб, мен бу тўғрида домла билан кенгашиб, сизга жавоб берайин, — деди.

— Бу кун эрталаб домла бизникига келган эди, — деди Султонали жиддий турда, — домланинг сўз даромадига қарағанда, сизни ўзига куяв қилиш фикри борға ўхшайди. Сизнинг ризолигингиз биланми, йўқми, бунисини билалмадим...

Анвар қизаринди. Жавоб бериш ўрнига «натижка?» дегандек қилиб унга савол назари билан қаради.

— Домланинг гапига қарағанда, бошқа тарафлар биткан кўринди — деди Султонали давом этиб, — фақат ул маним воситамда тўйни бошлаш учун сиздан изн олғали келган экан. Мен бу тўғрига сиздан жавоб олиб бермакчи бўлдим.

Анвар кулди. Аммо бу кулиш унинг бояғи кулгула-ридан тамоман бошқа, яъни баҳтиёрлиқ кулгуси эди.

— Яхши, — деди Анвар ва ўн қадам чамаси сўzsиз борди. — Яхши, мен эртагача ўйлашиб, сизга жавобини бераман.

— Маъқул, агар бу кун домлаға учрашсам, жавобни эртага оламан деяйми?

— Албатта.

- Хайр, худонинг паноҳига, Анвар.
- Хўш, Султонали ака.
- Иккиси ажралишдилар.

25. ҲАЙОТ ШАМЬИ

Неча йиллар Анварнинг кўнглини машғул эткан бир муаммо ниҳоят орзуға мувофиқ ҳал қилингандек, яъни шубҳа ичидаги қизарған муҳаббат фунчаси висол хабари билан очилаёзгандек ва куруқ томоша билан кечкан унинг ой, йиллари бу кун Раъно гулини искаш башоратига ноил бўлғандек эди. Дарҳақиқат, бунча йиллардан бери маҳдумнинг эшигида қолиши, опаси Но-диранинг «Мен сени онамнинг уйига чароғчи бўларсан, деб сўйинган эдим. Ўз истиқболинг учун қайғирмай, бир кишини семиртириб юришинг ақдли йигитларнинг иши эмас, Анвар» каби таъналарига бўйин эгиши ва ҳатто шу уйдан силжимаслик фикрида ўзи тиламаган вазифаларга ҳам уриниши яна шу башоратни олиш учун эмасмиди?

Истиқбол сўзини ҳар ким ҳар турлиқ тушунадир. Анвар ўз истиқболини ёлғиз муҳаббат орқалиқ кўрар эди. Ота-онанинг чароғини ёқиш учун аввало ўзига бир шамъи ҳаёт топмоқчи ва ўзи шамъсиз туриб, отонаға чароғ ёқишина асло тасаввур қилолмас, яъни истиқбол Анварнинг фарди ҳаётида¹ ёлғиз муҳаббат эди.

Йигитлар ўз истиқболлари қайғусида янги бино, янги рўзгор тузийдирлар ва ҳатто дунёда хаёлий ҳам бўлмаған рафиқалари учун кийим тикдирадирлар... Анвар эрса аввало Раъно каби бир рафиқаға эга бўлмоқчи ва шу воситада бошқа масалаларга қарамоқчи эди.

Анвар Султонали мирзога бояғи ваъданি бериб, бу хабар билан юраги шопирингдан ҳолда уйга келди. Мехмонхонада ўзини кутиб ўлтурганлар билан нарибери ишни битириб, ичкари кирди. Унинг бу кириши ҳар кундагидек киши билмас, тасодуфий эмас, Раънони кўришдан бошқа яна маълум бир маънони Раънодан ўқуш учун эди.

Раъно айвоннинг устунига суюниб китоб ўқур, Нигор ойим ўчоқ бошида овқат пишириш билан машғул эди. Раъно ўзига қараб келгучи Анварга ер остидан кулимсиб олғач, бир оз кўриниб турған оёқ учларини

¹ Фарди ҳаёт — шахсий ҳаёт.

сариф атлас күйлаги билан яширди, атлас күйлакни яхшиғина туртиб турған сирлик күкраги устига ён ўрим соchlарини олиб ташлади. Аңвар яқынлашғач, секингина китобдан күзини олиб, «ҳорманг» деди, яна китобка юз ўғирди. Аңвар келди ва унинг қўлидағи китобка қаради.

— Умар Хайём, — деди ва Раънонинг қаршисиға, ҳавлига оёғ солинтириб ўлтурди. — Қани, ўкучи эшитайлик.

Раъно китобни секингина ёпиб, Аңварга узатди:

— Сиз ўқунг, мен эшиштай.

— Ўзинг ўқи, бахилсан-да.

— Мен тўғри ўқуй олмасам, тунови кунгидек куласиз...

— Жўрттага хато ўқуб ўзинг кулдирдинг... Ўқи Раъно.

Раъно китобни ерга қўйди:

— Мен ўқуб зерикдим...

— Маним учун ўқуб бер, деяпман.

Раъно йўлакка ишорат қилди:

— Дадам келиб қолади.

— Қаёқдан бу қадар уятчан бўлиб қолдинг?

Раъно табассум билан жавоб берди ва унда бир оз қизариниш белгиси бор эди. Аңвар бу ҳолдан бир нарса сезгандек, сўзни бошқаға бурди:

— Кун иссиқми, терлабсан, Раъно?

Раъно бурни устидаги билинار-билинмас марварид резаларини рўймоли билан артди.

— Терлашим иссиқдан эмас, — деди кулимсираб

Раъно, — бошқа нарсадан...

— Нимадан, қани?

Раъно бир оз эски кулавич ва мунаққидлик ҳолатига кирди:

— Сиз беклашканингиздан бери... сизни кўрсам уялдирған бўлиб қолибман. Терлашим ҳам сиздан уялғанимра...

— Кесатуқ хунаринг эсингдан чиқдими, деб турған эдим. Ҳар начук ёдингда экан. Тағин, хўш?

— Ҳон жанобнинг муншийлар муншийси бўлған бир йигитнинг салобати борлигини ким инкор этсин. Албатта, бу тўғрида канизингизга ҳақ берарсиз деб ўйлайман.

— Хўб, ҳақ бердик, — деди кулиб Аңвар ва ўрни-

дан турди. — Башарти, канизимиз уялмасалар, бизнинг ҳам бир амримиз бор: амр қилсақ уялмасмикинлар?

— Амрингизга маҳжуби инқиёд¹ этишка канизинг ҳозир.

— Канизларнинг ўз хўжалари билан ўлтуриб муомала қилишлари мумкинми? Амрга инқиёд этишдан илгари шу тўғрида жавоб берсангиз...

Раъно иргиб ўрнидан турди, гёе канизлардек, икки қўли ёнида ва боши кўксидаги афу сўради:

— Инсон муштақ аз нисёнаст...² Канизи бетамиз ҳамиша афу атоға лойикдир, чунки зархарид³ хўжасига содикдир.

Анвар, очиқ ва ўйун-кулгини бир дақиқа ҳам қўйиб туролмаған парининг санъаткор шу вазиятига қулимсираган кўйи анча қараб турди, ҳам ўзининг хўжалиқ рўлини бузмай:

— Мен суфада бўламан, фурсат топиб ёнимга чиқ, сенга айтадирған маҳфий бир сўзим бор, — деди.

Раъно канизлар каби бош букиб «ҳозирман» ишорасини берди ва табассумга мойил жоду кўзлари билан Анварга оҳиста бош кўтариб қаради... Анвар ўзини завқ ҳам кулгидан тўхтатолмаған ҳолда ташқариға бурулиб жўнади. Ўчоқ бошида машғул Нигор ойим ҳам қизининг кейинги ҳаракатидан қулиб, Анварга қаради. Лекин, Раъно билан Анварнинг доимий шунингдек ўйунлариға тушуниб қолғани учун бу тўғрида гап айлантиргади:

— Ошим пишиб қолди, Анвар, — деди ўчоқ бошидан қулимсив, — суфада бўласизми?

— Бўламан.

— Отангиз аср намозидан чиқиб, бир жойга бориб келаман, деган эдилар. Сизнинг ошингизни сузуб чиқара берайми?

— Майли.

— Ташқаридаги болалар кўринса айтиб юборингизчи.

— Хўб.

Анвар маҳдумнинг қаёққа бориб келишини ўйлаған ҳолда ташқариға чиқди.

¹ Маҳжуби инқиёд — яширинча бўйсуниш.

² Инсон муштақ аз нисёнаст... — фаромушхотирлик айрим пайтларда инсон учун хос хусусиятлари.

³ Зархарид — кул.

Шомдан бир оз эртароқ эди. Енгилча бир шамол суфа атрофидаги гулларни зринибкина қимирлатар ва бу қимирлатищдан райхонларининг ўткур иси ўқтин-ўқтин димоғқа келиб уринарди. Ўн икки-ўн уч кунлик ой кўкнинг шарқи-жануби қисмидан туссизгина бўлиб кўтарилиб келмакда, қуёш ботқан сайин унинг чехраси ҳар замон очилиб бормоқда эди. Шаҳар подаси қайтиб, теваракдан сигир ва бузоқларнинг ма-а-а-му-у-у-лари, кўзичоқ ва қўйларнинг ба-а-а-бу-у-у-лари эшитилиб турар эди.

Анвар суфада ўрда юмишларидан баъзисини таҳрир қилиш билан машғул экан, ичкаридан Раъно чиқиб келди. Гўё Анвар Раънонинг келишидан хабарсизча ўз ишига қаттиғ берилган эди. Раъно оҳистагина Анварнинг ёнига келиб, суфага сунанди, икки қўли билан иягини кўтариб, оралиқдан Анварнинг таҳририга қаради. Анвар ҳам мулойимғина кулимсиб Раънога кўз қирини ташлаб олғач, гўё илтифотсиз яна қаламини қоралаб, қофоз устига бир-икки калима ёзди. Аммо учунчи калимага ўтканда қалами қўлида ўлланиб қолди ва бояғидек ёнидағига кулимсиб қаради. Раънонинг ҳам кўзи унга тўқнашиб бир оз бир-бирларига кулимираган ҳолда тикилишдилар...

- Нега тўхтадингиз, ёза беринг.
- Сенинг қилған ишинг доим шундай, Раъно.
- Масалан?
- Масалан... Ҳамиша иш чоғида келиб, фикрни бўласан.
- Мен орага сўз аралаштирдимми?.. Ёза беринг, мен шундай қараб тураман.

Анвар Раънога ўнгланиб ўлтурди:

- Фойдаси йўқ, энди фикрни ўfirладинг.
- Мен фикр ўғриси эмасман... Қани ёзинг.

Анвар қўлидағи ёзилған қофозни қўйиб, иккинчи оқ қофоз олди:

- Энди бошқа нарса ёзаман?
- Майли ёзинг.
- Сен ҳам жавоб ёzsант, хўбми?
- Хўб.
- Тунови кундагидек жавоб тополмассанг нима қиласай?

Раъно суфага оёғ солинтириб ўлтуриб олди.

— Юзимга бир шапалоқ уринг, лекин сажъ қофияси осон бўлиш шарти билан.

— Маъқул, — деб кулди Анвар ва Раънога қараған ҳолда ўйланди. Бу ўйланишдан Раъно қошларини чи-мириб эътироz этди:

— Кўб ўйламанг.

Анвар жавоб бериш ўрнига қаламини қоралаб ёзди:

*Агар Фарҳоднинг Ширин, бўлса Мажнунларнинг Лайлоси,
Насиб ўлмиси менга гулшан аро гулларнинг «Раъно»си.*

Анварнинг қаламидан қоғозга тушиб борған сўзларни таъқиб эткан Раъно, қоғоздан кўзини олиб қизарди ва бош чайқаб тескарига қаради.

— Қани, жавоб, Раъно?

Раъно шу кўйи бир оз Анварга қарамай турди ва қайрилиб унинг кўлидан қалам-қоғозни олди-да:

— Уят қилмайсизми? — деб сўради.

— Маним ёзғанимни сен уят қилмасанг, мен ҳам сенинг ёзғанингни уят қилмайман. Лекин шарт шуки, маним икки йўлимға айни жавоб бўлсин.

Раъно яна бир оз ўйланиб, Анвардан яширинчи ёзди:

*Агар ор этса Лайли ҳақлидир Қайснинг жунунидин,
Не баҳт, Раъно харидоринг талаб аҳлининг «Мирзо»си.*

Раъно ёзувни Анварнинг олдиға ташлаб, қизарған ва кулимсираган ҳолатда чопиб гуллар ёнига кетди. Анвар жавобни ўқуб завқланди:

— Офарин, Раъно, лекин биравнинг устида ортиқ-чароқ муболага қилибсан.

Раъно гуллар ёнидан Анварга жиддий қаради:

— Сиз ҳам муболага қилған эдингиз.

— Маники муболага эмас, — деди Анвар, — масалан, сен ҳозир гуллар ёнидасан, ҳам чиндан-да, гулларнинг раъносисан... Мана, мен яна ёза бошладим; жавобга ҳозирлан, Раъно.

Раъно югуриб Анварнинг ёнига келди ва унинг қаламидан томған сўзларни ўқуб борди:

*Ҳамиша ҳавфда кўнглим бу муҳаббат интихосидин,
Мени ҳам этмаса мажнун дебон Раънонинг савдоси.*

Раъно кейинги мисраъни ўқуб ўйланиб қолди. Анвар ҳозирги Раънонинг ўйчан кўзига анчагина тикилиб турғач, кулимсиди:

— Жавоби қийин келдими, Раъно?

— Қаламни беринг, — деди Раъно ўпкалаган қиёфатда қўл узатиб, — ўйлағали ҳам фурсат бермайсиз.

Ёзди:

*Мұхаббат жомидин нӯш айлаган¹ аҳли зако бўлмиш,
Фунуни тибда мажсундир кишининг куйса сафроси.*

— Енгдинг, Раъно, енгдинг! — деди Анвар, — лекин кейинги мисраъда бир хато қилдинг...

— Масалан?

— Тибнинг айтишича, сафро эмас, қон куйса, киши жинни бўладир...

— Коннинг бузулишига аввало сафронинг куйиши керак, сафро куймай туриб қон бузулмайдир... Хўш, яна ёзасизми ёки енгилдингизми?

— Енгилдим...

— Енгилган бўлсангиз, ютуғимни беринг.

Анвар юзини тутиб берди. Раъно бўшқина унинг юзига уриб қўйди.

— Агар шу гал ҳам енгсам, — деди Анвар ачиниб, — мен сени уриб ўлтурмас эдим...

— Нима қилар эдингиз?

— Энди фойдаси йўқ.

— Айтинг-да, агар менга ҳам маъқул бўлса, урганим ҳисоб эмас, бўшқина урдим-ку.

— Лекин сен уни қилолмайсан...

— Нега қилолмайман, қани айтинг-чи.

— Қилолмайсан... — деб кулди ва бир оз айтишка кучланиб турди. — Мен... мен сенинг юзингга қўлим билан эмас, оғзим билан ураг эдим...

Раъно қизариб ерга қаради. Юзга оғиз билан уришни ул ўз умрида биринчи мартаба эшитканлиги учун қизаришқа ва ерга қарашға ҳақли ҳам эди. Ўзининг ёзган муҳаббатка оид шеърлари ва Анварга берган ҳалигидек жавоблари билан чин бир маҳбуба ва маъшуқа бўлиб кўринса ҳам, лекин кейинги гапларга ҳануз ошна эмас ва юзга оғиз билан уришлардан тамом бегона эди. Бу гап Анварнинг ҳам биринчи жасорати

¹ Нӯш айламоқ — ичмоқ.

бўлиб, иккисида шу «янгилик»нинг ўнгайсизлиғида қолдилар.

Гумбази нилигун қандилида шамъи кофурйилар ёқила бошлаған эди. Ой ҳам бир оз нурланиб, турмушка янги қадам босқан бу икки ёшнинг ҳозирги ҳолларидан кулимсигандек кўринар эди. Бояғидан бир мунча кучаятушқан шамол гулни гулга қовишигириб, гўё бу икки ёшга: «Сиз ҳам мана шу гуллар каби қовишинг» дегандек бўлар эди. Ўнгайсизлиқда қолған Раъно хижолат аралаш Анварга кулимсиб бош кўтарди.

— Мен сизнинг «амрингизга» мувофиқ чиқған эдим.

— Амримга мувофиқми? — деди Анвар ва Раъно-нинг кўзига тўғри қараб илжайди: — Шомдан кейин.

— Нима шомдан кейин?

— «Амримга» мувофиқ чиқишинг.

— Ҳозир-чи?

— Ҳозир мумкин эмас.

Раъно ўпка билан Анварга қаради ва туриб ичкарига жўнади.

26. НЕГА ЕРГА ҚАРАЙСАН, РАЪНО?

Кучлик шамол кўтарилиб, боқчадаги ҳар нарсани тўрт тарафка бука бошлади. Кўча чанглари кўкка кўтарилиб, ой ва юлдузлар нурини хирароқ бир ҳолға қўйдилар. Чигирткалар чириллаши, кеча ҳашаротларининг нағмаси кучлик шамол товуши билан кесилди. Суфа устидаги сўри ҳар замон тўрт томонға чайқалиб, ўз остида ўлтургучиларнинг бетларини гоҳ кўрсатиб, гоҳ яшириб, улар билан ўйнашқандек теваракка ҳусайн гужумларини бир-икки бора узуб ташлади.

Анвар ўзидан нарироққа тушкан бир шингил узумни олиб еди ва бир-икки гужумни ҳамроҳига узатти:

— Ма, Раъно...

— Мен емайман.

— Мен ҳам сенга егин демайман.

Раъно ўз ёнидағи гужумларни йифиб, Анварга берди.

— Мана узум есангиз... Менда нима юмишингиз бор?

— Баракалла... Тўкилган узумларни йифиб бер-чи, менга.

Раъно яна бир нечта гужумларни териб узатти.

— Қани, юмишингиз?

— Сенда нима юмишим бўлсин, Раъно. Ҳар кунги ўзинг билган гап... сўзлашиб ўлтурамиз; узум тўкилса, менга териб берарсан, деб чақирған эдим.

— Дадам хуфтандан қайтиб қолади. Гапингиз бўлмаса, мен кетаман.

— Хуфтан ҳали ўқулған эмас, аzon ҳозир айтилди. Башарти дадамиз хуфтани ўқумай келиб қолса, бунинг ҳийласи осон: даррав анави гулнинг тегига яширинамиз.

— Башарти дадам бизни қидириб гулнинг тегидан топса, нима қиласми?

— Нима қилар эдик? Сен уйингга кетасан, мен бўлсам меҳмонхонага.

— Иккавингиз гулнинг тегида нима қилиб ўлтурган эдингиз, деб сўраса, нима жавоб берамиш?

— Ўзимиз ўлтурган эдик, деймиз.

— Нима учун, деса-чи?

— Қизингиз ўялғани учун, деймиз.

Раъно кулиб ўрнидан турди ва суфадаги кўзи илғаған фужумларни териб Анварга берди:

— Хайр, юмишингиз бўлмаса, мен кетдим, шамолдан қулогим битти.

— Гапим бор, гапим, — деди Анвар, — кел, айтаман.

Раъно қайтиб келди.

— Айтинг.

— Ўлтур.

Раъно Анварнинг қаршисиға ўлтурди. Ўлтуриши билан кучлик шамол юриб бошидафи рўймолни учурди ва олиб бориб Анварнинг бетига ёпти.

— Ха-ха-ха, шамол сиздан ўчимни олди. Қани, гапуринг.

Анвар рўймолни қисимиға олди.

— Ҳозир гапираман, лекин шартим бор.

— Айтинг шартингизни.

— Аччиғланмайсан.

— Хўб...

— Уялмайсан.

Раъно масалаға тушунгандек ўйланиб қолди.

— Рўймолимни беринг.

— Рўймолинг учеби кетди... Шартимга кўндингми?

Раъно жавоб бермади. Анвар Раънонинг олачалпоқ кўллага ичиди хаёлий бўлиб кўринган юзига қаради.

Унинг ҳаё ичида олийлик касб эткан жоду кўзи Анварнинг ҳозирги мақсадиға тушунгандикни ифода қилас эди. Бирмунча вақт шу кўйи сўзсиз қолдилар. Шамол дам кўтарилиб, дам босилар эди. Шамол асноси гуллар ҳам келинлар каби ҳар томонға эгилишиб салом беришиб олар эдилар.

Анвар ўзини суфанинг қоронғи қисмиға олди. Раънога айтмакчи бўлған сўзи эҳтимол унинг ўзига ҳам ўнгтайсизлиқ берар эди.

— Туғилғандан сўнг ўсиш, ўскандан сўнг икавикав бўлиб яшаш бор, — деди Анвар ва бир оз тўхталиб олди. — Жуфтлик ёлғиз кишилар орасидағина эмас, ер юзидағи ҳар бир махлукда ҳам бор... Масалан, тоғлардағи оҳулар, ўрмонлардағи тўтилар, чамандаги булбуллар ҳам ёлғиз эмас, жуфай яшайдирлар... Сенингча қандай, мен уни билмайман, аммо жуфтланишнинг, манимча энг муҳим бир шарти борким, ул ҳам икки тарафнинг муҳаббат занжири билан бир-бирларига қаттиғ боғланишларидир... Биз икав ёшлиқдан бирга яшаб келамиз, орамизда махфий сирларимиз йўқ ва бизнинг ўз аро сирларимизга воқиф бўлған чет кишилар ҳам йўқ. Шунга биноан сен билан маним ҳар бир тўғрида ҳам очиқ сўзлашмагимизга ҳеч бир монеълиқ бўлмас, деб ўйлайман... Агар янглишмасам, иккимизнинг бир-биримизга муомалаларимиз самимий ва юракларимиз тепиши ҳамоҳангдир. Ёки янглиш сўзладимми, Раъно?

Раънонинг ерга қараған кўзи секингина Анварга кўтарилиб, яна ерга оғди. Анвар унга бир оз қараб турғач, сўзида давом этди:

— Сен эшиитдингми, йўқми, билмадим, улар иккимизни жуфтлашдирмакчи бўлиб, бу кун мендан киши орқалиқ тўй вақтини белгилашни сўратқан эдилар, мен эртага жавоб бермакчи бўлдим... Сени бу ерда тутишим ҳам сен билан кенгашиб, эртага шунинг жавобини уларга айтишдир... Нега ерга қарайсан, Раъно?

Раъно бошини кўтариб кулимсиди ва юзини четка ўғирди...

— Сен уял, уялма, улар бизни жуфтлашдирарлар. Марҳума Моҳларбиининг фотиҳаси ерда қолмас. Агар сен шундай юра берайлик, десанг, мен ҳам уларга сенинг жавобингни айтаман... Гапир, Раъно.

— Юра берайлик, — деди Раъно юзини четка ўғирган ҳолда, — уларга нима оғирлиғи бор?

Раънонинг бу сўзи Анварнинг устидаги юкни кўтариб ташлағандек бўлди.

— Иккимиздан бошқага, албатта оғирлиги йўқ...
Лекин, сен айтканча, қачонғача юра берайлик? Уларга бир муҳлат кўрсатишимиш керак, Раъно.

- Қариғунимизча...
- Қариғунимизча, деб муҳлат сўрайми?
- Улгунимизча...

Анвар кулди ва сурулиб Раънонинг ёниға келди.
Гёй уни ўзига қаратмоқчи бўлғандек, елкасига қўл юборди...

- Менга қара, тўғри жавоб бер, Раъно.

Раъно қулоги остига теккан иссиғлиқдан чўчиб юзини ўнглаган эди, тасодуфан лаби ҳалиги иссиғлиққа учраши... Иложсиз каби лабини иккинчи ҳароратлик лабдан ажратолмай, бир неча сония кутиб қолди. Кучлик шамол қўзғалған эди. Шамол, гўё кўмаклашкан каби орқадан эсиб, Раънони Анвар томонға майл этдирап эди. Терак орқасида қолған ой ҳам қучлик елнинг кўмагида терак бошидан буларга мўралаб олди. Икки ёшнинг ҳозирги ҳолини яқиндан томоша қилмоқчи бўлған туссиз бир юлдуз кўк саҳнининг ерга яқинроқ қисмиға учиб тушди...

- Жавоб бер, Раъно.
- Бу ҳолда мен жавоб бералмайман...
- Жавоб бермасанг, мен ҳам сени бўшатмайман.
- Дадам келиб қолади...
- Дадангдан бу кун жавоб олдим.

Раъно Анварнинг ияги остиға сўл чаккасини қўйиб четка қаради.

- Сиз хоҳлаған вақтда бўлсин.
- Менга қолса эртага...
- Майли...

Анвар ияги остидағи мулойимлашқан қизнинг юзидан ўпти ва унинг тўзғифан соchlарини тўғрилаб, ҳаётбахш кокилларнинг муаттар бўйини узоқ ҳидлади.

— Чин сўзла, мен сенинг раъйинг билан уларга жавоб айтмакчиман, Раъно.

- Кўкламга...
- Чинингми?
- Чиним.

— Хўб бўлгай. Мен эртага, тўйимиз кўкламга бўлсин, деб жавоб айтаман... ерлар кўк гиламлар билан

бежалганды, ҳар тарафни бинафша чечаклари босқанда, қушлар уя қайғусини чекканда, биз ҳам түй қилармиз; чимилдиңда баҳт созини тинглаб, истиқбол куйини күйлармиз.. Шундайми, Раъно?

— Шундай...

— Ундан сүнг маним оғушимда шунинг сингари даданг келиб қолишидан күркіб, киши құлиға тушкан қүш боласидек типирчиламассан. Шу ҳұснинг, шу ма-лоҳатинг ва шу латофатинг билан тамом меники бўларсан, шундайми?

Раъно жавоб бермай, Анварнинг оғушидан үзини кутқариб ўрнидан турди. Суфанинг зинасига бориб кафшини кийди ва Анварнинг қувлашидан күркіб, сапчиб ерга тушти...

— Жавоб айтиб кет, Раъно.

— Ҳа, шундай, — деди Раъно, гул ёнида рўймолини тўғрилаб. — Энди сизнинг олдингизға чиқмайман.

— Нега чиқмайсан?

— Негаки жуда ёмон киши бўлибсиз... Мен аямга айтаман.

Анвар кулди.

— Нимани айтасан?

— Ҳаммасини айтаман.

Шу вақт ўрта эшиқдан кириб келган маҳдум уларнинг сўзини бўлди, ичкарига кетиб борған Раънони тўхтатиб, «Анвар акангга чой бердингми, қизим?» деб сўради.

27. ЗУЛМ ЎЧОҒИ

Худоёрхонға 1283-нчи йилда¹ учунчи мартаба таҳтка чиқиш насиб бўлди. Унинг охирғи салтанати хонлик истибодининг аччиғ зулм ва таъаддиларининг жонсўз қора саҳифаларини ташкил этадир. 1283-нчи ҳижрийдан 1292-нчигача бўлған саккиз йил, Худоёрнинг эркин нафас олиб, Фарғона устида ўзи тилаганча қамчи ўйнатқан ва зулм тифини камбағаллар қони билан сарбаст бўяған сўнгғи давридир. Мамлакатни обод қилиш баҳонаси билан 1284-нчи йилда Кўқон косибларини ҳақсиз — муфт² ишлатиб янги раста, карвон сарой, пахтасарой ва коппонлар бино қилдирди. 1285-нчи йил-

¹ Мелодий ҳисоби билан 1864—65 йиллар.

² Муфт — текин, бепул.

да Кўқоннинг Ўрганч мавзёида машҳур Оқсаройни солдириди, узоқ жойдан ариф қазитиб келиб, Оқсарой атрофини сугортириди. Иссиғ кунларда салқинлаш, ма-лика хонимлар билан ишрат қуриш учун «Боги Эрам» ясатди. Онаси Ҳоким ойимнинг васиятига мувофиқ, 1286-нчи йилда «Ҳоким ойим мадрасаси» деб машҳур мадрасани яна шу йилда Амир Умархон тарафидан асоси қўйилған маълум янги ўрдани ҳам теварагида боғ ва гулзорлари билан ишлатиб битирди¹.

1286—87-нчи йилларда «Улуғ нахр» «Хон ариғ» деб машҳур ариғни қазитди. 1287-нчи йилда ўз номидаги «Мадрасаси олий»ни ва «Дахмаи шоҳон»ни, 1288-нчи йилда Кўқоннинг эски қаландархонасини бузиб, янгидан таъмир, ҳам ўлган оғаси Султонмуродхон исмига мадраса бино қилдириди. Ва ушбу йил ўғли Ўрмонхоннинг хатнаси учун бир юз йигирма кун ош берил, тўрт ойлиқ тўй эълон қилди. Шундоғки, ҳар кун икки юз қозон ош дамланар, саккиз юз танур нон ёпилар, икки юзлаб улоқ берилар, мамлакатдан тўйға келгучи аъёнға ҳар кун минглаб тўн кийдирилар эди.

Бу қадар саховат, бунчалик дабдаба, албатта, хазинадаги олтинлар кучи билан бўлғандир, деб баъзиларнинг кўнглига келар. Хонлар ва подшоҳлар хазинасидаги олтинлар манбаи ҳам фуқаронинг билак кучидир. Лекин Ҳудоёрнинг саховатпешалиги ва маъмуриятпарварлиги меҳнаткашнинг хазинага олтин суратида йиғилған кучидан змас, бевосита билак кучидан, кўз ёшидан эди. Чунки Мұҳаммадалихон давридан бошланған (1240) ўзаро таҳт талаши, ўзбек-қипчоқ жанжали ва бошқа тўполонлар хазинани ялаб-юлқан, Ҳудоёр 1283-нчи йил таҳтка ўлтуришида эшиги очиқ — бўш хазинагатина эга бўлған эди.

Бу «маъмурият даври» саналған беш-олти йиллар Фарғона фуқароларининг омҳузнлари², қора кунлари бўлған эди. Ҳудоёрнинг Сирдарёдан сув чиқариш мажаросини мисол учун олайлик:

Хоннинг раъи сув чиқаришга тўхтади. Хазинанинг бўшлигини, ўйланған ишнинг ниҳоятда улуғлигини андиша қилмади. Қаламравидаги барча шаҳар ва қиши-

¹ Эски ўрда Шарҳ хоннинг ўғли Абдукаримхон тарафидан 1145 ҳижрия миёналарида бино қилинған, Ҳудоёрнинг орзулариға жавоб бералмайдирган ҳолга келиб эскирган эди (*муалі*).

² Омҳузи — умумий хафалик.

лоқларға саркорлар, чүгөллар тарқатди. Улар халқдан солиқ йиғишқа, ёрдам түплашқа буюрилған эдилар. Бу ихтиёрий равишдаги ҳозирлиқдан сүнг, «мамлакатимдаги ҳар бир хонадон битта кетман ва битта мардикор берсін!» деб истисносиз умумий бир фармон ҳам бўлди. Қамчиси кўкда тобланиб, ханжари заҳар сочқан «хон ҳазратнинг бюргуғиға» ким қарши бора олсин. Ҳар бир оила, гарчи, рўзгор бошлигини бўлса ҳам, битта кетман билан хон таъйин қылған жойға йўллай бошлади. Бойлар битта мардикор ёллаб бериш устига от ёки арава ҳам топишқа мажбур эдилар.

Эни олти, бўйи (чукурлиғи) беш газдан ўн беш газгача қазиладирған ариғнинг узунлиғи ўттуз чақирим ва шу ўттуз чақиримлиқ ариғ қазилиб битканда, Наманган ва Андижон туманларидан икки минг ботмонғача ер сугорилар эди. Шу йўсун ариғ қазила бошланди. Лекин ишчи кўб, озиқ-овқат йўқ эди. Бойлар киши ёллаб қутулғанлар, ўттуз чақиримлиқ ариғ хатига бола-чақасини оч ташлаб, кетман кўтариб келган нуқул меҳнаткаш, косиб ва деҳқонлар чизилғанлар эди. Уз ёнларидан сарф қилиш учун оқчалари, ҳукumat тарафидан бериладирған овқатнинг салмоғи йўқ эди. Иссиф қўёш остида, гиёҳсиз чўл бағрида кетман одатдагидан кўброқ ем талаб қиласидир. Ариғ қазувчиларнинг овқатдан силлалари қуриб, иликлари пучайган, ердан ўн қадоқ тупроқ олиб ирғитишқа эмас, ҳатто кетманнинг ўзини кўтаришқа ҳам дармонсиз эдилар. Хон тарафидан улар устига ишбоши қилиб белгиланган саркорлар, очлик ялқовлигини чинга ҳисоблаб, кулоқ эшиитмаган сўкишлар билан бечораларни таҳқир этар, сулайиб йиқилмағунча кетманни ташлатмас эдилар. Ҳар ўн беш-йигирма кунда ариғ бошиға келиб тургучи хон, саркорларнинг сиъояти¹ билан ҳар бора бир-икки меҳнаткашни ялқовлиқда, ўзига итоатсизликда айблаб, кўбчилик кўз ўнгидаги бўғизлатар ва ҳар гал келиб кетишида шунинг сингари мазлумлар қони билан янги «Хон ариғ»ни намлаб турар, бу зулмни ўз кўзлари билан кўриб турған бечоралар очлиққа, дармонсизликқа қарамай, жон аччиғида ишқа ёпишар эдилар.

Шу йўсун зулм зарби остида ниҳоятда улуғ иш бир йилга ҳам қолмай итмоломиға еткан, минг чақиримлар бўйлаб Сирнинг сирлик суви кумуш каби оққан, гиёҳ

¹ Сиъоят — чақимчилик.

унмаган чўллар меҳнаткашлар қони баробарига ям-яшил кўкарган эди. Шу мисолдан онглашилған бўлса керакким, хоннинг маъмуриятпарварлиги, яъни унинг мадрасалар, боғлар, қасрлар, сарой-расталар ва дахмалар бино қилиши, тўрт ойлаб тўй бериши хазинада асрлардан бери йиғилиб ётқан олтинларни сарф қилиб эмас, тўғридан-тўғри фуқарони муфт, мажбурий ишлатиш йўли билан эди.

Хоннинг гарчи зулм билан бўлса ҳам солған мадрасаларига, қаздирған ариғларига таҳсин қилғучи, «золим бўлса ҳам, маъмуриятпарвар экан» дегучи бъязи биравлар орамизда топилиб қолур. Шунинг учун хонни «маъмуриятпарвар» қилған омиллар устида тўхталиб оламиз:

Хон икки марта таҳтдан ҳайдалиб, анчагина тажриба ортдирған, учунчи марта таҳтга ўлтуриши маданиятлик ўрус истибодининг Тошкандни олиб Хўжандга ҳам қўл узатқан саналарга тўғри келган эди. Бу кунги шароит тажрибалик хонни бошқача сиёsat ушлашкан мажбур этар эди. Ниҳоятда қаттиғ қўллик бўлиш, юқори табақа ҳисобланған уламони, ашрофни ўзига қаратиш лозим ва таҳтига аждаҳо каби оғиз очиб келмакда бўлған ўрусларга қарши ўз маданиятини қуриб, жавоб бериши керак эди. Шунинг учун меҳнаткашни раҳмисиз ишлатиб мадрасалар бино қилмоқда, ариғлар чиқармоқда, сарой ва расталар, қаландархона ва ўрдалар ёпмоқда эди. Абдукаримхондан бери ўнлаб хонларга яраб келган ўрданни бузиб, янги ўрда бино қилиши ўз кайфига қаранда ҳам ўрусларга жонлилиқ кўрсатиш, ялти-расин шаъну шавкат билан Фарғонани ўз қўлида сақлаб қолиш учун эди.

Ўчадирған чароғ ёниб ўчадир, мақоли каби Туркистон хонларида сийрак кўрилган бу маъмуриятпарварлик бизга қолса, шу омиллардан туғилған ва бунда самимий ҳеч нарса йўқ эди.

28. ҲАРАМ

Янги ўрда юқорида ёзғанимиздек, ҳақиқатан шукуҳлик, хушманзара бино қилингандан эдиким, унинг ҳозирги харобасидан ҳам кўрса бўлур.

Ўрда қўргонининг ташқари айланаси (тўрт томо-

ни) ажойиб гулзорлар, анвоъи мевалик дараҳтлар билан зийнатланган. Бу боғни маҳтаб Ҳудоёрнинг ўз шоири Мулла Ниёз Мұхаммад:

«Ясаб қасре саодат даврида боғи жаҳон оро,
Муаттар бўлди гулзоридин олам гумбази ҳазро.¹
Шаҳи волоки берди зеб боғ ичра раёҳиндин,
Ўшал кун тутди ер саҳнини бўйи анбари соро.²

Ясарда тарҳини тарроҳлар³ андоғ сакиз гулшан,
Бу гулшан ҳар биридин топдилар юз минг чаман оро.

Ки ҳар ашжор⁴ асморини⁵ таъмида шаккар мазмар⁶,
Очарға шаккар оғзин муддаиликқа наҳад оро.

Хиёбон расталардин боғ топди зеби оройиш,
Гулистониға бергандек чаман оро гули ҳумро.⁷

Жаҳон боғида харна неъматидир бунда ул мавжуд,
Насиб эткай сенга юз йилғача ҳақ эй жаҳондоро⁸...» —

дейдир ва Ҳудоёрға бу боғда юз йиллаб роҳатланмоқ учун дуо қиласидир.

Домла Ниёз Мұхаммад айткандек, гулшанинг уч тарафи хиёбон, расталар ва бунда эртадан-кечкача ҳалқ қайнashiб турар эди. Ўрда боғининг эшигида доим қорувуллар қараб турғанлиқдан, ўрдага алоқаси бўлмаған кишилар боққа киравласлар, фақат ҳафтада бир кун, хоннинг кўнгил очиш соатларида, баъзи мустасно зотлар учун боғнинг йўли очиқ бўлур эди. Боққа кирилгандан кейин, тўғридан янги ўрданинг дарбозаси, мұташам музаяқакор тоқ ва равоқлар кўзни қамашдирар, киши гўё ўзини хон ҳузурида, истибод салобати остида сезар ва мутантан⁹, ва музайян¹⁰ қасрдан руҳ олиш ўрина, билъакс, бир даҳшат ва хавф ҳис эта бошлар

¹ Ҳазро — кўк яшил.

² Сор — тоза, соф.

³ Тарроҳ — лойиҳачи.

⁴ Ашжор — дараҳт.

⁵ Асмор — мевалар.

⁶ Мазмар — замери, ичи.

⁷ Ҳумро — қизил.

⁸ Жаҳондоро — жаҳонни эгалловчи ҳукмдор.

⁹ Мутантан — тантанавор.

¹⁰ Музайян — зийнатланган, безатилган.

эди. Ўрданинг хиштин, кунгирадор қўрғонлари ости билан жазойири қилич тақинған махсус муҳофиз йигитлар айланиб, бегона кишини қўрғон яқиниға йўлатмаслар, айниқса, ўрданинг юқори қисмидан қўйилған ҳарам дарбозасиға яқинлашиш учун, ҳатто ўрданинг ўз ходимлариға ҳам рухсат йўқ эди. Ҳарам дарбозасидан юргучилар ёлғиз хоннинг ўғли — шаҳзода, хоннинг хотин қариндошлари, канизлар, доя хотинлар, яна баъзи «махсус» юмишларга хон томонидан белгиланган заифаларгина эдилар. Бу дарбозадан хоннинг ўзи ҳам юрмас, чунки унинг ҳарамига кирадирган йўли ўз маҳкамаси ва шаҳнишин орқалиқ эди.

1287-нчи йилнинг сунбула ойи, яъни эрта кузнинг кўклам ҳавосига яқин турған салқинча бир куни. Кечки соат бешларда ўрда ичида қайнаб турған ҳаёт бир оз тинчиб тушти, дарбоза ёnlаридағи қоровуллар ичкарига киши киритмай қўйдилар. Ўрда хизматчилари, масалан, беклар, мирзолар, ясовуллар ва шулар сингари «сайд»¹ ходимлари бирин-сирин чиқиб тарқала бошладилар. Биринчи дарбозанинг икки биқинида турғучи қоровул йигитлар ўрданинг улуғ дараражалик бекларини таъзим билан узатар, мансаби қувироқ ясовуллар билан мутояба қилишиб қолар эдилар. Саркардалардан баъзиси дарбоза ташқарисида хизматчи тарафидан қантарилиб турған отининг ёниға келиб, отни қараб чиқар, яхши боқмағани, ёки тоза супурмағани учун сайисни² койиб олар ва сўкуниш ораси сайис кўмагида отига миниб жўнаб кетар эди.

Дарбозабонлар ўрдада зарур юмиши борлигини сўзлаб, илтижо қилғучи ҳар қандай кишини ҳам ҳозир ичкарига йўлатмаслар ва асабийланиб койиб қайтарлар эди.

— Бу ўзи қандай одам, қулоғига ун босқанму!— леб жекириниб турған биринчи дарбозабон узоқдағи кимгадир қараб қолди, кўзи ўша тарафда экан бояги сўзини тақрорлади, — боравуринге, оғизни очманг, шери Яздон³ келганда ҳам ичкари киритмаймуз!

Илтижо қилғучи умидсиз дарбозадан йироқлашди. Унинг кетича дарбоза ёнида банорас паранжилик бир хотин пайдо бўлиб, ичкарига парвосиз кира берди.

¹ Сайд — амир демоқчи.

² Сайис — отбокар.

³ Шери Яздон — ҳалифа Алига берилган нисбат.

«Шери Яздон»ни ҳам киритмайдырган дарбозабонлар хотинни бошдан-оёғ кузатиб, индашмай қараб қола бердилар. Хотин ичкари кириб, түгриға қараб юрди, асл ўрданинг улуғ муҳташам дарбозасиға яқинлашқандан кейин ўнгдаги айри йўлға бурилди.

Хотин ҳарам дарбозасини чоғлаб борар эди. Кўрғон остидағи соқчишлар хотинға ёвош-ёвош қараб олиш билан кифояланар ва уни таниғандан парвосизча ўз ёнларидан кечирар эдилар.

Хотин ҳарам дарбозаси ёниға етиб, остоңага қадам босқан чоғида бўсағадағи йигит «виш» этдириб қиличини қинидан суғурди.

— Тўхтанг!

Хотин тўхтади ва йигитка қараб бетидаги чашмандини қия очти. Йигитнинг жиддияти кулимсирашқа мубаддал¹ бўлиб, ҳаводаги қиличини қайтариб филоғиға солди. Хотин юзини очқан қўйи ичкарига юрди. Уттуз беш ёшларда кўринган бу гўзал хотин ҳарам ходимларидан Гулшанбону эди.

Гулшанбону Худоёрнинг иккинчи даврида ўз хусни билан бир неча мартаба хоннинг илтифотига сазовор бўлған ҳарам каниzlаридан эди. Худоёр тахтни ташлаб, Бухорога қочишға мажбур бўлғандан кейин, оғасини ғайри шаръий ишларда, жумладан, хотинбозлиқда айблаб, тахтга минган Маллахон ўз даъвосиға мувоғиқ Худоёр ҳарамидаги юзлаб хотинларни ўз йигитлари орасида хотинликқа тақсим қилиб юборди. Шу жумладан, Гулшанбону ҳам Маллахон тарафидан Худоёрға қарши урушда қаҳрамонлиқ кўрсаткан бир йигитка инъом қилиниб, шундан бери ўша йигитнинг никоҳида хотин эди. Худоёр учунчи мартаба тахтка мингандан кейин, Гулшан хоннинг ёниға келиб, эски «қадрдонлик» номига ҳарамдан бир хизмат сўрағанида, «марҳаматлик» хон Гулшаннинг арзини ерда қолдирмай, ҳарам ходимларининг жуда озларига насиб бўладирған улуғ бир мартаба ато қилдиким, биз Гулшангга топширилған вазифанинг нимадан иборатлигин қуида кўрармиз.

Гулшан дарбозадан ичкари киргандан кейин, паранжи остида босилиб тартибсизланган соchlарини тузатди, чанг ўлтурған нилий ранг товор кўйлагининг

¹ Мубаддал — алмашинган.

этакларини қоқти, күлидаги ёкут ва зумурал күэзлик олтин узукларини түғрилаб тақти ва шундан сүнг зиналардан юқорига қараб чиқа бошлади. Йигирманчи зинадан кейин узун — ўрданинг эни қадар бир йўлак бошланиб, унинг ўнг-сўлини ўн чоғлиқ бухори чакма эшиклар зийнатлаган эдилар. Бу эшиклар ҳарамдаги алоҳида ҳавлилар ва улар даромадини¹ кўрсатар эдилар.

Гулшан узун йўлакка чиқиб, ўнгдаги биринчи эшикни итарди. Ичкари тарафдан кекса бир ходима — эшик очар хола кўриниб, Гулшанга салом берди ва «хуш келдилар» — деди. Гулшанни ичкари киритиб, эшикни беклади. Бу, ҳарамнинг кичкинагина сув ҳавлиси эди. Ўртадаги мис ҳовузда кўм-кўк сув мавж уриб, бир неча канизлар ҳовуздан сув олмоқда эдилар. Ҳавлиниг шимолидаги ходималар турадирған кичкина бир уйдан бошқа мунда бино йўқ, фақат жанубда ҳалигидек бир эшик бор эди. Сув ҳавлисидаги бу ҳовуз ҳарамнинг бутун эҳтиёжини ўтар, уни ҳафтада бир неча мартаба маҳсус соатларда мешкоблар томонидан тўлдирб турилар эди.

Гулшан паранжисини қўлиға олиб, эшик томонга юрди. Эшик ёниға келиб секин-секин ҳалқани чертди. Эшик ичкаридан очилиб, бунда ҳам эшик очар хола кўринди. Лекин буниси ёшқина бир каниз эди. Гулшандан паранжи, чашмандни олиб, «хуш келдилар» — деди. Бу ҳарамнинг биринчи ҳавлиси эди. Ҳавлиниг тўрт томони нақшинкор, ойнабанд, гул чакилган даричалик, ҳаммаси бир хил бичиқда танобий (зол) уйлар, ҳар бир уйга маҳсус даҳлизлар ва бир-бирига ямашдириб солинган хоналарни шу даҳлизлар бир-биридан ажратиб турар эдилар. У қадар кенг бўлмаған саҳн остига хишт тўшалган, ҳавли юзида тўрт-бешта қизил шолдан кўйлак ва бошлариға сариф шолдан рўймол ўраб, оёқлариға бедонадан кафш-масхи кийган ёш канизлар сочилған ҳолда вазифалари орқасидан юрар эдилар. Гулшан улар билан оҳиста сўрашди ва канизларнинг биридан ярим товуш ичидаги сўради:

— Он ҳазратим?

— Шаҳнишиндалар, — деди каниз, товшини четка чиқармаслиққа тиришиб.

¹ Даромад — ёълак.

Шаҳнишин — хоннинг хос ҳужраси, хон овқатла-
надирған, ухлайдирған ҳам хотинларни қабул қиласидир-
ған уй бўлиб, сув ҳавлисининг қатори билан то таҳт
ўрнатилған маҳкамагача қатор уч хона танобий уйлар-
дан иборат эди. Бу уйлар шаҳнишинликка мувофиқ
бошқа бинолардан баланд қилиб солинган эдилар. Ҳав-
лининг шарқий томони маҳкамага қаратиб солинган
бинолар орқаси, жануби хос ойимлар — яъни хонимлар
танобийси, фарби — қисман танобий ва қисман ошхона
ва ҳарам хазинаси биноларини ва бошқа ҳавлиларга
чиқиш учун даромадларни ташкил этар эди.

Гулшан, «шаҳнишингдалар» жавобидан сўнг, та-
раддуллангандек бўлди. Бир оз иккиланиб турғандан
кейин, яна бир қайта сочини, рўймолини, кийимини
тузатиб олди ва шаҳнишин томонга бурулди.

— Ойихоним чақирадирлар, — деб бир каниз ши-
вирлади.

Гулшан уч-тўрт қадам босқан эди, тўрдаги тано-
бийдан чиқиб келган канизнинг ҳалиги сўзи билан
тўхтади ва сўzsиз каниз томонга бурулди. Гулшан кир-
ганда даҳлизнинг тўрида уч нафар каниз санама¹ ти-
киб ўлтурас эдилар. Улар билан саломлашди. Ул са-
ломлашқан аснода ичкари танобийдан олти ёшлар ча-
малиқ, оқ туслик, қора кўзлик кўркамгина бир бола
сариф атлас кўйлагини ҳилпиратиб чиқиб келди.

— Ассалому алайкум... Соғмилар, шаҳзодам, — деди
Гулшан қўlinи кўкрагига кўйиб, болаға букилинқи-
раған ҳолатда.

Шаҳзода жавобсиз кулимсираб, Гулшанга бир оз
қараб турди-да, ичкарига кириб кетди.

Гулшан кафшандозда оёғини ечиб, гиламга чиқди.
Даҳлиз ўн бир ёғочлиқ катта мунаққаш уйдан иборат
бўлиб, тахмонида атлас ва адрас кўрпа, кўрпачалар
уюлған, тоқчалари анвойи хитойи ва қашқар чинни-
лари, Бухоро мис ва кумуш идишлари билан зийнат-
ланган эди. Гулшан кафшини еча бошлиғач, юқори-
даги санама тикувчилар ҳам ўрунларидан турған эдилар,
келиб кўришидилар. Улар кўришиб бўлғанда, бояғи
каниз ичкаридан чиқди.

— Кирсинглар, — деди Гулшанга.

¹ Санама — ироқи.

29. ОҒАЧА ОЙИМ

Гулшан эшикка юриб келиб, рўймол — лачагини тузатти ва ичкарига қадам босди. Эшик ичкарисида қўл қовиштириб ўлтурган каниз ўрнидан туриб букилди.

— Сафо келдилар.¹

Асл гиламлар, баҳмал кўрпачалар, олтин ва қумуш асбоблар билан зийнатланган танобий уйнинг орқа ва ўнги деярлик кўзни қамашдиралиқ шукуҳларга фарқ бўлған эди. Танобийнинг ҳавли томониға қурулған учта кичкина деразаларнинг ойналари ҳам бундаги асл ашёларнинг турлиқ навъи қабилидан ҳар кўзи ҳар рангда жилваланар ва уларнинг акси зиёси билан шипга осилған олтин қандил алвон тусда товланар эди. Танобийнинг тўрида, ипак жойнамоз устида қиблага қараб ўлтурган ойим тизасига ясланган шаҳзодани эркалаб, ёниға қайрилди. Эшикдан кириб, қўл қовиштириб тўхтаған Гулшан икки букилиб салом берди.

— Келинг, Гулшан, — деди ойим, — ўлтуринг, ваарайкүм ассалом.

Гулшан таъзим билан биринчи даричанинг юқорисига бориб ўлтурди ва дуоға қўл кўтарди.

— Ойи хонимнинг баҳт ва обрўлари зиёда, шаҳзодамнинг умрлари узун бўлсин.

Эшик ёнида тик турған каниз дуо асноси ўлтуриб фотиҳа ўқушди. Фотиҳадан сўнг яна ўрнидан туриб қадалди. Ойим ҳамон шаҳзодани эркалаб жойнамоз устида ўлтурар эди.

Жияклиқ атлас кўйлак, Бухоро кундалидан² желатка ва бошиға санама рўймол ўраған ўттуз беш ёшлар чамалиқ бу хоним — Хоннинг мұттамад³ хотини Оғача ойим ва шаҳзода эса хоннинг суюклиқ ўғли — Ўрмонбек эди. Оғача ойимнинг хитой хонимлариникига ўхшаш қора бодом кўзи ва умуман сиймоси Туркистон қизи эмаслигини айтиб турар, бироқ тилида бегоналиқ сезилмас эди. Оғача ойимнинг асли исми Масъуда хоним, аммо «Оғача ойим» деб машҳур бўлиши унинг қашқар қизи бўлғанилиғидандир. Уйғурлар биздаги «хоним, бекач» дейиш ўрнида «оғача» дейдирлар.

¹ Сафо келдилар — хуш келдилар.

² Кундаль — зар иплар билан тўқилған қимматбаҳо мато.

³ Мұттамад — ишончли, зътиомодли.

Масъуда йаш атрофида турғун бўлған уйғурлардан Ибодуллахўжа деганинг қизи, Худоёр ўзининг иккинчи давлатида бунга уйланган эди.

Худоёр таҳтни ташлаб Бухорога кетишка мажбур бўлғандан кейин кўб хотинлари унга вафосизлиқ билан эр қилиб кетканлари ҳолда, шу Оғача ойим эрининг хорлиқ ва муҳтоҷлик кунларига шерик бўлиб юрган ва шу вафодорлиғи жиҳатидан хоннинг эътиmodini қозонған эди. Иккинчидан, Оғача ойим Худоёрнинг ҳарам хотинлари ичидаги ақдлик, тадбирлиқ ва шу сояда ҳарамнинг барча хонимлари ва юзлаб канизлари бунинг идорасига топширилған эдилар. Юзлаб кундашлар орасидағи жанжаллар оғачанинг ислоҳиға¹ келиб тўхтар, ҳарамдан ҳар кимса бунинг сўзига қулоқ солишга мажбур, ҳатто хоннинг ўзи ҳам хотинлари орасидағи онглашилмовчиликларни Оғачанинг ислоҳиға ҳавола қилғучи эди. Янги кийим бериш вақти етканда, кимга қандай кийимлик лозим, ким қандай нарсага муҳтоҷ — бу масала ҳам Оғача ойим тарафидан ҳал қилиниб, ҳазиначига бюурилар ва ҳозирланилған кийимликлар унинг томонидан тақсим қилинار эди. Бундан бошқа, кундалик ошхона овқати ҳам Оғачанинг белгилаши билан пиширилар, ойим ва каниз, доя ва чеварларнинг ҳаммомга боришлари, бекларнинг тўйиға чиқишилари ва шунга ўхшаёт лозимомадалар ҳам бу ойимнинг кўрсатишига мувофиқ эди. Баъзан Оғача ойим мамлакат ишларига ҳам оралашиб олар, гоҳо ўз фикрига хонни унатиб ҳам қўяр эди. Худоёрнинг хотинларидан кичик Шоҳ ойим² вафот этиб, ундан бир бола — Ўрмонбек ятим қолган эди. Худоёр Ўрмонбекни жуда яхши кўрар ва ўзига валиаҳд белгилаган эди. Кичик Шоҳ ойим ўлгандан кейин Ўрмонбекни ҳарамда эътиmodлик бўлған Оғача ойимга топшириди. Шундан бери ул Ўрмонбекни ўз боласидек тарбия қилиб келар ва бу сабабдан ҳам хоннинг назарида унинг қадри жуда юқори кўтарилган эди.

Оғача ойим ҳануз Гулшанга илтифотсиз, Ўрмонбек билан сўзлашмакда эди.

— Жуда шўх бўлибсан, ўғлим. Мен сени отахонингга чақиб бир урдирай.

— Будана берсантиз шўхлиқ қилмайман.

¹ Ислоҳ — тузатиш, тўғрилаш.

² Шунгон бегининг қизи (муал.).

— Буданаларингни ўлдириб битирдинг-ку, золим, буданаларни яна қайдан олайлиқ.

— Мен ўлдирмадим, ўзлари ўлиб бутдилар.

— Зийракни нега урдинг?

— Зийрак менга будана топмади.

Оғача ойим эшик ёнида тик түрған канизға қаради:

— Кел, Мисқол, — деди ва Ўрмонбекнинг орқасини силади. — Сен ғуманг билан ўйнаб кир, буданани эртага топдирамиз.

Каниз Ўрмонбекни етаклаб чиқа бошлади.

— Олдимға ҳеч ким кирмасин, — деди Оғача ойим. — Эшикни ёпиб чиқ.

Улар чиқғач, Оғача ойим Гулшанни ўз яқинига чақириб, жойнамоздан кўрпачага сурилиб ўлтурди, такрор — «яқинроқ келинг, Гулшан», деб таклиф қилди. Оғача ойимнинг бирам муҳим сўзи борлигини сезган Гулшанбону қўл қовиштириб, ойимнинг яқинига бориб тиз чўкти.

— Шаҳардан нима хабарлар топдингиз, Гулшанбону?

— Шаҳар хабарлари ойи хонимдан маҳфий эмасдир.

— Ўзингиз тинч турасизми, уй ичингиз соғмилар?

— Шукур... Онҳазратим ва ойи хонимнинг сояи давлатларида.

— Ишларингиз қандай? — деди қулимсираб Оғача ойим. — Бизга кундашлар топиб бўладими?

Бу саволдан Гулшан бошини қўйи солди, Оғача ойим қулимсиганча Гулшандан жавоб кутиб турар эди.

— Сиз бизга кундаш изласангиз ҳам, — деди Оғача ойим, — албатта, ўз ихтиёргизча эмас, сайдининг амрлари билан, шунинг учун бу тўғрида мен сизни айблай олмайман.

Бу сўз билан Гулшан бир оз хижолатдан чиққандек бўлди.

— Албатта, ойи хоним...

— Сўзимни ерда қолдирмаслиғингизға ишонғаним важидан, — деди Оғача жиддий тус олиб, — сиз билан бу тўғрида маҳфий бир-икки оғиз гаплашмакчи эдим.

— Канизингизнинг боши устиға, ойи хоним.

Оғача ойим деворга суюлған ёстиқни тирсаги остиға тортиб такя қилди.

— Мен бу гапимни ўткан кун Ботирбоши холаға ҳам айтрабынан қўйдим. Лекин сайдингниң қулоқлариға еткурмаслик шартдир. Бу тўғрида холадан ҳам сиз эҳтиётлироқсиз, деб ишонаман. Чунки сизнинг мен билан эски қадрдонлигиниз бор.

— Чўрингиз сўз улашларишни ёмон кўрадир, ойи хоним.

— Албатта, шундай бўлмоғи лозим, — деди Оғача ойим, — ўзгалардан ҳам сизга айткулуги йўқ, Гулшан. Сайдингниң никоҳларида биз ўнлаб кундашмиз...¹ Агар канизларни ҳам кўшиб ҳисобланса, кундашларнинг саноги бир юздан ортадир. Ботирбоши хола, яна бир нечалар ва атрофдаги бекларимизнинг таважжуҳлари соясида² сайдингниң ҳарамлари уч-тўрт йилнинг ичидаги бунчалик чўриларга эга бўлди... Янги ва кенг ўрдаға келиб яйрашармиз деган эдик, баракатларингизда кундан-кун баттарроқ сиқилишиб борамиз. Ҳатто ичкари ҳавлиларда бир уйга саккиз, тўққуз каниз жойлашишига тўғри келиб қолди. Бу ҳол давом этса, бираар йиллар ичидаги яна бир янги ўрда солишқа тўғри келадир. Бу, албатта, мумкин эмас. Ундан сўнг сайдингниң ҳамма диққатларини ҳарамга тортилса, мамлакат иши халалдор бўлишида ва бунинг уволини бизлар кўтаришимизда шубҳа йўқ. Мана шу андишаларга бориб, сиз билан кенгашмакчи эдим... Бу андишам Ботирбоши холаға ҳам маъқул тушиб, ваъда берди. Сиз ҳам шу гапларни яхши ўйлаб, ўз фикрингизни менга сўзлангчи, Гулшанбону.

Гулшан Оғача ойимнинг мақсадига тушунмагандек бир оз ўйланиб турди:

— Муддаоларига чўрингиз тушунмадим, ойи хоним.

— Тушунмаган бўлсангиз, — деди Оғача, — мундан сўнг ҳарамга хотин ва каниз келтирилмасин, дейман.

Гулшан бошини қўйи солди. Чамаси, Оғача ойимнинг таклифи унга ёқмағансумон эди. Дарҳақиқат, оғиздағи ошни олдириш ҳар ким учун ҳам бир хил эмасдир.

¹ Шарийатда тўрттадан ортиқча хотин олиш ёъқдир. Худоернинг расмий никоҳидаги хотини тўрттадан ошмас, яъни, янги хотин оладирған бўлса, тўртинчи хотинини канизликка кечириб, ўрнига янгисини қўйиб турар эди. Оғача канизликка кечирилганларни ҳам бунда қўшиб ҳисоблайдир (муал.).

² Атроф ҳокимлари хушомад тарикасида чиройли қизларни хонга юбориб турғучи эдилар... (муал.).

— Биз каминаларда нима гап, айланай ойи хоним...
Биз, ҳарна қылсақ, онҳазратимнинг буйруқлари билан
қиласиз... Биз онҳазратнинг отқан ўқларимиз.

Оғача ойим Гулшаннинг кўзига анча тикилиб қолди.
Лекин Гулшан кўзини ундан қочириб ерга боқди.

— Албатта, биз сайиднинг отқан ўқларимиз, —
деди Оғача ойим қизиқишқаннамо. — Лекин, хўжам
буюрди, деб ишнинг ўнг-терсига қарамай югурга бериш
аҳмоқликдир. Агар сиз билан мен онҳазратнинг холис
куллари бўлсақ, сайиднинг давлатларига рахна сол-
майлик, дўсти нодонлиқ қилмайлик. Мана бу — холис
куллиқ даъвосида бўлған бизнинг қўлимииздан келадир...
Зоҳиран, сайидга хиёнат кўринса-да, ҳақиқатда холис
дўстлик, деб сизга бу таклифни қилдим. Сайидни кун-
чилайди¹, деб бошингизга келтира кўрмангки, ҳозир
ҳам мен онҳазратнинг бир юзинчи хотини бўламан.
Юз хотиннинг биттаси бўла туриб, кундашлиқ қилиш
ўзи телбаликдир. Лекин, орада бир ғараз² бўлса, ул
ҳам сизга айтканимдек, холис қуллиқ — чин давлат-
хоҳлиқдир³, тушундингизми Гулшан.

Гулшан «биз сайиднинг отқан ўқларимиз» деб Оғача
ойимни аччиғландирған эди. Ўз хатосиға тушунган Гул-
шан уэр айтди.

— Мен сизга бу гапни бошқа мақсадда айтдим,
ойи хоним. Биз, дедим... албатта, биз...

— Агар сиз бунда ноилож бўлсангиз, мендан йўл
сўранг.

— Пир бўлиб қўлимдан тутсангиз, онҳазратимнинг
ўғурларида бошим фидо бўлсин.

— Гап шундай бўлса, иккимизнинг бу ишқа кўмак-
лашувимиз ёки сукут қилишимиз давлатхоҳлик эмас,
душманликдир, — деди Оғача ойим. — Маним сизга
кенгашим — бундан сўнг устингиздаги хизматка бир
оз ўйлашиб қадам босишидир.

— Мени итобга⁴ тутсалар?..

— Бунинг тадбири осон, — деди Оғача. — Аввал
шуки, сайиднинг кўзларига оз кўрининг, кўринган
чоғингизда сулук чўри тополмадим, деб уэр айтинг.
Сизни, тополмабсан деб қийин-қистоқقا олмаслар,

¹ Кунчи — рашқ қилиш, қизғаниш.

² Ғараз — мақсад, ният, муддао.

³ Давлатхоҳ — хайриҳоҳ, дўст.

⁴ Итоб — таъна.

жазога тортмаслар. Мұхтожлиқдан құрқсанғыз мен бор, мен сизге құлымдан келган ёрдамни қиларман. Маъкулми, Гулшанбону.

Кейинги жумла билан Гулшаннинг чехраси очилиб кетди.

— Хұб, айланай ойи хоним.

— Аҳсан!

Даҳлизда санама тикиб ўлтурған канизлардан бири—хазинадор югуриб кирди.

— Лаббай.

— Опанғға икки тилло бер, устига мунсак ёп!

Аҳсан икки құлни қўкрагига қўйиб, таъзим қилғандан сўнг, чиқиб кетди.

— Шундай одатингизча маним олдимға келиб туравуринг, керагингиз бўлса тортинмай айтинг.

Гулшан бош букиб құллиқ қилди. Эшик очилиб, қўлида адрес мунсаги билан Аҳсан кирди ва Гулшаннинг устида тўхтади. Гулшан ўрнидан туриб ойимға бош эгди. Шу ҳолда Аҳсан мунсакни унинг устига ёпиб, қўлиға икки тиллони ҳам узатди. Гулшан устида мунсаги билан оҳистағина ўлтурди. Аҳсан ҳам турған жойиға чўқкалади. Гулшан дуоға қўл кўтарди. Аҳсан омин, деди. Дуодан сўнг Гулшан ва хазинадор — Аҳсан оҳиста оҳиста орқалари билан юриб, Оғача ойимнинг хузуридан чиқдилар.

30. ХОНИМ ОЙИМЛАР

Гулшан эгнида мунсаги билан даҳлизга чиқиб, ундағи канизлар томонидан «илтифотга лойиқ кўрилгани» учун табрик қилинди. Кафшандозда кийинар экан, кўзи тўғридағи шаҳнишинда эди. Канизлар билан хўшлашиб ҳавлига тушди.

Юқорида сўзланганидек, бу ҳавлида хоннинг суюкли хотинлари ўзларига хос доя, чевар, канизлар ва қуллари билан турар эдилар.

Оғача ойимнинг қаторидағи иккинчи танобий хоннинг суюкли хотини Розия ойимға қарап эди. Розия ойим гарчи ўткан йиллардагина хонға никоҳланған бўлса ҳам, ўзининг хаёлий ҳусни билан «сайдинг» илтифотини жалб этиб, ҳарамда биринчи мавқуяга мингган хонимдир. Ҳизматига тўрт каниз ва икки қул ҳадя қилинған бу ойим асли кошғарлиқ бўлған

Охундジョンбой деганинг қизидир. Розия хоним қизлиқ чоғида Қўқон бойларидан Жонбобо отлиғ бир кишига тегиб, бир бола туққандан кейин эри ўладир. Бундан сўнг қўқонлиқ Миён Фазл Ваҳҳоб ҳазратка эрга чиқадир. Гулшанбонуға ўхшаш хуфиялар «сайд»нинг кулоғига еткирган бўлсалар керак, бир кун хон, тўсиндан арава юбориб, Розия хонимни «мехмонға» чақиради...

Хоннинг ҳукмига қарши Миён Фазл Ваҳҳоб нима ҳам қила олсин. Розия хоним хон ҳарамида бир кечада кўниб, эртаси уйига қайтадир. Ул уйига қайтиб келгандада Миён Фазл Ваҳҳоб Розия хонимнинг қўлиға талоқ хати топшириб, етти арава мол билан ўрдаға жўнатадир... Миён Фазл Ваҳҳоб бу ишни қўрққанидан қилғанми ёки хонга аччиғ тариқасидами, ҳар ҳолда буниси ҳатто Розия ойимнинг ўзига ҳам қоронғидир¹.

Гулшан Розия ойимнинг даромадига етканда икки нафар каниз даҳлиздан чиқиб, бўсағанинг икки томонида қўл боғлаб ва бош букиб тўхтадилар. Шу ҳолда ичкаридан гўё юзи сут билан суворилғандек оқ, қурулай кўзи ойсиз ва булуғлиқ кечасидан ҳам қорароқ, қадди сарв каби мавзун, қора сочи тақимини ўпкан, уст-боши ипак ва олтинлар билан гарқ бир хоним хиромон чиқиб келди. Бошидағи ҳисобсиз кокилларини санама тикилган оқ ҳарир рўймол билан озорсизгина боғлаған, ёқа ва этакларига нафис жияк бириктирган хонатлас кўйлак, бухоро кундалидан қирғоқларига олтин уқа (кўр) тутулған енгиз жедатка кийиб, ёқут кўзлик олтин тутгамаларни бўшқина солған, ҳуснда мисли оз бу нозанин хоннинг суюкли хотини — мазкура Розия хоним эди. Розия хоним орқасидан саккизтўқуз ёшлар чамалиқ, кўз ва тишидан бошқа аъзосида оқи йўқ бир бола кўриниб, хонимни таъқиб этди. Бу ёш югурдак қулча хонимнинг ҳар бир майда хизматларига тайёр каби сёғ олар эди².

¹ Ҳарам тўғрисидаги маълумотимизнинг аксариси бу кунда ҳам ҳаёт бўлған шу Розия ойимдан олинди. ҳозир тўқсон ёшларга йеткан бу кампир ўзининг кучлик хотираси билан бизга қимматлик маълумотлар берди. ҳануз сақланиб келган бэзги хусусиятлари билан бизни таажжубка солди. Мұхтарама Розия ойимға ва икки орада воситачи бўлиб устимга миннат кўйган қўқонлиқ дўстим Босит Қодирийга ташаккур ва раҳматлар айтишка бурчлиман (муал.).

² Куллар аксан тоғиқ ва ҳабашдан бўлиб, йетти ёшдан ўн икки ёшгача эдилар ва ҳарамда бўндан юкори ёшдаги куллар сақланмас, қул ўн икки ёшга етканда, ҳарамдан чиқарилиб, ўрладаги бирар хизматка белгиланар эди, дейдир Розия ойим. Эрлиги олинған (бичилған) куллар Худоёрнинг онаси ҳоким ойим — Жорқин ойимғача (1185 йилда вафот эткан) фақат икки нафар бўлиб:

Розия хонимга қарши келгучи Гулшан букилиб салом қылди. Розия хоним ишорат билан жавоб бергач, «Эсонмисиз» деди ва унинг жавобини ҳам кутмай шаҳнишин томонга қараб йўл солди.

Гулшан Розия ойимнинг қујисидағи даҳлизга юзланиб, ундан канизлардан Курбон ойимнинг соғлиғини сўраб ўтди. Курбон ойим танобийсидан сўнг ҳавлиниң кун ботишига мойил бино Шодмон ойимга қараашлиқ ва шу билан ҳарамнинг биринчи ҳавлисидағи ойимлар ҳисоби битадир¹.

Эшмат саркор, Тошмат саркор; (ҳар иккави ҳабаш) булат ҳам хондан ташқари ҳарамга киравлас эканлар. Ҳар кун эрталаб хон онасига салом бергали кирганда ҳалити икки нафар кул ҳам хоннинг орқасида кириб, ҳоким ойимга салом бергандан сўнг яна хон билан бирга чиқишиб кетар эканлар (бу иккиси Шералихондан қолган, ҳоким ойимға яқин, қадрдан қуллар бўлғанга ўхшайдир).

Розия ойимнинг айтишига қарганда, шу икки қулдан бошқаларнинг эрлиги ёъзотилмаган экан. Бундан онглашиладирким Худоёр ҳарами тўғрисида ёзгучи ўрусларнинг кул (евнуҳ)ларни каниз ва хонимлар билан аралаш юрган ўзда кўрсатишлари муболагадир.

Розия ойим яна тасифла киришиб: «Хон биринчи марта таҳтдан ҳайдалишида ўзига қараашлиқ ёш қуллардан бир нечасини Жиззахка элтиб ўқуди ва сўнги даврида уларни баъзи мансабларга қўиди. Улар: Шоғулом жарчибoshi, Жамил Файзулло ва Муллача хазиначилар, Давлат удайчи, Давлат саркор ва Шопсанд қўрбошилар» дейдир. Бу қуллар ҳам ҳарамга киравмаганлариdek, эрликлари ҳам жойида экан (муал.).

¹ Розия ойимнинг айтишига қараганда, Худоёр ўзининг уч карра хонлик даврида шу хотинларга ўйланган: 1). Қозоқ тўра — Розия ойим бунинг отасини аниқ айтголмайдир. Лекин, ўзи қиргизлардан эди, дейдир. Фикримизча, Мусулмонқулининг қизи шу бўлсамикин?.. Хизматида тўрт канизи бўлған; 2). Анбарчик тўра — Ўратепада юзбеги бўлған Худоёрбек валиманинг қизи; 3). Катта пошиш ойим — қўқонлиқ Ҳўжа Калон тўранинг қизи, Насрилдин бекнинг онаси, хизматида юетти каниз, тўрт кул; 4). Қўқонлик ойим — Қўқоннинг Сармозор даҳасидан, киммин қизи эканини Розия ойим билмайдир. Хон биринчи марта таҳтдан кувлангач, эрга тегиб кеткан; 5). Курбон ойим — гумалардан. Ўрмонбекнинг хазиначиси хизматида икки қул, уч каниз. 6). Гулзода бекач — гумалардан, хизматида тўрт каниз. Шаҳзодаҳон исмлик бир қизи бўлиб, 1919 йилда ўша ўлган; 7). Ширин бекач — гумалардан, хизматида уч каниз, икки қул. Тўра пошиш исмлик бир қизи бўлиб, қўқонлик Кароматхон тўрага берилган; 8). Исфаралик ойим — Исфаралик ҳабиб эшоннинг қизи. Бундан Моҳзодаҳон исмлик бир қиз туғулиб, қўқонлиқ Сафоҳон тўранинг ўғли Исаҳонга берилган (Моҳзода алжол тирик эмиши). Худоёр иккинчи хонлик даврида Исфаралик ойимни гарлиқда айблаб, баҳона билан ўрдадан ҳайдаб юборган.

Худоёрнинг иккичи хонлик даврида олған хотинлари: 9). Мунисхон пошиш — қўқонлиқ Қозихон тўранинг қизи, хизматида саккиз каниз, тўрт кул. Бундан Сайид Умарбек исмлик ўгул туғулган. Сайид Умарбек бу кунда Рошилон раёни, Тўра қишлоқда турар эмиш; 10) Пошшабону ойим — Қўқонда машхур Баҳодирхон тўранинг синглиси, Муҳаммад Аминбек билан Чорсолаҳон пошшанинг онаси, хизматида тўқиқуз каниз, беш кул. 11) Масъудаҳон (Оғача ойим) Ибодуллаҳўжа қизи, Фансуруллобекнинг онаси; 12) Кишибиби (Қизоийм) — Худоёрнинг тогаси Гадойбой дотқонинг қизи. Бу аслла Шомуродхоннинг хотини бўлиб, Шомурод ўлгандан кейин ҳоким ойим Бухорода ўғли Худоёрга Кишибибини никоҳлаб берган, хизматида беш чўри, уч қул; 13) Ки-

Гулшан ҳавлиниң күн ботиши — ошхона ва бошқа рўзгор уйлари ёни билан бориб бир эшик орқали бизга маълум узун йўлакка чиқди. Йўлакда сув ҳавлисидан чиқиб келган бир каниз Гулшанни кўриши он қўлидафи сувлик кашкулни ерга қўйиб югурди:

— Эсонмисиз? Мунсак муборак, аямлар соғми?

Гулшан қўй учи билан кўришди:

— Ўзинг ўйнаб кулиб юрубсанми? Мунисхон пошша ойим саломатмилар? Биби пошша ойим ёзилиб кетдиларми?

— Шукур, шукур, бизнинг ҳавлига кириңг.

— Киарман, — деди Гулшан ва устидаги мунсакни еча берди. — Сен маним келганимни уларга айтма. Мен ўзим бир оздан кейин чиқарман.

Каниз орқасиға бурилиши билан йўлакнинг юқори эшикларидан бири тарақ-туруқ очилиб, ичкаридан икки ёш, оёғ ялан каниз қувлашиб чиқдилар. Гулшанни мун-

чик Шоҳойим — Шуғнон ҳокимининг қизи, Ўрмонбекнинг онаси, боланинг чилласи чиқмай ўлган; 14) Тұхтапошша (Чиндовулиқ ойим) — Наманган тумани Чиндовул қишлоғининг хўжা қизларидан, хизматида тўрт каниз, уч қул; 15) Катта Шоҳойим — Дорбоз ҳокимининг қизи, хизматида етти чўри, катта Шоҳойимдан Сайд Фансурулло исмлиқ ўгул туғулиб, беш ёшида экан, Марғилонда Пўладхон ўлдирган; 16). Гуландом бекач — гумалардан, бундан Офтобхон исмлиқ қиз туғулиб, Худоёр вақтида, ўн уч ёшида ўлган. 17). Моҳбетим бекач — гумалардан. Биняминбекнинг онаси, хизматида уч қул, уч чўри; 18) Гулқиз бекач — гумалардан. 19). Асал бекач — гумалардан. Учунчи хонлиқ даврида; 20) Қоратегинлик ойим — Қоратегин ҳокимининг қизи, хизматида етти чўри; 21). Бибиопашка (эқавотлиқ ойим) — Наманган юқорисида Экавот қишлоғининг катта эшони Ҳўжам пошша тўранинг қизи, хизматида уч чўри, икки қул бўлған; бу ойимдан Сайд Фансурулло исмлиқ ўгул туғулиб, болани уч ёшида Пўладхон ўлдирган. 22). Розия ойим — (шу маълумотларни берувчи) Розия ойимдан Сайд Умарбек отли ўгул бўлса ҳам уч ёшида ўлган. 23). Қамбар пошша — Ҳўжакалон тўранинги кичиг қизи, Катта пошша ойим ўлгандан кейин болдиз олган, хизматида уч каниз. 24). Ойнисахон пошша — Турсун оталиқнинг қизи; 25). Тухфаниса ойим — Олтиариқ қозисининг қизи; бу қизга ўйлангандан ўттуз етти кун кейин Худоёр ўрусларга сигиниб Тошканд келган. 26). Ҳамроҳ биби ойим — қўқонлик Нурматбой деганинг қизи; 27). Саиданисо (чимёнлик ойим) Қирғизлардан бирининг қизи. 28). Шодмон ойим — гумалардан; хонга суюкли эмиш, хизматида уч чўри, уч қул. 29). Гулбону бекач — гумалардан; хизматида бир чўри, бундан Озодаҳон исмлиқ бир қиз туғулиб, қўқонлик Баҳодирхон тўрага келин бўлған; 30). Ружафзо бекач; 31). Сайқал бекач; 32). Санавбар бекач; 33). Аргувони бекач; 34). Ниғор бекач; 35). Рузрон бекач. Бу олтова ҳам гумалардан эмиш.

Бу йерда ёзилғанлар Худоёрнинг тугал хотинлари ҳисоби бўлмас, деб ўйлайман. Чунки Розия ойимнинг хотиридан баъзиси кўтарилган бўлиши мумкинdir. Биз Розия ойимнинг ёнида эканмиз, ўртоқ Босит:

— Хон неча хотин олган эди, ойи? — деб ҳазил тариқасида тақрор савол берди. Розия ойим мендан ийманган қиёфада:

— Хон қурсин, унинг олган хотинларининг ҳисоб-китоби ёъқ, болам, — деди ва манимча жуда тўғри сўзни айтди (*муал.*).

¹ Гума — жория, хизматкор.

сак билан овора кўрган қизлар шу тарафка қараб югурдилар.

— Гулшанжон, Гулшанжон! Эсонмисиз, омонмисиз? Сарпа қутлуғ!

Шўх канизларнинг бири Гулшаннинг олдидан ва иккинчиси ёнидан ўрамалаб, бирининг оғзидан иккинчиси «Гулшанжон, эсонмисиз!»ни олиб эсанкиратдилар.

— Бўлди, бўлди! Шўх байтал ўлгурлар! — деди Гулшан, — ойимлар эшитса, нима деган гап бўлади?

Қизлар Гулшаннинг сўзига қулоқ солмай, келган тарафларига қараб уни судрадилар.

— Тўқ байтал! Гулшанжон — Тўқ байтал!

Гулшан аччиғланса ҳам, яна уларнинг сўз ва ҳарачатидан кулиш카 мажбур эди.

— Куриб кеткурлар... Шунинг учун ҳам сенларнинг олдингға киргим келмайди-да!

Сўзга илтифотсиз, ўйун билан борған канизлардан бири Гулшаннинг қўлидағи мунсакни титкилаб ўзига тортди:

— Қайси гўрдан олдинг, менга берсангчи шуни!

— Ол, ол! — деди Гулшан мунсакни бўшатиб, — ўлимлик қиласан!

— Албатта тобутимга ёпарлар!

Йўлакнинг бошидағи эшикка етдилар ва учиси бирдан сиқилишиб, ичкарига кирдилар.

31. ҚИРҚ ҚИЗЛАР

Гулшанлар кирган ҳавли «Қирқ қизлар» деб аталар эди. Бунда хоннинг кўнгил очишиға хизмат қилғучи «Қирқ қизлар» турар эдилар. Бу ҳавли ундаги ўйунчи, созанда ва навозанда канизларнинг сонидан олиб, «қирқ қизлар» аталған эди.

Худоёрнинг ҳарам канизлари сони бир юз элли беш нафар бўлиб, булардан ўн тўрт нафар оқ саройда, саккиз нафар шаҳнишинда, яъни хоннинг ётиш-туришиға маҳсус, саккиз нафар Ўрмонбекка қарагучи, ўн нафар доялар ҳузурида, йигирма беш нафар шу «қирқ қизлар»да ва қолғанлари ҳар қайси хоним ойимларнинг хизматида эдилар.

Навли юзида тўп (копток) ўйнағучи «қирқ қизлар»-дан етти-саккизи Гулшан олдиға югурдилар.

- Эсонмисиз!
- Елиб ютуриб ҳормант!
- Эрингиз ўлмадими?
- Шаҳар йигитлари омонми!

Бу қизлар ҳалигилардан қолишмайдирған шүх эдилар. Гулшан ҳам энди жиддият сақлаб турмади:

— Зерикмай ўлтурибсанларми? Ичларингда туғиб күйғанларинг йўқми? Ўйнаш қилиб тутилмадингларми?

Бу ҳавли тўртта кичик ва битта зўр танобий уйдан, ҳам «қирқ қизлар»га маҳсус ошхона ва бошқалардан ташкил топиб, қизлар кичик уйларга жойлашқан эдилар. Уларнинг ясанига келганда, юқоридағи канизларда кўрилгандек — қизил шол кўйлак, сариф гуллик қизил шол рўғмол, шуваматос ёки адрес желатка эди. Ҳозирги тўп ўйуниға иштирок этувчи қизларнинг ҳаммаси деярлик ялан оёғ бўлиб, юмишдаги ва ошхонада ош пиширгучи қизлар дуранглик бедона кафшлар кийган эдилар. Аксарият, йигирмадан ошқан қизлар, ичларида ўн олти, ўн етти ёшлиқлари ҳам кўринар эди. Бу қизлар мамлакатнинг ҳар тарафидаги беклардан хонға ҳадя тариқасида юборилғанлар, шунинг учун улар терма дўндиқлар эдилар. Чўри исми билан ҳарамга келган кунлари ҳар бирлари ҳам хоннинг «илтифоти»га бир-икки мартабагина «лойиқ» кўрилиб, сўнгра «қирқ қизлар» ичига ҳавола қилинған эдилар. Улар ҳануз ҳам шаҳарнинг машҳур хотинлари бўлған Нусрат ҳофиз, Ботирбоши хола, Тилло ҳофиз, Тоғи ҳофиз, Мисқол ҳофиз, Хон оғача, Мисоқ оғача, Улуғ ўйунчи, Шоҳбачча, Ражабхон, Тош ҳофиз ва ҳатто марғилонлиқ Зебихонлардан ўйунта, созга, ашулага таълим олиб келарлар ва шунинг учун ҳар бирлари ўз ҳунарларида яхши санъаткор бўлған эдилар. Жумъа куни етканда бу ҳавлидаги катта танобий тартибка солинар, «қирқ қизлар» янги кийимлар кийиб, упа-эликлар қўярлар, турли зийнатлар тақиб, ажойиб суратда базмга ҳозирлашарлар эди. Жумъа намозидан кейин хон бальзан ёнида Розия ва Оғача ойимлар билан бу ҳавлига ўтар ва катта танобийнинг тўрига кўйулған маҳсус курсига ўлтуриб, «қирқ қизлар» базмини кўрар эди...

Шу йўсун қизлар Гулшанни ҳавли ўртасидаги тўп ўйуниға судрадилар. Гулшан ўйунға иштирок этишда тихирлиқ қилиб кўрган эди, қизлар зўр келдилар. Но-

илож ул ҳам ўйнамоққа мажбур бўлди. Бир чеккада ўлтуриб ечинди. Шу қизлардек ялан оёғ, бош ялан бўлди. Товор кўйлагини аяб липпа урди, енгини тирсаги юқорисигача шимарди ва ички кийимини ҳам болдириғача кўтарди.

Қизлар ўзлари ясаған катта ипак коптокни Гулшанга бердилар:

— Марра беш-ён; ҳар ўнда бир айланиш; агар тўпни маррага еткармай қочирсангиз, ҳар биримизни апишиб, ҳавлини бир айлантириб чиқасиз! — дейишиди қизлар.

Гулшан шартни эшитиб ўйланиб турди.

— Агар маррага еткарсам?

— Биз апишиб айлантирамиз!

— Қочинглар бўлмаса! — деди Гулшан ўртаға тушиб, — тўпка тегсанглар, менга ҳадук берсанглар, ҳисоб эмас!

Қизлар унинг шартига кўниб ҳавлининг теварагига тарқалишдилар. Гулшан ўйинни бошлади. Тўп чиқафон эди. Гулшан биринчи ўнни муваффақият билан тамомлади. Ўн иккинчи урушда биринчи ўн учун айланган эди, Гулшаннинг узун соchlари атрофка тарқалиб, ҳатто кўкраги ҳам ларзага келди... Қизлар қийқиришиб куладилар. Иккинчи ўннинг айланиси ҳам шу йўсун кулги берди. Лекин учунчи ўннинг ерга саккизинчи урулишида копток қочти. Гулшан коптокни ҳарчанд қувлаб юқори чиқаришга урунса ҳам бўлмади, ерда думалаб қолди. Қизлар қийқириқ ичиде чапак уриб юбордилар ва Гулшанни ўраб олдилар. Гулшан чиқиб қочишга хезланса ҳам бўлмади, ул кутмаганда бир қиз орқадан келиб сакраб минди...

— Хих, эшагим!

Қизлар кулишар эдилар. Икки қиз Гулшаннинг олд ўрум сочидан ушлаб етаклади. Бу томошага ҳатто уйдаги ва ошхонадаги қизлар ҳам қизиқсиндилар. Биринчи қизни ҳавли айлантириб чиқсан эди, иккинчиси минди... Шу йўсун бечора Гулшан ўнлаб қизни ўз устига миндириб, орқаси яғир бўлаёзди. Яна ўйун бошланди...

Шомга яқин ош тайёр бўлиб, қизлар ўз қўшоқлари билан уйларига кирдилар. Гулшан ҳам бир қўшоқ қизларга қўшулиб, ўрталаги уйга кирди. Қизларнинг ўзидек ўйнинг полос ва жиҳозлари ҳам бесаранжом эди. Унда

бир рўймол, бунда бир маҳси, нарида яна бир нарса...
Хулласи, уй ивирсиб ётар эди.

Гулшан бу ҳолдан ранжиб қизларни урушти:

— Сенларға ҳеч сон кирмади... Қачон қўрсам, уйла-
ринг лўлининг хуржун солған елкаси!

— Лўлининг хуржун солған елкаси бўлса, — деди
Нозик отлиғ бир қиз, — ўзинг йифиштириб бер, Гул-
шан опа!

— Менми, менга нима?

— Менга ҳам нима?

— Сенинг турадирған уйинг, — деди Гулшан, —
Йифиштирсанг, кўнглинг равшан бўлади.

— Уй йифиштирилмаса ҳам кўнглим равшан, —
деди Нозик ва ёнидағи Тұхфага қараб кулди. — Тұхфа,
сенинг ҳам кўнглинг равшанми?

Тұхфа оғзини катта очиб, Гулшаннинг олдиға келди:

— Мана, ўз кўзинг билан қара, опа: кўнглим чил-
чироғ ёққандек равшан, кўрдингми?

— Кўрдим, кўрдим? — деди Гулшан, юзини четка
үтуриб. — Кўнглинг равшанлиги устига яна бир нарса
ҳам тилабдир...

— Нима тилабдир, эрми? — деди учунчи ёқдан
Кумри. — Кўнгилдагини топар экансан, опа! Меникига
ҳам қарабчи, нима тилар экан?

— Сеники ҳам эр, — деб кулди Гулшан. — Буларга
бир сўзни айт-да, қоч! Ош келди. Нозик, дастур-
хонингни ёз!

Нозик дастурхон ёзди. Ўртаға икки хитой лаганда
палов қўйилиб, Гулшан билан етти қиз ошқа ўлтурдилар.
Кенгаш-пенгаш бўлмади. Хуфтандан кейин уйлар-
даги қизлар бирин-сирин катта танобийға йифила бош-
ладилар. Икки чилдирма қизитилди ва дутор, танбур,
ғижжак, чанг каби асбоблар созланди. Қизлар ўзаро
базмга ҳозирланар эдилар ва ҳар кеч ҳам базм билан
кўнгил ёзар эдилар. Дарҳақиқат, эрқаклар дунёсидан
алоқаси кесилган мазлума, оила ҳаётидан маҳрум
бечоралар шундан бошқа нима билан ҳам овинсин?
Уларнинг овунчоги — кундузлари ўйун, кечалари базм
ва тунлари уйқу ҳам туш эди.

Қизларға маҳсус назокат билан соз чалинар эди.
Созга йўлбошчилик қылған чилдирма ярим товушида
гумбирлар, қўнгуроқлари шингирлар эди. Катта қан-
дилдаги чилчироғ нури остида ҳарам қизларининг ҳусни

ял-ёнар, ўртада ўйнагучининг маммалари мақом билан силкинар ва «Кирк қизлар»даги кундалик базмга одат қылған бошқа ҳавли канизлари билан танобий борған сайин тұла борар эди.

Үйүнчи қуллиқ қилиб, сақнадан чиқди. Унинг ўрнига Нозик құзғалди. Нозик сақнага чиқиши билан чилдирма ҳам бошқа күйга ўтди:

— Бак-баканг, бак-баканг...

Чилдирмага созлар замланғандан кейин, икки ўртадан узук ва шўх бир куй туғилди. Нозик ўртада хиромон бир тарафка ўткан эди, қизларнинг баъзисидан соз каби шўх ва нафис оҳанг эшитилди:

*Очилғанда лолалар, териб юргай болалар,
Айтингиз-чи, холалар, ўткан дўндиқ созмиdir?
Ўткан дўндиқ созмиdir?
Термулғаним билмаса, писандига илмаса,
Раҳми асло келмаса, менга қылған нозмиdir?
Чеккан жабрим озмиdir?*

Нозик ўйнар, қизларнинг ашулласига аъзо ҳаракати билан тасдиқ ишорасини берар ва бунда нафис бир санъат күрсатар эди.

*Бағрим ўтда ёнади, ёрим мендан тонади,
Кулни йўққа санади, мендан ё аразмиdir?
Мендан ё аразмиdir?
Ёрим юзи гул эрур, зулфлари сунбул эрур,
Лаҳза кўрган қул эрур, ёки бул пардоzмиdir?
Ёки бул пардоzмиdir?
Хуммор қўзинг ўйнатиб, ошиқни арzon сотиб,
Исён лойига ботиб, жабру ситам бозмиdir?
Жабру ситам бозмиdir?
Тирнамагил сен ярам, ийғлатма кўб, қил карам,
Турған ўрнингдир ҳарам, яъни шоҳум базмиdir!
Яъни шоҳум базмиdir!
Ою ишлар ийғлаган, бағрин ҳар дам тиғлаган,
Ҳасратидан биғлаган¹, баҳтсиз бир қиз Назмиdir!
Баҳтсиз бир қиз Назмиdir!*

Кейинги байтлар оғир бир фожиъани тасвир қилдилар: ойлар, йиллар ийғлаган, ҳасратидан ҳушсиз йиқилған баҳтсиз бир қизнинг жонсўз фарёдини гавда-

¹ Биғлаган — бигиллаган, ҳушсиз йиқилған (муал.).

лантириб кўрсатдилар. Бу ўрунда шўх куй лобарғина қилиб бир ҳасратка таржимонлиқ этди. Юқоридан бошлаб ўйноқи рұхда куйлаб келтан қизлар ва доим нозу карашмада бўлған ўртадаги ўйунчи ҳам бундаги оғир маънони ўзича олишқа тиришдилар...

*Ою йиллар йиғлаған, бағрин ҳар дам тиғлаған,
Ҳасратидан биғлаған баҳтсиз бир қиз Назмидир!*

Бу «баҳтсиз бир қиз» базмдаги қизларнинг ҳар қайсиға маълум эди. Фақат бу мажлисда унинг фарёди иштирок этса ҳам, ўзи иштирок этмас, беҳисоб фарёдлар, фифонлар, ҳасратлар билан чарчаған бу қиз ҳозир тупроқ остида тинчib ухлар эди. Унинг таржимаи ҳолини «қирқ қизлар»дан ҳар ким билганидек, ҳатто уни қўмсаб йиғлағучилар ҳали ҳам топилар эдилар. Дарҳақиқат, озодликдан маҳрум этилган мазлума қизларга неча асарлар қолдирив кетган бир шоирани ким билмасин, кўбчиликнинг айттолмаган ҳасратини куйларга солиб берган шоирани ким унутсин? Ошиқидан айрилған бир маъшуқа, номусиға тўқунилған бир мазлума-нинг фарёди кимларнинг юрагига кириб ўлтурмасин?

Шундай... Мундан бирар йиллар илгари шу «қирқ қизлар» ичida Назми исмлиқ бир қиз ўлган эди. Бу шу қизнинг тўқуған байтларидан бири эди. Қизларнинг сўзига қарағанда, Назми Қўқон қишлоқларининг биридан, чиройлик қиз экан. Назми холасининг ўғли билан севишкан, ҳатто тўй кунлари ҳам яқинлашқан экан. Отаси жуда камбағал деҳқон бўлиб, Худоёрнинг неча йиллик солиқларини тўламаған экан. Худоёр чўғоллари (золим табиъатлик, раҳмсиз солиқ йиғувчилар) қишлоққа чиқиб, Назмининг отасини сиққанлар, урганлар... Қизидан бошқа мол тополмай, уч йиллик солиқ бадалига Назмини тутиб, Худоёрға тортиқ қилғанлар. Ҳонға Назмининг ҳусни ёқсан, уни доя хотинларға қўшиб ҳаммомга юборған. Худоёр бир-икки кеч бечоранинг номусига тегиб, сўнгра «қирқ қизлар»га қўшқан... Назми шунда икки йил чамаси куйлаб, йиғлаб юрган, «қирқ қизлар»га кўб янгиликлар берган ва охирда ўзи сил бўлиб ўлган...

Назмининг охирғи икки байтидан сўнг базм битди. Ҳар ким ўз жойиға тарқади.

32. НОЗИК

Гулшан бояғы етти қызлар ёнила ухламоқчи эди. Нозик билан Тұхфа ўрун ёзар әдилар. Қумри Гулшанга шүхлиқ қиласаң.

— Сен аҳмоқсан, Гулшан опа! — дер эди Қумри.— Эрингни ёлғиз ташлаб биз «бүйдоклар» ичиде нима маъно топасан?

— Алжимай ўл! — деди Гулшан. — Сенлардан, албатта, маъно топмайман... Сенларнинг ййлағанларинг фақат...

— Бўлмаса сен нимани ўйлайсан?

— Мен тириклик тўғрисида ўйлайман. Сенлар тўқлиққа шүхлиқ қиласанлар. Бир вақт мен ҳам хоним ойимларга чўри эдим. Бироқ сенлардек...

Ҳамма қызларнинг қулоқ-кўзи Гулшаннинг оғзида эди. Ўрунни ёзиб битирган Тұхфа сўради:

— Сен ўйламасмидинг?

Гулшан бир оз жавобсиз, кулимсираб турди.

— Ўйласам ҳам сенларча ҳар кимнинг олдида валдирамас эдим... Бу ўзи шайтоннинг иши. Намоз ўқусанг, рўза тутсанг, хаёлингга бу нарса ҳеч келмас. Мана биттаси Зарифа, сенлардек уят сўзга оғиз очмайдир.

— Ва-ха-ха-ха! — деб кулиб юборди Қумри. — Айтчи ўзинг, Зарифа, сен кеча қандай туш кўрдинг?

— Куриб кет, — деди Зарифа юзини четка ўтуриб. — Кишини кўрган туши билан айбламакчи...

Қызлар бирин-бирин келиб ўрунлари устига ўлтурдилар. Ўрун қатор ва бир-бирига тақаштириб солинган эди. Гулшан ўзи учун четроқдағи ўрунни танлади.

— Кўйлак ечар! — деди Қумри турған кўйи ва кўйлагини ечиб ташлади. — Иштон солар!

Қызлардан уч-тўрттаси Нозикни таъқиб этдилар ва шарт-шурт бир-бирининг яланғоч этига урушиб шартак олишдилар. Қип-яланғач қызлар билан кулги бошланди.

— Сенларнинг ёнингда ётқан киши гуноҳкор бўлади, — деди Гулшан бошини кўрпага буркаб. — Агар билсанглар, ҳар қайсинг иккита, учта боланинг онаси бўладиган ёшдасанлар.

— Тўғри айтасиз, айланай Гулшан, — деди Қумри яланғоч ўзини шамъга солиб. — Менга яна бир қараб

кўринг-чи, балки беш боланинг онаси бўлсам ҳам арзир.

Ҳамма кулишиб юборди. Кўрпани бир оз очиб қарашан Гулшан ҳам бу ҳолдан ичи қотиб қулди.

— Шамъни ўчир.

Кумри тоқчадаги шамъни ўчирди. Уй қоронғиланди. Энди «нари ёт, бери ёт» билан бир-бирларини итариб, суриб кўрпани тўрт томонга тортишиб жанжаллаша бошладилар.

— Ухлатасанларми, йўқми? — деди Гулшан жекириниб.

— Жим, жим, — деди ярим товуш билан Кумри. — Гулшан бизнинг уйга ухлағали келган экан.

— Уйида эри ухлатмаған бечорани.

— Мен шунинг учун ҳам эрга тегмайман-да, — деди Кумри. — Эр деганинг оти ўчсин, кишини ухлатмайди.

— Ухла, бечора, ухла, — деди Туҳфа, — «Кирқ қизлар»дан саранжомингни олиб кет.

Яна кулги кўтарилиди. Гулшан ҳарчанд ўзини ушласа ҳам яна қизларнинг кулгисига тортилди.

— Гап-сўзда ҳам бир маъни бўлиши керак, — деди Гулшан, — бўшдан-бўшка ҳиринг-ҳиринг; бундан кўратинч ухлаған яхши.

— Маъни ўзи нима, Гулшан опа?

— Маънининг маънисини сўрама, Туҳфа, — деди Кумри, — Гулшан опам жавоб берсин, бизнинг шу «Кирқ қизлар»да қамалиб ётқанимизда ҳам маъни бормикин?

— Уни қўявур, — деди қизлардан яна бири, — Гулшан опам эрини ёлғиз ташлаб, биз маънисизларнинг ичидаги яна бир маънисиз бўлиб ётипти; шунда ҳам бир маъни бормикин?

— Товушларинг ўчсин.

— Бор, бор, — деди аллаким. — Бизга ҳамроҳ топиб келади.

— Бизга ҳамроҳ топиб келганида ҳам маъни борми?

— Нега маъни бўлмасин, бизга ўхшаш маънисиз кўпаяди.

Яна кулги кўтарилиди. Қизларнинг «маъни»дан бошланған «пайрав»ларининг кейинги жумласи Гулшанга ҳам таъсир қилиб ҳиринглади.

— Қирилиб кет ҳаммаларинг... Энди маънисизни кўпайтирмайман, тинч ухлаларинг.

— Баракалла, — деди Нозик. — Ана энди сизга ҳам маъни кирипти.

— Бекор айтибсан, Нозик, Гулшан опамга маъни кирганига кўб бўлған.

— Масалан, қачон кирган?

— Анчадан бери... Эрга текканингизга қанча йил бўлди, Гулшан опа?

Қизлар яна шаққиллашиб кулдилар.

— Бемаза гапни қўйинглар, ухлайлик.

— Ухлашни бир оз қўйиб тур, Гулшан опа, — деди Нозик. — Мен сенга мазалик бир ҳикоя айтсам эшитсанми?

— Ҳикоянг курсин...

— Ўзи мазалик гап. Эшитмасанг, бари бир ухлатмайман.

Гулшан минғиллаб ўрнида ағдарилди.

— Айт, лекин чўзма.

— Чўзмайман. Сенлар ҳам жим ёт, овсинлар!

Бир-бирини қитиғлаб, ҳиринглашкан қизлар Нозикнинг сўзига қулоқ солмадилар.

— Тухфа, Қумри! — деб ҳайқирди Нозик. — Тинчимасанглар бўғаман, майлими?

Нозикнинг таҳдидига қулоқ солувчи яна бўлмади. Нозик ирғиб ўрнидан турған эди, қизлар кўрпага яшириндилар.

— Оғзингға аямай ураман, Наврўз!

Кўрпа ичиди қизларнинг пиқиллаши эшитилса ҳам, бояғи тўполон биткандек бўлди.

— Уйғоқмисан, Гулшан опа?

— Гапуравер.

Қизларга яна бир мартаба танбеҳ ясағандан кейин Нозик ўз ўрнига келиб ўлтурди.

— Бир кун эрталаб биз ҳаммомдан келар эдик, — деб ҳикоя бошлади Нозик, — бизга йўл устидан бир йигит ҳамроҳ бўлди...

— Эски дард, — деди аллаким, қизлар пиқиллашиб юбордилар.

— Эски гап бўлса, кишини эшиткали қўймайсанларми?.. Мен Гулшан опамга сўзлаб бермакчиман, сенлар эшитмасанглар, ухлаларинг ё бўлмаса, сўзни қовиштирларинг!

— Сүзлай бер, биз тинч ётамиз, — деди Тұхфа,— Наврүз, Қумри, Ҳамроҳ, жим ёт-да, ахир!

— Шундай, Гулшан опа, йўлдан бизга бир йигит ҳамроҳ бўлди. Ӯзи қандай йигит деб сўра: сурма қўйғайндек оҳу кўзи бор, қизил олмадек таранг юзи бор, энди чиқиб келган кўк майса мўйлаби, Розия хонимницидан ҳам нафисроқ қалам қоши... Устига кийган бекасам тўни ўзига шундай ярашқанки, биз қизлар ихтиёrsиз унга қарашибик; а, шундайми, Тұхфа?

Тұхфа тасдиқ қилди, Гулшандан уйғоқлиқ жавобини олиб, Нозик давом этди:

— Ёш, уятчан йигитка ўхшади. Йигирма чоғлиқ қизнинг ўзига тикилганидан уялиб, ерга қаради... Бизни ҳаммомга олиб борғучи Насиба хола билан Ханифа доя эдилар. Улар бизни йигитка айланишкан ҳолда кўриб, тез юришқа қистадилар. Биз йигитка қарай-қарай ночор қадам босар эдик. Йигитча бўлса биздан қолишмай бирга келар эди. Биз ўрда дарбозасига етаёзған эдик мен қайрилиб орқамға қарадим. Ёш йигит ҳамон ўн қадам нарида келар эди... Шайтон васваса қилиб кўнглимга бир гап келди. Секин-секин сурилиб, қизлардан кейин қола бордим. Энг орқага чиқфач, бошимдағи рўймолни олиб, паранжи ичидан ерга ташлаб юбордим... Дарбозага яқинлашқан эдик, дарбозани очиб дарбозабонлар четлашдилар. Рўймолим ерга тушдими, йўқми — билмас эдим, лекин дарбозадан ташқарида тушиб қолишини тилар эдим... иш кутканча чиқмади, деб афсус қилдим, чунки дарбозадан ўн адим ичкари кирган эдик, дарбоза ёпилмасдан яна орқамға қайрилдим. Ўзимдан беш қадам нарида тушкан рўймолимни бояғи йигит энгашиб ердан олар эди. Мен бурулиб йўлимға кета бердим...

— Опа, рўймолингиз тушти!

Юрагим орзиқиб тўхтадим. Йигитча рўймолимни келтирди, тусида бир оз кулимсиш бор эди.

— Сизникидир? — деб сўради.

— Меники, — деб қўлидан олдим, раҳмат айтиш ҳам эсимдан чиққан. Дўндиқ йигит бошқа сўз айтмади. Рўймолни менга бериб ўрданинг улуғ дарбозасига қараб кетди. Мен бўшашғанча қизлар орқасидан ҳарамга судралдим. Мен йигитни бир адим наридан кўрдим, товшини ҳам эшилдим, қўли ҳам қўлимға тегди шекиллик. Ухламайсанми, опа?

— Уйгоқман, — деди Гулшан. — Хўш, ундан сўнг нима бўлди?

— Нима бўлғанини ҳозир сўзлаб бераман... Юрагим ўйнаған ҳолда «Қирқ қизлар»га кирдим, «опа, рўймолингиз тушти, сизникими?» жумласи қулогим остидан кетмайди ва суврати кўз ўнгимга келган сайин, юрагим орзиқади. У ёқни ўйлайман, бу ёқни ўйлайман, ўйимнинг бошига еталмайман, аммо юрагимга бир парча олов ташланған, ёнаберадир. Ичимдаги шу ўт билан гўё мен маст бўлғанман, бошим шишкан, кўзим тинған, юрганимни-турғанимни билмайман. Нега кўрдим, нега қарадим? Нега рўймолимни ташладим, нега олиб берди, нега ўрдаға киралди? Бу ўзи жин, мени жинни қилмоқчи... Оҳ, яна бир кўрсам эди! Ҳаммом борғанларнинг ҳар биридан сўрайман: «Йўлдағи йигитни сен кўрдингми?» «Кўрдим»... «Кўрган бўлсаларинг сенларнинг ҳам юракларинг ёнадими, яна кўргинг келадими?» «Йўқ». Шундан сўнг унинг жин бўлғаниғиа ишониб қоламан: мени жинга тегищдим, жин мени чалди, дейман. «Бизнинг ўрдала шундай йигит борми?» «Йўқ», «Сенлар ҳам унинг орқамииздан ўрдаға эргашиб кирганини кўрдингларми?» «Йўқ». Демак, мени жин чалған... Тухфа бўлса: «Сен пари йигитка ошиқ бўлғансан», деб кулади. Мен унинг сўзига ишонаман. «Балки пари йигитдир, ул ҳам мени яхши кўргандир», дейман. Шундан кейин мен кута бошладим. Агар яхши кўрган бўлса, мени ўз юртига олиб кетар, деб ўйладим. Эрта кутдим, кеч кутдим, пари йигитдан дарак йўқ. Ўн беш кундан сўнг яна ҳаммомга бориш чоғи етди. Мен сўйиндим, балки бу кун парилар юртига кетарман, деб ўйладим. Шу орзуда ҳаммадан илгари мен отландим. Бордиқ. Ҳаммомдан чиқиб пари йигит билан учрашкан жойға яқинлашқан эдик, юрагим ўйнай бошлади. Учрашилганда қиладирған ишоратларни ўйлаб қўйған эдим. Агар четдан туриб ўзига имласа, қизлардан ажралиб қолмоқчи эдим. Маълум жойға етдик... Пари йигит йўқ. У ёқ-бу ёққа, тор кўча ичларига қарадим, яна йўқ. Баданимга совуқ тер чиқди, қизлардан ажралиб, йўлда тўхтаб қолғанимни ҳам билмайман. Бир вақт Насиба холанинг чақирған товуши билан кўзим очилди ва не зайлда қизларға етиб олғанимни билмадим. Ўрда дарбозасига еткунча неча қайта орқамға қарадим, — деди Нозик ва узоқ тин

олиб, бир оз тўхтади. — Шундай, мен пари йигитка ошиқман. Уч ойдан бери ошиқман, Гулшан опа.

— Пари йигитка ошиқмисан, хе-хе-хе.

— Нега куласан, Гулшан опа?.. Ишонмасанг, Тухфадан сўра.

— Ошиқлиғинга кулмайман, — деди Гулшан кулиб. — Сен айткан йигит пари эмас.

Нозик ўрнидан сапчиб турди.

— Ким бўлмаса?

— Одам!

— Одам? Сен уни кўрганмисан?

— Кўрганманс... Ўзи бизнинг ўрдада... Ҳозир пойгачининг ўрнига ким ўлтурган, биласанми?

— Биламан, мирзо Анвар отлиғ киши.

— Сен ошиқ бўлған «пари йигит» шу...

Тухфа бирдан хаҳолаб юборди. Бу кулгидан уйқуға борған қизлардан баъзиси чўчиб кетди.

— Мирзо Анварга ошиқ бўлған экансан, Нозик.

Нозик ҳамон қотиб турар эди...

— Шу қадар ёш йигит мирзобоши бўлғанми, Гулшан опа?

— Бўлған.

— Бўлса ҳам арзийди, — деди Нозик, — ўзи уйланганмикин?

— Мен қаёқдан билай, уйланганми, эмасми?.. Уйланмаган бўлғанда ҳам сени олмас.

Нозик бир неча вақт жим қолди...

— Албатта, мени олмас, — деди Нозик, унинг товшида шу чоққача эшитилмаган бир синиқлиқ оҳанги бор эди. — Албатта, сен айтканча, мени олмас. Менга ит теккан, мен...

Гулшан жавоб бермади. Бир оздан сўнг қатордан пишиллаган товушлар эшитилди ва бу пишиллашни ора-чора пиқ-пиқ йиглаған товуш бузар эди.

33. ЯНГИ «ХУНАР»

Ичкаридан чиқиб келган маҳдум мирзобошини кутиб ўлтургучилар ичидаги мулла Абдураҳмонни ҳам кўриб қолди.

— Бахайр, мулла Абдураҳмон, бахайр... Ваалайкум ассалом.

Солиҳ маҳдум мулла Абдураҳмон билан кўриши
ва уни кишилардан айириб меҳмонхонага олиб кирди.

— Хўш, ҳабба... Хўб саломатмисиз?

— Алҳамдулилоҳ... ўзларининг сиҳҳатлари?

— Парвардигорга минг қатра... Хўш, қадамлариға
ҳасанот?

— Мен тунови кунги марҳаматлари юзасидан... —
деди мулла Абдураҳмон, — башарти мирзо Анвар жа-
ноблари мувофиқ кўрсалар, муншийликка кирсамми,
деган ниятда...

— Кўб яхши, кўб яхши, — деди маҳдум, — не
таройиблиги бор, илмингиз кофий, фақат иншо... ин-
шодаги нуқсонингизға, албатта, Анвар устозлик қилар,
қараб турмас... Ҳусниҳат важида сизга таълим ҳожат
бўлмаса керак.

— Таҳрир ва иншода ҳам устозга муҳтоҷлик оз, —
деди бир оз нафси олинған қиёфада, — мирзо Анвар
каби бўлмасамиз ҳам ундан берироқ, тақсир...

— Яна яхши, яна яхши. Аммо, лекин девонхонадаги
барча мирзо, муфтиларға қарағанда Анварнинг таҳри-
ри фосиҳроқ¹ эмиш. Бу, албатта, таълим хосияти... Кам-
кўст ўрганилса, бешак манфаати бўлур. Хўб... Мирзо
Анварга ўzlари тасодиф келмакчиларми ёки мен во-
сита бўлсан дурустми?

— Билмадим... Ўzlари восита бўлсалар ҳам маъкул-
ми, деб ўйлайман?

— Воситалик ҳам дуруст, зеро, хотиржамъ сўзла-
шармиз, соний сизнинг камолатингиздан мирзобоши-
ни қаноатландириш зарурати ҳам бор, — деди маҳдум
ва бироз ўйлаб тўхтади. — Ҳабба, девонхона қавоиди-
ча², янги мирзо малака ҳосил қилғунча вазифа эмас
экан. Бизнинг Анвар ҳам ибтидо вазифасиз хизмат қил-
ған эди.

— Моҳонада аҳамият оз, зеро, майшатимиз имо-
мат орқасида таъмин, тақсир.

— Ҳабба, бу тарафдан ҳам ташвиш оз экан. Иншо-
да чобакдаст³ бўлиб олсангиз, вазифа важҳи осон... Фай-
раз, боби олийға алоқа, калон ва калонзодалар билан
робита ҳам кишига кўб манфаат берадир. Бу жиҳати
сизга кўб ғанимат, — деди маҳдум ва товшини

¹ Фосиҳ — чиройли.

² Қавоид — қоидалар, тартиблар.

³ Чобакдаст — чаққон, эпчили.

секинлатди. — Имомат билан бир жойға етиб бўлмайдир... Аммо бу андишсангиз бениҳоят маъқул. Сиз ўзимизнинг фарзандимизсиз; зеро ўз болаларимизнинг ўрда билан алоқадор бўлишлари бизга айни манфаат. Хотиржамъ, мулла Абдураҳмон, мен Анварга сизнинг важҳингизни тушунтиурман. Албатта, ўз ёнига олар.

Абдураҳмон маҳдумга раҳмат айтди ва кетиш учун кўзғалиди.

— Қай вақт хабар олсам бўлур экан? Албатта, жавоб ўзларидан бўлса керак?

— Ҳабба, эртага баъдаз бомдод, — деди маҳдум. — Нега кўзғалдингиз, чой, нон, моҳазар...

— Раҳмат, тақсир.

Маҳдум мулла Абдураҳмонни ҳавлигача кузатиб чиқди ва хайрлашиб, Анварни кутиб ўлтурганлар ёнига келди. Ҳар кимдан аҳвол ва кутиш учун сабаб сўради. Тўни янгироқларнинг болалари қаерда ўқушини, баширти, шу даҳадан бўлсалар, нима учун болаларини бошқа мактабка берганликларини текшириди. Айниқса, кутиб ўлтурғучилар ичидаги ямоқ тўнлик, қўли қадоқ бир деҳқон маҳдумнинг дикқатини ўзига жалб эткан эди.

— Хў-ўш, ким, ҳали сиз қишлоқдан келган кўринасиз, — деди маҳдум, — қани, айтинг-чи, касал нима?

Деҳқон маҳдумнинг ҳурматига ўрнидан туриб, қўл қовишитирди:

— Ўн уч таноп еримиз бор эди, тақсир... Чамаси янғини бўғанда, ўттуз уч танопқа ҳақ соғанлар. Мен шунга арза ёздирайма, деб...

— Ҳиммм, — деди маҳдум, — қишлоғингизда оқсоқол йўқми?

— Бўған минан, тақсир... Қулоқ соладиган эмас.

Маҳдум яна бир мартаба деҳқонни бошдан-оёқ кўздан кечирди.

— Ариза ёздиришқа чақа керак бўлади, ука. Чақангиз бўлмаса, оворагарчиликка арзимайди, иним...

Деҳқон белини тимискилаб, гўё чақасини кўрсатадигандек ҳаракатланди.

— Чақасиз арзага келиб жинни бўғанмизма, тақсир.

Маҳдум деҳқоннинг чақаси борлиғига қаноат қиласа ҳам, Анвардан хотиржамъ эмас эди. Чунки «зарношу-

нос» Анварнинг шу деҳқонға ўхшаш камбағаллар ишини битириб бериб, улардан «чақа» олмаслигини билар эди. Ҳатто шу тўғрида Анварга «бу ишиңгиз зарношунослиқ, болам», деб насиҳатлар қиласа ҳам, бир натижа чиқмаған, шунга биноан «заршунос» маҳдум яқиндан бери қизиқ бир ҳунар ижод қилған эди. Маҳдум кўпинча кишилар Анварга учрашиб тарқалғунча, йўлакда ўлтуриб олар эди. Анварга йўлиқиб чиққан ҳар бир кишини тўхтатиб, натижани билар, ариза ёздирган ёки бошқача бир кенгаш олған бўлса, ҳақ берган, бермаганилигини сўрар, Анвар берилған ҳақни олмай қайтарған чиқса, дарҳол — «сиз чақани оз бергансиз-да, мўлроқ берсангиз, албатта олар эди. Хўб, майли, борини менга ташлаб кетинг, ўзим уни кўндираман», деб ариза ёздиргучининг бор ақчасини қоқмалаб қолар эди. Ҳатто баъзи вақт икки оғиз сўз билан қайтиб чиққан кишидан ҳам бир нарса ундиришкантиришар, «мишиқ офтобга текин чиқмайдир, сиздан ақча сўрашқа ийманган-да, менга бир нарса ташлаб кетсангиз, ўзим унга бериб қўярман. Ўзингизга беришкан уялибдир, деб айтарман. Ҳабба, яна ишиңгиз тушишига яхши-да» дер эди.

Шу йўсун маҳдум бир неча ҳафтадан бери бу «хунар»ни ўзига касб қилиб олған, Анвар ариза ва кенгашдан бир пул ишламаган кунларда, ул неча тангаларни йўлакда ўлтуриб топар эди. Кишиларни жўнатиб хотиржамъ бўлғач, жарақ-жарақ ақча билан ичкарига кириб кетар, ичкарида бу кунги «даромад»ни санаб, бир пулни беш пулдан, тангани чақадан ажратиб, «ҳе, гап билгунча иш бил, бачча талоқ», деб ўзича кулар эди. Албатта, бу ҳунарни уй ичидағилардан яширас, айниқса, Анвардан «беҳад» андиша қиласа эди.

Маҳдум аср намозига кеткан пайтда Анвар ўрдадан қайтиб келди. Маҳдум шошиб ва асрни чала ўқуб келса ҳам, яна баҳтлик одамлардан анчали ишни битириб тарқаған эдилар. Маҳдум аттант ўқуб меҳмонхона даричасидан қайтди, аср азонини кеч айткан сўфидан ранжиди. Ичкарида яна бир неча киши кўрингани учун эски одатича, гўё биравни куткандек, йўлакка келиб турди. Бир оздан кейин меҳмонхонадан бир мулланамо чиқиб келди. Маҳдум чиқувчини ёқтирмағандек ер ос-

тидан кўзини ғилайлатиб қарағач, бирдан вазиятини ўзгартди:

— Ассалому алайкум, келган эканлар, тақсирим!

— Ваалайкум ассалом! Хўб саломатмисиз, Солиҳ маҳдум? Мирзо Анварда андак юмишимиз бўлур экан... Яшағурингиз, кўб зийрак бола: кичкина ариза ёздириб олдим... Хўб саломатмисиз, маҳдум?

Маҳдумнинг оғзидан ҳар турлук тақаллуфлар чиқса ҳам, унинг нима учун ариза ёздирганини сўрамади. Чунки бу одам шу ўртанинг эшонларидан бўлиб, гадойдан хайр кутиш маъносиз эди. Мундан бошқа, эшонни сўзга тутса, «келаси даромад»нинг ҳам кўлдан кетиш эҳтимоли бор, шунга биноан маҳдум сўзни муҳтасар қилмоқчи бўлди:

— Кўб яхши, кўб яхши, келиб турсинлар, тақсирим!

— Келамиз, келамиз... Мирзо Анварга фотиҳа ҳам лозим. Ўзингиз бир зиёфат қилиб чақирай ҳам демайсиз, маҳдум... Мен мирзога айтдим: бу хизматингиз билан қутулмайсиз, бир зиёфат қилиб чақирасиз, дедим. Мирзо кўб сахий табиъат кўринади. Қачон келсангиз зиёфатимиз тайёр, эшон почча, дейди. Болаларнинг тўйини қиласр эмишсиз, деб эшилдим. Мирзодан сўрасам, кулгулик билан тўғри жавоб бермади. Кори хайрни тўхтатмаған яхши... Хўш, тўй қачон, маҳдум?

Маҳдум бу дуру дароз «бемаънилик»дан анча тоқатсизланған, ичкаридан бир киши чиқиб кетмасин, деб кўзи бесаранжом эди.

— Тўйни кўкламга бошласақ, деб турибмиз!

— Фурсатни узоққа олибсиз-да. Хайр, ҳар нарса вақти соатига етиб бўладир. Тўйларингиз ҳам кичкина бўлмас деб ўйлайман. Тўрт даҳанинг казолари ҳам тўйға айтилсалар керак, ҳарам хонимларини ҳам бир кун кутарсиз... Зоро, куяв болангиз кичкина одам эмас. Бирар минг тўн кетиши бу ерда турған гап. Албатта, тўйға келганларнинг кўллари куруқ бўлмас... Ҳарам хонимлари бўлса, юз тиллолиқ сарпосиз келмаслар, қизингизга чўри ҳадя қилсалар ҳам ажаб эмас. Албатта, даромадга яраша буромад, деган гап бор.

Маҳдум, меҳмонхонадан юриб келган оёқ товшини эшитиб, ёмонлаған отдек типирчилади. Эшон бўлса ҳамон булбул каби сайраб борар эди:

— Тўйдан қўрқишиш керак эмас. Кори хайрникини

оллоҳ таолонинг ўзи еткирар экан. Сизнинг тўйингиз-ку, албатта, бошқаларнидан кўб катта бўладир. Яна шундай бўлса ҳам, таваккал билан қулочни кенг ёза бериш керак. Худо хоҳласа, тўй кунларингиз ўзим келиб тураман. Тўй кўрмаган киши учун, албатта, одам кутиш қийин. Лекин менга ўхшаш одамдан иккитаси бир кунда беш минг кишини кута оладир.

Меҳмонхонадан чиқиб келган бир хотин киши эди, уларнинг ёнидан шовиллағанча ўтиб кетди. Махдум ола-зарак гоҳ эшонға, гоҳ хотинга қараб қолди.

— Аёллар бўлса ичкаридан хотиржамъ бўлишсин... Бизнинг аёллар тўйда хотин кутиб, жуда омилкор бўлишиб қолған. Тўйдан бирар ҳафта илгари хабар берилса, албатта, бош усти, аёлларни юборамиз... Ҳаёлингиз па-ришон кўринади, маҳдум, бирар аъзонгизда алам бор-ми, мулла Солиҳ?

Ҳақиқатан ҳам маҳдум ҳозир жуда бесаранжом бўлған эди. Чунки меҳмонхонадан иккинчи сёғ товши юриб қелар эди.

— Йўқ, баҳузур.

— Шундай, тўйда одам кутишдан хотиржамъ бўла-сиз. Тўйдан илгари ҳалиги зиёфатни унутманг-чи, мулла Солиҳ. Шу баҳонада мирзо Анвар билан ҳам бир суҳ-батлашайлик...

Бояғи деҳқон йўлакдаги икки «хурматлик» зотка таъзим қилиб, дарбозага ўтди. Бетоқат маҳдум эшоннинг сўзига қулоқ солмай:

— Сиз тўхтаб туринг-чи, ука, — деди.

Деҳқон нарида тўхтади. Эшон яна сўзида давом этди:

— Агар фурсатингиз бўлса, мен шу ҳафта ичи бўш эдим, мирзо Анвар ҳар қачон ҳам тайёр экан. Такал-луфнинг унча ҳам ҳожати йўқ. Мантими, сомсами, ишқилиб, оғизға ёқадирғанроқ таом бўлса кифоя... Вақ-тини белгилаб, мактаб болаларидан бирини бизнинг уйга юборсангиз бас.

— Хўб, тақсир.

— Бўлмаса, гап шундай бўлсин. Ўзингиз ҳам бизни йўқлаб уйга борсангиз, қадамингиз кира тилайдими? Хайр, мулла, Солиҳ, кўргунча худойнинг паноҳига.

— Хайр, тақсир, хайр.

Маҳдум эшонни ҳатто дарбозагача кузатиб чиқиша ҳам энсаси қотиб, деҳқон ёнида тўхтади:

— Нима гап, ариза ёздиридингизми, ука?

— Йўқ, тақсир, — деди дехқон, — тақсирим шу қовозни питиб бердилар, танопчиға кўрсатадуған қовоз экан.

— Кўб яхши, — деди маҳдум, — қалам учи бердингизми?

— Йўқ. Чақа берсам олмади, тақсирим.

— Озғина бер...

Маҳдум «озғина бергансиз» демакчи эди, бироқ «озғина бер» билан тилини тишлаб, дами ичига кетишка мажбур бўлди. Чунки ҳозир меҳмонхона томондан Анвар келиб чиқсан ва маҳдумга салом берган эди.

— Ваалайк... Мен, шундай, масжиддан, — деди маҳдум шошқан ҳолатда ва ўз оғзиға қараб турған дехқонға ишорат қилди, — ишингиз биткан бўлса боравуринг.

34. ХАЙРУЛ-УМУРИ АВСАТУҲО

Дехқон «озғина бер» деб тиланғучиға нима беришини билмаган ҳолда йўлакдан чиқиб кетди. Маҳдум терлаган, довдираган йўсунда Анвар билан ичкарига юрди. Бир оз сўзсиз борғандан кейин секин Анварнинг афтига қараб кўйди.

— Фози эшон ҳузурингизда экан, — деди Маҳдум, — ўзи кўб бемаъни одам... Зиёфат-миёфат деб яқин бир соат вақтимни олди. Ўзи кўб таммоъ одам. Сизга ҳам зиёфатдан дам урган бўлса керак?

Анвар илжайиб бош ирғатди. Маҳдум Фози эшондан койиб давом этди:

— Тамаъ ўзи кўб мазмун¹ суфат... Чунончи, азза ман қанаъ, залла ман тамаъ...² Отаси марҳум ҳам беҳал тамаъкор эди. Ит эганини кусиб, ўғли ундан ҳам расвороқ чиқибдир. Бу авлоднинг каттадан-кичиғи бирбиридан баттар... Муфтига ариза ёздирибсан, кета бер. Яна бу ўртада зиёфат ба чи маъни?!

Анвар маҳдумнинг сўзига кулиб, орқада борар эди. Маҳдум ичкарига томон сўзланиб кирап эди:

— Такаллуф лозим эмас эмиш: мантими, сомсами — ҳар начук оғизга ёқадирған таом бўлса кифоя эмиш. Кабоб бўлса емасмидингиз, эшон?! Тўйға ўзи бош бўлиб

¹ Мазмун — ёмон; хато.

² Қаноатли азиз, тамаъли киши хордир (*муал*).

турап эмиш, одам кутишни бениҳоят билар эмиш. Эй... ман сандек таммоъни тўйбоши қилиб, телба бўлдимми? Уйидан тоқ келиб жуфт кетмакчид, бу таммоъ.

Махдум шу сўз билан ичкарига кириб, ҳавли саҳнида чақалоқ кўтариб турған Раъно ёнидан айвонга ўтди. Махдумнинг орқасида кирган Анвар Раънонинг олдида тўхтаб, ундан чақалоқни олди. Отасининг юзида аччиғланиш сезган Раъно Анварга «нима тап?» деган каби им қилған эди, Анвар кўз қисиб, арзимаганлик ишорасини берди.

Махдум айвонга чиқиб ўлтурар чоғида яна бир «астағфиурлло» деб қўйди. Чунки кайфи жуда ҳам бузулған эди. Илгари масжиддан кеч қайтиш билан бузулған авзо, Фози эшоннинг «пастлиги» ила жуда ҳам авжига чиққан эди. Бу кунги кутилган «даромад» сартопо¹ фалокатка учраб, махдумнинг кўнглини фаш қилған, айниқса деҳқоннинг ҳам текинга кутулиши ва ўзининг Анвар олдида шарманда бўла-ёзиши... Буларнинг ҳаммасига шу «паст», «таммоъ» сабабчи ва шунинг учун ҳам махдум Фози эшон тўғрисида ҳар бир сўзни айтишдан тортиниб турмади.

Анвар ҳавли юзида чақалоқни восита қилиб, Раъно билан сўзлашар эди. Махдум кечки ош пишириш билан машғул Нигор ойимдан таомнинг тайёр бўлиш вақтини сўраб, Анварни ўз ёнига чақирди.

— Қани, бу ёққа, Анвар! — деди махдум. — Таомни шу ерда тановул қилсақ ҳам бўлур... Сен, Раъно, укаларингта қара-чи: Мансур ташқарида кўрингандек эди, дарбозани ҳам занжирлаб кир, қизим!

Раъно ташқариға чиқиб кетди. Анвар қўлида чақалоқ билан айвон муйушига келиб ўлтурди. Чақалоқ Анвар қўлидан иргиб ҳар тарафка талпинар ва турлик товушлар чиқариб қичқирап эди. Махдум чақалоқнинг ҳаракатига қизиқсинди:

— Мам-мам, мам-мам-мам, — деди қўлинни чақалоқча уйнатиб, — ду-ду-дув, ду-ду-дув... ҳай баччаталоқ, ҳай баччаталоқ!.. Беҳад шўх бўлибти-да, беҳад, ду-ду-дув!

Чақалоқ махдумга талпинар, кичкина қўлларини тоҳ очиб, тоҳ юмар эди.

— Кел, йигит, кел! Алҳол хом-да, хом, қизамиқ чиқиб ўтса эди. Ду-ду-дув!

¹ Сартопо — бошдан оёқ.

Раъно укаларини бошлаб кирди. Махдум чақалоқни кўйиб, болаларни койиб кетди:

— Ҳай бемаънилар! Чақирмаса, уйга киришни билмайсанлар! Кийимни қара, кийимни! Турпоққа ағнадингми, эшшак! Қоқ, қоқ, ечиб қоқ! Аттанг-а, эсиз кийим... Буларни энди нима қилса бўлади, Анвар?

Анвар маҳдумдан кўркиб турған болаларнинг аҳволиға қараб, кулимсиди:

— Эси кириб қолар.

— Қиёматдами? Буларнинг татифини бермасам... ҳе, кўзларинг курсин! Раъно, сен акангга кўрпача солиб, укангни ол, онангға айт, ош дам еган бўлса, сусин!

Раъно айвонга кўрпача ёзиб, Анвардан чақалоқни олди ва онасининг ёнига кетди:

— Анвар, қани кўрпачага чиқинг! Қўлларингни ювиб кел, эшшаклар!

Болалар югуришиб ариққа кетдилар. Анвар ҳам қўл ювиш учун болалар орқасидан борди. Ариқнинг суви жуда лойқа эди. Анвар болаларни ариқдан қайтариб, обдастадаги тиниқ сувдан уларнинг қўлиға кўйиб, ювинтириди. Навбат ўзига етканда айвонда туриб, маҳдум бақириди:

— Раъно, акангнинг қўлиға сув қуй!

Анвар Раънонинг келиб сув қуишиға қарамай, ўзи ювина берди. Раъно етиб келгунча қўлини ювиб олди. Маҳдум қизидан аччиғланди:

— Жуда суст қадамсан-а, Раъно. Сени талқон еб сувга юборған киши қайтиб келгунингча, тиқилиб ўлади!

Маҳдумнинг ташбиҳидан Анвар ва Раъно кулишдилар. Сўзни жойида ишлаткани учун бўлса керак, маҳдумнинг ўзи ҳам кулимсиради:

— Тўғри-да, мирзо Анвар, қўли суст косибдан оёғи чаққон гадой яхши эмиш!

Улар яна кулишдилар. Маҳдум завқланди. Анвар кўрпачага чиққандан кейин Раъно ўртаға дастурхон солди. Нигор ойим сопол лаганда палов келтириб, ҳаммалари бирга ошқа ўлтурдилар. Ош ўҳшалған эди. Биринчи ошамдаёқ маҳдум Нигор ойимни тақдир этти:

— Бу кунги ошинг дуруст, Нигор... Бироқ гўштни кўб солибсан.

Нигор ойим кулимсиб Анварга қаради:

— Гўшт кўб бўлса, ош ўҳшаладир.

— Хайрул-умури авсатуҳо, Нигор¹
— Бу сўзнинг ошқа гўштни кўб-оз солиш билан
нима алоқаси бор?

Раъно онасининг бу сўзи билан пиқ этиб кулди.
Анвар юзидаги кулгини яшириш учун четка қаради.

— Ҳадиснинг ҳукми ом², Нигор, — деди маҳдум. —
Бундаги умур — умурид-дунё³, умурид-дунё иборат аз
ҳаракати аҳли мўмин. Инчинин⁴, бу ҳадиснинг ама-
лиёти охират учун ҳам ҳукми жорийдир⁵... Масалан,
шабу рўз савм⁶ ва салот⁷ мўмин кишини жисман нота-
вон ва нафақаи аҳли аёлдан ожиз қиласидир. Бас, бу
ҳолда ибодатнинг касрати, яъни тоатда ифрот⁸ ҳам
хайрул-умурга қўшилмас, зеро, фарз ва суннат банда
учун кофий эрди. Маънойи кофий чист, ай авсат⁹...
Бинобарин, бу ҳадиси шариғ рўзғорот борасида дас-
тур тутилса, яна айни ҳикмат ва савоб. Масалан, ошқа
йигирма пайса гўшт солмоқчисан, аммо «авсат» қил-
моқ ниятида, мазкурдан ўн пайсани ажратиб қолдинг...
Бас, ҳикматни томоша қил; эртаси кун ошинг яна
жазлик, яъни «авсат» билан икки кунлик эҳтиёждан
қутилиб, савобга ҳам даҳлдор бўлдинг. Ҳикмати дигар:¹⁰ дунё важхинг¹¹ яхши эрди. Таомни яхши мазалик
еб, нафсинг яхши ошқа ҳў¹² қилди. Вақти келиб, афто-
даҳол бўлдинг, кунинг гўштсиз таомга қолди: аммо
нафси амморангни¹³ сержаз ошқа ҳў қилдирғанинг ва-
жҳидан іўштсиз ош оғзингга ёқмайдир, бу — бир ази-
ят; сониян: лазиз ошқа ҳў қилған нафсинг тақозаси
билан, анвоғи ҳабосатларга ва мазмум кирдорларга¹⁴
иртико¹⁵ қилмоғинг хавфи ҳам бордир; бу нимадан
келди? Албатта «авсат»ка риоясизлиғингдан.

Маҳдумнинг «амри маъруфи» Нигор ойимга қара-

¹ Ҳар ишнинг ўртаси яхшидир, ёки: ишда эътидол яхши (*муал.*).

² Пайгамбарнинг буйргуи ҳаммага тегишлиқ.

³ Умурид-дунё — дунё ишлари.

⁴ Инчинин — (инчунин) — шунингдек.

⁵ Ҳукми жорий — ярайдиган ҳукм.

⁶ Савм — рўза.

⁷ Салот — намоз.

⁸ Ифрот — ҳаддан ошиш.

⁹ Йетарли деганнинг маъноси нима, бу демак ўртачаликдир.

¹⁰ Ҳикмати дигар — бошқа бир ҳикмат.

¹¹ Дунё валиси — бойлик.

¹² Ҳў — одат.

¹³ Нафси аммор — доим ёмонликка буюриб турувчи нафс.

¹⁴ Кирдор — одат, қилиқ, иш.

¹⁵ Иртико — ҳаракат.

тиб сўзланса ҳам, ҳақиқатда умумий, яъни, бир ўқ билан бир неча қушни урмоқчи эди. Бироқ, қаршиға қараб отилған бу ўқдан маҳдумнинг ўзи ҳам амин эмас, агар лаган теварагидаги ўлтурғучилардан бири туриб, бошқаларидан қатъи назар, фақат бу кунги хайрул-умурингизни мисолга олайлиқ: «Йўлакдаги «умуридунёнгиз» ўзингиз айткан «авсат»ка кирадими?» деб сўраса, билмадикки, маҳдум нима деб жавоб берар эди. Мадраса кўрган Солиҳ маҳдум, балки бу саволдан ҳам шошиб қолмас. Китобнинг «нафақа» баҳсидан варақ очиб, «нафақаи аҳли аёл» учун бўлған «ҳаракат»-нинг фарзлиғидан ва бундаги ҳисобсиз савоблардан дам уриб, «нафақа» билан иши йўқ баъзиларни «ерга қаратса» ҳам мумкин эди... Лекин ўқ еганлардан ҳеч бириси маҳдумга қарши чиқмағанларидек, унинг сўзи-ни тасдиқ этиш белгисини ҳам кўрсатмадилар. Эҳти-молки, улар муқобалага ожиз эдилар ёки қарши чиқиши-ға орада бошқача бир сабаб бор эди. Фақат бир-бири-сига қарши ўлтурған икки ёш маънолиқ кўз уришти-риб кулимсидалар.

Маҳдум амри маъруфдан кейин ошқа қаради, кўб вақт сўзсиз фақат ошдан бош кўтартмади. Маҳдумнинг даъвосича, ҳар бир ишда ҳам «авсат» мезондир. Лекин ош олишда бу «мезон» унтилди. Бошқалар ора-чора бир гўшт кўшиб олганда, маҳдум бир ошамни ҳам гўштсиз юбормаслиққа тиришиб борди, яъни «авсат»-дан ўтиб «аъло»да иш кўрди...

Ошни яримлатқанда, маҳдум лагандан бош кўта-риб, Анварни тузукроқ олишга таклиф қилди, болаларни ошни тўкиб ейишда айблаб, Раъонони чипхўрлиги учун койиди:

- Чипхўрсан-да, қизим... Шу ҳам ош ейишми?
- Меники адно¹, — деди Раъно.

Бу сўз Анвар ва Нигор ойимларни товуш чиқариб кулишка мажбур этди.

— Сенга бир сўз тегмасин, қизим, — деди кулиб маҳдум. — Ошни суст еган киши, ишда ҳам суст бўла-дир.

- Бўлмаса, ошни «аъло» ейиш керак экан-да...
- Оғзинг куймаса аълоси ҳам дуруст.

Яна кулишдилар.

- Ҳай, воқиъян, — деди маҳдум, кулги ораси тўхтаб.

¹ Адно — паст; озгина.

— Мирзобошидан бир илтимосимиз бор экан, ёдимдан чиқаёзған экан... Ким ҳали... ҳабба, боя мулла Абдураҳмон келган эди. Ўшал ваъдамизга мувофиқ сиз билан учрашмакчи экан. Чоғи ул ҳам мирзоликқа киришмакчи. Ҳўб, мен мирзо Анвар билан гаплашиб қўярман, ўз ёниға олса керак, дедим. Ўзи яхши мулла бўлған кўринади, закки табъ¹ йигит...

Анвар бир оз ўйлаб турди.

— Ким у мулла Абдураҳмон, хотирлай олмадим?

— Ўзимизнинг мулла Абдураҳмон-чи, ахир... Ёрлиғ олған кунингиз фотиҳага келган ёш имом.

Анвар яна бош чайқади:

— Ҳеч бир эсимда йўқ.

— Ҳўб, — деди маҳдум ўнг кўзини қисиб. — Ўшал кун фотиҳага келган бўзчи муҳлисингизни хотирлайсизми?

— Хотирлайман.

— Ҳабба, энди ўшал бўзчининг устига кирган ёш муллани ҳам хотирлаб қаранг.

— Хотиримга келди... Ўзи ёшлиғида бизнинг мактабда ўкуған?

— Ҳабба, — деди маҳдум ва баҳска Нигор ойимни ҳам тортиди, — уни сен ҳам биласан.

— Мен қаёқдан билай?

— Ўзи Бухорода ўкуб келган, Раънога бир неча қайта совчилар юбориб юрган одам.

Нигор ойим боши билан «танидим» ишорасини бериб, Анварга секин кўз қирини юборди. Раъно «совчи» сўзи билан энсаси қотқандек сочиқни олиб қўлини артди. Маҳдум кейинги сўзини ўйлаб айтдими, ўқуми — ҳар начук Анварда гайурлик каби бир хис уйғониб, ўзидан жавоб куткучи маҳдумга илтифотсиз, Раънодан сочиқни сўради.

— Нега қўл артасиз, Анвар. Қун бўйи оч юриб, еган ошингиз шуми?

Анвар Нигор ойимфа раҳмат айтиб тўйғанини сўзлади ва қўл артар экан, чақалоққа гап қотди:

— Анвар билан Раънонинг тупроғи бир жойдан олинған, — деди маҳдум ош ошалаб, чунки ҳануз уники «авсат»ка этмаган эди, — иккиси ҳам кам таом.

Маҳдумнинг бу сўзи юқоридағи гуноҳини ювғандек

¹ Закки табъ — озода табиат.

бўлди. Улар бир-бирларига қарашиб, илжайишилар. Нигор ойим ҳам оғирлиқдан чиқди.

— Шундай, Анвар... Шу йигитни ўз ёнингизға олсангиз, қалай бўлар экан?

— Ҳозирча мирзога эҳтиёжимиз йўқ.

— Мирзога эҳтиёжингиз бўлмаса ҳам, яна шундай кишиларни олғанингиз маъқул, деб ўйлайман. Зеро бундайлар ўзингизга синамол, яна ўз тарбиянгизда етишсалар бошқалардан сизга хайриҳоҳроқ, инчинин, хизматингизга азтаҳидил камарбаста бўлурлар. Бу ҳам бир маслаҳат-да, болам Анвар.

— Ўйлашиб кўрармиз.

— Ўйлашқан албатта яхши ва лекин мен буни кўб вақтлардан бери андиша қилур эдим. Билохир¹, амниятингиз учун бу тадбирни кўб пухта идрок қилдим. Зеро, Султонали мирзодек ҳамкуфларингиз² кўпайса хайриятингиз, деган мулоҳаза фикримга келди.

— Балки тўғридир...

Анварнинг кўзи дастурхонда эди. Бу тўғрида қатъиятсиз муҳмал жавоблар беришидан недир туйинған Раъно Анвардан кўз олмай турад эди. Нигор ойим Мансурга қолған ошни едириб қўйиш билан ора-чора гапка ҳам кулоқ солғандек бўлар эди.

Махдум кекириб, сочиқ сўради.

— Бу андишанинг ҳақлиғида шак йўқ, Анвар, — деди ва дастурхондаги донларни териб, оғзиға ташлади. — Менга таслим бўлиб, ибтадан шу мулла Абдураҳмонни ўз ёнингизға олинг. Ул бир неча ойғача муфт хизмат қилишға ҳам рози.

— Масала унинг муфт ёки ҳақли хизмат қилишида эмас.

— Яъни, масалан?

— Мен янги мирзо бошлаб борсам, у ердагиларга оғир келмасмикин, деб ўйлайман.

— Ул мажжонан³ хизмат қиласи, бас, мирзоларингизға нима оғирлик?

— Яна ҳар ҳолда, бир-икки ойдан кейин бўлса ҳам уларга рақобатчи ортади... Айниқса, бизнинг Шаҳодат муфти кабиларнинг феъли сизга ҳам маълум.

— Шаҳодат муфти ўзи қандай ит! — деди махдум.—

¹ Билохир — ниҳоят.

² Ҳамкуф — сафдош, дўст.

³ Мажжонан — текинга.

Андишамиз ҳам бамисоли шундай итлар қаршисиға ўз кишингизни тиккайтариш эмасми? Ёшлиғингиз бор, болам, ёки янги мирзо олишда биравнинг рухсатига ҳожат борми?

— Йўқ.

— Ана холос. Аз карнайчи як қуф. Мен эрта унга айтай, ҳузурингизга бораверсин.

— Бориши қочмас... Илгари мен у ердаги баъзилар билан кенгашайин-чи.

— Хўб, уларнинг юзи учун кенгашкан маъқул: аммо, баҳархол олмоқ керак.

Махдум фотиҳа ўқуб, шом намозига қўзғалди. Ташқи йўлакка етканда, ёдига Фози эшоннинг бемаънилиги келиб тушти, шу қаторда тўй, тўйға иштирок этадирган казолар, хоним ойимлар, ҳаммадан ҳам муҳим ва қизиги ёмғур каби ёғиладирған тўёна ва уларнинг сарланжоми... Сўфи такбир тушуар экан, махдумнинг кўнглидан «Раънога чўри қўша кўрмасинлар-да, тишлик ҳайвоннинг бўлғанидан бўлмағани яхши» деган андиша кечти...

35. ХОН КЎНГИЛ ОЧМОҚЧИ

Қавс ойи¹ кирган бўлса ҳам, ҳаво мўътадил, кун жумъя эди. Ўрда боғига сув сепилиб, супурилган, ўртадаги шаҳсуфага лолагул гилам ёзилиб, хоннинг ўлтуриши учун баҳмал кўрпача устидан арслон териси ташланған эди. Ҳозир шаҳсуфа хон ва аъёндан холи, аммо шаҳсуфа қаршисидағи нимсуфалар вазирлар, саркардалар, қозикалон, шайхулислом, қози-қузот, раис ва шаҳарнинг зўр уламолари — мударрислар, аҳли тарижат эшонлар, ўрда ходимлари ва энг пастарини қўрбoshi ва даҳбошилар билан лиқ тўлған эди. Уламо қисмида умуман банорас тўн, оқ салобатлик салла, вазир ва саркардаларда кимхоб ва баҳмал тўнлар, бошларида баъзан салла ва баъзан ўсиқ баррадан тикилган телпаклар ҳилпиран эди.

Хон бу кун жумъя намозигача кўнгил очмоқчи ва бундаги йиғилғанлар шу кўнгил очиш соатида иштирок эткувчи хоннинг кўнгил тортарлари, яъни мамлакат аъёнлари эдилар. Хон ҳали ички ўрдадан чиқмайсан, ҳамма раъият «жаноби олий»ни кутиб муҳташам

¹ Қавс — 22 ноябр — 21 декабр.

дарбозага кўз тикканлар эди. Шаҳсуфадан бир оз нарида, атрофи бордон билан ўроғлиқ бир ката пайдо бўлған ва бу ката ичиди бир неча киши сұхбат қуриб ўлтураг эдилар. Бир неча дақиқа куткандан сўнг, мұжташам дарбозада Дарвеш удайчи кўриниб, қаршисидағи раъиятка ўрундан туриш ишоратини берди. Бирдан ҳамма шув этиб қўзғалди. Дарвеш удайчи дарбоза ёнига ўтиб, рукуъга¹ борди. Ичкаридан кимхоб түн билан йўғон қорнини ўраған, оқ шоҳи салласини манглайигача туширган Худоёр кўриниди. Хон кўриниши билан барча раъият ҳам удайчи каби рукуъга кетдилар. Худоёр орқасидан ёш Ўрмонбек қизил баҳмалдан тикилган сипоҳи кийим билан отасини таъқиб этар эди. Бунинг орқасидан қизил мовутдан шаҳзода каби кийиниб, силоҳ² тақинган ва ҳар қаторға тўрт нафардан териилган ўн олти-ўн етти яшар, ёш ва хушрўй сипоҳлар (маҳрамлар) чиқдилар. Хон шаҳсуфага қараб келди. Ўнинчи қатордан сўнг ёш сипоҳлар туркуми узулиб, яхши интизомлик қирқ нафар навжувон шаҳзода орқасида хонни таъқиб этар эдилар. Шу ҳолда нимсуфаларнинг биридан чалғулар товши келди. Созлар нафис ва оҳангдор қилиб «Сарбозча» куйини чалдилар. Куй созда қайтариб олингач, хон орқасидағи ёш сипоҳларнинг бир қисмидан шу куйнинг ашуласи эшитилди:

*Шаҳаншоҳим, шаҳаншоҳим, баҳтингиз кулсин!
Давлатингиз, шавкатингиз душманлар кўрсин!*

*Қалқон ушлаб, ханжар таққан ёвлар майдонга!
Номуссизлар, вафосизлиқ қилдингму хонга!*

*Бизнинг айткан назримиз бор Шоҳимардонга!
Аҳдин бузуб, динни сотқан бўялғай қонга!*

*Шаҳаншоҳим, шаҳаншоҳим, баҳтингиз кулсин!
Давлатингиз, шавкатингиз душманлар кўрсин!*

Хон суфанинг зинасига этиб, юқори минди. Шаҳзода ҳам отасини таъқиб этди. Ёш сипоҳлар хон ва Ўрмонбекни зинада қолдириб, тўғриға ўтдилар, суфадан айланиб бориб, хоннинг муҳофазатига, яъни Худоёр ўлтурадирган арслон терисининг орқасига саф

¹ Рукуъ — бош эгиш.

² Силоҳ — қурол-аслаҳа.

торта бошладилар. Хон бориб арслон терисига ўлтурди. Ўрмонбекни ўзининг ўнг томонига олди. Раъият ҳамон рукуъда... Ёш сипоҳлар сүфанинг уч тарафини қуршаб олған эдилар. Хон жойлашғач, рукуъдагиларга тиккайиш ишоратини берди. Барча бош кўтариб, қўл қовишириди. Соз ҳам тўхтади. Сүфанинг зинасида удайчи ҳозир бўлиб, қўлини кўтарди, раъият ҳам унинг билан баробар дуога қўл очдилар.

— Душманлар хароб, мунофиқлар бетоб ўлсин... Онҳазратимнинг давлатларига худо тавфиқу адолат берсин!

Дуодан сўнг барча юз сийпади. Хон удайчига бир нарса деб ишорат қилди.

— Мингбоши, қушбеги, домла шоғовул, жаноб шайхулислом, оталиқ ва амсоли ҳазратка ул жаноб ўз ҳузурларидан жой меҳрибончилик қиласидирлар!

Удайчи санаған кишилар бирин-бирин шаҳсуфага чиқиб хонға салом ва таъзимдан кейин атрофлаб тура бошладилар. Суфага ўн чоғлиқ аркон¹ чиққандан сўнг, хон удайчига яна бир нарса деб қўйди.

— Фароғат ато қилдилар!

Сипоҳлардан бошқа барча тик турғанлар шув этиб ўлтурдилар. У ер-бу ердан йўталган товуш эшитилди.

Удайчи хонға арз қилди:

— Онҳазратимнинг давлатларига худо тавфиқу адолат берсин... Қулларидан бири валинеъматимга икки калима арзим бор, дейдир!

Хон келсин, ишоратини қилди. Барчанинг кўзи бояғи бордонлиқ уйга тушти. Бордон ичидан узун бўйлиқ, қора соқоллиқ, устида малла тўн, симоби бўз салласининг пешини бир қарич осилтирган бир киши чиқди; тамкин, виқор билан битта-битта юриб келиб, зина ёнида хонға қарши тўхтади... Хондан тортиб ҳаммага табассум туси кирган эди. Киши хонға қарши турған ҳолда салласини тузатди, соқол-муртини силади, тўнини қоқиб, олдини ўради, сўнгра хотиржамъ рукуъга борди. Бирдан хон ва раъият кулиб юбордилар. Бу киши Худоёрнинг энг яхши кўрган қизиги Зокир-гов эди.

Зокир-гов бошини рукуъдан кўтариб, гўё жаноза ўқуған кишидек, икки елкасига салом берди. Яна гурр этиб кулиб юбордилар. Зинанинг иккинчи бошида турған Дарвеш удайчи Зокир-говга танбиҳ берди:

¹ Аркон — давлат арбоблари.

— Кимнинг ҳузурида турғанлигингизни унутман!'

Зокир-гов қўли қовиширилған ҳолда, гавдасини қўмирлатмай ёнидағи удайчига қаради:

— Ўзим ҳам билиб турибман, бу ерда аҳмоқ бор, деб ўйлайсанми?

— Хўш?

— Ҳонимға арзим бор!

Яна гурр эткан кулги боғни тутиб кетди¹.

Удайчи:

— Арзинг бўлса, додрас² ҳузуридасан, гапур!

— Арзимни ўйлаб туриппан-да, ўйлағали ҳам қўймайсанми? — деди Зокир-гов. — Ёки мен ҳам сўзимдан янглишиб Жаббор жиннидек осилиб кетайми?

— Арзга келиб турғанингга бир ош пишар вақт бўлди!

— Мен ҳам арзимни миямда пишириб олаётиманда; пишмаған ош ич оғритадими-а, тақсирлар?

— Арзингни йўлда ўйлаб келмабсан-да!

— Эй, девонами бу ўзи! — деди Зокир-гов. — Йўлда ўйлаш учун бундан бошқа касал йўқми?

— Йўлда нимани ўйладинг?

— Ҳон ҳузурига бораётибман, деб ўлимни ўйладим, етим қоладирған болаларимни, мен ўлгандан сўнг эрга тегадирган янганингни ўйладим! (Кулги.)

— Жанобни ва шу қадар раъиятни маътал³ қўйма!

— Хе-хе-хе! — деб кулди Зокир-гов. — Сизлар ҳар кун минглаб кишини урда тегида маътал қўйғанларингизда, мен бир нафас маътал қўйсам, хе-хе-хе!.. Тақсир, сизга арз!

Ҳон, «айт» деган каби бош ирғатди.

— Тақсиримга биринчи арз шуки, — деди Зокир-гов, — ёнимда турған шу бақа афтни мендан нари қилсангиз, зеро, бунингизнинг дағдағаси сизникидан ҳам ўтадиган кўринади! (Кулги).

Худоёр удайчига, суфага чиқ, ишоратини қилди. Зокир-гов қўлини дуоға очти:

— Онҳазратимнинг даватлари кам, ўзларида ғам, кўзларида нам, душманларида дам, қадларида ҳам бўлмасин... Шаҳзодамнинг бошларида баҳт, остларида таҳт ўйнаб, ёш умрларига ажали бевакт етмасин... Шоҳи

¹ Бундаги кулгига сабаб «ҳонимға» сўзиdir. Чунки бизда «ҳоним» деб хотин кишига айтиладир (муал.).

² Додрас — олампаноҳ, ҳон.

³ Маътал — кутмоқ.

бахтиёрнинг хизматларига бел боғлаған оқ салла, кўк салла, тўни малла оталаримизнинг диллари ҳам ҳамеша соқолларидек оқ бўлсин, омин! Соний, арзи бандалигимиз шулки, биз, дарбадари девона, ақлу ҳушдин бегона, ҳалқ тилида афсона, елкезар ғарибона қулларингиз дарду алам ютар эрдик, қаламравингизнинг бир четидан ўтар эрдик. Дедиларким, бу диёрнинг хоқони, Искандари сони, зару зевар кони, элининг ошу нони, яъни саховатда Ҳотам, қаҳри келса мотам... гуррабо¹ ёридир ва яна сизлардек бозори касод дарбадарлар, энаси кўчада туққан беспадарларга ҳам эҳсони жорийдир, деб биз аҳли тамаъ бечора, нафс илгига² овора ғариблар ҳар қайсимиз беш пайса, ўн пайса тамаъ хапидан ютиб, даргоҳингизга юзландик, токи эски-туски ҳунарларимизни арз қиласақ, жанобингизни беш пул, ўн пул қарз қиласақ, деб... (*Кулги.*)

— Кўп, ҳунарингизни кўрсатине! — деди хон.

36. ҚИЗИҚЛАР

Зокир-гов хонға қулиқ қилди ва икки-уч қадам бордон томонға юриб, бутун товши билан чақирди:

— Баҳромбой! Ҳов, Баҳромбой!!!

Бордон ичидан бир ёёғида кафш, иккинчиси кафшсиз олди очиқ кир яхтагидан бадани кўринган, бир қўли билан елкасини қашиб, иккинчиси билан иштонбоғини ушлаган, бош ялан бир йигит чиқди.

— Эшак ҳанграйдим! — деди Баҳром ва ўёқ-буёққа алонғлаб олғандан кейин, яхтагининг чокини ахтарди.— Сингли талоқ битни қочирдим-да! (*Кулги.*)

— Баҳром деяппан, менга қара!

— Э-эй, Зокир ака, сен чақирдингма... Ҳа, нима гап?

— Хонни кўндиридим!

— Кўндиридингма?.. Мен ҳам айтдим-ку, хон ўзи лақма эмиш, деб. (*Кулги.*)

— Улар қани?

— Уларингма? Уларинг ичкарида ятилти.

— Нима қилиб ятилти.

— Кўй десам бўлмади, бир пой кафшимни икави, хузур қил-и-иб йеб ятилти! (*Қаттиқ кулги.*)

Зокир-гов аччиғланди.

¹ Гуррабо — ғариблар.

² Илгиг — қўл.

— Сенларга ҳеч бир ақл кирмади-да... Энди хоннинг олдига бир пой кафш билан чиқасанми?

Баҳром ўйланиб бошини қашиди.

— Чиқсан чиқавураман-да. Хоннинг ҳам менга ўхшаган бир одам-да, aka! (*Кулғи.*)

— Кир, кир, падарлаънат, даррав уларингни олиб чиқ!

Баҳром елкасини қашиб, кафшлик оёғи билан кафши-сиз оёғини «тап-чип, тап-чип» ерга босиб ичкарига кириб кетди. Бир оздан сўнг икки ҳамроҳини бошлаб чиқди. Чиққанлардан бири пак-пакана, юм-юмалоқ, лўп-лўнда бир маҳлуқ эди. Унинг гавдаси бу қадар «келишкан» бўлиши устига, башараси ҳам шунга монанд тушкан, томогининг остида чўгури қовундек бўқоқ ғовлаб ётар эди. Унинг гавдаси мисоли бир гупчак бўлса, шу гупчакнинг юқорисига катта бир сув қовоқни бош бўлсин, деб ўрнатқан эдилар. Ва бу ялтири қовоқнинг бетида кўз бўлиб, қўёшда қовжираған иккита фўлун туршак, оғиз ерида бир кафш, бурун ўрнида юқорига қараб ўрмалаған баҳайбат бир қурбақа ва кулоқ мақомида сув қовоқнинг икки бағриға тирадан икки ошлов турар эди. Қош ва бошдағи соч тўғрисида оғиз очиб бўлмас, аммо беш-ўн тук, яъни соқол-мурт гирашира кўзга чалинар эди. Сепкил ва чечак доди бу бетни «музояқакор» қилиб кўрсатканидек, оёғидаги чориқ, устидаги қисқа, эски алак чопон, белидаги беш-ўн айлантириб боғланған бўз белбоқ, бошининг учдан бир қисмигагина қўниб ўлтурган тор пилта тўппи бир «хусн»-га яна бир юз «хусн» қўшиб арз қиласар эди. Бу маҳлуқ доимий ўрдада турадирған хоннинг кундалик қизиги мулла Баҳтиёр эди. Иккинчиси мулла Баҳтиёр билан ўчакишкандек, жуда узун бўйлиқ, ғилай кўзлик, ажина қошиқдек юзлик, қотма, ўзининг бўйидан ҳам узунроқ тўн ва бошиға қаландар кулоҳи кийиб, яланг оёғ, ўрта яшар Давлат исмлик яна бир қизиқ эди.

Зокир-ғов буларни қарши олди.

— Э, ҳаромзодалар, — деди Зокир-ғов қўлини пахсалаб, — андак нафсларингни тийсанглар, хотин-ларинг талоқ бўладими?! Бунинг бир пой кафши қани?

Баҳром маъюс бўйин солиб турди, Баҳтиёр билан Давлат лабини артиб, бир-бирига қарашиди:

— Айт!

— Сен айт.

— Нима деб айтаман?

— Еганимиз йўқ, деб айт...

Бахтиёр икки қўли билан белбоғига такя қилиб, қаддини ростлади ва бошини бир оз орқасига мойил тутиб, қаққайди:

— Билиб сўзла, ака, биз еганимиз йўқ!

Зокир-гов индамасдангина Бахтиёрнинг ёнига ўтди ва озорсиз қилиб унинг намойишкор кўриниб турған бўқоғини салмоқлади:

— Кафшнинг ўқчаси тиқилиб қолипти-ку, иним!— деди Зокир-гов. Кучлик кулги кўтарилди. Сўнгра вазиятини ўзгартириб, уларга уқдириди: — Биз ҳозир хоннинг хузурига борамиз, эшитасанларми... Учавинг ҳам адаблик, мутавозиъ¹ бўлиб кўрин. Хонға учрашканларингда, икки букулиб қуллиқ қил, ундан кейин хонни дуо қиласаллар. Тузукми? Қани, келаберларинг орқамдан!

Тўрттави, бири орқасидан бири чизилишиб, шаҳсуфа ёнига бордилар. Зокир-гов зина ёнида тўхтаған эди, орқадағилар бир-бирига туртинишиб, бири у ёққа, бири бу ёққа, учунчиси хонға орқа ўғирган ҳолда тўхталишилар. Бу ҳолдан хабарсиз Зокир-гов уларни хонға тақдим этди:

— Кулбаччаларингиз... саломга келдилар. (*Кулги.*)

Зокир-гов уларнинг ҳолидан хабар топиб, шошли ва ошиқиб, уларнинг бетини хонға қаратди.

— Ҳай, бепадарлар, ҳай, беадаблар... тўғрингда ўлтурған кишига баробар қуллиқ қил.

Учави баробар қуллиқ қилдилар, кулги бошланди. Чунки уларнинг ҳар бири бошқа кишига қуллиқ қилиб, хон четда қолған эди.

Зокир-гов хонға узр айтиб, уларни койиди:

— Кимга қуллиқ қилдинглар?!

— Тўғримизда ўлтурғанга.

— Лўнда бўл, лўнда, учавинг ҳам!.. Дуо қил, дуо!

Учави дуоға кўл очти, кўл очқанча бир неча вақт қарашиб турди, сўнгра тирсаги билан бир-бирини туртиша бошлади. «Сен қил, сен...» Кулги кўтарилди. Улардан товуш чиқа бермагач, Зокир-говнинг ўзи кўл очти.

— Омин де, ҳўқизлар! — деди. Улар «омин, омин» деб турдилар. — Шояд дуо қабул бўлса... Оллоҳ таолонинг мулла Бахтиёр ва Давлат каби закки бандаларига бизнинг эҳтиёжимиз йўқ. Шунинг учун дуо қиласиз-

¹ Мутавозиъ — кибрисиз, одобли, таъзимли.

ки, бу учавининг жонини тезроқ олсин ва бандаларини бу фалокатдан кутқарсин, омин!

Учави ҳам фотиҳага юз сийпашкан эдилар, яна атрофни гурр эткан кулги бости. Фотиҳадан сўнг Зокир-гов уларни йўлға солди:

— Тилак қил, тилак; бақрайиб турасанларми? Учави яна бир-бирини туртишиб, ўз ора бир нарса сўзлашиб олдилар. Давлат нимадир айтиб, суфага ўлтурганларга ишорат қилди... Орадан Баҳром тилакка оғиз очти:

— Салла-кала, шопу шалопни кўриб, ўзимиз ҳам жуда кўрқсанға ўхшаймиз... Манови Давлат бўлса — «Бу ўлтурганларнинг ҳаммаси ҳам одамхўр», деяпти. (*Кулги.*) Энди тилагимиз шуки, бизларга жавоб берсалар, жойимизга тинчкина кетсак... (*Кулги.*) Илоҳи мана шу ўлтурганларга худойим инсоф берсин... (*Кулги.*) Юрагимиз жудаям чиқиб кетаяпти! (*Кулги.*)

— Ҳай, тилакларинг билан бориб ёт! — деди Зокир-гов ёниға уриб. — Қочиб қол, еб қўяди!!

Орадан «дод» деган товуш чиқди, учави ҳам уч томонға қочар экан, Баҳтиёр Давлатнинг оёғига чалиниб йиқилди. (*Қаттиқ кулги.*) Баҳром билан Давлат олпонғ-толпонғ бордонға кириб кетдилар... Зокир-гов Баҳтиёри тутиб қолди.

— Қўй, ака, қўй! — деб йиглади Баҳтиёр, — бекорга ўлиб кетмай, бала-чақам бор?

— Емайди сени!

— Ейди, ака, ейди! Манови бекингнинг кўзига қара... вой-воя-а-а, қўйувор! (*Кулги.*)

— Мен сенларга аччиғ айтим-а, падар лаънат!

— Менда ўчинг борға ўхшайди, ака! Анови домланг нах одамхўрнинг ўзи, кийимингни ҳам ечдириб ўлтурмайди... Уягини сўрасанг, хонингға ҳам ишонмай қолдим! (*Кулги.*)

Баҳтиёр силтаниб Зокир-говнинг қўлидан чиқди ва фидирағандек бордонға қараб қочти. Зокир-гов ҳам уни қувлағанча бордонға кирди.

Бир оздан сўнг тузукроқ кийимда, бошиға салла ўраб, оёғида сағри кафш билан қўлида жойнамоз каби бир нарсани кўтариб бордондан Давлат чиқди. Хонға таъзим қилғандан сўнг, жойнамозни ерга ёзди. Хонға таъзим қилиб: «Шайхулислом Валихон тўра¹ шу ерга

¹ Бу киши асли чустлик бўлиб, шайхулислом ва янги солинган ҳоким ойим мадрасасининг бош мударриси (*муал.*).

марҳамат қилар эканлар!» — деди. Ҳон мулла Ниёз домланинг ёнида ўлтурган шайхулислом Валихон тўрага қаради. Аҳволга тушунмаган шайхулислом «Нима гап?» дегандек қилиб, жойнамоз ёнидағи Давлатка кўз қирини ташлади. Давлат «Ҳеч гап» деган ишорани бериб, бордонға қайтиб кетди. Демак, ҳозир шайхулислом Валихон тўрага муқаллид бўлмоқчи эдилар. Буни пайқаган ҳалқ секин-секин, бир-бириси билан имлашиб, кулимсишдилар ва барчанинг кўзи бордон уйда бўлди. Бир вақт бордон эшигидан банорас тўн кийиб, ўнг қўлиға асо ушлаган ва сўл қўлида адрас рўймолға тугиклик китоб кўтарган, шайхулислом Валихон тўра (Зокир-гов) кўринди. Шайхулислом каби қадди бир оз букик ва қадам қўйиши ҳам Валихон тўрадек икки тарафка мойил эди. Барчанинг кўзи ва диққати ҳар икки шайхулисломда бўлди. Ҳон ёнидағи ҳақиқий шайхулислом эса қип-қизарған ва ҳар он «тавба» деб қўяр эди.

«Шайхулислом» йўл устида тўхтади ва ерда тушиб ётқан бир нарсани асосининг уни билан текшириб кўрди ва уни туртиб четка чиқарғач, йўлида давом этди. Кўбчилик чидалмади, гур этиб кулиб юборди. Валихон тўранинг ўзи ҳам тавба аралаш кулиб қўйди. Чунки Зокир-гов ҳеч бир нуқсонсиз муқаллид бўлмоқда эди. Жойнамоз ёнига етди, асосини шайхулислом асоси ёнига тиради, кафшини ечиб жойнамозга чиқди. Ўлтуриб китобни тизасига қўйди ва пичир-пичир дуо ўқуб юзини сийпади.

«Шайхулислом» уёқ-буёқни қарағандан кейин чақирди:

— Мирзо Ҳамдам-ҳай, мирзо Ҳамдам-ҳай!

Кулги кўтарилди, айниқса, шайхулислом ёнида ўлтурган домлалар қаттиғ кулдилар.

— Мирзо Ҳамдам-ҳай...

Бордондан Баҳром чиқди, ул ҳам муллаёна кийинган эди.

— Лаббай!

Баҳром «шайхулислом» қаршисиға келиб, салом берди. «Шайхулислом» жавоб бериб, жойнамоз ёнига эшкан кафшига қаради.

— Ҳай, шу кафшимни бир пок қилинг, мирзо Ҳамдам, — «Мирзо Ҳамдам» тавозисъ билан чўнтагидан рўймолини олиб, кафшини арта бошлади ва шу вақтда бордон ичидан, ул ҳам муллаёна кийимда мулла

Бахтиёр чиқиб келди; «шайхулислом» қаршисиға келиб, салом берди.

— Ваалайкум ассалом! — деди «шайхулислом» ва келгүчининг апти-бошиға қараб олди. — Шинед, бачча, шинед!

Бахтиёр ўлтурди.

— Хўш, писар, чи гап?

— Тақсир... сизга... арзим бор эди... Подшоҳимиз янги мадраса бино қіғанлар, деб илм талабида қишлоқдан тушкан эдим; бир ҳужра берсангиз, деб сизға арзға...

— Хўб, хўб... Шумо гужойи?¹

— Тақсир, Олтиариқдан...

— Аттанг, аттанг, — деди «шайхулислом», — бар-вақтроқ келмабсиз-да, бачча, акун² ҳамма ҳужраларга жой йўқ, муллабаччалар жойлашиб қолган.

— Муллаларнинг арасиға қўйсангиз ҳам бўлавуради менга, — деди тавозиъланиб Бахтиёр. — Биз қишлоқ одами... сиқилишсақ ҳам ётавурамиз, тақсир!

— Хўб, хўб... Акун ҳужраларимиз муллабаччалар ми-нан беҳал тўлган, ҳолонки бир тариқ ҳам сиғмайди, биз дуруф сўзламаймиз, бошидон³...

Ҳақиқий шайхулислом масалага тушуниб тер чиқара бошлади. Бахтиёр (муллабачча) маъюс фотиҳа ўқуб «шайхулислом» ҳузуридан кетди. «Мирзо Ҳамдам» кафшини туфлаб, тозалаб бўлғандан кейин «шайхулислом»нинг қаршисиға ўлтурди. Ҳариги ёқдан «шайхулислом» рўбарўсига Давлат келиб тўхтади.

— Ассалому алайкум, тўра почча! — деди Давлат ва кафшини ечиб келиб, «шайхулислом» билан қўл олишиб кўришди. — Хўб саломат, оғият ҳастедми⁴, тақсир?

— Худоро шукур, худоро шукур.

Давлат рухсат, фалон кутмай «шайхулислом»нинг ёниға ўлтуриб олди.

— Ба жаноб арз...

— Бисёр хўб, арз кунед⁵.

— Очик гов: бизга бир ҳужра берсалар, деб келдикда, тўра почча!

— Хўб... Гужойи?

¹ Шумо гужоиши — сиз қайерликсиз.

² Акун — (акнун) — энди.

³ Бошидон — ўргулай.

⁴ Оғият ҳастедми — тинчмисиз.

⁵ Жуда ҳам яхши, арзингизни айтинг.

- Тақсир, чустий, ба жаноби шумо ҳамشاҳрий¹.
- Яъни писари ки?
- Рисари усто Мұхаммад собунгар.
- Хұб, хұб, — деди «шайхулислом» ва «мирзо Ҳамдам»га буюрди, — ба ҳамин одам як ҳужра додан гир!²

Давлат дуо қилиб «шайхулислом» ҳузуридан кетди. Құқонлик муллабачча рўлида Бахтиёр келди. Үнга яна: «Биз дуруғ сўзламаймиз, мадрасамизга бир тариқ ҳам сифмайди», деган жавоб бериб жўнатилди. Давлат яна чустлик бир толиби илм бўлиб келган эди, «мирзо Ҳамдам» орқалиқ «додан гир!» буйруги берилди. Қаттиғ қулги кўтарилди. Ҳон ва домла Ниёзнинг кўзларига ёшлар чиқди. Аммо шайхулислом дам-бадам манглай терини артиб олар эди. Зокир-гов хонға қуллик қилиб, шогирдлари ёнига борди. Ҳон ва раъият янги қизиқлиқни кутиб қолдилар.

37. БИРИКИШ

Далв ойи³, қаттиғ қиш. Девоннинг ҳар икки хонасиға бир нечадан сандал қўйилган эди. Ҳар бир сандалга тўрттадан мирзо жойлашиб, дафтар таҳрири, ёрлиғ иншоси билан машғул эдилар. Ҳон ҳузурига чақирилған Анвар ярим соат чамаси кечикиб чиқди. Анвар ўз хонасиға келиб кирганда, четдаги танчада Шаҳодат муфти бошлиқ мулла Абдураҳмон ва Калоншоҳ мирзолар нима тўғрисидадир, оҳиста-оҳиста сўзлашиб ўлтурар эдилар. Эшикда Анвар кўриниши билан уларнинг суҳбати кесилди ва ҳар ким ўз қўлидағи ишқа қаради.

— Эҳи, эҳи, — деб йўталинди Шаҳодат муфти, — нима фармон бор, мирзо Анвар?

— Ҳеч гап, — деди Анвар ўз танчасига жойлашиб.
— Ўш, Андижон ҳокимларига нома буюрилди... Сиз мулла Абдураҳмон aka, қўлингиздағини неча нусха тайёрладингиз?

Мулла Абдураҳмон ёнидағи қофозларни санади:

- Уч нусха.
- Яна бир нусха ёzsангиз бас. Закотчи исмини қўймағандирсиз?
- Қўймадим.
- Жуда яхши, ўзим қўярман. Қўлингиздағини тезроқ

¹ Чустликман, сиз жанобларига ҳамшаҳарман.

² Шу одамга бир ҳужра бергин.

³ Далв ойи — 22 январь — 21 февраль.

ёзиб битирсангиз, яна бир иш бор, — деди Анвар ва Шаҳодат муфтига юз ўгири. — Тақсир, сиздан бир илтимос; кечаги Абдушукур понсадга маҳзарни¹ ўзингиз ёзиб бермасангиз бўлмайдирған кўринади. Боя менга яна учраши; гулдир-гулдир қиласи, мақсадига ҳеч бир тушуналмадим. Чамаси, унинг даъво кониятини сиз яхшироқ билар экансиз?

— Кўйинг шу бош оғригини, — деди муфти, — неча бора менга иши тушиб, бирар мартаба ҳақ берганини хотирламайман.

— Ҳақ олиб беришкан мен кафил.

— Эй-ҳа, мен ололмағанни сиз олармидингиз?

— Ололмасам, сизга ўз ёнимдан тўлай, тақсир; ишқилиб, шунинг даъвосидан мени қутқаринг-чи.

Шаҳодат муфти индамади. Анвар қоғоз олиб, бир нарса ёза бошлади. Шаҳодат муфти оҳистагина ёнидағи Абдураҳмонни туртиб қўйди ва Анварга ишорат қилиб, «ана аҳвол» дегандек илжайди. Яъни унинг ҳаракати «кўрдингми мирзобошини, қўлидан маҳзар ёзиш ҳам келмайди» мазмунида эди. Мулла Абдураҳмон оҳиста бош кўтариб кулимсиди. Бу гапдан хабардор бўлиб ўлтурган Калоншоҳ мирзо қўлини оғзига карнай қилиб Анварга тўғрилади, яъни, жиртак чалди. Шу ҳолда эшикдан Султонали мирзо кириб, Калоншоҳга тикилиб қолди...

— Маймунлик муборак!

Иш билан машғул Анвар қоғоздан бошини кўтариб, эшикдаги Султонали мирзога қаради:

— Нима гап?

— Неч гап, — леб кулди Султонали, аммо кўзидағазаб ўти ёнар эди. — Мен бояғи қоғозга кирган эдим.

Анвар ёнидағи қоғозлар ичидан бир ариза ажратди:

— Жавоб мен айтканча бўлсин.

— Хўб.

Султонали қоғозни олиб чиқар экан, яна уларга қараб қўйди. Уларнинг учави жиддий равишда ишга берилган, қоғоздан бош кўтармас эдилар. Султонали чиқиб кетди. Бир оздан кейин Шаҳодат муфти секин бош кўтариб Анварга қаради. Анвар ўз ишига қаттиғ боғланған эди. Шаҳодат муфти Калоншоҳ билан кўз тўқнаштириб, «яхши бўлмади», деган каби бош чайқади. Калоншоҳ аҳамиятсиз кўз қисди. Одатдагидан ҳам

¹ Маҳзар — ариза.

ранги ўчкан Абдураҳмон буларнинг ҳозирги им-ишоратига иштирок этмай, ўз ишига қараган эди.

Солиҳ маҳдумнинг ўша сўзи билан Абдураҳмон ишка олинған эди. Уч ойдан бери Анвар қошида — ўз хузурида мирзолиқ қилиб келар ва иккинчи ойдан беш тиллолиқ моҳонага ҳам ёзилған эди. Бир ойлар чамаси Анварга садоқат билан, унинг қаноти остиға киргандек ишлади. Бу орада Шаҳодат муфти ва Калоншоҳ мирзо кабилар билан сирдон бўлмаса ҳам танишди, яқинлашди. Бошда Шаҳодат муфтилар уни ётсимишиб унинг ёнида ҳар турлиқ гийбатларни қилишдан чўчилилар. Чунки мулла Абдураҳмоннинг Анвар кишиси бўлиши тахмин қилинған эди. Иккинчи ойдан моҳонага ёзилиши ҳам уларнинг ўз андишаларида янглишмағанликларини кўрсатди. Бироқ Абдураҳмоннинг баъзи ҳаракатлари, масалан, мирзо Анварнинг арабча, форсийча лафзлардан холи, содда таҳририни нусхаларга кўчирап экан — «аттаому било милҳи» (тузсиз ош), деб кулиб қўйиши муфтиларни ўйлатиб қўяр, бу таънани чин кўнгилдан чиққаниға шубҳаланишни-да, шубҳаланмасни-да, билмас эдилар. Шундай фурсатларда «аламзада» муфтилар ҳам бирар латифа сўзлашка тутунар, аксар, латифа мазмунини бир тарафка буриб юритар эдилар. Баъзан Шаҳодат муфти ишдан чарчаған каби оҳ тортиб, ўзича «мутул-асаду филғабоби жуъан ва лаҳмут-тайри йутраху лил-килоб»¹, деса, иккинчи ёқдан Калоншоҳ мирзо шу мақолнинг давомини сўзлаб «ва хинзиру яному фил-фирош ва улул-қули яному алаттуроб»², дерди. Мулла Абдураҳмон уларнинг кинояси мазмунига тушунибми ёки тушунмасданми — ҳар ҳолда бир илжайиб қўяр эди.

Шу йўсун иккинчи ойда бу икки муфти мулла Абдураҳмонни синаб вақт кечирдилар. Абдураҳмон ҳам ўзининг аксар сўз ва ҳаракатлари билан уларни шубҳадан чиқара борди, ниҳоят икки муфти учунчи ёш «олим»ни ҳам, гарчи бир «нодон» тарафидан келтирилган бўлса ҳам «заршунос» деб билдилар ва учунчи ойдан уни ҳам, ўз ёnlариға олиб сирдон бўлишилар. Бояғидек, «қозихона маҳзарлари» уларга дастмоя бўлди. Анвар ўзи вақт тополмай, бирар нарсани муф-

¹ Арслон chanгалзорда очликдан жон берадир, аммо итни куш гўши билан бокалирлар (*муал.*).

² Тўнгуз хузур қилиб тўшакда ухлайдир, оқиллар тупроқда ётадирлар (*муал.*).

тиларга ҳавола қиласырған бўлса, «мирзобошининг тиши ўтмади» деб кулишдилар. Мулла Абдураҳмон ҳам валинеъмати бўлған Анварнинг риоясини унуга ёзди. Чунки мазкур икки муфтининг таъсиirlари кучлик бўлиши устига, ўзи ҳам уларга мойил, ҳатто бу камси-тишлардан лаззат олгучи эди...

Анвар икки муфтининг фийбатларини яхши билса ҳам, Абдураҳмоннинг бу фийбатда иштироки борлиғини сезмас эди. Фақат яқиндан бери Султонали мирзо Абдураҳмоннинг бунда иштироки борлиғига воқиф бўлди. Ҳатто шу тўғрида Анварга баъзи сўзларни ҳам айтди. «Мулла Абдураҳмондан нон емаймиз, сизга қарши қаттиғ қутурған икки итимиз бор эди, энди учунчисини ўзингиз келтирганга ўхшайсиз...»

Кечка томон мирзолар тарқалишдилар. Бироқ бизнинг муфтилар ҳануз қўзғалмас эдилар. Анвар эса ҳаммадан кейин чиққучи эди. Икки муфтининг қўзғалмасликлариға ўзи сабабчи бўлғанлигини яхши билган Султонали мирзо Анвар билан хайрлашиб чиқди. Шундан бир оз сўнг муфтилар ҳам кетишкага чоғландилар.

Ҳаво совуқ, тўрт эллик чамаси қор ёғиб, кўча бетини ёпқан эди. Кўқоннинг ўзига маҳсус изғириқ бу қор билан яхши қуролланиб, кишининг қулоқ-тумшуғини заҳар каби ялаб ўтар эди. Кишилар телпакни бостириб кийган ёки саллани қулоқ ва манглай аралаш ўраб, бўз гуппини тумшуққача кўтарған эдилар. Кўча бўйлаб ҳар ким чопар, бир нарсадан қуруқ қоладирғандек югурап эди. Бу кунги совуқ билан қор ҳар кимга ҳам ғарчлиқ кафш инъом қилған, бой ва беклар оёғидаги бедона, сағри қала кафшлар билан камбагал косиблар кийган утика,¹ айбаки кафшларнинг ўзаро фарқи қолмаған ва ҳатто баъзилар оёғидаги ёғоч кафшлар ҳам ажойиб нағманавозлиқ қилар эдилар.

38. FARIB KЎNGLI

Анвар бошқалар каби югурмаса ҳам елиб келар эди. Хиштқўпрукка етканда, катта сув ёнидағи ҳужра эшигига қўсқи² пўстунга ўралиб турған қоровул унинг олдига тушиб салом берди:

— Совуққа қотқан кўринасиз, тақсир... Гулханимиз бор.

¹ Утика — бузоқ терисидан тайёрланган кўн.

² Қўсқи — жулдур, эски.

Анвар тумшуғини тўнидан чиқариб илжайди ва ту-
тун чиқиб турған эшикка бурилди, қоровул олдинда
келиб, эшикни очиб берди. Анвар ичкарига кирди. Ту-
тун билан қоп-қорайған, пасткина қоронги ҳужранинг
ўртасида гулхан ёниб, алангаси мўрига ўрлар эди. Гулхан
ёнида қўлиға касав тутқан Султонали мирзо олов
жўнаштириб ўлтурар эди.

— Сиз ҳам совуққа қотқанларданмисиз?! — деб қул-
ди Анвар.

— Жон олов — жон эр, депти бир хотин... Гулхан
ўтлик йигитнинг иссиқ қучоғи эмиш. Қани, бу ёққа
марҳамат!

Коровул ва Султонали мирзоларнинг қисташлари
билан Анвар гулханнинг тўрига, тўрт қатланиб солин-
ган кийизга ўлтуриб, қўлини оловга тутди.

— Ўзингиз ўлтурмайсизми, ака, ўлтуринг!

Анварнинг бу сўзи билан адаб сақлаб турған қоро-
вул гулханнинг бир чеккасига чўйккалаб, гулхан ёни-
дағи қора қумғонни оловға тираброқ қўйди.

— Совуқ тузук бўлди, — деди Анвар исиниб. —
Ўрдадан чиқиб, ўзингизни гулханга урибсиз-да?

— Қарасам уйга еткунча қотадирғанман, Тойир
акамнинг туйнугида тутун кўриб, эшикни очсан, иш
кatta. Хиралиқ бўлса ҳам кирдим, нима қилади... Би-
роқ, сизни Тойир акамнинг ўзи чақириб кирганга
ўхшайди, ҳали сизга чой дамлайман, деб овора бўлса
ҳам эҳтимол...

Тойир ака қумғонни яна олов томонга итариб қўйди:

— Ҳозир дамлаймиз, тақсир, ҳозир. Сув ҳам қал-
қиб қолибдир, яхши кўқ чойимиз ҳам бор.

— Ўзларингиз ичмасангиз, меним учун ҳожат эмас,
мен ҳозир кетаман.

— Шу гулханни ташлаб, қаёққа?

— Уйга... Балки кишилар кутиб ўлтурган чиқарлар.

— Шундай совуқда сизни ким кутсин, чойни дам-
лай беринг, Тойир ака, мирзобошини юбормаймиз.

— Шундай бўлсин, тақсир... Фарилларнинг чойидан
ҳам бир ичиб қўйсинглар, — деди Тойир ака ва ўрни-
дан туриб бурчакдаги ёрилған тарашадан бир кучоқни
келтириб гулхан ёнига ташлади. Қайнаб тошқан қум-
ғонни оловдан олиб, чой дамлади.

— Тойир акамнинг гулханини ташлаб кетиш бўлмай-
ди, — деди Султонали, — бир-икки пиёла чойидан

ҳам ичиш керак, бир-икки калима сұхбатини ҳам әши-тиш керак.

Анвар илжайиб қўйди. Тойир ака қозиқдағи тугунни очиб тўрт-бешта нон, бир ҳович каттақўғон магиз олиб, кичкина баркашчага солди. Баркашни Анвар олдиға келтириб, узр айтди:

— Камбағалчилик, тақсир, олдингизға дастурхон ёзолмадик...

— Нима айби бор, — деди Анвар, — мен шундай қоронғи уйда гулхан ёнида ўлтуришни ва шу ҳолда чой ичишни жуда яхши кўраман.

— Бу ўлтуришнинг ўз олдиға бир нашъаси бор, — деди Султонали.

— Бор... Шоирона, дарвешона бир маъноси бор. Мен ёш, етим чоғим, опамнинг уйида шу ҳолни кўрар эдим. Язнам қашшоқ косиб эди. Қиши келди дегунча гулхан ёқар ва шу йўсун гулхан ёнида ўлтуриб чой ичар эдик. Шу гулхан ҳаёти ҳануз меним эсимдан чиқмайдир ва шу ҳаётка ҳамиша кўнгилда бир муҳаббат сақлайман.

Тойир ака Анварга сопол пиёлада чой узатди. Гулхан кейинги қаланған тарашалар билан аллангаланиб ёнди. Қоронғи ҳужра ёришиб, учқунлар билан зийнатланди.

— Бола-чақангиз борми, Тойир ака?

— Йўқ, тақсир... Шу ерда юртни дуо қилиб ётаман.

— Тойир акам ҳам сизга ўхшайди, — деб кулди Султонали. — Тўйни кўкламга қолдирғанингиз яхши бўлмади, қиши кунлари Тойир акамдек ёлғизлиқ...

— Чунки мен Тойир акам турмишини яхши кўраман... Дардисарнинг нима кераги бор-а, Тойир ака?

Тойир ака қўлида касав билан олов тўғрилар эди.

— Курби еткан кишининг бола-чақа қилғани маъкул, тақсир.

— Нима учун?

Тойир ака олов жўнашдириб, бир оз жавобсиз ўлтурди. Соқол-муртига учиб тушкан учқун кулларини селпиб ташлади.

— Худой фарзанд берса, қариған кунларингизда ишингизга ярайди, — деб қўйди Тойир ака, яна бир озов тўғрилаб турди. — Менда ҳеч ким йўқ... Ёшим эллидан ошқан, тақсир... Ҳозир куч-қувват бор, бир нарса топиб бўлади... Бир вақт келар, куч кетар, шунда менга ким қарайди, тақсир? Иссиқ жон, мен оғриб ётарман, бир қошиқ сувға муҳтоҷ бўларман... Шунда

сувни менга ким беради, тақсир? Ўлим ҳақ, ажал етиб амонатни олса, кўзим юмилса, бир чеккада ўлиб қолғанимни ким билади, тақсир?.. Кишининг бола-чақаси бўғанда шундай гаплар йўқми, деб ўйлайман-да.

— Тўгри гап, — деди Султонали, — дарҳақиқат, киши қандай кунларга қолишини билмайди. Тойир акам айтканча, бола-чақа бўлса, бир оз кўнгил тўқи-да.

Анвар бир оз сўзсиз, ўлланиб турди, қўлидаги пиёласини бўшатиб, Тойир акага узатти.

— Уйлантириб қўяйлиқми сизни?

Тойир ака миннатдор оҳангда кулди.

— Э, жонингдан, тақсир, — деди, — энди бўлмайди.

— Нега бўлмайди?

— Соқолға қаранг, ўлим иси келади...

— Бўлмаған гап... Сиз биздан ҳам ёш кўринасиз.

— Кўнгил қариған, тақсир, кўнгил, — деди Тойир ака, қўлини кўкрагига тегизиб олди. — Энди кўнгил ҳеч нарса ҳам тиламайди, фақат тинчлиқ тилайди... Тинчлиқ қачон бўлади, унисини билмаймиз-да.

Сўзни яна айлантиришкага йўл қолмади. Анвар ер остидан Султоналига кўз юборди. Султонали маънолик бош ирратиб қўйди. Тойир ака ўз олдидағи ёниб ўчкан хокаларни кулдан ажратиб, гулханга ташлар эди. Бояғи шиддати йўқолған гулхан нафис кўк тутун чиқариб оҳистафина чайқалиб ёнар эди. Куллар кўкка учар, чўғлар кулга ботар, чалалар чўққа айланар эдилар... Учави ҳам сўз кўйишқандек анча вақт гулханинг шу ҳолини таъқиб этдилар.

39. БИШЎЙ, ЭЙ ХИРАДМАНД...

— Муфтиларингиз меним орқамдан жўнаған бўлсалар керак, мирзо Анвар?

Хаёли бошқа нарсада бўлған Анвар Султоналининг сўзига тушунибми, эмасми, ҳар начук бош ирратиб қўйди.

— Мен сиз билан хайрлашиб кўчага чиқсам, «дўстингиз» Мулла Абдураҳмон уларни кутиб турған экан. Чамаси кундузги «суҳбат»нинг мобаъди¹ бўлса керак!?

Анвар хаёли билан видоълашқандек, тилар-тилас Султоналига юз ўгирди.

¹ Мобаъд — давоми.

— Қандай сұхбатнинг?

— Сұхбатнинг эмас, ғийбатнинг.

Анвар күлди:

— Сиз мулла Абдураҳмон домлани күралмай қолдингиз.

— Масала күралмасликда эмас, унинг нолойиқ ҳаралықтида, дүст күриниб душманлық күчесига киришида.

— Биз унинг чин күнглини билишдан ожизмиз.

— Ҳар ҳолда бу калтакесак бизга дүст эмас.

— Хүш? — деб күлди Анвар.

— Муфтилар бизга дүстми, душманми?

— Балки душманлар, лекин биз уларга душман эмасмиз,

— Бали! — деди Султонали мирзо. — Башарти бизнинг ёрдамимизда ишлик бүлған бир одам, эрта-кеч бизнинг душманимиз ҳисобланған кишилар билан ҳамсұхбат бўлса, оғиз-бурун ўпишса, биз унга қандай баҳо беришимиз керак? Бундай одамни биз очиқдан-очиқ душман ёки аҳмоқ деймиз. Аммо мулла Абдураҳмон аҳмоқ эмас, кўб иш кўрган туллак! Энди фақат унинг душманлық тарафи қолди, ҳам бу аниқ. Меним ҳукмимга қаноат қилмасангиз, ҳикматка қаранг. Шайх Саъдий:

«Бишүй, эй хирадманд, аз он дўст даст,
Ки бо душманонат бувад ҳамнашаст»¹, —

дейдирлар...

— Мен мулла Абдураҳмонни яхши киши, деб ўйлайманми?

— Ўйламайсиз, бироқ унинг ўзига яраша муомала қилмайсиз, шу билан бирга анови муттаҳамларни ҳам ҳаддидан оширасиз!

Анвар барқашдаги магиздан бир-икки дона олиб кўлида ушлади.

— Сизнингча, улар билан қандай муомала қилишимиз керак?

— Мулла Абдураҳмонни ўрдадан жўнатиш керак; тинчкина имом ва хатиблигини қилсин. Муфтиларга ҳам қозихонадан бирар вазифа топилиб қолар.

Анвар бош тебратиб күлди. Тойир ака гулханга ўтун қалаб шом учун жойнамоз ёзди. Султонали мирзо имом

¹ Бишүй, эй хирадманд, аз он дўст даст.

Ки бо душманонат бувад ҳамнашаст. (Саъдий.)

(Эй ҳушёр киши! Душманларинг билан бирга ўлтуришкан — ҳамсұхбат бўлган дўстингдан кўл ювғил (муал.).

бўлиб, уч киши шомга турдилар. Шомни ўқуб гулхан ёнига ўлтурап экан, Султонали сўради:

— Еки уларни ўрдадан жўнатиш осон эмасми?

— Осон, бироқ осон ишда лаззат йўқ, — деб кулди Анвар. — Сизнинг шу гапингиз билан бир киши ёдимфа тушди: ўзи мулла Абдураҳмоннинг қавмларидан бўлған оқ кўнгилли содда бир киши бор. Оти... ҳа, оти Сафарбой, касби бўзчилиқ. Ўткан кун ўрдадан қайтиб борсам, шу киши уйда мени кутиб ўлтурибдир. Хўш, келинг, Сафар ака? — Куйган-пишкан, менга «арз» қилди: мулла Абдураҳмоннинг бир дўстидан эшиткан эмиш, гўё мулла Абдураҳмон биравга «мирзо Анварнинг тегига яқинда сув келади» деган эмиш... «Бу нима деган гап, мирзо, нега сизнинг тегингизга сув келади?» — деб сўрайди. Мен кулдим... «Ҳозирча тегим қуруқ, ба-шарти тегимга сув келса, бўзчилиқни ўргатасизми?» — деб сўрадим. Саволимга жавоб бермайди, фақат сизнинг сўзингизни айтиб: «Имомимиз фисқи-фасод, бундай кишини ҳайдаганингиз маъқул», — дейди. Сизга ёқадирған сўзни айтдимми, Султонали ака??!

— Бу киши сизга чин дўст экан, — деди Султонали жиддий. — Мен ўз фикримда янгишмасман. Бу калтакесак юткан чаённинг юрагида, худой билсин, сизга қарши катта адоват бор.

Шу чоққача олов кавлаб жим ўлтурган Тойир ака сўзга қотишти:

— Сафар, елкаси чиққан, жиккак йигит эмасми, тақсир?

— Бали, бали.

— У меним ошнам бўлади. Эҳей; у билан биз ҳар ёз бирга мардикор ишлар эдик; ўзи ўбдан яхши йигит.

— Вассалом, — деди Султонали мирзо. — Бас, Абдураҳмон ҳам адоватда муфтилардан қолишмайдир. Шунча яхшилиқни билмаган киши...

— Яхшилиқ қил, дарёға ташла; балиқ билмаса, холиқ¹ билур, деганлар. Фузулий: «Даҳр² бир бозордир, ҳар ким матоъин арз эдар» деб жуда тўғри сўзлайдир. Шунга ўхшаш биз ҳам, ўзимизда бўлған матоъни бозорға соламиз, улар ҳам бисотларини кавлаб шундан бошқасини тополмайдирлар.

— Бу шундай, мирзо Анвар, аммо ўзингизни душмандан мудофаа қилиш керакми, йўқми?

¹ Холиқ — яратувчи, худо.

² Даҳр — дунё, олам.

— Мен нимани душмандан мудофаа қилай? — деб кулди Анвар. — Агар уларнинг адовати мендан бош муншийликни олиш учун бўлса, марҳамат қилинлар, ҳатто ўзим уларга ёрдам ҳам берай. Тўғри сиз уларнинг номуссизона ҳаракатларидан қизишасиз, аччиғланасиз. Мен-чи, мен ҳам бир инсон, кўқдан тушкан фаришта эмасман; ўз устимдаги тўқинған ҳаракатлардан аччиғланаман. Сиз айтканча, уларни ўрдалан ҳайдаш мулоҳазаларигача бориб етаман. Бироқ, баъзи андишалар мени тўхтатиб қўядир. Аввало, улар билан тенглашиш меним учун камчилик кўринадир; иккинчи, уларни девондан ҳайдаш тўғрисиға келганда яна андишалар бор: башарти муфтиларни девондан чиқарсан, халқ нима дейди, беш кун амалга миниб, ўтгуз йиллиқ мирзоларни қадр қилмади, демайдими? Агар улар тинч-кина чиқиб кетса-ку, яхши, билъакс, хон ва шоғовул домлалар воситасида яна кириб олса, мен нима деган одам бўламан? Бу ҳолда бир адоват устига юз адоват замланишида шубҳа йўқ. Энди мулла Абдураҳмон тўғрисида: бошда мен бу кишини ўрдаға олишга қарши бўлиб, биринчи кўришимдаёқ бу мулладан яхшилиқ кутмаган эдим. Бироқ, сизга айтканимча, ўртада нозик бир киши восита бўлди, шундан кейин ноилож хизматка олишқа мажбурият туғулди. Мулла Абдураҳмон ифлослар қаториға ўткан экан, иши осон, жўнатиб юбориш қўлимиздан келади. Ва лекин, фикримча, уни ҳам жўнатиш маслаҳат эмас. Аввало хизматка олмаслиқ керак эди; олинғач, уч ой ўтмасдан жўнатиш... Жуда оғир; агар ифлос бўлса унинг табиъати, биз ўзгарта олмаймиз, ҳар ким тилаган ошини ичадир.

Султонали мирзо муфтилар тўғрисида бир нарса деялмаса ҳам, Абдураҳмонни жўнатишга исрор этди¹.

— Хўб, муфтилар қолсин, яна бир неча кун са-сишсин. Бироқ, Абдураҳмонни тўхтатманг, агар сиз шучувалчангнинг баҳридан ўтсангиз, ҳамроҳларига катта ибрат кўрсаткан бўласиз.

Анвар кулиб қўйди.

— Сиз мени дўстимга қаттиғ тикилдингиз...

— Тикилишқа — тикилдим, — деди Султонали мирзо жиддий, — сиз лоақал шуни ҳам жўнатмасангиз, мен кетаман. Муфтиларнинг афтини кўриб қийналар

¹ Исрор этмоқ — қистамоқ.

эдим. Энди бу учунчи ифлоснинг юзига қарашқа тоқатим қолмади!

Султонали жиддийлашкан эди, Анвар яна қарши боришни мувофиқ кўрмади.

— Хўб, — деди, — сиз шуни маслаҳат кўрсангиз, жўнатайлик.

— Бали! — деди Султонали. — Сиздан яна бир талаб: эртадан бошлаб мени ўз ҳузурингизга олинг, тики муфтилар эртадан кечкача фийбат сўзлаб, маймун бўлиб вақт кечирмасинлар.

— Бу ҳам осон, — деб кулди Анвар, — улар мен йўқ вақтдан фойдаланиб, юрак бўшатар эдилар. Энди бундан ҳам бечораларни маҳрум этмакчисиз; бу қадар зулм...

Султонали яна кулмади:

— Қилғанға қиласиз-да.

Шундан кейин кетишка чоғландилар. Анвар қўзғалар экан, ёнчиғидан бир тилло олиб, Тойир акага узатти. Тойир ака билими, билмасданми, ҳар ҳолда тиллони қўлиға олғандан сўнг, яна тез қайтариб берди:

— Уят, уят бўлади.

— Бу пул ўзимга, деб ўйламанг, — деди Анвар Тойир аканинг қўлини итариб, — сиз бу пулга ўтун, магиз, оптиб қолса чой оласиз. Султонали акам билан келганимизда гулханни бундан ҳам катта қилиб берасиз.

— Сизлар келсаларинг ҳаммасиям ўзимиздан топилади.

Анвар пулни олмади. Тойир ака маслаҳат сўрағандек Султоналига қаради. Султонали дуо қилиб олинг, деган каби ишорат қилди. Тойир аканинг дуосидан кейин чиқдилар.

40. АЛДАШ УЧУН БОЛА ЯХШИ

Бир неча кунлардан бери Сафар бўёзчи хурсанд эди. Мулла Абдураҳмоннинг хизматдан чиқишиға ўзим сабаб бўлдим, деб ўйлар; ўз сўзи билан мулла Абдураҳмон каби бир кишининг сувға тушкан нондек шилқиллаб қолишиға: «Кўрпангга қараб оёғ узат, муллавачча!» — деб ўзича кулиб қўяр эди. Кеча Самад бўқоқни кўчада учратиб, пичинг отди: «Мирзабошимнинг тегига сув кетиптия, гапингни тўғри чиқишиға қара, Самад?» — деди. Чунки Анварга бориб айткан хабарни шу Самад бўқоқдан эшиткан эди. Самад бўқоқ унинг бу пичин-

гидан қизарди: «Күлөғимға яңғыш кирған экан-да, абл-лах!» — деб гапни кулгуликка бурди. Сафар бўзчи ҳам «пайрав» қилди. «Бир қўчқорнинг боши кеткунча, минглаб қўйнинг боши кесилар эмиш, деб айт домланға!» — деди. Самад бўқоқ индамади.

Сафар бўзчи мулла Абдураҳмоннинг хизматдан бўшатилғанини эшиткандан бери «Мирзамни бир кўрсам» деб Анварнинг олдига боришқа чоғланиб қолди. Бироқ, дастгоҳ ёнидан қўзғалишқа ишни қизғанди. Бу кун иш тўқур экан, ўзича қарор берди: «Бу кун чоршанба, эрта панжшанба... жумъа кун мен ҳам бўш, мирзам ҳам бўш. Ҳа, индин борганим маъқул».

Шомдан бир оз илгарироқ Сафар ака ишдан чиқди. Куннинг совуқлигига ҳам қарамай музлаган совуқ сувда таҳорат қилди, нари-бери бўз салласини чулғаб, масжидга югурди. Ул жиловхонадан кирганда, масжиднинг тўрдаги ҳужрасидан мулла Шаҳодат муфти, Калоншоҳ мирзо ва мулла Абдураҳмонлар намозга чиқиб келар эдилар. Сафар бўзчи ҳар икки муфтининг ҳам ўрдада туришларини яхши билар эди. Мулла Абдураҳмонни ўрдаға яна оладиган бўлибдирларми, деб ўйлади ва уч уламо келиб масжидга киргунларича адаб сақлаб, масжиднинг бўсағасида кўл боғлаб турди. Улар келиб масжидга кирап экан, мулла Абдураҳмон кўзининг пахтасини чиқариб, Сафар бўзчиға қараб ўтди, улар орқасидан Сафар бўзчи ҳам хонақоҳға кирди. Аммо ҳалиги қарашдан сўнг Сафар бўзчининг бошидан: «Бу муллалар ҳам домламдек ўрдадан ҳайдалғанлармикин? Мирзамнинг фийбатига йиғилишқанлармикин?» — деган бир фикр ўтиб кетди.

Сўфи такбир тушурди, мулла Абдураҳмон меҳробка ўтди, муфти ва бошқалар унга иқтидо қилдилар. Ином қироатда, Сафар бўзчи сомиълик¹ ўрниға — «манови кетман соқолнинг афти хунук, ўттасининг авзойи бузуқ, домламнинг бўлса фурраги бола очкан... Учави ҳам аламзада бўлсами? Домламнинг кўнглини кўтаргали келғанлардир, ёки мирзам билан икки орани битиштирмакчиларми?.. Мирзамнинг битишмагани маъқул, икки оғиз гап учун ҳанузгача кек сақлаған домла...» — деб ўйлар эди. Шу йўсун васвасаланиб шом намозини қандай ўқуғанини ўзи ҳам билмади, аммо ётиб туришдан эринмади. Фотиҳадан сўнг жамоат тарқала бошлиди. Беш-олти киши, жумладан, Сафар бўзчи ҳам адаб

¹ Сомиълик — тинглаш.

сақлаб, домлалар масжиддан чиққунча қўзғалишмадилар. Улар чиқиб кеткандан сўнг сўфи шамъни ўчирди, бошқалар масжиддан тарқадилар. Сафар бўзчи саҳнга тушиб ҳужрага қаради; ҳужра даричасидан шамъ ёруқлиғи тушар, ичкаридан қўлида қуроқ дастурхон ушланган, ўн бир-ўн икки ёшлиқ бир бола чиқиб келар эди.

Сафар бўзчи жиловхонага ўтиб тўхтади. Ҳужрадан келган бола ўз ёнига еткач, болани олдинга ўткариб, унинг орқасидан кўчага чиқди. Бола кўчанинг ўнг томонига қараб кетди. Сафар аканинг ҳавлиси кўчанинг чапида эди, лекин ул ўз ҳавлиси томонга юрмай, шу бола орқасидан борди.

— Ҳой, Шукур сўфининг ўғли!

Шукур сўфининг ўғли — бола, йўл устида тўхтади. Сафар бўзчи унинг ёнига етиб олди.

— Қани юравур, сенинг отинг Маматқул-а?

— Ҳа.

— Маматқул... Сен бизнинг Асқарбойни танийсанми?

Бола ажаблангансумон сафар бўзчиға қараб олди.

— Асқар мени ўртоғим-да, шу топқача билмайсиз экан-да!

— Ҳа, ҳа... ўзинг ҳам яхши йигит кўринасан... Масжидда нима қилиб юрган эдинг?

— Имом поччамнинг ҳужраларида чай қўйиб бердим. Катта домлалар меҳмон бўб кепти.

— Ҳа, ҳа... Энди қаёққа борасан?

— Имом поччамнинг уйларидан ош об келаман-да.

— Туппа-тузук дасёр бўлиб қопсан-да. Ош олиб келганингдан кейин тағин чой қўйиб берарсан ҳали?

— Ҳа, қўйиб бераман. Домла поччалар жўнағунча хизмат қилиб турман.

— Ҳа, ҳа... Катта домлалар қачон келишди экан?

— Дадам аzonга чиққанда келишди-да, қўйиб берган чайимни шу топта ичишяпти.

Сафар бўзчи ўн қадамча сўзсиз борди.

— Ўзинг кўб яхши боласан-да, Маматқул, домла поччаларинг нима дейишяпти?

— Ҳали гапуришканлари йўқ-да.

— Маматқул-чи, шу домла поччаларнинг сўзига яхши қулоқ солиб, тифнаб оған киши бемалол жаннатка қириб кетавуради-да... Сен ҳам уларнинг сўзини тифнаб оласанми?

— Ҳа, тифнаб оламан. Дадам савоб бўлади, деяпти.

— Бали, Маматқул, жуда яхши тиғнаб ол-да... Агар сен шу домла поччаларнинг сўзини яхши тиғнаб, улар жўнағандан кейин менга бориб сўзлаб берсанг-чи, Маматқул, мен сенга ўн пул бераман-да.

Маматқул тушуналмаслик ичидаги Сафар бўзчиға қаради:

— Чин айтаяпсизми, Сафар ака?

— Ёлғони йўқ-да, Маматқул, — деди Сафар бўзчи ва бўз яхтагининг чўнтагини силкитиб жарақлатди. — Кўраяпсанми чақаларни... Агар уларнинг гапини тиғнаб менга сўзлассанг-чи, ўн пулни олавурасан-да, Маматқул.

— Тунда сизнинг олдингизга борғани қўрқаман-да.

— Нимадан қўрқасан, Маматқул? Асқар ўртоғинг кечаси ҳам қўрқмасдан юравуради.

— Мен итдан қўрқаман-да.

— Бизнинг кўчада ит йўқ-ку, тентак, қўрқсанг эта-метан бор. Агар имом поччанг энди кетавур деса-чи, Маматқул, хўб, деб ҳужрадан чиқда, ҳеч кимга билдирмай, дарчанинг тегидан гапни эшит, ҳами?

Маматқул нима учундир илжайиб қўйди ва маъқул деган каби бош ирғатди.

— Қўрқмасанг, улар жўнағандан кейин бизникига бор, мен дўконда иш тўкуб ўлтураман; ўн пулни олиб келавурасан-да, сендан нима кетди, Маматқул...

— Тузук.

Бола шу сўзни айтиб кичкина, тор кўчага бурулди. Сафар бўзчи боланинг орқасидан бир оз қараб турғандан сўнг, орқасига қайтди. Сафар бўзчи болага берган ўзининг бу ваколати билан келаси кун мирзобоши-нинг олдиға яна бир гап топиб бормоқчи эди. Унинг фикрича, эҳтимолки, кейинги домла поччалар ҳам ўрдадан ҳайдалишкан лойиқ, мирзобошига душман бўлиб чиқар эдилар. Шу ҳаёллар билан келиб, уйига кирди. Эрини кута-кута қозондағи тулласи аталаға айланган Тўхтабиби Сафар бўзчини койиб қарши олди.

41. ЧАҚАНГИЗ СИЙҚА ЭМАСМИ?

Ул аксар шом ва эрталабки намозларнигина масжидда ўқуб, қолғанларини уйида адо қиласар, пешин, аср, хуфтанларга вақт тополмас эди. Аммо бу кеч жўртта хуфтанга чиқмади. Яъни Маматқул ўн пул учун шошиб, топқан гапини кишилар орасида сўзлаб берса

Эҳтимол эди. Ошдан сўнг ишхонасига чиқди. Дастроҳ ёнидағи қора чароғни ёқиб ўришдаги узуқларни улади, аймашқан ипларни ечди, чигилларни ёзиб тароғлади, оғзи билан охор буркиб, яна таради ва энг сўнг қурутиш учун ўришни елпиди. Ўриш тўқиши ростланғандан кейин, эски тўппидаги найчага солинган ипларни (арқоқни) олиб, дастгоҳка тушти, тиф ва гулани орқага суреб моккини ростлади.

Қора чароғ аранг-аранг дастгоҳни ёритар, елкаси ташқариға туртиб, кўкраги ичка ботқан Сафар бўзчи, гўё дастгоҳка қуюлиб кўйғандек кўринар эди. Тепки босишдан фич-фич қилған нағма эшишилар ва бу нағма оҳангига ўйнағучи мокки у ёқ-бу ёққа ўтиб турар, лаҳза сайнин арқоқ-ўриш бирлашиб, тўрт еллик бўз ҳосил қиласи эди. Сафар бўзчининг бир кечлик ишига бир оҳор мўлжал бўлиб, қора чароғнинг мойи ҳам соат вазифасини ўтар, яъни қора чароққа тўлдирилған мой ҳар кун бир оҳорға етиб битар эди.

Сафар бўзчи новорт ёғочини ўраб, оҳорлиқ тандага — ўришка мўралади ва нос отиб, кўча томонга қулоқ солди. Чунки ул ҳануз Маматқулнинг келишидан умидвор эди. Бир оз қулоқ солиб турғандан кейин, моккига янги найча жойлаб, яна ишқа уринди. Ичкарида чарх тоблаб найча солиши билан машғул Тўхтабиби кўйлак енгини иплик ўришчалар билан тўлдириб чиқди. Гапсўзсиз, ўришчаларни эски тўппига ағдариб, бўшалған найчаларни йиғиб олди.

— Оёғим совуқ қотти, оловнинг иложини қил-чи.

— Ўт ёқиб берайми?

— Ҳа, бали, уч-тўртта тарашани кертиб кирсанг бўлади.

Тўхтабиби чиқиб кетди. Сафар ака асабийланғандек тез-тез тепки босиб ишқа қаради. Мокки тўхтовсиз икки ёққа сапчиб турди. Ўн дақиқа чамаси шу ҳолда иш қизғин давом эткандан кейин, бирдан мокки тўхтади, Сафар бўзчи ташқариға қулоқ солиб қолди. Кўча эшик «фийқ» этиб очилиб, йўлақдан кичкина оёқ товши келди. Сафар бўзчи моккиси кўлида ўзича илжайди, яна бир-икки оёқ босқандан кейин, дўконхона эшиги очилди.

— Бали, Маматқулим, бали... Эшикни ёп, эшикни!

Маматқул эшикни ёпди ва икки қўлини оғзига кўтариб исинди.

— Совуқ қотдингми, Маматқул? Ҳозир олов ёқамиз,

ҳозир... Боядан бери Маматқул келади, деб ўн пулни сақлаб ўлтурибпан-да.

Шу пайтда эшик қияғина очилиб, яна ёпилди.

— Кираур, Тұхта, киравур: ўзингнинг Маматқуллинг-ку.

Тараша күтариб Тұхтабиби кирди ва Маматқулға қаради.

— Маматқулмидинг, — деди Тұхтабиби. — Бемаҳалда нима қилиб юрибсан, болам? Энанг эсон-соғ юриптими?

Маматқул Тұхтабибининг сўзига бош ирғатиб, Сафар бўзчиға қаради...

— Маматқулнинг менда иши бор, холаси. Оловни тезроқ ёқ, Маматқул совуқ қотипти...

Тұхтабиби ўтунни гулхан ўрниға ташлаб, қўлидағи қовғасини қора чароққа тутиб ёндириди ва бориб ўтуни ёқди.

— Уларни жўнатиб келдингми, ўғлим Маматқул?.. Бали, бали. Ёнларингға яна бошқа киши ҳам келдими?

— Йўқ.

— Ха, ҳа... Имом поччант сенга кетавур демаптида?

— Мен тағин икки қайта чай қўйиб бердим-ку: мен кетсам уларга ким чай қўйиб берарди. Мен чайни қўйиб, гапни тифнаб ўлтурдим.

— Бали, бали, — деди Сафар қулиб ва хотиниға қараб қўйди. — Йигит деганинг ана шундай бўлсинда, бизнинг Асқарбойлар ҳам «Йигит»да. Қани, Маматқул, гулханнинг ёниға борайлиқ-чи, исиниб гапиришамиз-да.

Иккиси гуриллаб ёнған олов ёниға чўнқайдилар. Сафар ака оёғини кафшидан чиқариб оловға тутди.

— Асқарбой ухлаб қофанми, дейман, хола?

— Ухлаб қофан, — деди Тұхтабиби ва бориб дастгоҳ ёнидағи бўшаған найчаларни йиғиб олди. — Шуларни тўлдириб берсам, бу кечага етар?

— Тўлдиравур-чи, кўрамиз-да.

Тұхтабиби дўконхонадан чиқди. Сафар бўзчи Маматқулға қараб илжайди. Маматқул ҳам ўз навбатида илжайиб, Сафар бўзчининг чақалиқ чўнтагига кўз ташлади ва нима учундир энтикиб қўйди.

— Хўш, Маматқул охун?

Маматқул ўйлаб иккиланди:

— Китоб... китоб сўзини айтишмади-да, ҳа... Катта домлам курғандаги¹ ижжани² ўқуған эди, мен...

Сафар бўзчи боланинг андишасига тушуниб кулди:

— Сен уқуб ололмадингми, аттанг. Майли, уқуб олғанингни айта бер.

Маматқул енгилланиш нафаси ютди, кўзини бе-ихтиёр Сафар бўзчининг чўнтағига тикди.

— Китоб сўзи бўлмаса ҳам чақани беравурасизми, Сафар aka?

Сафар бўзчи кулгидан ўзини тўхтата олмади, чўнтағидан чақаларни чиқариб қўлиға олди:

— Беравураман-да. Кўраяпсанми?.. Шундан ўнови сеники.

— И мом поччам, — деди Маматқул кўзини чақадан ололмагани ҳолда, — имом поччам ўзи ўрдаға мирзабоши бўған экан-да... Ўша хат битадуған жайда мулла эмас бир киши катта бўб қоған экан... Ўша мулла эмас хоми киши имом поччамни хат битишкага тозаси экан, деб мирзахонадан чиқарған экан-да... Али мирзо деган киши имом поччамни унга ёмонлапти...

Сафар бўзчи Маматқулнинг сўзини бўлди:

— Кимга ёмонлапти?

— Ўша мулла эмас хоми кишига ёмонлапти-да...

Шуннан кейин имом поччамни чиқарипти. Энди катта домламларни ҳам ўрдадан чиқарсам, деб юрган экан. Ўзи жуда ёмон киши экан-да... Катта домламлар буни нима қиласиз энди, деб имом поччамнинг олдига келишипти экан-да, — деди Маматқул ва бир неча фурсат Сафар бўзчининг қўлидағи чақага қараб турди.

— Чақангиз сийқа эмасми, Сафар aka? — деб сўради.

Сафар aka кулди, чақадан бештасини ажратиб Маматқулга узатти.

— Мана, ўзинг кўр-чи.

Маматқул чақани олиб, уёқ-буёғини текширди:

— Мухри бутун экан. Бир пулга ўн пайса ҳолва берармикин, Сафар aka?

— Нега бермасин. Чақани чўнтағингга солиб қўй, қолғанини сўзлаб бўғанингдан кейин оласан. Катта домлалар кенгашка келган эканлар, дегин?

— Ҳа... Чақамни белбоғимга тугсам тушиб қолмасмикин?

¹ Курған — куръон.

² Ижжаса — ҳижока.

— Ҳозир тугма, мендан яна беш пулни олғанингдан кейин, қўшиб тугарсан.

Маматқул қўлидағи пулни жарақлатиб ўйнади ва шунинг орқасидан ижирғаниб шикоятланди:

— Оёғим ивишиб қоған.

— Чўнқайиб ўлтурма.

Маматқул ўлтуриб олғандан кейин, яна ижирғанди:

— Игна санчяпти?

— Қулоқ солма, сўзлай бер, ҳозир ўзи тузалиб қолади.

— А, шундайми, — деди Маматқул маҳсисини силаб. — Сизники ҳам ашундақа бўладими, Сафар ака?.. Катта домлам соқолини тутамлаб, ўшани янди, тузоқча тушар, деди. Имом поччам ўйлаб ўлтурди, ундан кейин... Санчяпти-ку, Сафар ака?

— Ҳозир тузаласан, хўш?

— Ундан кейин... Сизларга маъқул бўлса, бир гап хотиримга келади, деди. Ўша кўклам чиқса уйланади, деди...

Сафар бўзчи Маматқулни тўхтатиб сўради:

— Ўша ким, ўша?

— Ўша-да, мулла эмас, синглиталоқ-да... Ўзингиз ҳам сурай берайди экансиз-да!.. Оладуған хотини чиройлик, деб эшитаман, деди. Бу ҳам бир гап-да, шу қизни хонға тўғриласақ бўладимикан, деди. Катта домлалар маъқул дейишиди. Ҳай-ҳай дейишиди... Шу ерда Маматқул бир оз ўйлаб қолди, — бунинг давоси гулчин бўлади, дейишиди.

Сафар бўзчи кейинги сўзни такрорлади:

— Гулчин бўлади, дейишиди?

Маматқулнинг ўзи ҳам бу тўғрида иккилангандек бўлди.

— Мен яхши пайқамадим-да: давоси гулчин бўлади, дейишиди... гул-чай... йўқ.

— Ундан кейин?

— Шу, бўлди.

— Бари?

— Бари шу... Мен ташқариға чай қўйғани чиққанимда гап тифнамадим-да.

— Маъқул, маъқул, — деди Сафар бўзчи, — ундан кейин улар кетдиларми?

— Кетдилар. Имом поччам энди уйингга бор, деди менга... Чақани берсангиз қўшиб тугар эдим.

Сафар бўзчи кулиб, кўлидағи чақадан яна беш пулни узатди.

— Мендан ўн пул олғанингни ҳар кимга сўзлаб юрма, тузукми? Ҳа, ундан кейин бу гапни ҳеч кимга айтма, домлаларингнинг сўзи савобсиз гаплар экан... Уйингга ёлғиз кеткали қўрқмайсанми?

Маматқул бир оз ўйланиб, белидаги чақа тугунини кўли билан ушлади, Сафар аканинг «қўрқмайсанми» саволига жавоб бермай, бориб эшикни очди ва юрганча чиқиб кетди.

42. ҚУВ ОДАМ ЭКАН

Сафар бўзчи дарбозадан кирганда, ичкаридан ясамол бир хотин чиқиб қолди. Мундай яхши кийинган ва хусндор хотинни ул ўз умрида биринчи мартаба кўргани учун бўлса керак, хотин яшириниб олғунча, ундан кўзини олмай қаради. Таажжуб ва ҳайрат ичидагелиб меҳмонхонаға кирди, Меҳмонхонада Анвар йўқ. Анвар ўрнида бегона бир киши — Султонали мирзо ўлтураг эди. Сафар бўзчи салом берди. Султонали мирзо жавоб бериб, ўлтурган жойидан Сафар бўзчиға жой кўрсатди. Сафар бўзчи бир оз сўзсиз ўлтурғандан кейин, «мирзасини» сўради. Султонали мирзо, Анварнинг қўшиналардан бириникига зарур бир юмиш билан чиқиб кетканлигини ва бир оздан сўнг келишини сўзлаб, ундан мирзода қандай юмиши борлигини савол қилди.

— Юмиш-ку, йўқ, тақсир, — деди Сафар. — Биз бир холис дуогўй одам... Мирзамни бир зиёрат қиласай, деб келган эдим.

Султонали Сафар бўзчини бир нарсанинг тамаъида юрған киши, деб ўйлади. Чунки Анварнинг кўли очиқлиғини, унга кўб ҳожатмандларнинг ўрганиб қолғаниqliқларини яхши билар эди. Аммо Сафар бўзчи Султоналининг силлиқ муомаласидан хурсанд бўлиб, унга қарши ўзида дўстлиқ сезди. Бир оз жим ўлтурғандан кейин Сафар яна тилга келди:

— Барака топсин мирзам одамжон-да, одамжон; биздек фақирлар билан ҳам оғайни, сизлар билан ҳам шундай, барча баробар.

Бу сўз Султонали мирзонинг бояғи фикрига қарши сўзлангандек тушди. Сафар бўзчининг мирзо билан оғайнилиқ даъвоси уни таажжубга солди.

— Шундай, шундай... Мирзо, сиз айтканча, барча-

га баробар йитит, — деди Султонали. — Нима касб қиласиз?

— Бўзчилик, тақсир. Лекин мирзам, сен бўзчисан, деб биздан ҳазар қилмайди, биз шунисига адо-да, тақсир... Бўлмаса гузаримизнинг оқсоқоли ҳам икки оғиз гапимизга қулоқ солсин-чи. Ҳафсамбир гап яхши-да, тақсир.

Сафар бўзчининг «ҳафсамбир» гапи Султоналини беихтиёр кулдири.

— Тўғри айтасиз. Исмингиз нима?

— Биз деворнинг кавагида ётқан бир одам-да. Ўзимиз киму, исмимиз нима бўлар эди. Шаҳарнинг Олим қовоғи¹ эмасмизки, айткан он таниб олсангиз.

Султонали мирзо яна кулди, — «ҳафсила́м» гаплардан завқланиб, ул ҳам Сафар бўзчиға қарши ўзида яқинлик ҳис этди ва бир оз ўйлаб турди.

— Исмингизни айтсангиз, балки мен танир эдим... Сиз бўзчи бўлсангиз, ўткан ҳафта мирзо Анварга бир сўз айткан эмасмисиз?

— Айткан бўлсам эҳтимол; нега десантгиз, қўл бўшаганда мирзамнинг зиёратига келиб тураман-да.

— Сиз... Сиз мулла Абдураҳмоннинг қавмларидан эмасмисиз?

— Хе-хе-хе... Худда, тақсир.

— Агар янглишмасам, исмингиз Сафарбой чиқар? — Сафар бўзчи завқланиб, кайфланиб кулиб юборди:

— Мирзам айткан эканлар-да.

Султонали мирзо ҳам кулди ва кулги ораси латифа қилди:

— Сиз ўзингизни паст уриб Олим қовоқ эмасманки, отимни айткан он танисанг дейсиз, ҳолбуки, сизни ўрданинг миrzобошиси, шаҳарнинг қўрбоши, даҳбошиси ҳам танийдир.

— Тавба қиппан, тавба қиппан, — деди Сафар. — Мен ўз қадримни билмай юрган эканман-да.

Иккиси ҳангама сўқиб бир неча пайт кулишдилар ва бир онда эски қадрдоңлар ҳолига ўтишдилар. Султонали уни «Сафар ака» деб хитоб қила бошлади ва мулла Абдураҳмоннинг кейинги аҳволидан сўради. Сафар бўзчи мулла Абдураҳмоннинг бўшатилғанидан

¹ Худоёрға чет мамлакатлардан мол келтириб сотғучи машҳур савдогар (муал.).

хурсандлигини изҳор қилди ва унинг лаби гезарид юрғанини сўзлаб, Султоналини кулдирди.

— Шунчалик ҳолинг бор экан, думингга қумғон боғлашинг нима ҳожат эди, деб куламан. Эгри тўнкага — эгри тўқмоқ; миразм хўб яхши қилғанлар-да.

— Шундай, — деб қулди Султонали, — кишиларга энди нима дер экан, балки қулоғингизға чалинғандир?

Сафар бўзчи ўнг қовоғи устини силаб олди ва қўлининг текис ўсмаган тирноқлариға қаради.

— Бу тўғридағи сўзини эшитканим йўқ-ку... Энди ўзи ёмон одам-да.

— Масалан, ёмонлиғи?

— Ёмонлиғи... — деб яна тирноғига қараб қолди, — ишқилиб, тақсир, шу одамни пайини қирқсам, дейдиди. Йлгари холисанлилло душман бўлса, энди аламзада бўлди-да...

Сафар бўзчининг содда кўнглида яширинған сироз-оз сиртига ҳам тепиб турар эди. Унинг «...энди аламзада бўлди-да» жумласидан шубҳаланиб қолған Султонали жиддий тус олди:

— Мен мирзо Анвар билан бирга тураман, Сафар ака, — деди. — Мирзо билан бизнинг орамизда ҳеч бир яширин гап бўлмайди. Масалан, сизни тусмол билан танишим, мулла Абдураҳмон тўғрисида келиб айткан сўзингизни билишим...

— Мен буни билиб туриппан, тақсир.

— Билиб турған бўлсангиз, — деди Султонали ўпкалик қиёфатда, — нега мендан шубҳаланасиз?

— Йўқ, йўқ, ука, мен худой ҳаққи...

— Бўлмаса, нега мулла Абдураҳмон тўғрисидаги саволимга тузук жавоб бермайсиз?

— Мен айтдим-ку, ёмон одам-да, ўзи...

— Унинг ёмон одамлигини ўзим ҳам биламан. Аммо мени ҳам ёмон одам деб ўйлағанингиз учун... Хўб, ҳали мирзо Анвар келганда ўша мендан яшириб турған гапингизни сўзларсиз, мен шунда сизни уялтираман...

Сафар бўзчи бирдан кулиб юборди ва қўли билан Султоналини яниб қўйди:

— Уят қилсангиз ҳам «нафсамбир»ини айтай, анча кув одам экансиз.

Бу содда баҳо Султоналини кулдирди:

— Сиз мендан ҳам қувроқ экансиз.

— Мен топқан гапимни мирзамни ўзига айтай, деган эдим-да.

— Албатта айтасиз, лекин мен ҳам эшитсам, зарар қилмайди. Хўш: «аламзада» нима қилмоқчи?

— Аламзадами? — деб кулди Сафар ва бир оз ўйлаб турди. — Ўрдала туралиған бўлсангиз, анови катта гўзим муфтиларингиз бор-ку?

— Бор, бор: пул берсангиз ҳаром ўлган эшакнинг ҳалоллиғига фатво берадирган муфтилар. Хўш?

— Гапларингиз ҳам қизиқ экан... Ана шу муфтиларингиздан иккитаси ўткан кун домламизнинг ҳужрасига меҳмон бўлишди...

Сафар бўзчи ўткан фаслда ёзилған можарони бир-бир сўзлаб борди. Эшиткучи бўзчининг соддагина қилиб сир олишини кулиб завқланиб тинглаб турди.

— Боланинг сўзи кўб тутал келди, тақсир. Чамаси мирзам бир қизға уйланмакчи экан-да. Қизи қурғур чиройлик бўлса, қўйинг-чи, шу қизни хонға олдирмоқчи бўлғанлар-да. Кишига алам қилғандан кейин ҳар бир куракни бемалол...

Султонали мирзо бу сўзни эшитиш билан бирдан ўзгариб кетди, кўзи катта очилиб, манглайида узун-узун ажинлар ҳосил бўлди:

— Тутилмаган гап... Хўш, сўзлай беринг-чи?

— Боланинг хуллас гапи шу, — деди Сафар ва бир оз жим қараб турди. — Ҳа, ҳа, яна бир нарса ҳам бор экан: улар шуни мувофиқ кўрганларидан кейин — «бунинг даъвоси гулчин» деб айткан эмишлар. Мен боланинг бу сўзига ҳарчанд тушуналмадим. Бола янгишканми ёки муллаларнинг шундай тожикиси ҳам бўладими, мен энди авом одамман-да, тақсир.

Султонали мирзо шу жумла устида ўйладими ёки бошқача бир андиша уни машғул этдими, баҳарҳол, бирар дақиқа чамаси сўzsиз хаёл суреб қолди. Сафар бўзчи эса, бу ҳолдан бад олиб, манглайнини қашиди. Қашир экан, бармоқ ораси Султонали мирзонинг юзидан бир нарса ўқушқа тиришар эди.

— Улар қайси кун шу маслаҳатни қилған эдилар? — деб сўради Султонали мирзо.

— Ўткан кун, тақсир.

— Яъни орада кеча панжшанба ўткан?

— Бали, бали.

Султонали бошини чайқаб тебранди. Сўнгра мирзо Анварнинг кўкламга чиқиб уйланмакчи бўлғанини, қиз

эса, шу уйнинг боласи эканини, домлалар мирзо Анварнинг обрўсини тўкиш фикрига тушканликлари ни сўзлаб чиқди:

— Раҳмат сизга, Сафар ака, — деди Султонали. — Сиз мирзо Анварнинг обрўсиға тўқунмоқчи бўлған бир ёмонлиқнинг хабарини олдиндан олиб келгансизким, мирзо Анварнинг бир дўсти бўлишим сифати билан сизга миннатдорчилик изҳор қиласман ва шунинг билан бирга бу хабарни мирзога билдириласлигингизни, ҳозирча бу сирнинг иккимизнинг орамиздағина қолишини сиздан сўрайман. Негаки, мирзо Анварни бу хабар билан ташвишкага солған бўламиз. Мирзога бу хабарни айтишдан илгари ошиғич равишда сиз билган ифлослар қаршисиға чиқиб ишлашимиз, мирзонинг обрўсиға тўқунадирған ёмонлиқни дафъ қилишимиз ва шундан кейингина бўлиб ўткан бу можарони унга сўзлашимиз керакка ўхшайди. Мен ҳозир мирзо Анвар қайтиб келмасданоқ, шу гап орқасидан бир жойға бораман... Борадирған жойимни сизга айтиб ҳам қўяй: «Давоси гулчин» жумласидаги «гулчин» сўзини бола янгиш онглаған, улар — «давоси Гулшан» деганлар. Зероки «Гулшан» сўзи бир хотиннинг исми бўлиб, бу хотин хонға чиройлик қизлар топиб бергучи ҳарам далласидир¹. Улар ўзларининг ифлос ниятларига шу отин орқалиқ етмакчи, шу воситада мирзо Анвардан ўч олмоқчи бўлғанлар. Фурсатни қочирмай шу хотиннинг олдиға боришим керак. Гапка тушунгандай чиқарсиз, Сафар ака.

— Тушундим, садағанг кетай, тақсир.

— Гап шундай бўлсин; иш бартараф бўлгунча бу тўғрида мирзога оғиз оча қўрманг, жон ака, — деди такрор Султонали ва ўрнидан турди. — Мен мирзо Анвар келмасдан жўнай, келса юбормайдир. Сиздан мени сўраса, бир киши чақириб кетди, дерсиз, дурустми?

— Хўб, мен ҳам сиз билан кетаберсам?

— Йўқ, сиз ўлтуринг, меним дарагимни айтиб уни хотиржамъ қилинг. Ундан кейин келаси жумъа, албатта шу ерга келиб мендан натижани эшитарсиз, мирзо билан учавимиз ўлтуришиб сухбатлашармиз, маъкулми?

— Хўб.

Султонали хайрлашиб, ошиғич меҳмонхонадан чиқди.

¹ Далла — қўшмачи.

43. ЧУЛОК ҚУШ

Айвонда салла ўраб овора бўлған маҳдум йўлакдан «заифа» шапрасини олиб, танчада санама тикиб ўлтургучи Раънога:

— Йўлакда хотин киши кўринади, хабар ол-чи, болам, — деди. Раъно йўлакда ярмисини кўрсатиб ёндама турған хотиннинг олдига борди.

— Ассалому алайкум...

Хотин саломга жавоб бериб, йўлак томонга ўтди ва Раънони ўз олдига имлади. Ясамол, пўстун кийган бу хотин Раънонинг диққатини ўзига жалб этди. Бориб кўришиди.

— Насибекнинг ҳавлилари шу эмасми, отин қиз?

— Йўқ, — деб кулди Раъно, — биз Насибекнинг қўшнисимиз.

Хотин бошдан-оёқ Раънога қараб чиқди:

— Шўрим қурсин, — деб қўл силкиди хотин, — мен адашиб сизларни овора қилибман... Кези келганда танишиб қўйғанни айби йўқ, бу кимнинг ҳавлиси?

— Солиҳ маҳдумнинг.

— Мен адашмай кетай, жуда уят бўлибти-да, ҳали мен маҳдум поччамнинг ҳавлиларига кирдимми... Сиз кимлари?

— Мен... қизлари.

— Кўб яшанг, исмингиз?

— Раъно... Қани, бу ёқقا.

— Раҳмат, Раънохон... Насибекнинг уйи сизнинг қайси тарафингиздаги эшик бўлади?

— Сўлимиздаги биринчи дарбоза.

— Раҳмат, Раънохон.

Хотин хайрлашиш ўрниға, яна бир оз Раънога қараб турди. Раъно бу ҳолдан ўнгтайсизланиб, ерга қаради. Хотин кулимсив олғандан кейин, Раъно билан хўшлишиб орқасига қайтди, ташқарига чиқиб, Сафар бўэчига учрашиди...

Раъно хотинни жўнатиб, ичкарига кирганда, маҳдум «зарурат» тўнини кийиб, ўзига оро берган ҳолда, айвондан тушиб келар эди. Хотиннинг ким эканини сўрагандан кейин, Раънога бу кунги рўзгор ишлари тўғрисида баъзи таълимотларни берди. Чунки Нигор ойим бу кун эрталаб қариндошларни кига мөхмон бўлиб кеткан, Раъно уйда ёлғиз қолған эди.

— Онанг кеч қайтади, бинобарин, таомни барвақт-

роқ қылсанг ҳам бўлади... Ҳабба, таомни ўзинг билан Анвар акангга лойиқ қил, мен бўлсам тўйдан албатта тўйиб келаман, онанг ҳам оч келмас, — деди ва бир неча қадам юриб, яна тўхтади. — Анвар акангдан, нима таом қиласай, деб сўрасанг яхши бўлади, қизим!

Раъно отасига маъқул ишоратини бериб айвонга келди, махдум чиқиб кетди. Раъно айвонда бир неча вақт санама тикиб ўлтурғандан кейин, ишини йиғиштириди, рафдаги китоблардан бирини олиб очди. Китоб устида ҳам анча шуғулланиб, бундан ҳам зерикди. Сўнгра ўрнидан туриб, ташқариға йўл солди. Боқча эшиги ёнига келганда, Анвар ташқарида ким биландир хайрлашар эди. Раъно эшик ёнида кутиб турди. Бир оздан кейин Анвар ёлғиз қолиб, шу томонга — ичкарига қараб кела бошлиғандек бўлди. Раъно кулимсиб ўзини эшик панаисига олди.

— Ассалом.

Бир-икки қадам олдинга ўткан Анвар мулойимфина эшитилган «ассалом» сўзи билан чўчиб, ёнига қаради ва жуда ҳам қўрқсан киши бўлиб атрофига туфлай бошлади.

— Жоним чиқиб кетди... Бу нима қилғанинг, ҳой қиз!

— Буми, бу сизни чўчитканим.

— Хўш, нима қилиб юрибсан?

— Сизга ош қилиб берайми, деб сўрагали чиқсан эдим.

— Отамдан сўра.

Раъно отасининг тўйға кетканини ва сўзини айтди. Анвар кулимсиди.

— Уч қават ҳавлида иккимиз ёлғиз қолсақ қандай баҳт бу?.. Бўлмаса мен дарбозани занжирлаб келай.

— Ҳа... занжирлаб келинг...

— Нега аччиғланасан, яхши қиз, мен ичкари кирсам, меҳмонхонанинг ёлғиз қолишини ўйламайсанми?

Раъно истиғноланди.

— Мен сизни ичкарига таклиф қилғали чиқмадим, нима ош қилишни сўрагали чиқдим.

— Мақсадингга тушуниб турибман, аммо сен ёлғиз зерикмагил деяпман.

— Мен зерикмайман... Қандай ош қиласай?

— Қайси хилини буюрсам экан? — деб ўз-ўзига савол берди. Анвар. — Убрата уқувинг йўқ, паловни ланж қиласан, сомсани ёполмайсан, туппани кесал-

майсан, сенга қайла буюргандан, атала қыл деган яхши, чунки эзилтириб юборасан, манти түғрисида үйлаш ҳам ортиқча... Яна шу ҳолда қандай ош қиласай, деб дүк урганинг қизиқ.

— Мен укувсиз бўлсам, ўзингиз ош қилинг.

— Мен ҳам ош қилишни яхши билмайман, шунинг билан бирга дўк ҳам урмайман, — деди Анвар.— Лекин икки ёрти-бир бутун бўлсақ эҳтимол яхши ош қиласмиш... Сен бориб ўчоқ ҳаракатини қўрабер, сабзи-пиёз тўғрашни менга кўй, хўбми, яхши қиз?

Раъно жавоб бермади, ўпка намойиши остида ичкарига жўнади. Анвар кулги ораси ташқарига чиқди...

Раъно ўчоққа оловни ёқиб қозонни ювар, Анвар ўчоқбошининг суфасига энгашкан кўйи сабзи тўғрап эди. Раъно ҳануз ўпка сақлаб, Анварнинг саволларига жавоб бермас, унинг қизиқлиқ сўзларига ҳам тескари қараб кулар, кулгисини унга кўрсатмас эди.

— Хотин кишининг чархи билан ўчогига тегма, деган гап тўғри эмиш... Албатта, сен хотин киши эмассан-ку, бироқ, «куллу шайъин яржиъу ила аслиҳи».¹ Сабзини майда тўғрайми, йирик? Бир бор эмиш, бир йўқ эмиш, ўткан замонда бир қиз бор эмиш: кўзига тутун кириб юм-юм йиглаған эмиш. Сабабини сўрасалар, ўтун ҳўл эмиш, аммо қизнинг аччиғи хийли мўл эмиш... Тескари қараб кулма, ҳой қиз! Ўҳ, латта келтир, кўлимни кестим!

Раъно ялт этиб Анварнинг қўлиға қаради ва алданғанини билиб яна ўз ишида давом этди.

— Қўлингни кессанг ҳам бу қиз ишонмайди. Сочинг куяди, яхши қиз.

Раъно сочини орқасиға ташлаб, ўчоқбоши суфасига чиқди; қозонға ёғ солиб, Анварнинг олдиға гўшт билан пиёз келтириб қўйли. Анвар гўштни тўғраб, яна тегажаклик бошлади:

— Тўйинглар қачон, ҳой қиз... Жавоб берсанг-чи, ахир, агар насрни писанд қиласант, назм билан ҳам сўрай:

*Нагма унлари,
Баҳор кунлари,
Ишрат тунлари,
Этарми, Раъно?*

¹ Куллу шайъин яржиъу ила аслиҳи — ҳар бир нарса ўз аслига қайтади.

Раъно секин илжайиб, Анварга ён қаради, сўнгра кўзини ўчоқ ёнидағи бир нуқтаға олиб, ҳаракатсиз қолди.

— Насрга жавоб бералмаган, назмга... Ўзим ҳам қизиқман-да, — деди Анвар.

Раъно бир неча вақт бояғича ҳаракатсиз, Анварнинг пичинггига илтифотсиз турди, сўнгра Анвар томонга бироз майл этиб илжайди:

*Кеча-кундузлар,
Қизарди юзлар,
Уятли сўзлар
Битарми, мирзо? —*

деди ва орадан озғина фурсат кечириб яна:

*Ўчоқ бошидан,
Дўсти қошидан, —
Қараб Рошидан¹
Кетарми, мирзо? —*

деди ва шунинг орқасиданоқ:

*Манглайин қашиб,
Мендан ҳам ошиб,
Жавобим шошиб
Этарми, мирзо?!*

Анвар уст-устига тушкан қатор бу ҳужумлар остида шошиб қолди, байтларнинг қайси бирисига жавоб беришни билмай кулди.

— Лўли экан бу қиз! — деди.

Раъно ўчоқ ёнига чўнқайиб олов жўнашдирап экан, ер остидан Анварга қараб илжайди:

— Жавоб.

Анвар кулимсиган ҳолда ўйлаб қолди.

*Нозмидир, ҳаё?
Билмадим, аё,
Гўзал, дилбаро.*

Анвар охирги мисраъни айталмай тутилиқди, чунки қофия топиш қийин эди. «Кетар, етар» вазнлик сўзлар қофия учун камбағал бўлиб, ўхашлари тўртбештадан ошмас ва шулар ҳам Раъно томонидан олиниб биткан эдилар. Анвар ҳар қанча уриниб, кейинги

¹ Кўқон туманида бир қишлоқ исми (*муал.*).

мисраъга қофия тополмағандан сўнг, Раънога қўшилишиб кулишди.

— Күшингизнинг боши билан икки қаноти бор, лекин оёғи йўқ.

— Куш учун бош билан икки қанот кифоя, Раъно...
Куш учиб юрса, бас!

— Чўлоқ куш кўкда учиб чарчагандан кейин дарахтка қўнолмайди, аммо ерга тушса мушук еб қўяди,— деди Раъно ва кулиб қотиб қолди.

Кучлик култидан Раънонинг кўзи ёшланиб, ўсиқ кипраги жуфталаанди, кулги ва ўтоқ ҳарорати билан икки юзи қизил олмага айланниб, латиф бурни устида марварид резалари ҳосил бўлди.

Анвар ўзининг мағлубиятидан хафа эмас, Раънонинг хуснидаги ҳозирги ажаб ўзгариш муваффақиятидан ўзини тутолмай кулгучи шоиранинг намойишкор курсандлиги Анвар учун бир юз мағлубиятка арзирлик эди.

44. ҚОП ЙЎҚОТДИНГИЗМИ?

Султонали мирзо «Күшбеги» маҳалласига келиб, бир дарбозага кирди. Қоронғи йўлакдан юриб бориб, ички эшикни тақирилатди. Ичкаридан «Ҳозир!» деган товуш эшитилгандан кейин бир неча қадам орқага қайтиб келди. Бир оздан сўнг ичкаридан беқасам чопонини елкасига хом ташлаған, маҳсисиз оёғига сафи кафш кийиб кўйлакчан баданини чопони билан ўраган қирқ ёшлар чамалиқ бир йигит чиқди ва Султонали мирзога салом бергандан сўнг, шошиб чопонининг енгини кийди, келиб кўришди.

— Марҳамат, тақсир.

Бу киши молтопар хотинни олиб, суяги тинчиб қолған Холбой — Гулшаннинг эри эди. Уйида эрта-кеч бекор ётиб, Гулшаннинг топиб келганига қаноат қиласар, фақат ош пишириб ҳавли супурар эди. Бошқа оиласарда хотинлар уй иши билан бўлиб, эркаклар кўча ишини қилсалар, Холбой аканинг оиласи тамоман шунинг зиддига қурилған эди. Султонали мирзо Гулшаннинг ўрдаға кетганланлигини эшитиб, силласи қуруди, бир неча вақт фикрга толиб қолди.

— Ўрдаға кетканлигини аниқ биласизми?

— Бундан чиқиб бир жойга бормоқчи эди, — деди Холбой, — агар иши битса — тўғри ўрдаға кетмакчи,

битмаса уйга қайтиб келмакчи эди. Шу чоққача қайтиб келмагани учун, ўрдаға бордими, деб ўйлаб туриппан.

— Сиз ўша борадирған жойини биларсиз?

— Пайқолмадим, тақсир.

Султонали мирзо тинкаси қуруғандек орқасиға тис-ланиб, йўлакнинг токчасиға ўлтурди ва манглайнини қашиди:

— Кече янгамни ҳеч ким йўқлаб келдими?

Холбой бир оз ўйланиб соқоли остини чимчилади.

— Йўқлаб келган экан, мен уйда йўқ эдим.

Султоналиниң тузи ўзгариб, бошини қимирлатиб қўйди, шипка, кўчага қаранди.

— Агар янгам келса, мени айтарсиз, мен яна қайтиб келаман... Уйдан силжимай, мени кутсин, катта бир иш бор, дурустми?

Султонали мирзо Холбойдан ваъда олиб кўчага чиқди, илдам-илдам оёғ қўйиб, келган томонига йўл солди. Қинғир-қийшиқ кўчалар бўйлаб борар, кўчада кўринган ҳар бир хотинни текшириб оёғ босишиға қараб ўтказар эди. Бозорчаға этканда теваракдан жумъя азони эшитилди. Кўчада дуркум-дуркум салла ўраган ҳалқ масжидларга қараб оқар, ул эрса жумъани унтиб аллақаёққа чопар эди. Солиҳ маҳдум кўчасини босиб тўғриға ўтди, ўн қадамча юриб тўхтади. Бир оз тараддулланиб турғандан сўнг, орқасиға қайтиб, Солиҳ маҳдум кўчасига кирди. Дарбоза қия очилиб турар, ташқари кишидан холи, меҳмонхона қулфланған эди. Султонали мирзо боқча эшигига тўхтаб, тирқишдан мўралади. Хотин киши йўқлиғига қаноатланғандан кейин, боқчаға қадам бости ва секин-секин юриб ичкари ҳавлининг эшигига тўхтади.

— Мирзо Анвар, ҳов, мирзо Анвар!

Чақириш уч-тўрт такрорланғандан кейин, йўлакдан гурс-гурс оёқ товуши келди. Султонали мирзо ўзини эшикнинг ёниға олиб, яна чақириди. Ичкаридан: «Йўқлар!» деган жавоб бўлди.

— Қаёқдалар?

— Жумъага кетдилар.

Султонали роҳат нафас олғандек кўриниб, кўзини эшик остонасиға тикди:

— Сиздан сўраб кетсам ҳам бўлар, синглим... Шу ерга бир хотин келдими?

— Йўқ... Ҳа, боя бир хотин адашиб кирган эди, — деган жавоб бўлди.

Султоалининг кўзи олаланиб, пешонасида қатор ажинглар зоҳир бўлди.

— Адашиб кирди?

— Ҳа.

— Адашиб кирганига қанча бўлди?

— Боя, эрталаб.

Султоали бошини чайқади. Раънога раҳмат айткандан кейин, ташқариға қараб юрди. Кўчага чиқиб яна бояғича оёғини қўлиға олғандек, югуриб кетди. Ўрдағача бир ярим чақирим чамаси йўл бўлиб, ул бу масофани ўн беш дақиқа ичидаги бости. Ҳавонинг совук бўлишига қарамай, манглайидан тер қўйған ҳолда ўрданинг биринчи дарбозасига келиб этди. Дарбозабонлар ёнида тўхтаб сўзлашди, манглай терини артиб, дарбоза суфачасига ўлтурди.

— Қоп йўқотдингизми, тақсир, — деб кулди дарбозабонлардан бири.

— Ўҳшаш... Жаноб жумъага чиқдиларми?

— Чиқмадилар.

Султоали мирзо дамини ростлаған каби бир оз сўзсиз ўлтурди.

— Ҳарамга бирар хотин кирдими?

— Битта кирмади, — деб кулди дарбозабонларнинг бири. — Беш-ўни кирди чамаси...

Султоали унинг ҳангамасига кучланиб кулди, аммо яна оғиз очишига мажолсиз каби ўлтуриб қолди. Чунки, энди мундан нарига югурга олмас, қўли шундан ортиқчага етмас эди. Кўзини ерга тикиб, икки соатдан бери қилған ҳаракатларининг шамолға кетканини хотирлади. Абдураҳмон ва шериклари ўзларининг ифлос мақсадларига етмасалар, деб энтиқди, айниқса мирзо Анварнинг душманлари олдида обрўси тўкулиши унга оғир туюлди. Бу оғирлиқнинг устига Абдураҳмон тўғрисида қилған ўзининг худраълигини¹ хотирлағач, яна ҳам кўнгли ғаш тортди. Бу жиҳат билан гўё ёмонлиқнинг бош омили Султоалининг ўзи бўлиб чиқар, «Агар мен Абдураҳмонни ўрдан чиқариб юборишқа исрор этмасам, мирзони бу ишқа мажбур қилмасам, балки бу адватлар бўлмасми?» — деб ўйлар, Анварнинг таъна қилмаслигини билса ҳам, яна маънан эзилишини, унинг юзига қаролмаслигини чамалар эди. Андишаси шу жойға еткандан кейин ўрнидан турди, дарбозанинг

¹ Ҳудравъ — ўжарлик, ўзбилармонлик.

кичкина эшикчасини очиб, ичкарита кирди. Түгрийүлни қўйиб, қор остида босилиб қолған собиқ гулзорлар ичи билан айланиб юрди. Ички ўрда қўргонлари остида яроғлиқ йигитлар айланиб турар эдилар. Султонали мирзо юра-юра ўрданинг чап муюшига, қоровул йигитлардан бирининг яқиниға етиб, у билан сўрашди, бир-икки оғиз сўзлашиб, ўрданинг шарқиға юзланди. Бундаги дарбоза беклари билан борди-келди айтишиб: «Жумъа кун нима қилиб юрибсиз?» — деган саволга: «Бу кун жаноб кўнгил очмоқчилар, деб эшилкан эдим» — жавобини берди. Булар ёнида ҳам бир оз ўлтуриб, яна қўзғалди, ўрданинг шимол қисмиға ўтди. Ҳарам ва хон оиласига маҳсус янги дахма теврагида уч-тўрт нафар қора қулчалар ичидан Ўрмонбек ўқ ўйнаб юрар эди. Султонали мирзо дахмага қараб борди, «кичкина хон»ға таъзим қилғандан сўнг, дахманинг бир чеккасиға ўлтуриб, қуръон ўқуди. Аммо кўзи ўйнаб юрган болаларда, тили қироатда эди. Фотиҳадан сўнг қориҳонанинг айвон муюшига чўнқайиб, болаларнинг ўйуниға томоша қилди. Ўрмонбек камончага ўқ қўйиб отар, ўқлар кўкка кўтарилиб турли масофага бориб тушар, қулчалар отилған ўқларни териб келиб Ўрмонбекка берар эдилар. Отилған ўқлардан бири Султоналининг оёғи остиға келиб тушти. Султонали энггашиб ердан ўқни олди, ўқнинг уринган патини тўғрилаб ўлтурдиди. Шу ҳолда қулчаларнинг бири югуриб етди. Гап-сўзсиз ўқца қўлини узатқан эди, Султонали қулчанинг бўйи етмайдиган қилиб қўлини юқори кўтарди.

— Ўқни беринг, ака, тақсир қафа бўлати!

Султонали ҳазиллашкан бўлиб, ўқни юқорида кўтариб тураберди.

— Сен Гулшан опани танийсанми?

— Танисам не?! Беринг ўқни!

— Шошма хувари, Гулшан опа бу кун ҳарамга келдими?

— Келса не?..

— Ўқ ўйнаб бўлғандан сўнг Гулшан опани менга чақириб бер, дурустми?

— Кўп.

Султонали ўқни қулчанинг қўлиға ушлатди, аммо яна қўйиб юбормай қўргон ости билан юриб турған йигитларга қаради...

— Аниқ чақириб берасанми, ўғлим?

— Кўп дедим-қув.

— Мени танийсан-а?

— Сизни? Сиз мирзо — тақсир.

Султонали ўқни бериб юборди. Қулча югуриб Ўрмонбек ёниға кетди. Султонали қўрғон остидағи йигитларга қўз қирини ташлаб, уларни ўзидан парвосиз топди. Чунки унинг ҳозирги иши, яъни бола орқалиқ ҳарам билан алоқа тутиши қўрқинчли саналар, башарти бу хил гап сезилиб қолса, катта фалокатларга ҳам сабабчи бўлар эди. Ўрмонбек яна бир оз ўқ отқандан сўнг, зерикиб, камончани ерга ташлади ва ўзи ҳарам дарбозасига қараб жўнади. Қулчалар ҳам уни таъқиб этдилар. Султонали мирзо болаларни ҳарамга киргизиб, қабрларға яна «фотиҳа» ўкуди ва секин-секин орқасига қайтди.

45. «ФОТИҲА — МУҲРИ ХУДОДИР»

Маҳдум чувирлашиб ўқуб ётқан болаларға тўхталиш ишоратини бериб, ўзи иргиб ўрнидан турди ва шошқанча мактабхонадан чиқиб, саҳн ўртасида турған икки нафар машҳур беклар истиқболига югурди. Улар билан энггашиб кўришкандан сўнг, бориб меҳмонхона эшигини очди.

— Марҳамат, тақсирлар, марҳамат!

Маҳдум бу қадар шошиб қолишға ҳақли эди. Чунки, келгучиларнинг ҳар иккиси ҳам хон ёнида мўътабар ва ҳамиша унга мусоҳиб¹ беклардан эдилар. Улар меҳмонхонаға кириб ўлтургандан кейин, маҳдум ўрнидан туриб, қўл қовуштириди ва «хуш келдилар!» — деди. Меҳмонлар ҳам маҳдумнинг ҳурматига қўзғалишиб кўйдилар.

— Ҳачук худо ярлақади, тақсирлар? Фарибхонамизни муборак қадамларингиз билан мунаvvар этканларингиз учун ҳазорон раҳмат.

Беклар маҳдумга ташаккур айтдилар. Абдурауф тунқотар ҳамроҳига қараб олғандан кейин «ташриф» сабабига тил очди:

— Жаноби пушти паноҳ бизни зиёратларига буюрдилар, сизга улуғ меҳрибонлиқ ато қилдилар.

Маҳдум жойидан қўзғалишиб ўлтурди, аммо «жаноб»-нинг «марҳамат»ларига тушуналмай шошди. Тунқотарнинг сўзига Мұхаммад Шариф дастурхончи изоҳ берди:

— Ҳар кимса ҳам пушти паноҳнинг марҳаматлари-

¹ Мусоҳиб — сұхбатдош.

та лойиқ күрила олмайдыр. Пушти паноҳ ўзларини дөмдилікта чоғлаб, бу башоратни бизлар орқалиқ сизга еткаришқа амр қылдилар...

Маҳдум бояғидек яна құзғалиб олса ҳам, аммо товуши чиқмай, сукутка кетиб қолди.

— Тақсиримда ожиза борлигини пушти паноҳ эшиткан эканлар... — деди тунқотар. — Мирзо Анвар каби донишманнан етиширигап киши оқила ва жамила¹ қызы ҳам тарбия қылмағанмуын деган андишага борибдирлар... Шогирдингизга қылған марҳаматни жанобингиз ва каримангиз учун ҳам дарыг тутмаслик ниятида, бизни хизматингизга буюрдилар. Албатта, бу марҳаматтинг нечоғлиқ улуғлигини сизга сўзлаб ўлтуриш ҳам ҳожат эмас.

— Қуллуқ, раҳмат, пушти паноҳнинг давлатлари зиёда бўлсин, — деди маҳдум узоқ сукутдан бош кўтариб. — Бир эмас, юз қизимиз бўлғандан ҳам жанобинг канизликларига назр қилиш вазифамиз эди. Аммо камина ва ожизамизда бир қанча гуноҳлар, нуқсонлар, узрлар бор, тақсиirlар.

— Беайб парвардигор, — деди тунқотар. — Банда ҳамиша маъзур ва хатоликдир, тақсир.

Маҳдум бош ирғатиб бир оз сукутда ўлтурди, сўнгра кўзини тунқотарнинг тиззасига тикиди.

— Жанобларига ожизона арз... Аввало камина ожиз, нотавон, афтодаҳол; пушти паноҳ жиҳатларидан содир бўлған улуғ марҳаматка сазовор ва лойиқ эмасдирман; сониян — ожизамиз олампаноҳдек улуғ зотка ҳамхоб бўлмоқ учун кофий тарбия олмаған бир қулбаччадир. Бас, биз шу кайфиятда онҳазратнинг меҳрибонлиқларига арзирму, тақсиirlар?

— Пушти паноҳнинг сизнингдек аҳли илмларга қаратилған дарё марҳаматлари арзитар, тақсир.

Тунқотар бу марҳаматнинг беҳад улуғлигини шарҳ қилиб кетди. Маҳдум бир неча фурсат сукутда ўлтургандан кейин, тунқотарнинг муболағаларига бош ирғатиб кўйди.

— Шак йўқ, шак йўқ, мен онҳазратка мусалламман² ва лекин... ва лекин бир узри фақирни андишага қўядир: ожизани бир важҳ билан мирзо Анварга ишонтирган эдик... мана шу масала каминага бир оз мушкил келадир...

¹ Жамила — чиройли, гўзал.

² Мусалламман — хоннинг ихтиёрларидаги одамман.

Бу сўздан тунқотар дастурхончига қаради, дастурхончи қўл силкиб кулди:

— Ҳеч боки йўқ, — деди дастурхончи, — мирзо Анвар пушти паноҳнинг ўз кишилари, бу хабарни мирзо эшитса, шубҳасиз, сўйинадир.

— Иншооллоҳ.

— Биз бориб онҳазратка жанобингизнинг дуонгизни эшитдирали: ҳусни қабулингизни, ижобатингизни уқдирамиз... Жанобнинг хурсанд бўлишларида шубҳа йўқ, тақсир, — деди дастурхончи ва бошқа сўзга йўл кўймай; ҳатто кейинги масалаларга ҳам келиб етди.

— Тўй фурсатини таъян қилиш албатта, онҳазратнинг ихтиёларига... Қани тунқотар, фотиҳа қилайлик, фотиҳа — муҳри худодир!

Тунқотар фотиҳага қўл очди, маҳдум саросима ҳолатда уларни таъқиб этди. Фотиҳадан сўнг «совчилар» ҳеч нарсага қарамай қўзғалдилар. Ўн беш дақиқалиқ бу ҳодисадан маҳдумнинг мияси шишди, ҳатто айтишкага чоғлаб турған муҳим бир сўзини ҳам унугди. Уларни дарбозага кузатиб чиқар экан, мазкур йўқотиб қўйған муҳим сўзини хотирласам, деб кучанар эди. Беклар билан хайрлашар чоқдафина бирдан «ҳабба» деб юборди. Унинг совчиларға айтмакчи бўлған сўзи ҳақиқатан муҳим, яъни бу воқиъя хабарини Анварга шу беклар воситаси билан етказиш эди. Улар бу илтиносни маъалмамнуният қабул қилдилар, мирзога ётифи билан сўзлаб, маҳдумнинг маъзур қолғанлигини унга уқдирмоқчи бўлдилар.

Маҳдум «улуг меҳмонлар»ни жўнатиб, меҳмонхонаға қайтиб келди. Мияси ҳануз тузукрак муҳокамага қобил эмас, кутилмаган бу ҳодиса ўзи учун фойдалиқми, зарарлиқми — имтиёз¹ қилолмас эди. Анварни аяғаниқми ёки ундан уялғанлиқми, баҳарҳол, кўнглида бир хил ғашлиқ, чигаллик бор эди. Муҳокама ҳар турлиқ: тўйни илгарироқ қилиб қўйсақ бўлар экан, деб ўйласа, иккинчи тарафдан, «хонға падари аруслик» масаласи ораға кўндаланг тушиб, яна фикричувалиб кетар эди. Бир тарафдан Анвар, иккинчи тарафдан хон... Шу йўсун, фикри бу йўлда тинолмай гангиган ҳолда меҳмонхонани ёпиб чиқди.

Маҳдумни мактабхона эшигига кўрган болалар чувирлашиб сабоқ такрорлашкан тутиндилар. Лекин

¹ Имтиёз қилмоқ — фарқламоқ.

махдумга ҳозирги чувур-чувур ёқмади; унинг учун ҳозир тинчлик, кутилмаган ҳодисанинг ўнг-терисини ўйлаш керак туюлди. Махдум мактабга кириб ўз ўрнига ўлтургач, болаларни тўхташға буюрди. Болалар жим бўлғандан кейин «озод!» деб юборди. Болалар домлаға салом бериб, бир онда мактабхонани бўшатиб кетдилар. Махдум дарс ўрнидан қўзғалмай яна ўйлаб қолди.

Анвар тўғрисидағи кўнгил гашлиғи бир турлиқ бўлса ҳам, бошқа тарафдан анчагина яхши умидлар туғулиб қолдилар. Хонға қайин ота бўлиш эл қошида кичкина гап эмас эди. Қалин тўғрисида подшоҳ-куявдан кўп маблағ кутилса бўлар эди. Агар худо ўғул набира ато қилса, Худоёрнинг таҳт вориси бўлиш эҳтимоли ҳам бор эди... Тўйнинг кейинга силтаниши эса, тақдир иши; Раъононинг тақдири хонға битилган, шунга биноан Анвар тўйни кейинги силташка, биткан ишни етиришкага¹ мажбур эди... Яна шу ҳолда ва шунча янги умидлар ичida кўнгилдан ҳалиги гашликни, ўзига но маълум илинжни ювиб юбора олмади. Яна бир оз шу тўғрида қийналиб ўлтургач, Анварга қарши ўзида бир аччиғ сезди: «Тўйни кўкламга қўй, деб унга ким айтди? Бу ўзи ҳар ишда ҳам суст қадам. Энди, хон сўраткандан кейин рад қилишға кимнинг ҳадди бор!» — деб кўнглидан кечирди. Шундан сўнг ул озғина тинчилини, яна бир мунча фикрланиб ўлтургандан кейин кўз ўнгига — қалин учун бериладирған бир саноч олтин, эл қошидағи обрў, энг охирда Худоёрнинг таҳт вориси бўлған хонзода келиб кечдилар. Ўзини эл сўраб турған ёш хон ёнида кўриб, илжайди...

Шу йўсун махдум ўзини босиб олди, кўкдан тушкандек бу совчилиқни ўз истиқболининг хайрлик фоли, файзи илоҳий, деб қувонди, ҳануз кўнглини гаш қилиб турған Анвар масаласини хотирига келтирмасликка, «хаёли фосид»²дан қочишқа қарор берди. Махдум шуни ўзига маъқул қилғандан кейин бошқа кишилар андишасини, айниқса уйдагилар раъйини ўйлаб турмади. Ўзича саодат бўлиб кўринган бу фожиға хабари билан Нигор ойимни эсанкиратди, йифлатди. Раъно эрса танчала ўқуб ўлтурган Хайём рубоиётни устига хушсиз бошини кўйди.

— Ўн йиллаб бизга кийдирган, едирган бечора Анварга оқибатимиз шу бўлдими! Шўрлик Раъно бир

¹ Етмоқ — ёъқ қылмок, барбод бўлмоқ.

² Ҳаёли фосид — бузук ҳаёл.

юз хотин ёнига юз биринчи кундаш бўлиб борадими?
— деб йиғлади Нигор ойим.

Раънонинг ҳозирги аҳволини биз ёзиб ўлтурмаймиз.
Аммо маҳдум уларнинг ҳар иккисини аҳмоққа чиқа-
риб, ўзи «оқиллар» қаториға ўтди.

46. ЙИГИТ!

Маълумки, кеча Султонали мирзо қул болага Гулшанни чақиришни таъйинлаб, ўрдадан чиқсан эди. Шу чиқишида ўрда атрофидан силжимай, кечгача Гулшанни кутди. Аср намозидан бир оз кейинроқ ўрдадан учтўртта хотинлар чиқдилар, буларнинг орасида Гулшан ҳам бор эди. Султонали мирзо хотинлар билан сўрашиб (чунки ўрдаға алоқалиқ хотинларнинг ҳаммаси унга таниш), Гулшанни четка чақирди, унинг билан сўзлашиб иш қўлдан кетканлигини ва душманларнинг яна бир ифлос найрангларини онглади. Шундоқки, Гулшаннинг ёнига боргучи мулла Абдураҳмон, гёё ўзини Солиҳ маҳдум тарафидан юборилғучи қилиб кўрсаткан. Ҳатто мулла Абдураҳмон орқалиқ Солиҳ маҳдум, қизимни хонға маҳтасин, деб Гулшанга бир неча тилло пул ҳам бериб юборған эмиш...

— Мен қиз топишни икки-уч ойлардан бери ташлаб юборған эдим. — деди Гулшан, — кишининг ҳожати чиқсин, дедим. Кейинчалик ўзимга гап тегдирмаслик учун аввал бориб қизини кўрдим; қизни ёқтирганимдан сўнг не андишалар ичиди хонға келиб арз қилдим... Мен у қизнинг мирзо Анварга айтдирилғанлигиги, ўртада адоват борлигини туш билайми, Султонали ака... Энди иш ўтди, мен хоннинг олдига кириб кечаги сизга маҳтаған қизим фалон экан, деб айта олмайман. Мирзо Анвар уйланадирган бўлса, мен кўриб қўйған яхши қизлар бор, айбонам¹ учун мирзо Анварга мен бошқа бир қиз топиб берай.

Султоналининг тарбузи қўлтуғидан тушиб, Абдураҳмон ва шерикларидан фижинған ҳолда, Гулшан билан хайрлашиди. Бутун кун зир югуриб юрганиға эмас, ифлосларнинг ғализ муваффақиятига чидамас эди. Бу чучмал адоват билан ингичка табиъатлик Анварнинг не кайфиятка тушишини тасаввур қилолмас; ит феъл, қадр билмас хонға аччиғ қилиб мирзолиқни ташлаб кетмаса, деб қўрқар эди.

¹ Айбона — зарар учун тўланадиган жарима.

Гулшан айтканча, иш ўткан, гап мазмунича, албатта хон Солиҳ маҳдумга куяв бўлмай қўймас, ҳозир бунинг қаршисиға бирар тадбир топиш жуда қийин ва бу хабарни Анварга айтиш-айтмаслик масаласи ҳам яна оғир. Султонали мирзо бу гапдан Анварни хабардор қилиш ва қилмаслиқ тўғрисида кўб ўйлади. Қанча мулоҳазалардан кейин уни хабардор қилишни маъқул кўрди. Чунки юзда тўқсон тўққузға қарши бир эҳтимолгина бу фожиъанинг бўлмай қолишлиғи тарафида эди. Анварни хабардор қилса, эҳтимолки, унинг ўзи бирар чора топар ёки масала Султонали ўйлағанча унинг учун аҳамиятлик бўлиб чиқмас, башарти аҳамиятлик бўлғандан ҳам фожиъани кутиб, ўзини босиб қарши олиш ногонийсига қараганда хийла енгил кўчар эди.

Султонали эрталаб уйқудан туриб, намозни ўқуди, болалари ёнида чой ичмай, Солиҳ маҳдумнинг ҳавлисига қараб кетди.

Меҳмонхонада ўрдаға кетмакчи бўлиб турған Анвар Султоналини ранжиб қарши олди:

— Шундай ҳам иш бўладими, кеча нега мен келгунча кетиб қолдингиз?

— Бирав чақириб келди-да... Мен ўз ўрнимға Сафар акамни ташлаб кетдим-ку.

Анвар ўпкалик илжайиб, ундан чой ичкан-ичмаганлигини сўради. Султонали гўё ўзини шу яқиндағи қариндошлардан бириникида қолған ва шунда нонушта қилиб, йўл устидан Анварнинг олдиға кирган каби кўрсатди. Иккиси биргалашиб йўлға тушдилар. Кўчада йигирма қадам чамаси борғандан сўнг, Анвар кулимсиг Султоналиниңг кўзига қаради:

— Кечада бизнинг ҳавлига кимни сўраб келдингиз?

Султонали манглайини қашиди:

— Мен чақириб келганда сиз уйдамидингиз?

— Мен уйда эдим, — деб кулди Анвар ва бир оз жим борди. — Мен уйда бўлмасам ҳам, уйдагилар сизни таниғанлар. Уйдан шу хабарни эшишиб, кечадан бери таажжубка тушдим... Хўш, сиз сўраған хотин ким? Ўзи нима гап?

— Арзимаган гап...

— Қани?

Султонали масаланинг қулай кўчишидан енгил тортиб, бир оз сўzsиз борди.

— Кулги гап... Сизга бир оз тегишлиғи бўлса ҳам арзимайдир... Арзимаса ҳам?

— Гапуринг... Сизнинг келиб юрганингизни эшикканымдан бери анча ташвиш чекдим.

— Сизга бир сўзни айтиб ҳам бўлмайди, — деб кулди Султонали, — иғнани түядек, хасни ҳаридек кўрасиз.

— Менми? Ҳайр, дунёни сел ювса ҳам тўпуғимга чиқмасин, сўзлангиз.

Султонали ҳикояни Сафар бўзчидан бошлади. Лекин жиддий эмас, ярим жиддий қилиб мулла Абдураҳмон ва муфти бечораларнинг ағлиға гўё шундан бошқа пастлик ва масхарароқ фикр келмаган, шу қадар аҳамиятсиз, тубанлик билан гўё ўч олмоқчи бўлғанлар руҳида сўзлаб борди. Анварнинг бир неча кундан бери ўзи тушунмай чеккан ташвиши, кўнгил ғашлиғи ҳақиқатка айланиб борса ҳам, Сафар бўзчининг болани алдаб йўлға солишидан, сир олишидан ва Абдураҳмонларни камситиб, масхаралаб қилинған ташбихлардан кўб ўрунда кулиб, Султонали мирзога енгиллик берди. Сўз Гулшан билан учрашиш ва ундан олинған жавобка етканда, Анварнинг туси ўзгариб, кипрак остлари учиб кетди. Аммо кутилмаган равишда яна совуққонлик сақлади.

— Зарари йўқ, — деди Анвар бир хил вазиятда қўл силтаб. — Мен улардан бу хилда ифлослик вужудга келишини тасаввур қилмаган бўлсан ҳам, лекин ҳар ҳолда адоват куткан эдим... Зарари йўқ, Султонали ака.

Султонали Анварнинг товуш оҳангидаги ўзгаришша эътибор этмаган бўлса керак, ҳануз бояғи ярим жиддий руҳидан силжимади.

— Саллалик эшакларнинг диринглаши оғилхонағача... Улар мирзо Анвар ўйланмакчи бўлған қизни хонға тўғрилаб, шунинг билан гўё ўч олмоқчилар. Мирзо Анвар хотинсиз қолсин, демакчи-да, бу аҳмоқлар. Ҳолбуки, бутун мамлакат қизлари мирзо Анвар учун соч тарайди. Агар сиз хоҳласангиз қозикалон ёки домла шофовул ва шулар сингари калонполарга куяв бўлолмайсизми? Кесак отиб арслонни енгмакчи бўлған галварсларнинг ишига қулгим қистайдир...

— Зарари йўқ...

— Раҳмат, Анвар. Мен сизнинг баъзи тўғриларда юрагингиз кенглигидан аччиғланар эдим... Дарҳақиқат, ўйлаб қарасам, юрак кенглиги ўзи бир фазилат эмиш... Бундан бошқа маъно онгламангиз, Анвар. Муфти кабиларнинг паст, бачкана адоватининг киши қитифига

тегиши бўлмаса, сиз ва дўстларингизча ҳам қиз оти топилмайдирған матоъ эмас.

— Албатта.

Анвар ўзини фавқулодда текис ушлаб борар, ҳозир унда бояғи ўзгаришларнинг ҳеч бириси ҳам кўринмас эди. Султонали мирзо бу bemaza гапни Анварнинг кўнглидан чиқаришқа тиришиб ҳалигидек юпатишларни оғзидан кўймас, эшиткучи эса қисқафина жумла билан унинг фикрига қўшулар ёки илжайиб, тасдиқ ишорасини берар эди. Иккиси бирга девонға кирдилар. Ишка илгарироқ келган мирзолар ёзув билан машгул эдилар. Анвар мирзолар билан саломлашиб сўрашди, ҳатто ҳеч гап бўлмаған каби Шаҳодат муфтилардан ҳам аҳвол ва соғлиқ сўради. Муфтиларни кўриши ҳамоно нафрати жунбушка кирган Султоналининг бу ҳолдан таажжуби ортиб Анварга қаради ва кўнглидан «йигит» деган сўзни кечирди. Султонали айтканча, шубҳасиз, бу йигитнинг кўнгли ёлғиз муҳаббаткагина эмас, муҳаббатдан файри фазилатларга ҳам қобил эди.

Султонали мирзо ҳам нариги хонадан Анварнинг ҳузурига ўткан, Шаҳодат муфтилар қаторида ўлтуриб ишлар эди. Анвар бу кунги нома ва аризаларни йиғишириб удайчига топширди, девоннинг ўзига тегишлик бўлғанларини мирзолар орасида тақсим қилди. Ҳар ким ўз вазифасига берилиб, ораға жимжитлик кирди. Фақат бу тинчликни савофич қаламларининг қофоз устида қириллаши ва гоҳо буқланган қофозларнинг шалдираши бузар эди. Шу ҳол бир соат чамаси давом эткандан сўнг, онда-сонда сўз ҳам қўзгалди. Анвар ҳузуридагилардан Шаҳодат муфти қофоз-қаламини ёнига кўйиб, сандалда исинди.

— Мулла Наврўз кўб паст одам-да, — деди муфти, — унинг иши кечадан бери менга ажаб таъсир қила-ди-да...

— Паст, паст, — деди Калоншоҳ.

Султонали Анварга қараб кўйди. Анварнинг эса кўзи ёзувда эди.

— Шунча кишининг илтижосини ерда қолдириши ўзи ярамаслиқ... Қазоси етиб ўлган экан, келиннинг молига нима дахлинг бор? Бу одамият эмас-да.

— Паст кишида одамият нима қилсин.

Султонали кулимсираб, бир-икки қайта муфтиларга қараб олди.

— Уйингга икки тарафдан шунча одам йиғилди,

сүзга кирмай, уларни овора қилдинг, лоқал бир лаган ош билан уларни жұнатсанғ үлиб қолармидинг... е, ҳайф сендеқ мұмсукка!¹

— Мен ҳам мулла Наврұзни бунчалик билмас әдим, — деди Калоншоқ, — одамиятни еб қўйған киши экан.

Султоналининг ранги ўчиб, қовоқ остлари пирр-пирр уча бошлиған эди.

— Қизиқ баҳсни қиласиз, — тақсирлар, — деди бирдан Султонали, — шу замонда одамият қолдими? Агар озғина андиша қилиб кўрсақ, сиз ҳам, биз ҳам одамиятни пок-покиза еб қўйған чиқамиз. Бу замонда ўзгани қўя туриб ҳатто ўзларингиздан ҳам одамият кутмасантиз бўлади, тақсирлар!

Юраги тор — асабий Султоналининг бу сўзи «ширин суҳбат» устидаги муфтиларни ҳайрон қилиб қўйди. Анвар Султоналига қараб унинг кўзини учраталмади. Чунки ул ҳалиги сўзларни айтиб, қўлидағи таҳрирга берилган эди.

— Сиз ажаб одамсиз-да, Султонали, — деди муфти. — Биз нима теяпмиз-ку, сиз нимадан ўтлайсиз.

— Сизлар одамиятдан баҳс қилаётисизларми, ахир? Мен ҳам бу вақтда одамият йўқлиғидан зорландимда...

— Сизнинг сўзингиз ажаб, Султонали. Сиз бизнинг одамиятимиз йўқлиғини бир жойда кўрганмисиз ёки димогингизга футур етиб қолғанми?

Анвар Султоналининг кўзини учратишкага урунди, аммо Султонали муфтиларга юз ўғуриб ўлтурди.

— Сизларнинг одамиятингиз йўқлиғини ҳеч бир жойда кўрганим ва эшитканим йўқ албатта, — деб заҳарханда қилди Султонали. — Аммо ҳозир ўз нафсимдан бир ҳисоб олиб кўрсам, ҳатто шу ҳафтанинг ичидәёқ неча жиноятка иртикоғ² қилғанман. Шунинг учун ҳам бояғи сўзни айтдим-да. Йўқса, меним ким билан қанчалиқ ишим бўлсин, тақсирлар...

Муфтиларнинг ранги бўзариб, иттифоқлашқандек Анварга қараб қўйдилар ва Султоналидан зорланғандек бош чайқадилар.

— Султонали ака, — деди Анвар зорланған оҳангда, — тақсирларим айтканча, димогингизга бир оз футур етканга ўхшайдир: шундай таплар нима ҳожат,

¹ Мұмсук — ўтакеттан хасис, баҳил, зиқна.

² Иртикоғ — машғул бўлиш, кўл уриш.

ним алоқаси бор? Тинчкина ишингизга қарасанғизчи, худо хайр берсин.

Сўнгра Анвар муфтилар томонға қулимсиб, Султоналининг гапига аҳамият бермасликка ишорат қилди. Шаҳодат муфти бир нарсаларни айтиб ишига қаради. Султонали ҳам қулиб, гёй Анварга итоат қилғандек, сўзсизгина, қаламини кўлиға ушлади. Ҳар ким ўз ишига қараб, орада яна бояғича тинчлик бошланди.

Кечка томон мирзолар тарқалишиб, орада Султонали ва муфтилар ҳам бирин-сирин чиқиб кетдилар. Энг сўнгға қолиб қўзғалған Анвар девонхона даҳлизида тунқотарға учрашди. Тунқотар Анвар билан ҳазиллашкандек, унинг кўлидан ушлаб ичкарига — девонға бошлади. Ичкарига кирдилар.

— Хизмат, тақсир?

— Хизмат шуки, — деб кулди тунқотар, — сизнинг устингиздан бир ўқтамлик қилинди?

— Яхши... Эшитсан бўладими?

— Жаноб бу кун бизни устозингиз Солиҳ маҳдумникига қулчилиққа юборған эдилар. Бориб эшитсамиз, фотиҳа сизга бўлған экан... Биз қиблагоҳ учун кечарсиз, деб ўйладиқ...

Анвар бу заҳарлик сўз билан илон каби тўлғаниб олса ҳам, бутун кучини сарф қилиб, сир бермасликка тиришди.

— Атиги шу гапми?

— Шу гап, мирзо Анвар.

— Арзимаган гап... Буни мендан сўрамасангиз ҳам бўлар эди.

— Раҳмат, мирзо, мен сизнинг бу садоқатингизни жанобга сўзлайман.

— Йўқ, йўқ, — деди Анвар бош чайқаб, — зинҳор гапирманг, зинҳор.

— Нега ахир, нега? Жаноб ҳам ўзларининг содик қулларини таниб қўйсингилар-да.

Анвар мажхул оҳангда кулди: «Айтманг, мен хоҳламайман» — деди яна. Иккиси биргалашиб девондан чиқдилар.

Ҳаво текис қорамтил булут билан ўралған, Кўқоннинг машҳур шамоли қанот ёйған эди. Қорамтил булутлардан қуйироқда олақарғалар қанот қимирлатмай саёҳат қилар ва онда-сонда ёмғур қатралари томчилар эди. Шу вақтда кўпрук ёниға келиб тўхтаған Анвар қаёққа бориб ётсан, деб тараддулланди...

47. ОЧИҚ ХАТ

Шом намозини ўқуб қайтқан махдум меҳмонхонанинг эшигини очиқ кўрди. Унинг келганлигини фаҳмлаб, тўғри ичкарига ўтди. Бир оздан кейин товоқда ош кўтариб Нигор ойим чиқди. Йигидан киприклари терилиб, чукур андиша ичида бошини қуи солған эди. Нигор ойим кирганда Анвар чароғ-пояға шамъ ёқар эди. Нигор ойим дастурхон ёзиб, товоқни Анварнинг олдига қўяр экан, бирдан пиқ-пиқ йиғлаб юборди. Анвар ҳайрон бўлиб қолмади, йифи сабабига тушунди.

— Нега йиғлайсиз? Тақдирни ўзгартириб бўладими? Хафа бўлиш яхши эмас, сиз шундай бўлсин деганмидингиз...

Нигор ойим жавоб қайтартмади, йиғлаған кўйи меҳмонхонадан чиқишига ошиқди. Анвар ошдан биринки луқма олиб, қўлини артди, сандал кўрпасини бағриға тортиб, кучли ва узун тин олди.

Чароғпоядаги шамъ бедиллар юрагидек титраб, меҳмонхонани аранг-аранг ёритар, шамънинг титроғи билан кўзини бир нуқтаға тиккан Анварнинг ҳозирги хаёлчан юзи ҳам қалтирағандек кўринар эди. Меҳмонхона тип-тинч, фақат бу тинчликни ташқарида ёққан ёмғурнинг кучсиз шитирлаши, ўқтин-ўқтин кўзғалиб қўйған шамолнинг даричага келиб уриниши ва аллақайси том бошидағи бир мушукнинг мавлаган товуши бузар эди. Дарича тирқишидан келиб кирган кейинги шамол чароғпоядаги титроқ шамъни ўчраёзизб, меҳмонхона қоронғиланди ва шу чоғда ичкаридан чиқиб келган оёқ товши билан Анвар хаёлдан кўз очиб, танча устидаги товоққа қўл узатди ва товоқни ушлаганча бир оз кулоқ солиб турди. Оёқ товшининг меҳмонхонадан узоқлашқанини, махдумнинг хуфтан учун масжидга ўтканини фаҳмлади ва товоқни ўлтурган жойидан орқасидағи тоқчага олиб қўйди. Орадан бир пиёла чой ичиш фурсати кечкандан кейин яна оёқ товши эштилди. Буниси адим сайин меҳмонхонаға яқинлашиб келар эди. Меҳмонхона даҳлизизда қўлида чойдиш кўтарган Раъно кўринди... Икки кўзи қип-қизарив, қовоқлари олудек кўпчиган, юзида ҳам зўриқишиш аломати бор эди. Ерга қараған ҳолда оқ чойдишни Анварнинг яқиниға келтириб қўйди, тоқчадаги пиёлани олиб чойдишдаги чой билан чайғади, пиёлани со-

чиқлағач, яна чайиб иккисини Анварнинг ёниға сурди
ва бирдан ўқраб юзини танча устига қўйди...

— Раъно, Раъно, — деди шошиб Анвар. — Болами-
сан, ҳали ҳеч гап бўлғани йўқ-ку.

Раъно бошини кўтармай, пиқ-пиқ йиглар эди. Анвар
уни юпатиб, ялинған ҳолда йигидан тўхтатишқа ури-
нар эди.

— Бекорга йиглайсан, Раъно. Йигидан бир фойда
чиққанини эшитканмисан ёки мени ҳам йиглатмоқчи-
мисан?.. Агар ўйлаб кўрсанг, йиглаш сенинг ҳаққинг
эмас, меним ҳаққим, ҳолбуки мен йигламайман. Нега?
Негаки, йифи энг сўнгги иш... Мен йиглаған кишини
ёқтирамайман... Тур, жоним, тур.

Анвар Раънонинг сочини силади, икки қўли билан
бошини кўтариб, юзидан ўпти.

— Мендан кўнгли қолсин десанг, йигла. Юзингни
ёш билан ювибсан, Раъно, ўнглан, мен юзингни ар-
тиб қўяй. Ўзингга кел, ақлингни йиф, оғир қиз бўлиб,
сўзимга қулоқ сол.

Раъно юзини четка ўгуриб, бошидағи рўймоли би-
лан юзини артди, узун энтиқди.

— Йиглаб бир натижага етиб бўладими? Ҳеч. Кўзинг
яна ёшланди, сен йиглай бер, мен сўзламайман, Раъ-
но.

Раъно яна четка қараб кўзини қурутди. Анвар пиё-
лага чой қўйиб, Раънога узатти:

— Ма, Раъно, ич.

Раъно ичмайман дегандек, бош чайқади. Анвар қис-
таб чойни олдириди.

— Ҳаммасини ичмасант ҳам бир-икки ҳўпла.

Раъно Анвар айтканча, икки-уч ҳўплаб, пиёлани
олдиға қўйди. Анвар ўрнидан туриб даҳлизга чиқди,
кўлида обдаста, дастшў кўтариб Раънонинг ёниға келди.

— Юв юзингни, Раъно.

Анвар сув қўйиб турди, Раъно юзини ювди. Анвар
қозиқдан сочиқ келтириб берди. Раъно артинди.

— Ана тамом... Энди одамшаванда сўзлашайлик,
йифи нима ҳожат.

Раъно қайғуларини озайтиргандек энтиқди, ўзига
яrim жиддий тикилиб турған йигитка жавобан илжай-
ди.

— Яна бир кул, Раъно.

Раъно бирдан тундлиққа оғишиди.

— Кулги соати эмас...

— Кулги соати бўлмаса, йифи фурсати ҳам эмас, — деди Анвар ўлтуриб. — Сенинг мурасса¹ халтачага ўхшаш кичкинагина юрагинг бор, ичини қийматли тошлар билан тўлдиргансан. Бу кун қазо муншийси² шу мурасса³ халтачадаги қийматил тошлар орасига қўпол бир нарса келтириб тиқди... Табиъий, сенинг кичкина юрагинг бу қўполлиқни кўтара олмади, қийматли тошлар сиқилдилар, сен йигладинг, сенинг каби мен ҳам шу қўполлиқни қабул қилишда қаттиф энтиксим, бироқ йиғламадим. Нега? Негаки, бу қўполлиқ меним юрагимдаги жавоҳирни сиқиб чиқара олмас, фақат унга тангликина берар эди, сенга ҳам шундай эмасми, Раъно? Хўш, энди бизнинг фожиъамиз сабабига келайлик. Бу ҳодиса тўғридан-тўғри хоннинг ўзидан келган гап эмас. — Хон—ҳазми ҳар бир ифлослиқни ҳам кўтарадиган катта бир ҳайвон. Унинг теварагида майда ҳашаротлар кўб, булар ҳам ўзларига яраша ҳайвонлик истайдилар. Бироқ қўй қисқа, шунинг билан бирга ётиб қолишқа кўнгил тинчимайдир. Шундан кейин хон — катта ҳайвонни қитиқлаб ишка соладилар... Балки ёдингдадир, мулла Абдураҳмон исмлик бири сенинг харидоринг эди, шоир айтканча:

Мендин ўтиб гулга бўйи етмади,
Умид узиб ўз иўлиға кетмади.

Хабаринг бор, мен отангнинг тазиқи остида уни ўрда хизматига олдим, ул ўрдадаги бир неча ифлослар билан биргалашиб, меним қаршимфа ишлади... Мен... уни ўрдадан жўнатдим, натижада ҳозирғи ифлосликка енг шимардилар. Бироқ, улар бизни бир-биrimиздан ажратса оладиларми? Йўқ. Мажозий ажралиш-ажралиш эмасдир, чунки биз бир-биrimизга мажозий боғланмағанмиз, ҳақиқий боғланишни эса қатъ³ этиш ифлослар уҳдасидан келмас. Бас, шу ҳолда биз икав нега хафа бўлайлик, Раъно? Ишқ давоси авом ўйлағанча васл эмас — ҳажрdir. Зоро, васл ишқ ўтини сўндиргучи, ҳажр эса камолатка эриштирғучидир... Сен шу иккidan қайси бирисини танлайсан, Раъно?

Раъно кўзини тиззасига тикиб, қўли билан шолча ипини чирмаб ўлтураб эди. Ҳалиги савол Анвар тарафидан яна такрорланди.

¹ Мурасса² — қимматбаҳо тошлар билан безалган.

² Қазо муншийси — олиоҳнинг иродаси, тақдир

³ Қатъ этмоқ — узмоқ.

— Мен кейингисини... Бироқ, хоннинг ифлос тұшағыда ётмайман.

Анвар бир неча вақт сукутда ўлтурди. Раъонинг жавоби унга оғир таъсир қилған эди...

— Буни мен ҳам ҳоҳдамас әдим... Бироқ, ифлослар меним чора йўлларимнинг ҳаммасини кесдилар, Раъно... Яна ўйлашмоқ учун фурсат бор, айниқса, сен бирар тадбирни мувофиқ кўрсанг мен бош эгаман... Сен йиғлатиб ҳайвон чангалига бермасман... Шундай, сен йиғлама, ақлли қизларча ҳаракат қил, мен...

Анвар сўзини тугата олмади, меҳмонхона эшигидаги маҳдум кўринди:

— Ичкарига кир, Раъно, бевақт бу ерда нима қилиб ўлтурибсан?

Анварнинг вужуди физз етиб кетди: қаршисида бояғича ўлтурган Раънога «тур, жўна» деган каби ишорат қилди, лекин Раъно қимириламади. Маҳдум бошқа сўз айтмай, даҳлиздан орқасига қайтди.

Анвар жуда ҳам оғир тортқан эди. Ҳақиқатан ҳам маҳдумнинг бу ҳаракати ақлсизча, аҳмоқларча әди. Анварга оғир келишини ўйламай бу «буйруқ» билан Раъонинг кундалик одатини манъ қиласар, ҳар кечаси ўз вақтида ўлтурган Раъно гўё бу кун «бевақт» ўлтурар эди. Бундан бошқа, унинг Анварга учрашмай намойишкор чиқиб кетиши, қандайдир яна бир маънони онглатқандек ҳам бўлар эди.

Раъонинг юзидағи қайғи белгилари йўқолиб, унинг ўрнини ғазаб, нафрат аломатлари олди.

— Андишасиз!

— Зарари йўқ, аччиғланма, — деди Анвар. — Энди бошқа сўзимиз ҳам йўққа ўхшайдир...

Раъно яна бир оз кўзғалмай ўлтуриб қолди, сўнгра кўзига жиқ ёш олиб, меҳмонхонадан чиқди.

Эрта билан Нигор ойим чой олиб чиққанда, меҳмонхонада Анвар йўқ, сандал устида очиқ бир хат ётар эди:

«Мехрибон хола.

Ёшлиқдан сизнинг тарбиянгизда ўсдим, сизга ва тақсиримға кўб заҳматлар бердим. Бу заҳмат бадалига тегишилик ҳақ қайтаролмаган, хизмат қилолмаган ҳолда маълум сабаблар тазиғи остида сизнинг шафқатли тарбиянгиздан кетишка мажбур бўлдим. Сўнгра уйдаги менга алоқадор барча нарсалар, шу жумладан, ўзингиздаги амонат олтиналар ҳам оиласизга мендан ҳадядир. Мен ол-

тингларни қизингизнинг тўйига атаб йигқан эдим, мундан сўнг ҳам шу оқчани Раъононинг тўйига сарф қилсангиз, деб сўрайман. Мени йўқлаб келгучиларга ўрда дарагини айтиса эди. Шафқат ва марҳаматингиз билан гуноҳимни кечирарсиз умидида:

Анвар».

48. ТЎЙ АРАФАСИДА

Хоннинг совчилари иккинчи марта бекор тўй вақтини тайинладилар: келаси жумъя маҳдумнинг уйида тўй ижро қилиниб, маросимдан сўнг Раъно ўрдаға юбориладирган бўлди. Тўй вақти белгилангандан бир кун кейин тўй жамарғаси ҳам келди. Хоннинг ҳадяси уч юз тилло пул, шу қадар қийматка арзийдирган шоҳона сарполар, маҳдумга алоҳида илтифот қилинған «раисулмакотиблиқ»¹ унвонларидан иборат эди.

Шунчалик илтифотлар ичida гангид қолган маҳдум уч кундан бери дараксиз кеткан Анвар тўғрисида ўйлай олмади, фақат бундан «ҳамоқат», «андишасизлик» деган натижа чиқариб тинчили. Нигор ойим эрса ўзини бирмунча босиб олди, гоҳо Анварга юраги ачиб қўйса ҳам, уни ошиғич келган тўй ҳозирлиги масаласи ихтиёрсиз равишда бу тўғрини ўйлай олмаслиққа мажбур этди.

Раъно!.. Маълумки, бу кунларда Раънога тикилган фалокат беҳад улуғдир: фалокатлик, ҳалокатлик кунлар яқинлашадир. Бунинг устига уч кундан бери Анвар дараксиз. Анвар «висол — муҳаббатни ўлдургучи, ҳажр эса — камолатка эришдиргучидир», деб Раънони ҳамишаликка ташлаб кетдими ёки маҳдумнинг бемаза муоммасидан кўнгли олинниб, араз қилдими? Ҳолбуки ҳозирги кунлар араз, аччиғ ва фалонларни кўтарадирган вақтлар эмас, ҳеч бўлмағанда бечора қизға гап билан, сўз билан маънавий ёрдам бериб туриш соатларидир. Бечора Раъно ҳамиша яхшилиқ, ақдлилиқ кўриб келган бир кишисидан ҳам охирда дағаллиқ кўрап, вафосизлиқ бўйини олар эди. Шу дудама фалокат бир неча кун ичida Раъно гулини сўлитаёзди, ҳатто жоду кўзлар ёш тўкишдан ҳам тўхтадилар.

Раъно сандалда ўлтуриб жумъя куни — мудҳиш жумъя куни тўғрисида ўйлар эди. Бу кун сесанба, жумъагача яна икки кун бор. Фақат икки кунгина... Раъно бундан

¹ Раисулмакотиб — мактаблар раиси.

ортиқни күз ўнгтига келтира олмас, гүё ўзини жар ёқасида күрган кишидек панжанба кечдан беихтиёр, гүё савқи табиъий¹ остида орқасиға тисарилар эди. Шундан кейин Анвар тұғрисида хаёл суриб, унга — Анварга қарши ўзида күчлик бир кек сезар, шундай оғири соаттарда ташлаб кеткан «йигит» яна бир күринса, қандай киноялар билан истиқбол қилишини — кутиб олишни үйлар эди: «Хамма даъволарингиз пуч! Сиз, мирзобошлиқдан маҳрум бўламан, деб қўрқингиз, бизнинг уйда ўн йил турсангиз ҳам, отамнинг феълини билмаганимдингиз? Ҳолонки, мен сизни хондан ҳам юқори ўрунга қўйған эдим. Энди фурсат қўлдан кеткач, нима учун келдингиз?..» Лекин ул кейинги итоби маъносидан ўзига ҳисоб бермас, агар бунга қарши Анвар: «Қандай иш ва фурсат ўткандан кейин келдим?» — деб сўраса, эҳтимолки, Раъно сукут қиласар, чунки ҳозиргача унинг фикрига вақти ўтадирган бирар чора келмаганидек ва бу тўғрида ўйлаб ҳам кўрмаган, фақат бу фожиға қаршисида такягоҳ,² деб Анварни истаган, Анвар эса кўздан йўқолиб, Раънонинг мажруҳ юрагида яна янги бир жароҳат очқан эди.

Нигор ойим ошиғич ҳозирликлар орқасидан чопиб юрар, бешикда ётиб зериккан Масъуд қичқириб йиғлар эди. Бояғи хаёллар ичида ўлтурған Раъно узоқ энтиқди ва асабий ҳаракат билан ўрнидан туриб, бешик ёниға келди. Тебраткан билан бола тийила бермагач, уни йиғлаған кўйи ташлаб, ҳавлига тушти ва нариги айвонда юмиш қилиб ўлтургучи онасиға «эмизинг!» деб асабий ҳайқирди, ўзи йўлак томонға қараб ўтди.

Боқчада Маҳмуд ва Мансурлар қўшни болалари билан ўқ отиб ўйнар эдилар. Атроф олашовур қор билан ёпилған, сўри остидағи сүфанинг четлари ёғин билан нураб, устидан бир неча жойи узун-узун ёрилған эди.

Суфа ёнида тўхтаған Раъно болалар ичидаги Маҳмудни чақириб, сўради:

- Маҳмуд, даданг қаерда?
- Дадам... бозорда.
- Ташқарида ким бор?
- Ичким.

Раъно бошқа сўз айтмай ўрта эшикка келди. Маҳмуд айтканча, ташқарида ҳеч ким йўқ, тўй муносабати билан мактаб шогирдлари бир неча кунга озод қўйил-

¹ Савқ табиъий — табиий ҳаракат.

² Такягоҳ — суюнчиқ.

ған эдилар. Нима мақсад биландир ташқариға чиққан Раъно меҳмонхона эшигини қулфланған кўриб, машқхонаға қараб келди. Эшик занжирини тушуриб ичкари кирди. Саҳнидаги бўрё ва бордонлари чувалиб, титилиб ётқан машқхонанинг ҳар бир тоқчасига кўз ташлаб, бирар нарса излагандек юринди. Тўрдаги тоқчадан устига кўк сир берилган бир давотни олиб қарди. Давотнинг ичидағи лосларини қора-сариқ тусда қуриб қолған кўргач, оёқ остиға ташлаб машқхонадан чиқди.

— Маҳмуд!

Камончасига ўқ қадаб ётқан Маҳмуд ўрта эшиқдан турған опасиға қаради.

— Ҳмм?

— Бери кел.

Маҳмуд тилар-тиламас опаси — Раъононинг ёниға келди.

— Ҳмм?

Раъно Маҳмудга ўз орқасидан келишка ишорат қилиб, яна машқхонаға қараб кетди. Маҳмуд қўлидағи камончасини турли тарафка ўқтала-ўқтала Раъно билан машқхонаға кирди. Улар иккиси бир неча вақт машқхонада қайси тўғридадир сўзлашиб қолдилар.

Уйда хат ёзиб ўлтурган Раъно онасининг ким биландир ҳавли юзида кўришиб, сўзлашқанини эшиитди ва бир оздан сўнг юмалоққина, тўла-тўкис бир бўғоз хотинни айвон муюшида кўриб, ёзувини тўхтатишқа мажбур бўлди. Чунки хотин Раъонони кўриб қолған, шунинг учун бўғоз хотин билан чиқиб кўришиш Раънога лозим бўлған эди. Раъно чиқиб кўришди. Нигор ойим танимаған меҳмонни сандалга таклиф қилди.

— Бу ёққа, айланай, бу ёққа.

Хотин қистатмай сандалга чиқиб ўлтурди, қўзи Раънода экан, фотиҳа ўкуб рўймол-лачагини тузатди:

— Танимаған хотин нима қилиб юрийди, деб ўйларсизлар, айланай, — деди хотин ва чўнтагидан бир қофоз чиқарди. — Мирзо бир-икки кундан берли бизникидалар... Танисаларингиз керак, ўргулай, мен мирзо Султоналининг кўчлари¹ бўламан... Китобсиз зерикдим, уйда бир китобим бор эди, деб боя — эрта билан шу қофозни берибтилар, айланай...

Хотиндан бу сўзни эшитиб Нигор ойим ачиниш ва уялиш вазиятига кирди. Танчадан нарироқда тик тур-

¹ Кўчлари — хотинлари.

ған Раъно Нигор ойимдан қизғанғандек, келиб хотиннинг қўлидағи буқланган қофозни олди.

— Мирзодан уятлиғмиз... Айниқса, уч кундан бери қаёкларда қолди, деб ич-этимни едим, — деди Нигор ойим. — Тақдирға ҳеч нарса деб бўлмас экан... Биз миরзо билан уланишармиз деб ўйлаған эдик.

— Тақдирни азал, айланай, — деди хотин. — Мирзо ҳам юртда иккита ақил бўлса, биттаси. Сизлардан ҳануз миннатдор эканлар; шундай, шундай иш бўғандан кейин келишка андиша қилиб қофанлар-да, айланай.

Улар шу сўзда экан, Раъно уйга кирди:

«Холамға, сўнгра Раънога. Беҳад салом ва дуо. Мендан ранжимангиз, ҳа учунким шундан бошқа чорам йўқдир. Ҳат олиб боргучидан Шайхи Саъдий куллиётини¹ бериб юборсангиз, бўш соатларимдан фойдаланаар эдим. Раънога маълум бўлсинким, бундан сўнг сенга меним машқларим (шебър дафтарим) керак бўлмас ва ўзинг билан олиб юришинг ҳам эҳтиётдан эмас. Агар хафа бўлмасанг, шуни ҳам бериб юбор. Соғлиқ аҳвалотингиздан ёзингиз.

Аддои Анвар».

Ҳат шу қисқа жумлалардан иборат, яна шундай ҳам бўлса Раъно учун қийматли эди.

Ҳали ёзиб бошлиған қофозни нима учундир йиртиб ташлади, айвондагиларнинг ўзаро сўзлашиб турғанларидан фойдаланиб, жавоб ёзишқа шошилди.

49. РАМЗ

Анвардан бир оз илгарироқ қайтқан Султонали оғилхона айвонида сигир соғиб ётқан хотини устида тўхтади.

— Бордингми, Рузвон?

— Бордим, — деди Рузвон ва эмчақдан «пов-пов» сут соғишида давом етди. — Бордим, олиб келдим.

— Мехмонхонаға олов қилғандирсан?

Рузвон боши билан қилдим, ишорасини берди.

Султонали миризо уйга ўтди, салла-чопонини ечиб, яна хотинининг ёниға келди.

— Бузоқни ечиб юборинг-чи, айланай. — Султонали миризо устунга боғланған бузоқни ечиб юборди. Бузоқ онасининг эмчагига ёпишди. Рузвон хурмадаги сутни кўтариб ҳужрага ўтди, Султонали ҳам хотини орқасидан кирди.

¹ Куллиёт — шоирнинг асарлар тўплами.

— Хўш, нима гап бўлди, Рузвон?

Рузвон хурмадаги сутни товоқларга бўлар эди.

— Бордим, хатни бердим, чой қайнатдилар, талай гапуришиб ўлтургандан кейин, китобни олиб қайтдим.

— Кимлар бор экан?

— Отин хола, қизи.

— Қизи қалай?

Рузвон афсус қилғандек, бошини икки елкасига иргатди ва тилини тағлайиға тегизиб «чалоқ» этдириб қўйди.

— Мен, мирзобоши жуда хафа кўринади, деганингиздан ҳам шуни ўйлаған эдим. Баани сурат: киши ҳам бундай бежирим бўлар экан.

— Ҳа, ҳа!

— Чамаси улар ошиқ-маъшуқ, балохўр хон лоақал шунга чўвагини тиқмаса нима қилар эди. Бечора қиз, шундай хафа, шундай хафа. Дор-дунёси¹ қоп-қоронги.

— Ҳа, ҳа... Отин холаси-чи?

— У бечора ҳам ҳайрон, «болаларимнинг сўйинчи ичига тушти», — дейди.

Султонали афсуслангандек бош чайқаб қўйди.

— Китобни қаерга қўйибсан?

— Мемонхонада... Ҳа, айтканча, ичиди кичкина хат ҳам бор.

Султонали мирзо кечлик ош тўғрисида баъзи гапларни айтиб, ташқариға чиқди. Меҳмонхона очиқ эди. Тирсаги билан танчага такя қилған Анвар Саъдий кулиётини вараклар эди. Султонали кириши билан Анвар китобни ёниға олиб қўйди ва кучлангандек илжайди.

— Раҳмат, олиб келган эканлар.

— Китобнинг ичиди хат бор эмиш, балки кўргандирсиз?

Анвар хатни кўрмаган эди, китобни қайтадан очиб, муқовадан тўрт букланган бир қофозни олди. Хат масаласи билан Анварнинг бир оз шошиб қолғанини сезган бўлса керак, уйда бир иши борлигини сўзлаб, Султонали меҳмонхонадан чиқди. Анвар хатни очди.

«Хурматлик Анвар ака, ассалому алайкум. Ҳаммамиз соғ ва саломатмиз. Келин ойим орқалиқ бериб юборған хатингизни олдиқ, соғлиғингизни, тинчлиғингизни ўқуб ва эшишиб жуда хурсанд бўлдиқ: илоҳи, саломат бўлсинлар. Соңий, биздан аҳвол сўрасангиз алҳамдуиллоҳ тинч-

¹ Дор-дунё — кўнгил, ич.

миз, хотиржамъ бўлурсиз. Сўратиб юборған китобингизни бериб юбордим. Аямдан сизга салом, боқий сўзни Шайхи Саъдийдан ўқурсиз деб хатни мухтасар¹ қилдим, Раъно».

Анвар ёзувни қўлида ушлаган ҳолда қараб қолди. Бир оз ўйланиб турғандан кейин, хатни яна ўқуб ҳар бир жумла устида тўхталиб ўтди. «Соғлиғингизни, тинчлиғингизни эшишиб жуда хурсанд бўлдиқ» жумласи билан «сиз тинчиб кетдингиз» демакчи эди. Чунки, шу жумладан кейинги — «илоҳи, саломат бўлсинлар» кинояси буни таъкид қиласар, «соний, биздан аҳвол сўрасангиз, алҳамдулиллоҳ тинчмиз, хотиржамъ бўлурсиз», яна киноя, аммо энг кейинги — «боқий сўзни Шайхи Саъдийдан ўқурсиз деб хатни мухтасар қилдим» жумласи бир оз ўрунсиз каби эди. Анвар бу жумлани «мундан сўнг ёнингизда Раъно йўқ, бўш вақтингизни Шайхи Саъдий ўқуб кечириңгиз» маъносида тушунди.

Анвар қофозни буқлаб китобнинг муқовасига солди ва хатнинг оғир маъноси таъсирида энтикиб сукутка борди. Унинг бу кунларда кечириб турған ҳоли жуда оғир, бу оғирлик устига Раъононинг мазлумона ёрдам сўраб киноялар ёзиши яна аламлиқ эди. Чора нима? Бу фожиъани дафъ қилиш учун бирар йўл, бирар хил тадбир? Фақат бир йўл, энг сўнгги чора: Худоёр олдидаги сирни очиш, Раънога ва Раъононинг эса ўзига қарши муҳаббатларини фош қилиб, хоннинг оёғига бош уриш — ялиниш, ёлбориш... Ҳайҳот, бу разолатни Анварнинг нафси ҳазм қилолмаганидек, «адолатпаноҳ»-нинг ҳам бу тўғрида «марҳамат»лари шубҳалик. Башарти Анвар шу разолатка иртикоғ этса, адабсизлик, уятсизликда айбланиб, бирар жазога йўлиқиши ҳам яқин эҳтимолдир.

Маънан ва жисман эзилган, айниқса, ҳозирги аҳвол ичидаги ўнги қоронғиланған Анвар меҳмонхонаға кириб келгучи Султоналидан ҳам ибо қилмай, гўё ҳуссиз каби бошини икки қўли орасига олиб, сандал устига энгашти... Масала билан бирмунча таниш Султонали мирзо бу ҳолни дафъатан бояги хат мазмунидан деб ўйлади. Уялмасин, деган каби бир нарса излаган бўлиб, тоқчаларни айланди... Анвар қаддини ростлаб, узун нафас олди ва Султоналига ўлтуринг ишоратини қилди. Султонали ўлтурди.

— Нега ундейсиз, Анвар?

¹ Мухтасар — қисқа.

Анвар кучланиб илжайди.

— Ҳалиги хат мени хафа қилди, — деди ва бир оз тұхталиб турди. — Сиздан яширап сир йўқ, хат ёзғучи билан орамизда анчадан бері яқинлиқ каби бир гап бор эди. Маълум гаплар туғилғач, мен ўзимни четка олишни, қатый алоқа қилишни мувофиқ кўриб, сизнинг устингизга келдим. Воситангиз билан бу кун хат ёзиб, мендан ранжийдир, тинчидек кетдингиз деб, киноя қиласидир. Ёш, ақлсизға нима ҳам деб бўлсин, фагат диққатлик... Мана, ўкуб кўрингиз, сартопо киноя.

Султонали кулимсиди, аммо ўзида ўнгтайсизлиқ, тузида қизариниш бор эди. Хатни мирзонинг кўлидан олиб ўқуди. Ўкуб чиққач, ёзувнинг яна аллақайси жумласига иккинчи мартаба қаради.

— Қизиқ, «боқий сўзни Шайхи Саъдийдан ўкурсиз, деб хатни муҳтасар қилдим...» Бу жумла билан нима демакчи?

— Бу ҳам киноя, — деди Анвар, — бундан сўнг меним тўғримда ўйламай, бўш вақтингизни Шайхи Саъдий ўкуб кечирингиз, демакчи бўлса керак.

Султонали мажхул ҳаракат ясади.

— Балки...

Бу муҳмал тасдиқ ва мажхул вазият Анварни шубҳага туширди.

— Хўш, сизнинг фикрингизча?

— Мен... Мен ҳам сизнинг фикрингизга келиб қолдим; мен бошқачароқ тушунган эканман.

— Масалан?

— Мен: «Китобнинг ичидаги яна бир хат бор, қолған сўзни шундан ўкурсиз» деб.

— Эҳтимол сизники тўғридир, — деб аланғлади. — Бу ҳам бир эринмаганлик бўлсин; китоб ичини ахтариб кўрайми?

Султонали кулди.

— Майли... Мен уйга кириб, таом етилган бўлса, олиб чиқай.

Султонали кетди. Анвар китобнинг ўнг-терсини очиб, ахтара бошлади. Ҳеч нарса кўрина бермагандан кейин бирма-бир саҳифа очиб боришдан ҳам эринмади. Бош тарафдан ўттузлаб саҳифа текширилган эдиким, Султоналиниң фоли ҳақиқатка ошиб, саҳифа орасига буклавсиз кўйилған бир хат китоб четига қоқилиб чиқди. Анвар шошли.

«Андиша ва эҳтиёт юзасидан бир хатни алоҳида ёзиб,

китоб ичига яширдим: *Анвар ака, оғир соатларда ёнингизда турғучи дўстдир; қочқучи эсаким — буни сизнинг ҳукмингизга ҳавола қиласман. Ваъда бериш осон, лекин уҳдаси машаққат; бундан сўнг шуни ҳам хотирда яхши тутингиз. Оғир дақиқаларда арзимас гапни кўнгилга олиш сизнинг каби олижаноблар иши бўлур, деб ким ўйласин.* Бахтсиз бир қизнинг најсоти учун тебранмадингиз, деб сизни айблаб бўлмас; бироқ, бахтсиз Раъно таҳлика остида қолғанда, уни бу кун-эрта бир фожиға кутканда вафолиқ, деб билган бир кишисидан бу янгиғ жафо кўриши нақларда ўқулғанми, афсоналарда тўқулғанми? Шу қадар гуноҳим бор эмиш, деб хафа бўлмангиз, *Анвар ака.* Башарти шу гуноҳларнинг ювилиб кетишини тиласангиз, сизга бир хизмат бор, ҳам сизнинг учун энг осон хизмат: эртага чаҳоршанба кечқурун, тиласангиз — очиқча, тиласансангиз — янгирина бўлса ҳам бизнигига келингиз, мен билан охирги мартаба видоълашингиз. Чунки сиз нашъу намо қилған жойда Раъони ҳалокат кутадир».

Анвар ёзувни онда-сонда ўқуб, тезлик билан китобка қайтариб солди, саҳифалар орасида қолдириб, устига янги саҳифалар уя борди. Чунки лаганда манти кўтарган Султонали даҳлизга қараб ўткан эди.

— Борми? — деди Султонали лагани сандал устига қўйиб. — Валлоҳи аълам, маъно сиз тушунгандадир. Мен янгишқан чиқарман.

Анвар унинг сўзини тасдиқ қилған каби бош ирқатиб, китобни ёпли, қўл ювғали даҳлизга чиқди.

50. МАЪШУҚА МАҲБАСИ

Раъонинг иккинчи хати Анвар учун яна бир ташвиш эди. Унинг ёнига боришдан ҳеч бир мантиқ топмас, билъакс, юрак ўтининг аланга олишини, жароҳатларнинг янгиланишини кўрар эди. Китоб баҳонаси билан хат ёзиб, ўз дарагини айтиб, эвазига шундай ташвиш ортдириб олған Анвар, кечаги кунларда ҳиссиётка қаттиғ берилиб, китоб сўратиш оқибатини яхши муҳокама эталмаганидан пушаймон эди. Шунинг билан бирга ўзининг мундан сўнгри ҳаракатида ҳам амният¹ сезмас эди. Чунки Раънога учрашишдан ҳеч бир фойда тасаввур қилмаған муҳокамаси қаршисидағи кучлик бир майл, Раънога йўлиқишидан фойда

¹ *Маҳбас* — ҳибсона, қамоқона.

² *Амният* — тинчлик.

эмас маъно кўрсатар эди... Учрашилганда шубҳа йўқим, Раъно йиғлар, кўнгилни бузар, шундан бошқа иш чиқмас, лекин иккинчи тарафда неча йиллиқ муҳаббат яна шу фожиъ учрашишкан майил каби эди.

Ул тун бўйи учрашишнинг яхши ва ёмон тарафларини ўйлаб, ухлай олмади, ора-чора ухлаб кеткан аснолари ҳам яна шу учрашишкан алоқадор тушлар билан кечди. Ҳар қанча ақл изи билан ҳаракат қилишга тиришса-да, яна учрашмаслик, сукут қилиб кетишлик еб кўринмас эди. Учрашиш — нечоғлиқ тадбирсизлик, жон койитиш бўлмасин, Раънонинг: «Мен билан охирғи мартаба видолашингиз, сиз нашъу намо қилған жойда мени ҳалокат кутадир» жумласи ҳар қандайдур андишаликни енгарлик ва бу жонсўз хитобадан кўз юмиш йигитлик шаънига ярашадирған кўринмас эди.

Анвар қатъиян бориш қарориға келганда, девонда ўлтуриб ишлар эди. Унинг эндиғи тараддуни учрашиш ёки учрашмаслик борасида эмас, Раънонинг олдига очиқча бориши, яширинчами тўғрисида эди. Башарти очиқ борса, маҳдумнинг шубҳаланиши, Раънони четка қоқиб ёки уларни таъқиб этиб, ярага туз сепиши, Анварнинг иззати нафсиға тўқуниши аниқ. Яширин борса... Орада хиёнат, бузук ният бўлмағандан кейин яшириниб юриш нима ҳожат? Хайр, яширинча ҳам борсин, баногоҳ маҳдум кўриб қолса... Унинг учун бу масалани ҳал қилиш жуда ҳам мушкил эди.

Иккиси кечқурун қайтишиб келдилар: Султонали мирзо кундаги каби Анварни яхши ошлар билан меҳмон қилди. Шомни ўқуғандан кейин Анвар «бир неча соат ичиди жиянлари олдига бориб келиш учун» Султонали мирзодан изн олиб чиқди.

Кишининг охирғи кунлари, кўчада қора совуқ билан изғириқ юрар эди. Тўққуз-ўн кунлик ой шаҳарнинг қоқ устида чети қорайған сариқ баркашдек ялтираб турар эди. Маҳалла болалари эшикма-эшик юриб — «Барот келди, билдингизми, идиш-товоқ ювдингизми?» ашуласини айтар эдилар.

Анвар маҳдумнинг маҳалласига келиб етканда, киши танимаслиқ даражада қоронги тушди ва шу қаторда Анварнинг кўнглидаги қоронғилиқ ҳам кучайди, юрак уриши эътидолдан чиқиб, ўғри кишидек атрофга қарана бошлади. Бундан бирар ҳафта илгари баҳт бўйини онғқитқан бу маҳалла ҳозир шунинг зидди билан ҳувиллар; ҳаммаёқ тим қоронғи, фақат бир маҳалла устида

нурланиб кўринган ойфина унинг кўнглини ёритар, бироқ... Бироқ кажрафтор фалак¹ уни ҳам бағрида қора доги билан ўрда томонға қараб судрар эди...

Анвар ёпиқ ҳолда турған дарбоза ёнига келиб оҳис-та итарди. Дарбозани занжир кўриб, кўз ўнги қоронғи-ланди... Бир неча фурсат дарбоза ёнида қадалиб турғандан сўнг, тўғриға ўтди. Йигирма қадам чамаси юриб, кўшнининг дарбозасини итарди, буниси очиқ эди. Қоронғи йўлакка кирди. Ул маҳдумнинг хуфтангча чиқишидан фойдаланмоқчи, хуфтан азони айтилғандан кейин ҳам дарбоза очилмаса, сўнгра қайтиб кетмакчи эди. Узоқ кутишка тўғри келмади, маҳалла масжидида хуфтан азони айтилди, шундан бир оз кейин Раъно-лар дарбозаси ҳам фийқиллаб очилди.

Дарбозадан чиқсан оёқ товши Анварга яқинлаб келар эди. Анварнинг юраги арзиқиб, кўшни дарбозасининг ички томонидан очиқ табақа орқалиқ йўлға мўралар эди. Раънолар дарбозасидан чиққути тўғриға ўтиши билан Анвар турған йўлакнинг ичкарисидан ҳам оёқ товши келиб қолди. Анвар шошли, маҳдум бешолти қадам йироқлашқач, йўлакдан чиқишқа мажбур бўлди. Анвар оёғидан товуш чиқармаслиққа тиришиб, секин-секин дарбозага юриб келди. Орқадаги оёғ товушларининг узоқлаша борғанини сезиб, хотиржамъ ичкарига кириб олди. Меҳмонхона саҳнида бир оз алантублаб турғандан кейин, тўғриға — машқхона эшигига ўтди. Машқхона эшигини очар экан, орқасиға — дарбоза йўлагига қаранди.

Даричалари ёпиқ машқхонанинг ичи ҳосидлар² юргидек қоп-қоронғи, даромад ҳам ёпилғандан сўнг уй гўё лаҳад тусиға кирди. Зулумот ичидан қолған Анвар орқа-ўнггини ажратолмай бўрё устини чоғлаб бир-икки қадам юриб келди ва икки қўли билан тиззасини қучоқлаб чўнқайди. Даричалар тирқишидан тушкан ёруғлик билан зулумот бир оз кучсизланди, шунда ҳам унинг кўз ўнгги қов³ каби қоронғи эди. Ҳамма тип-тинч; қулоқ остидағи чивиллашишдан бошқа товуш эшитилмас, ора-чора узоқдан келган бола йифиси бу тинчлиқни бузғандек бўлар эди. Шу ҳолда орадан неча дақиқалар ўтиб кетди. Бир вақт ер ости дукиллагандек бўлди. Бу дукиллаш секин-секин оёқ товшиға мубаддал бўлиб,

¹ Кажрафтор фалак — этги айланувчи фалак.

² Ҳосид — ҳасад қилиувчи, баҳил.

³ Қов — кўйдирилган пахтага нисбат.

унинг қулоқлари тиккайди. Ичкаридан чиқсан бирав йўлакками, меҳмонхонағами ўтиб кетди. Анвар энтиди, меҳмонхонанинг эшиги очилиб бир оздан кейин яна ёпилди, ҳавли саҳнида яна бирав юринди. Борған сайнин машқонаға яқинлашиб келган оёқ товши билан Анвар тоқатсизланди. Эшик очилиши билан беихтиёр ўрнидан туриб кетди...

— Анвар ака.

— Мен...

Эшик очқан Раъно эди, бир-икки қадам ичкарига кириб тўхтади. Анварга озғина қараб турғач, узун нафас олиб орқасига қайтди. Анвар бу ҳолнинг сабабига тушуналмаганидек, уни чиқармай тўхтатишқа ҳам ўзида жасорат топмади. Бирар дақиқадан сўнг эшикда яна Раъно кўриниб, Анварнинг олдиға қорамтил бир нарса келтириб кўйди.

— Сизга кўрпача олиб келдим, — деди шивирлаб, — уйга аммам ва ҳоламлар келишкан, мен уларни ухлатиб чиқаман...

Раъно шу сўзни айтиб, орқасига қайта берди, эшикни боягича ёпиб, ҳужрадан йироқлашди. Аҳволга бир оз тушунган Анвар кўрпачани бўрёға солиб, устига чиқди ва эркин нафас олиб ёнбошлади. Энди Раънонинг ҳар ҳолда чиқишини билса ҳам, бироқ қачон чиқишини билмас, шунга биноан бир тавқ ўткунча кутиб ўлтуришини чамалар эди. Орадан бир оз фурсат кечканда дарбоза очилиб ёпилди. Анварнинг қулоғи тиккайиб, қаддини ростлаб ўлтуришка мажбур бўлди. Оёқ товши яқинлашди, узоқлашди ва охирда битиб ҳам кетди.

Вақт жуда қийинлиқ билан ўтар, ташқарида «тиқ» эткан товуш уни бир алланглатар эди. Бир тавқ ўтканига талай вақт бўлса ҳам, ҳамон Раъно дараксиз. Юраги сиқилған Анвар тоҳ ўлтуриб, тоҳ ёнбошлар, совуқда музлаб кеткан маҳсилик оёғини турли вазиятка солиб кўрар эди. Шу азоб ичида яна талай вақт кечти. Маъшуқа маҳбасига тушкан Анвар ўлтуриб чидалмади. Кафшини кийиб, ўрнидан турди, музлаган оёғини иситиш ва оғриққа кирган аъзосини ҳаракатлантириш учун уй бўйинча кезина бошлади. Неча вақт саҳн айланиб, яна ўлтурди. Ой ҳам бота бошлиған, чунки четдаги дарича тирқиши орқалиқ тушиб турган кучсиз ойдин изи ҳам йўқолиб, уйни қоронғилиқ босқан, теваракдан чалинганд довулларнинг «гум-гум» оҳангига ичида хўрзлар ик-

кинчи мартаба қичқириб юборған эдилар. Анвар бир оз ёнбошлагандан кейин яна ўрнидан турди, кафши-ни кийиб келиб, эшикни очди, саҳнга тушиб кўзини уқалади. Кўкда дуркум-дуркум юлдузлар сайр этар эдилар. Том бошидан ботишқа яқинлашқан ой нури аранг-аранг кўзга чалинар эди. Анвар тоза ҳаво искаб узун нафас олди.

— Зерикмадингизми?

51. ЖАСУР ҚИЗ

Кулоги остидағина айтилган бу сўз Анварни чўчитди ва ўз ёнида қўлида бир нарса кўтариб турған Раънони кўрди.

— Уларни ухлатмай чиқолмадим... Уйга кирайлик, Анвар ака.

Юраги арзиққан Анвар Раънонинг орқасидан машқхонаға кирди. Иккиси кўрпача устига ёнма-ён ўлтуришдилар.

— Китоб ичидаги хатни пайқамайсизми, деб кўрқкан эдим, — деди ярим товуш билан Раъно. — Пайқамасангиз...

— Ўзинг ҳамма гапка тушуна туриб, яна бунчалик аччиғ ёзғанинг нимадир, Раъно?

— Чунки шунчалик аччиғ ёзмасам, — деди Раъно товшида титроқ оҳанг билан, — сиз келмас эдингиз... Сиз... Сиз миrzобошилиқни яхши кўрасиз-а?

Анвар бу муносабатсиз саволдан бир оз ҳайрон бўлиб турди.

— Тушунмадим... Нима демакчисан?

— Сиз миrzобошилиқни яхши кўрасизми, деяпман?

— Яқинда миrzолиқни ташламоқчиман, Раъно?

— Миrzолиқни ташлагандан сўнг нима иш қиласиз?

— Кўқондан кетаман, саёҳат қиласман.

— Мени... мени ҳам ўзингиз билан олиб кетмайсизми?

Анвар яна тушунмади. Раънонинг юзига анча қараб турди:

— Сен... сенга мумкинми, Раъно?

— Мумкин, — деб қалтиранди Раъно. — Миrzобошилиқни ҳозирдан эътиборан ташласангиз мумкин...

Бу сўз Анварни ҳам қалтиратиб юборди.

— Нима деяпсан, Раъно?

Раъно бир неча вақт жавоб бералмай турди. Ўзини тўхтатиб олиш, ҳаяжонини тиндириш оғир эди.

— Ҳалити... ҳалиги сўзингиз чин бўлса, мен ҳам сиз билан кетишни хоҳлайман... Башарти сизга оғир ошмасам...

Анвар жим бўлиб қолди, тушига ҳам кирмаган бу таклифка нима дейишини билмай энтиқди...

— Башарти сизга оғир ошмасам, — деди такрор Раъно.

«Жасур қиз» деб ўйлади Анвар. Чиндан ҳам бу жасурона исён хотин-қизлар томонидан Худоёрнинг ҳайвоний истагига қарши биринчи кўтарилиш эди. Анвар истиқболда қанчалик мушкилот ва хатар қўрмасин, бу жасоратни хуш қабул қилишга мажбур, чунки муҳабатдан ҳам илтари йигитлик тақозоси шу эди.

Ул ўз яқинида турған қора тугунни ушлаб қаради.

— Бу нима, Раъно?

— Бу... бу сизнинг эски кийимларингиз.

— Нима учун бу?

— Башарти сиз хоҳласангиз.

Анвар паранжими, деб чамалаган эди. Мантиқсиз бу жавоб уни шоширди.

— Ҳўб, сенинг ризолифинг йўлида... — деди Анвар ярим товушда. — Меним эски кийимларим сенга нима даркор?

Раъно жавоб бериш ўрнига узун сўлиш олиб ёнидаги тугунни еша бошлади.

— Паранжи олмадингми, ахир?

— Ҳозир... — деди Раъно ва қоронғида бир нарсалар қила берди.

Паранжиси ҳам бордир, деб ўйлаған Анвар уни ўз ҳолига қўйиб турди. Бирар дақиқадан кейин Раъно ердан бир нарсани тутиб қўзғалди, паранжи каби узайған нарса ичидан «чоқ» эткан бир нарса ерга тушти.

— Топиб олинг шуни.

Анвар ерни тимискилади.

— Нима эди?

— Аямга берган амонатингиз.

Анвар тушкан нарса олтинлар эканини пайқади, узоқни ўйлаған Раънога қарши юрагида яна ҳароратлироқ муҳаббат сезди.

— Топдингизми?

— Топдим.

— Туринг энди.

Анвар Раъно билан бошлашиб ҳужрадан чиқди ва ўз ёнида паранжи ёпинган қизни эмас, телпак ва тўн кийган ёш, ўспурин бир йигитни кўрди...

— Бу нимаси, Раъно?

Раъно жавоб бериш ўрнига йўлакка қараб юра берди. Дарбозани очиб кўчага чиққандан сўнг, Анвар Раъно-нинг олдига тушиб, йўл бошлади ва ўзида енгиллик ҳис этди. Чунки Раъононинг йигит суратига кириши андозасиз маъкул; бемаҳалда паранжилик хотинни бошлаб юриш миршаб ва қоровулларда ҳам турли шубҳа туғдиргани каби, Анварнинг ўзи учун ҳам ўнгфайсиз бўлар эди. Гўё бир ўртоғи билан кетиб борғандек парвосиз кўринган Анвар, бурилишка етканда ўзидан ўн қадам орқадаги ҳамроҳини кутиб турди. Фуруби¹ яқинлашқан қип-қизил ой Анвар тўхтаған муюшга кўлага каби заиф нур сочар эди. Раъно Анвар ёнига етиб «қаёққа юрамиз», деган каби бир йўлға ва бир ҳамроҳига қаради. Соч ўрумларини телпак остиға босиб, тўни тўпуғи устига тушаёзған «ёш йигит» Анварнинг кўзига яна ҳам дўндуқроқ кўринди. Анвар Раъононинг тўнини бир оз кўтариброқ ушлатди, онда-сонда телпакдан чиқиб қолған соч толаларини яширди ва «ўнгга» деган ишоратни қилди. Раъно олдинда, ундан икки-уч қадам орқада Анвар йўлға тушдилар. Енгил бедона маҳсиси билан қала кафши кичкина оёғига жуда ҳам келишкан Раъно, гўё учкандек тез юриб борар, орқада келган Анвар гояи омолға² ошиққандек ундан қолишмасқа тиришар эди. Узоқ юрдилар. Элли қадам чамаси нарида гулхан ва гулхан теварагида уч-тўрт нафар кишилар кўриниб, Раъно тўхталди.

— Тўхтама, Раъно, — деди орқадан Анвар, — сен писанд қилмагандек, парвосиз гулхан ёнидан ўта бер, мен улар билан сўзлашиб қолсам, нарироқда кутиб тур.

— Миршаблар бемаҳалда қўймас эмиш-ку.

— Мен билан сени қўяр... Қўрқмай боравур.

Раъно иккилангансумон йўлға тушти, гулхангача ўн қадам қолғанда миршаблардан бири ҳайқирди:

— Тўхта!

Раъно Анварга қараб тараддулланди, Анвар юра беришка ишорат қилиб, тезлик билан гулхан ёнига етди. Анварни таниған миршаб ва қоровуллар таъзиман ўрунларидан қўзғалдилар.

¹ Куруб — ойнинг ботиши.

² Қояи амал — умид-мақсад.

— Қўзғалманглар, — деди Анвар гулханда исиниб,— даҳбоши ҳам шу ерда эканлар...

Анвар «даҳбоши» деб атаған юм-юмалоқ киши Қорунбой исмлик бўлиб, миршабларнинг қизиқроғи, шунинг учун ундан «даҳбоши» деб истеҳзо қилар эдилар:

— Ёнингизда бесақал билан бемаҳалда нима қилиб юрибсиз, тақсир? Одамзодга ишониб бўлмас экан-да...

Анвар, «даҳбоши»нинг кўзи Раънога тушиб қолғанини онглади. Гулхандан ўттуз қадамча нарига бориб тўхтаған «бесақал»га кўз қирини ташлади.

— Зиёфатда эдик, даҳбоши.

— Ҳа-а-а-а-а менам айтдим... Уй бу ёқда қолиб, энди қаёққа кетапсиз, тақсир?

Анвар қўлини яқиндан иситмакчи бўлиб гулхан таракфа бир қадам бости.

— Эшитмадингизми, ҳали?.. Мен Раис кўчадан... янги ҳавли олдим.

— Муборак, муборак.

Анвар қутлуғ айтиб, улар билан хайрлашди. Миршаблар унинг ҳурмати учун қўзғалишиб қолдилар.

Гулханчилардан элли қадамлаб узоқлашқач, Раъно Анварнинг етиб келиши учун йўл устида тўхтади.

— Нима деяпти у гўрсўхта?

Анвар ҳиринглаб кулди ва Раънонинг елкасига қоқди:

— Юр, юр, йигитча. Гўрсўхта тўғри айтяпти.

— Етаёздиқми, қаерға борамиз?

— Яқин қолди, кечаги хотиннинг уйига...

Раъно олдинға тушиб кетди, узоққина сўзсиз борғандан кейин орқасиға қайрилиб сўради:

— Ўзлари яхши одамларми?

— Яхши, яхши, — деди Анвар ва ўн қадам чамаси индамай борди. — Сен уй егасидан қочиб ўлтурма, ўзи меним оғам... Тузукми, Раъно?

— Хўб.

Яна бир оз юриб торроқ бир кўчага бурилдилар. Султоналиниң дарбозасига еткунча иккиси ҳам оғиз очиб гапиришмадилар.

52. ДЎСТЛИҚ «КАРОМАТИ»

Эрталаб хоннинг ҳарамдан чиқиш вақти яқинлашкан, салом ва истиқбол учун хослардан саккиз-тўқкузи йиғилған эдилар. Шу кутиш асноси эшикда ҳовли-

қиб Султонали кўринди. Қора бармоги билан хослар ичидағи Абдурауф тунқотарни ўз тарафига имлаб, орқасиға қайтди. Абдурауф тунқотар ажабланган ҳолда даҳлизга чиқиб, ўзини четка олиб турған Султоналига, нима гап, деган ишоратни қилди. Султонали лабини тишлаб, қўли билан тунқотарни ўз ёниға чақирди. Тунқотар маҳсичан оёғини ерга босиб Султоналиниңг ёниға келди.

— Хўш?

Султонали бошини икки елкасига ирғатиб, лабини тишлаб олди.

— Мирзобошимизнинг миси чиқиб қолди-ку.

— Хўш, хўш?

Султонали тунқотарнинг қулоғи остиға энгашти ва ярим товуш ичидаги деди:

— Мирзо Анвардан онҳазратка номуссизона бир хиёнат содир бўлди.

Тунқотар бошини қўйироқ тушуриб, Султоналиниңг афтига эгри қаради:

— Масалан?

— Мирзо Анвр уч-тўрт кундан бери меним ҳавлимда қўниб юрар эди, — деди Султонали ва сўз ораси ўёқ-буёқса қараб қўйди. — Чамаси устозига бир хиёнат қылғандан кейин меним ҳавлимда ётиб юрган экан... Ўз устозини билмаган бу беладар, олампаноҳнинг ҳам бетларига оёқ қўйишидан тоймай, мазкур устозининг қиблагоҳ учун мувофиқ кўрилган қизини йўлдан оздириб, бу кун кечаси уни қочириб меним ҳавлимга олиб келди... Гарчи ўз ҳавлимда ётқан меҳмоним ва дўсти қадрдоним бўлса ҳам, валинеъматимнинг ҳаққи на-макларини унуткан бу беҳаёнинг андишасизлигидан ҳар мўйим бир ништардек кийимимдан тешиб чиқаёзди. Унинг йигитлигига тилда таҳсин ўқуб, ичдан лаънат айтиб, жанобни хабардор қилиш учун югуриб келаётқаним-да бек ака.

Тунқотарнинг кўзи қинидан чиқаёзид, бир-икки қайта соқолини қўли билан букиб ямлади.

— Падар лаънат. Ўзи ҳозир сизнинг уйингизда?

— Ҳа, ҳа... Қиз ҳам шунда. Ҳанобнинг раъйларини билиш қийин-ку, бироқ менга қолса, вақт қочирмай уни ҳозироқ кўлға олиш керак-да.

— Бўлмаса-чи, — деди тунқотар елкасини қисиб, — мен ҳозир арз қиласай. Раҳмат сизга.

Тунқотар ҳузури хоска кириш учун шошилди. Сул-

тонали хоннинг «ҳаққи намагини» бенуқсон адо қилиб, хотиржамъ девонға қайтди. Анварнинг энг содиқ кишисининг охирғи «каромати» ниҳоят шу бўлди.

Кўб фурсат ўғмади. Девоннинг даричаси ёнига келган тунқотар Султоналига чиқ ишоратини қилиб, ўзи нарироққа кетди. Ҳовлиққан, энтиккан Султонали оёғини онда-сонда ташлаб, девонхонадан чиқиб келди.

— Марҳамат?

— Ушлашка буюрдилар.

— Айни каромат, — деди Султонали. — Иккисини ҳам албатта?

— Албатта.

Ёнига тўрт нафар ясовул олиб, Султонали йўлға тушти. Ташқи дарбоза ёнига қантарилған отлардан бирисига миниб, тунқотар ҳам уларнинг изига кирди. Озғина юргандан кейин, тунқотар яёвлардан ўзди. Унга етиб юриш учун Султонали ва ясовуллар елиб бордилар. От билан баробар югуришар, озғина кейинда қолсалар, отлиқ тунқотар тез юришға қистар эди. Шу йўсун ҳаллослашиб, узоқ чоптилар... Бурулишқа етканда Султонали бир оз сустланиб, ўзидан ўн от адими йироқда борған тунқотарни чақириб тўхтатди ва қўлини ўнгга силтади. Тор қўчага кириб кетдилар. Уч дақиқа чамаси елгандан сўнг, Султоналиниң дарбозаси кўринди. Султонали тўхтади...

— Ўша кўриниб турған дарбоза... Озғина таҳаммул қилинсин-чи, бек почча, меним киришим яхши бўлмас, дейман?..

Тўрт адимча олдинда борған тунқотар отнинг жилавини тортди.

— Нима учун?

— Меним дўстлиқ отим бор... Мен четроқда турсам маъқул бўлмасми?

— Маъқул, маъқул.

— Раҳмат... Дарбозадан кирсангиз меҳмонхона бор; ул шунда бўлса керак, қиз эса ичкарида эди.

Султонали шу сўзни айтиб, ўзини қаршидағи дарбоза йўлагига олди. Тунқотар йигитлар билан дарбозага қараб кетди. Дарбозанинг ҳар икки табақаси ҳам лангиллаб очилған, ичқари тарафдан хотин ва ер кишининг сўзлашкан товушлари эшитилар эди. Тунқотар отдан тушиб жилавини ясовуллардан бирининг қўлиға берди:

— Сен от билан шу ерда турасан, дарбозадан на

хотин ва на эркак кишини чиқармайсан, — деди тунқотар. — Сиз йигитлар, мени орқамдан кириңгиз, Анварни күрганингиз он ҳеч нарсага қарамай, қўлини боғлангиз.

Ясовуллар садоқат нишони кўрсатдилар. Тунқотар уч-тўрт қадам ичкари юрди ва йўлак даромадида тўхтаб ичкарига қулоқ солди. Ичкаридан эр ва хотин сўзлари-ни эшилди.

— Шарманда бўлдим, расво бўлдим!..

— Шарманда бўлиш ҳеч гап эмас, — деди ичдан тунқотар.

— Вой шўрим қурсин!..

— Албатта шўринг қуруйди, моча!.. — деди тунқотар.

Тунқотар, йигитларга «орқамдан» ишоратини қилиб, бирдан саҳнга чиқди... Саҳннинг ўртасида қўлида бир қоғоз ушлаб, бошини қуий солған Солиҳ маҳдум турар эди. Маҳдумнинг ёнида икки киши, улардан берироқда паранжилик уч хотин қадалған эдилар. Тунқотар ва ясовулларнинг шарпаси билан ҳамма чўчиб кетди. Маҳдум қўлини бир-бирига уриб, оҳ чекти:

— Шарманда бўлдим, расво бўлдим!

Тунқотар шошиб, олпонғ-толпонғ маҳдумнинг ёнига келиб етди.

— Нима гап?

Маҳдум шарт этиб, пешонасиға уриб, йиғлади:

— Сўзлагали тил йўқ... Жанобнинг олдиларида шармисор, ғазабка сазовор бўлдим... Эрталаб уйғонсак, беспадар ожизамиз йўқ... Саросима ўён-буён югуриб турғанимизда, миরзо Султоналиникуидан, қизингиз бизникида, деган хабар борди. Биз аёллар билан югуришиб келсак, бир онда...

— Хўш, хўш?

— Ҳаромзода Анвар уни йўлдан оздириб, бу ердан ҳам олиб қочибдир... Ҳарчанд ичкари ва ташқарини излаб, ушбу хатдан ғайри асар топмадиқ... Эвоҳ!

Хотинларнинг биридан йифи товши эшитилди. Тунқотар маҳдумнинг қўлидаги хатни юлқандек ўз қўлига олди.

«Иzzатлик миরзо Султонали оғамизға! Маълум бўлсин-ким, синглингиз билан маслаҳатлашиб ўз ҳаётимиз учун сизникуда туришни хавфлик, деб ўйладиқ. Гарчи дўст кўринсангиз ҳам, баъзи нолойиқ ҳаракатларингиз бизни шубҳага солди. Айниқса, хотинингизнинг Раънога бузук

қиз билан қылған каби мұомаласи яна бизни хавотирға тушириди. Шуларга мабни¹ алдаған каби сизни ўрдаға жүннатишқа, сиздан сүңг үйингиздан кетишікә мажбур бўлдиқ. Дунёда дўсти содиқни топиш қийин экан. Сизга ҳарчанд: «Мен ошиқман, қиз маъшуқамдир, олампаноҳка қылған бу хиёнатим ёлғиз ўз тарафимдан содир бўлған жиноят эмас», — десам ҳам сиз «Ёшлиқ қилибсан, мар-ҳаматлик подшоҳинг ҳақини унудибсан!» дейсиз. Лекин сиз шу қиз йўлида ҳатто бош муншийликдан ҳам кечиб турғанимни ўйламайсиз. Бунинг учун мен сиздан ранжи-майман. Аммо сизни инсон фаҳмлаб, үйингизга дўст олиб келганда бу қадар тундлиқ, бу қадар риоясизлигиниз кишига қаттиғ таъсир қиладир. Ичкарида ҳатто қиз бечоранинг бошиға ёстиқ ҳам бермаганлар. Баракалла сизга, баракалла янгамизга, баракалла одамгарчиликка!..

Аддои дўстингиз Анвар»

— Одамгарчиликни ҳам билади, бу туз кўр қифур!— деди заҳарханда ичида тунқотар ва хатни букиб ёниға солди. — Ичкаридан мирзо Султоналининг хотинини чақириб беринглар-чи!

Хотинлардан бири ичкарига қўзғалди. Рузвон йўлакда турған бўлса керак, хотин ички эшик ёнида тўхтаб, йўлак билан сўзлашди. Тунқотар эшик ёниға келди.

— Сиз шундамисиз, янга?

— Ҳа, айланай.

— Сиз бу гаплардан нима биласиз?

Рузвон эшик панасиға яшириниб, бир оз жавобсиз турди ва бир-икки томоқ қириб қўйди:

— Уч кундан бери мирзо Анвар отлиғ йигит бизнинг меҳмонхонада ётиб туарар эди, айланай... Шу йигит бу кун ярим кечада бир қизни бошлаб келди, мен ҳайрон бўлиб мирзонгиздан сўрасам, шундай-шундай гап... Жуда хафа бўлиб кетдик-да, айланай. Кет дегали юз чидамайди, киши чақирғали яна вақт эмас; ми-рzonгиз билан кенгашиб, эмди ҳарчи эрталабгача жой берайлик, тонг отса, буларнинг татиғини бергувчилар топилар-ку, ахир, дейишдик. Тонг отди, мирзо Анвар у кишига: «Мен бунда яна бир кун турман, шунгача бизни эҳтиёт қилсангиз бўлади», деган эмиш. Ми-рzonгиз шошиб ўрдаға кетди, у кишидан кейин мен ҳам тинч ўлтуралмадим, айланай. Қўшнимизнинг боласини қизнинг уйига чоптиридим. Бир вақт мен билан

¹ Мабни — биноан.

сандалда ўлтурган қыз уйдан чиқди, мен ташқарига чиққуси келдими, деб бепарво ўлтурабериппан, айланай... Шу чиққаны билан қайтиб кирмади-күйди. Күнглим ғаш тортиб, ҳавлига чиқиб қарадим. Йўқ, ташқаридамикин деб шу турган жойимға келган эдим, ўёқдан булар келишиб қолди... Бўған гап шу, айланай!

Тунқотар афсус чекиб маҳдумнинг ёнида турған кишиларга яқин келди.

— Сизлар нима қилиб юрасиз бу ерда?

— Биз... биз мирзо Султоналиниңг қўшнилари бўла-миз.

— Жуда яхши, хизмат?!

Тунқотарнинг кариҳ¹ бу муқобаласидан кишилар сиқилиб қолдилар.

— Мен кўчада эдим, — деди бириси қўрқа-писа,— ўёқдан домла билан аёллар келиша берди... Аёллар йиғлашқанға мирзонинг уйида бир гап бўлғанми, деб...

— Текин томошачиман, дегин... Хўб, сен-чи?

— Мен ҳам мирзо Султоналига қўшни бўламан, — деди иккинчи киши: буниси ўзига бир оз тетикроқ эди. — Бироқ мен, сизларнинг гапларингизни эши-тиб, бир нарсага ҳайрон бўлиб туриппан-да.

— Мен шунга ҳайрон бўляпманки, янгамнинг сўзига қарағанда, мирзо Анвар ўз ёнида паранжилик хотин билан чиқиб кетса керак эди... Боя мен уни дарбозадан чиқиб борғанида қўрдим, ёнида хотин-потин деган гап йўқ эди.

— Ёлғизмиди?

— Ёлғиз-ку эмас эди, бироқ ёнидағиси аёл эмас, дўндиққина бир бесақал эди.

Тунқотар қўшнининг сўзига тушунмади, елкасини қисиб қўйди.

— Сиз аниқ кўрибсиз, Карим aka, — деди у ёқдан Рузвон. — Қиз кечаси келганида ҳам эркак кийимида эди.

— Об, падар лаънат! — деб юборди тунқотар.

Устиға тоғ афдарилған маҳдум бошини яна қуйироқ-қа солиб, ҳўнгир-ҳўнгир йиғлади.

— Бўлар иш бўлған... — деди тунқотар атрофига хитобан, — улар-ку, албатта, қўлға тушиб жазосини топар, бироқ жанобнинг шаънларига жуда оғир гап. Биноан алайҳ, шу ердаги сирга воқиф бўлғанларнинг

¹ Кариҳ — ёқимсиз, хунук.

вазифаси бу ҳодисани кишига сўзламаслик, кўрган-кечирганини шу ерда қолдириб кетишлик!

Кишилардан: «Албатта, албатта!» деган жавоб бўлди. Сўнгра тунқотар маҳдумнинг ёнига келди.

— Сизда гуноҳ йўқ, бироқ қиз ўсиришни билмас экансиз.

— Бандамиз, бандамиз, — деб йиғлади маҳдум.— Илоҳи жувонманг бўлсин, мени ерга қаратди.

Паранжидаги хотинларнинг бири бўлған Нигор ойим пиқ-пиқ йиғлади. Тарбузи қўлтуғидан тушкан тунқотар ясовулларнинг олдиға тушиб, тарс-турс кўчага чиқди, йигитлардан бирининг кўмагида отқа миниб, жилавини кўйди. Султонали яширинған дарбозага етканда йўла-кай чақириб ўтди:

— Мирзо Султонали, чиқинг. Қочқан, падар лаънатлар!

Султонали кўзини катта очиб, дарбозадан чиқди.

— А, чинми?

— Қочқан, — деди тунқотар хатни Султоналига узатиб, — ўқуб, яна менга қайтаринг, жанобга ҳам кўрсатишимиз керак...

... Султонали шу ҳодисанинг иккинчи куни хонға қилған садоқатининг самарасини ҳам кўрди, яъни бош мунший бўлиб белгиланди.

53. ЧАЁННИНГ НАМОЙИШИ

Бу кеч масжид хужраси яна обод, катта шамъни тоқчаға қўндириб, очиқ танчага писта кўмир солиб, маъюс, бир-бирига ёнма-ён ўлтурғучи икки муфти қўлларини оловға товлар эдилар. Ҳужранинг тўрдаги тоқчасига беш-олти дона қалин муқовалиқ китоблар терилган, уларнинг варақ тахида — «Шарҳи мулло Жомий», «Ақоиди маъалҳавошӣ», «Ҳикматул-айн», «Алвиқоя», «Сияри шариф» каби сўзлар ёзилған эди. Кун ботиш тоқча деворига гул равишида туширилган дуо ёки шунинг каби муқаддас қалималар ёзиғлиқ бир қоғоз ёпиштирилған. Сирлар билан турланган қозиқларнинг бирига бева хотиннинг декчасидек бир салла илинганди.

Шаҳодат муфти касавни олиб, чўғни титди ва кенг кўкрагини шишириб нафас олди.

— Ажаб бедаво дард-да.

Калоншоҳ мирзо бошини ирғатиб кўйди.

— «Сўйган ёрим сен бўлсанг, кўрган куним не бўлғай», — деб давом этди муфти. — Улуламир қадрношунос бўлғандан сўнг қийин экан. Шу оқладарнинг кўл остида ишлагандан девонни ташлаб кеткан беҳроқ.

— Сабр қилинг, домла, сабр: «Инналлоҳа маъассобирин».¹

— Албатта... Ва лекин Султоналидек бемаънига бош эккандан, ҳар рўз ўн таёқ еган яхши.

Хуфтани ўқугандан сўнг таҳорат янгилаб юргучи мулла Абраҳмон ҳужра эшигида кўринди. Кичкина ховонча бошидағи оқ тепчима тўппи ва қора узун соқоли уни ҳиндиларнинг савдогари қиёфатига қўйган эди. Мулла Абдураҳмон ичкари кириб, қозиқдағи саллани оқ тўппи устидан кийди.

— Мен жанобларнинг сўzlари билан уйга овқат буюрмадим-а?

— Лозим эмас, биз уйдан овқатланиб келганмиз.

Мулла Абдураҳмон танча ёниға келиб ўлтурди ва ер остидан Шаҳодат муфтига қараб илжайди.

— Шундай қилиб, мирзо Анварни қиз билан қочирдингиз?

— Қочириш бўлса, қочирдиқ ва лекин қордан кутублиб ёмғурға тутилдиқ, мулла Абдураҳмон.

— Мен эшитдим.

— Куллу явмин батар² — буниси ундан ҳам қабиҳроқ бўлди... Беш кундан бери юраклар зардобка тўлди, мулла Абдураҳмон, — деди муфти. — Кеча бизникига йўқлаб борған экансиз. Сиз кетибсиз, мен келибманда; кўб афсус қилдим. Бу кун мулла Калоншоҳни олиб, сиз билан суҳбатлашиб қайтайлиқ, деган ниятда...

— Қуллуқ, тақсир қуллуқ, — деб мулла Абдураҳмон қимиirlаб ўлтурди. — Мен Анвар билан Султонали мажаросини фақат кечада мирзо Боисдан эшитдим. Бу тўғрани аниқроқ билиш учун жанобингизнинг хизматингизга борғаним эди... Хўш, ҳаводис нима?

— Ҳаводисми? Қани сўзланг-чи, мулла Калоншоҳ.

Калоншоҳ, сўзлай беринг, дегандек Шаҳодат муфтининг ўзига ишорат қилди. Шаҳодат муфти кўзини юминқираб, ҳаводисдан³ саҳифа очди:

— Ҳаводис шулки, Анвар борасиға сизнинг олған

¹ Оллоҳ сабр қилғучилар билан биргадир (Оят.) (муал.).

² Куллу явмин батар — кундан-кун баттар.

³ Ҳаводис — ҳодислар, воқеалар.

нишонингиз жиддан тўғри тушиб, биз куткандан ҳам зиёдроқ самарага эришкан, яъни мағур гўдагимиз қизни олиб қочқан...

Мулла Абдураҳмон ҳакимона илжайди, Шаҳодат муфти давом этди:

— Чамаси, нисфи шаб-ярим кеча асноси, дўстим, деб ёнида қиз, Султоалининг уйига келган. Султоали тонг отқунча икки гўдакнинг қўйини пуч ёнгоққа тўлатиб чиққан, эрта билан улар уйқуда ётқанда, Султоали ўрдаға югуриб келган; воқиъани тунқотарға сўзлаб, тунқотар хонға йўлиқиб, хоннинг буйруғи билан ёнлариға ясовуллар олиб келсалар, ошиқ-маъшуқ йўқ, улар жойида Султоалига аталған бир сабнома¹ бор... Чамаси, Султоали аблажлик қилиб, Анварни бад олдириб қўйған ва тонг вақти, улар уйқуда экан чоқда фойиб бўлиб, яна шубҳани ортдирған бўлса керак. Султоали Анвар билан қизни тутиб бералмаса ҳам, баҳархол хонға яхши кўриниб, Анварнинг ўрнини олишқа мувваффақ бўлди. Барча ҳаводис мана шундан иборат.

Абдураҳмон ҳикояни эшиткандан кейин, бир неча вақт сўзсиз ўлтурди. Танчадаги оловни тузатар экан, ер остидан муфтиларга қараб илжайди.

— Мирзо Бойсдан ҳам шу маолни² эшиткан эдим, — деди ниҳоят. — Жанобларнинг фикрлари балки тўғридир, аммо мен бу маолдан бир оз шубҳа қиласман...

— Яъни, масалан?

Абдураҳмон қўлини ўйнаб, яна бир оз сукутда ўлтурди, сўнгра лаби оҳиста-оҳиста очилиб юмила бошлади:

— Бу ҳаммаси Султоали билан Анварнинг ўйунидир, деб ўйлайман... Бу андишамга бир неча сабаблар ҳам бор. Жаноблардан махфий эмасдирким, биз ўзаро қандай яқин бўлсак, Султоали билан Анвар ҳам ўзаро шундай қалин дўст эдилар. Бинобарин, ақлға «қарға қарғанинг кўзини чўкур эканми?» деган савол келадир; жаноблари шу борани қандай тушундилар экан.

Шаҳодат муфти Калоншоҳка қараб қўйди, Калоншоҳ парвосизроқ кўринар эди. Орада яна бир неча вақт сукут ҳукм сурди.

— Султоали сармунший бўлиш учун дўстидан кечса ҳам мумкин, — деди муфти. — Иккинчи тарафдан, сизнинг фикрингиз ҳам эҳтимолдан баъид³ эмас.

¹ Сабнома — сўқиб, таҳқир қилиб ёзилған хат (муал.).

² Маал — мазмун, маъно.

³ Баъид — узоқ.

— Султонали дўстидан кечмай туриб ҳам бу найрангни қиласа мумкин эмасми, домла? — деб кулди Абдураҳмон. — Масалан, хон олмоқчи бўлған қизни қочирғучи Анвар икки бошдан-ку, қайтиб сармуншӣ бўлолмайдир, бошқа тарафдан, хиёнаткор дўсти бўлиб танилған Султоналининг ҳам ҳаёти таҳлика остида турдир... Бас, шу ҳолда бу найранг тўқилған бўлса, яна тўғриси, шу ҳийлани Султоналининг амнияти талаб қилған бўлса, сиз билан мен ғайраз қандай мантиққа сяяна оламиз?

Шаҳодат муфти ўрнидан турди, Абдураҳмоннинг ёнига келиб орқасини қоқди:

— Раҳмат, ўғлим, раҳмат. Сени түққан онангға ва ўқутған устозингта раҳмат.

Абдураҳмон ерга қараған ҳолда илжайди. Шаҳодат муфти унинг ақлиға таҳсин ўқуй-ўқуй, нос чакиб, ўз жойига ўлтурди.

— Мулла Калоншоҳ-а, шу гап бизнинг ақлимиизға асло келмабти-да?

Шаҳодат муфтининг хурсандлигига қўшулмай, тунд ўлтурғучи Калоншоҳ, парвосиз қўлини оловға иситди.

— Мен шу андишани ҳам қилған эдим, — деди бир оздан кейин Калоншоҳ, — лекин ақлим бовар қилмаған эди ва ҳозир ҳам бу фикрга қўшула олмайман.

— Сабаб?

— Боис шулки, Султонали Анварга суюқасд қилмағанда ҳам унга ҳеч гап йўқ эди. Аммо ул хонға қаробат¹ ҳосил қилиш учун азтаҳидил Анварнинг қасдиға тушканким, бунда шубҳа йўқ.

Ўзгалар тарафидан сўзланган фикр ёки баҳс ҳар қанча мантиқий бўлғанда ҳам Калоншоҳнинг қарши чиқиши феъли бор эди. Унинг бу феълига яхши тушуниб қолған Шаҳодат муфти бош чайқади.

— Биз янгишамиз.

Калоншоҳ яна юқоридағи сўзини такрорлади:

— Бачи маъни янгишамиз? Мулла Абдураҳмоннинг ўзи ҳам ўйлаб кўрсинг, башарти Султонали дўстлик юзасидан Анварни қочириб юборғанда ҳам унга ҳеч бир зарар йўқ эди. Бас, Султоналининг ҳамма ҳаракати тўғри, Анварга хиёнат қилиши мансаб умидида эканлиги шубҳасиз.

Орада ўз фикрига қарши шунча раддия ўтса ҳам

¹ Қаробат — яқинлик.

парвосиз, гүё муроқабада¹ ўлтурғучи мулла Абдураҳмон яна илжайиб бош кўтарди.

— Султоналиниң Анвар билан ати-қатилиғи ўрдада ҳар кимга маълум-ку, домла. Башарти ўз уйидаги турған Анварниң хиёнати тўғрисида ўзини тағофулға солса, мардумнинг кўнглиғи нима гап келар эди, айниқса, жанобларингиз қандай андишага тушар эдингиз... Ожизниң фикримча, ул найрангбозлар бир ўқ билан неча күшни урганлар, масалан, жанобга Султоналиниң садоқати зоҳир бўлди, сармуншийлик вазифасига беозор ўлтуриб олди ва учунчидан, мардум кўзини бўяди.

— Баҳарҳол... баҳарҳол Анварга қарши чиқмағандаги ҳам Султоналини на хон на биз айблай олар эдик.

— Ҳўш?

— Ҳўш-пўши йўқ, — деди қизишиб қолған Калоншоҳ — биравнинг устига айб қўйиш учун, шаръан шоҳидлар лозим, даъвони исбот қилиш керак... Ҳаххах-ҳах, сен фалончи гуноҳкор билан дўст эдинг, деб кишини айлаш. Масалан, ушбу даъвони қилғучи ўзингиз ҳам уларнинг маслаҳати устида бўлмағансиз; фақат шундаймикин, деган мулоҳазада сўзлайсиз, ҳолбуки, сизнинг сўзингизнинг шаръан тўрт пуллик қиймати йўқ, ука...

Калоншоҳ жуда қизишиб кетди, «шаръан сўзингизнинг тўрт пуллик қиймати йўқ, ука» таҳқири билан мулла Абдураҳмон ҳам бўзариб олди.

— Меним сўзим бир мулоҳаза, тақсир, мулоҳаза шаръан исботка буюрилмаған. Ҳоказо, ўзингиз айтканча, гүё маснад² учун жон отиб юрган Султоналиниң зоҳир³ ҳаракатига ҳам ишониб бўлмайдир.

— Шунинг каби, сизниги ҳам вусук⁴ йўқ.

— Мен айтаяпман-ку...

Жанжалниң каттага кетишини фаҳмлаган Шаҳодат муфти Абдураҳмоннинг сўзини бўлиб, ораға тушди:

— Баҳс нима ҳожат? Мулла Калоншоҳники ҳам тўғри, сизники ҳам ҳақиқат... Аммо ҳозирги масаламиз қайси фикр тўғрилиғи устида эмас, қайси йўл билан Султоналини бу ўрундан олиб ташлаймиз борасида.

Кўб йиллардан бери бирга юриб, ўз руҳига тушуниб

¹ Муроқаба — мушоҳада қилиш.

² Маснад — мартаба.

³ Зоҳир — ошкора, очик.

⁴ Вусук — ишонч.

қолған Шаҳодат муфтининг бу сўзи билан Калоншоҳ озғина ёриши.

— Ана бу бошқа масала, — деди, — мулла Абдураҳмоннинг фикрини тўғрими, эгрими, суриштирумай, унга фақат бир тадбир деб қарасангиз бу бошқа гап, аммо маҳзи ҳақиқат¹, деб билиш бус-бутун хато.

Шаҳодат муфти бу масалани ёпиб, иккинчи тарафка ўтишка шошилди. Чунки Абдураҳмон яна бир илжайиб икки оғиз сўз айтса, Калоншоҳнинг оғзини тикиш оғир ошар, Шаҳодат муфти буни яхши онглар эди.

— Ҳалос, ҳалос, — деди муфти, — менда воқиъ ҳологи фараҳ² ҳам фақат шунинг устида, йўқса, илми ғайбни³ ким билибдир. Аммо мулла Абдураҳмон мулоҳазасининг қиймати шундаким, Султонали муаммосини тез ҳал қилса бўлур.

Муфтининг сифориш⁴ сўзлаши билан Калоншоҳ жуда ҳам ўзига келиб қолди ва «ҳалли қандай» деб ёвошқина сўраб ҳам қўиди.

— Ҳалли осон, жуда осон, — деди муфти. — Биз мулла Абдураҳмоннинг мулоҳазаси айни билан жанобга бир ариза ёзамиз, холос.

Мулла Абдураҳмон намойишкор Калоншоҳқа қараб, ўнг қўли билан манглайини қашиди... Аммо Калоншоҳ қаноатланмагандек қилиб буш чайқади.

— Ҳон Султоналиниң садоқатига қаноат ҳосил қилған, яна шу ҳолда бу аризага ишонардирми?

— Агар ҳақиқатни айтилса, ҳон ўзидан бошқа ҳеч кимга эътимод қилмайдир, — деди муфти, — хайр, Султоналига эътиқод қўйған ҳам бўлсин, яна бу тақдирда ҳам биз аризани ёза берамиз. Нега? Агар ишонса, Султоналини ўрдадан ҳайдар, ишонмаса, яна бизга нима зарар; бу гап сизга қандай ўхшайди, мулла Абдураҳмон?

Абдураҳмон кўзини катта очиб, тўғри топқан каби буш иргатди.

— Аризамиз ўрунласа кўб яхши, билъакс, ўрдадан ўзимиз ҳайдалурмиз, — деди Калоншоҳ.

— Нима учун? — деб сўради муфти.

¹ Маҳзи ҳақиқат — фақат тўғри гап.

² Менда воқиъ ҳологи фараҳ — мендаги ҳалиги хурсандлик.

³ Илми ғайб — гойибни билиш, келажакда бўладиган воқеани олдиндан билиш. Бу хусусият фақат Оллоҳга косдир.

⁴ Сифориш — меҳрибонлик, ҳурмат.

- Ахир аризани ким берганлиги маълум-ку.
 - Йўқ, — деди муфти. — Биз ариза остига имзо қўймаймиз, Калоншоҳ.
 - Имзосиз ариза мұттамад¹ бўлмас.
 - Мұттамад бўлсин-бўлмасин бизга нима зарар; баҳарнавъ шу эҳтимолни хоннинг қулоғига еткарсак бас-да, Калоншоҳ.
 - Кимнинг дастхати билан ёзасиз?
 - Бу осон, сиз бунисидан хотиржамъ бўлинг, Калоншоҳ!
- Калоншоҳ ноилож ариза ёзишқа роғиб² бўлди. Аризанинг шу мажлисда, мулла Абдураҳмон ҳузурида ёзилиши мувофиқ кўрилиб, муфти таҳрирга ўлтурди.

54. ИККИ ХИЛ САДОҚАТ

Кечаси ёмғур савалағандек ёғиб турадир... Қоп-қоронги, олти қаричлиқ тор кўчанинг муюшида турған бир кўлага ёмғурдан қочқан каби, кичкина эшик панасиға сиқилған ва зўр бериб эшикни қоқадир.

- Ким?
- Мен, очинг.
- Сафармисан?
- Ҳа.
- Эшик занжири «ширқ» этиб кўтарилиди. Ёмғурда бўккан Сафар ўзини торфина, олди очиқ йўлакка олиб, эшикни занжирлади.
- Тинчликми?
- Тинчлик, — деди эшик очқан кампир. — Нега кеч қолдинг, Сафар?
- Ёмғурни кўрмайсизми...

Сафар кампирнинг орқасидан сўзланиб саҳнга чиқди. Тор саҳннинг йўлак қаторида, тўрт бўйра эни катталитига ости бир қаричқина ердан кўтарилиб ишланган каталак айвоннинг тўр тоқасида қора чароғ сасиб ёнадир. Сандалнинг бир чеккасида ғўза суғуриб ўлтурғучи бир кекса кўр киши кўлидаги ғўза пўчоқ ва суғурған пахтаси билан бошини баланд кўтариб ҳавлидаги сўзга қулоқ солиб турадир. Сандалнинг иккинчи тарафида, юзини рўймоли билан яширган, хотинми, қизми — ўлтуриб, сандалнинг учунчи томонида, бир тўда чиқарилған пахта орасида чиғириқ кўринадир...

¹ Мұттамад — ишончли.

² Роғиб — мойил.

— Ойим қизим бизни жудаям уялтириди, Сафар, — деб сўзланди кампир. — Шунча қайтарсақ ҳам бўлмайди, эрта-кеч отасининг ёнида фўза суғуришади.

— Синглим зериккандир-да, опа, — деди Сафар. — Эсон-омон ўлтурибсизми, почча, ассалом алайкум.

Кўр киши бошини яна ҳам баландроқ кўтариб, икки тарафка чайқади.

— Ваалайкум салом... Ҳа, нега жим бўлиб кетдинг, Сафар? Мулланинг олдига кирақо, ёмғурда ивидингми, хўб.

Сафар танчадаги юзини яширгучига қарамаслиқда тиришиб даромади айвондан бўлған ҳужра эшигига чиқди.

— Эски ҳикояларингизни сўзлаб, опамни зериктирмай ўлтурибсизми, почча?

— Ҳа, ҳа, — деди кўр киши, — қизимнинг ўзиям ҳикояга жуда уста экан-да, дам мен ҳикоя айтаман, дам ойим қизим айтади: асти қўйсанг-чи бизни, Сафар.

— Бали, бали.

Сафар ҳужранинг эшигини очиб, ичкарига кирди. Сандал устига қора чароф кўйиб, олдига китоб ёзған Анвар Сафар бўзчининг истиқболига қўзғалди.

— Ўлтуринг, ўлтуринг, шу ишингиз ёмон-да, мирзам... Саломатмисиз? Зерикмадингларми? Уч кун кечикдим-а. Мендан хафа бўлған чиқарсиз-ов... Ҳа деганда у ёқдан хабар бўлавермади, унинг устига аёллар навқасланиб¹ қолди...

— Зарари йўқ, тоза ивибсиз, Сафар ака. Асли бу кун ҳам чакки овора бўлғансиз.

— Жаззаси чопонни солиб ташлаш-да, мирзам, — деди Сафар чопонини ечиб. — Қани ўлтуринг... Юртда тинчлик, ёр-дўстдан сизга салом, мирза оғайнингиз хотиржамъ мирзабошлиқни қилаяпти... Мен бўлсам, сенгаям бали, устозинггаям бали, деб юрибпан.

Анвар илжайди. Сафар бўзчи сандал ёнига ўлтуриб, маҳсисининг қўнжидан бир қофоз олди. Анвар қофозни ундан олиб сандал устига кўйди. Қозикда осилған чопонини келтириб, Сафарнинг яхтакчан елкасига ёпти.

— Шамоллайсиз, Сафар ака, ўраниб ўлтуринг.

— Ҳамма вақт койиб қофансиз-да, мирзам, — деди Сафар ва устига ёпилған бекасам чопоннинг астар-

¹ Навқасланиш — ҳолсизланиш, дармонсизланиш, касалга чалиниш.

аврасини текширди. — Тоза яхтак киймаган эдим, бүннегиз менга увал-да, ука, — деб сиқилинқиради.

Анвар ўлтурап экан, эътиборсиз кўл силкди ва сандал устидан хатни олиб очди:

«Баланд мақом, лойиқи эҳтиром, буродарим мирзо Анвар.

Дўстлар шод, душманлар ғамгин, явми саодат¹ яқин-дир. Фалак қажравлиги аҳли салоҳ² устига ҳар рўз ҳар ранг³ жавр туғдирса ҳам, ба ҳамаҳол⁴ лайли залиманинг⁵ явми навираси⁶, риёзати қавиянинг⁷, ажри азимаси⁸ бордир. Жаноби сарвари коинот,⁹ мушриклар¹⁰ шарридин¹¹ сақланмоқ учун ўзларини гор паноҳига олған эрдиларким,¹² бу амсолингиз¹³ каби уммати ҳақиқийларға¹⁴ суннат бўлди. Баъда, камина дўсти хосдин¹⁵ арзи ихлос¹⁶ шудирким, барча тадбирларимиз шоҳи мажнунга¹⁷ ва гайри ашқиёға¹⁸ баайни афсун каби таъсир қилиб, ўткан хатда ёзған мулоҳазаларим хаёлдан ҳақиқатка ошмоқда. Каминага хоннинг эътиномоди ёндошмоқда ва ул андишаларимиз эҳтимоли биздин узоқлашмоқдадир. Можаро бир неча кун сир бўлиб кечса ҳам, алҳол ўрдадин баъзилар бу сирга воеиф бўлғанға ўхшайдирлар, маъаҳозо¹⁹ очиқ сўзлашка ҳеч кимда ҳад йўқ. Аммо, иккинчи тарафдин, сизни излашка маҳфүй бюруқлар берилди, дарбоза беклари ёнига хуфиялар юборилди, бинобарин, сиздин илтимос, ушбу ҳавфлар кўтарилигунча бениҳоят эҳтиётда бўлиш, Тошканд ниятини бир неча ҳафтага мавқуф²⁰ қўйишадир. Хизматингизга

¹ Явми саодат — саодатли кунлар.

² Аҳли салоҳ — тўғри кишилар.

³ Ранг — турли.

⁴ Ба ҳамаҳол — ҳамиша.

⁵ Лайли залима — қора тун.

⁶ Явми навира — нурли кун.

⁷ Риёзати қаяя — катта машаққат.

⁸ Ажри азима — улут мукофот.

⁹ Жаноби сарвари коинот — пайгамбар.

¹⁰ Мушрик — Оллоҳга ишонмовчи, будпараст.

¹¹ Шарр — ёмонлик, гуноҳ иш

¹² Мұхаммад пайғамбар исломни ошкора тарғиб этэйтган даврида Макка мушрикларининг таъқибидан Мадина шаҳрига қочиб, Абу Бакр ва бошқа саҳобалар билан бирга ёълда горга яшириниб жон сақлайдилар. Султонали шунга мисол қиляпти.

¹³ Амсол — мисол.

¹⁴ Уммати ҳақиқий — пайғамбар ёълидан борганилар.

¹⁵ Дўсти хос — яқин дўст.

¹⁶ Арзи ихлос — самимий арз.

¹⁷ Шоҳи мажнун — очиқ хон.

¹⁸ Гайри ашқиёғ — ўзга золимлар.

¹⁹ Маъаҳозо — шу билан бирга.

²⁰ Мавқуф — тўхтатиш.

Сафарбой билан ушбу хатни озгина кечиктириб юборишм боиси ҳам, мазкур хавфлар борлигидан бўлиб, маълумингиздир, Сафарбойнинг табиъатида андак бебоклик¹ ва лоқайдлиқ бор. Бинобарин, муҳобароти дигаримизни² унинг аёли воситасида қиласами, деган андишадаман. Зеро, аёл киши, ба ҳарҳол, мардум назарига яхши ва кундуз кунлари борса ҳам хавфсиз. Аммо бошқа эҳтиёт ўзингизга муҳасир³. Зинҳор ва садди⁴ зинҳор, ҳамсоялардин хотиржамъ бўлинмасин. Соңий — сизга тегишлиқ гариба⁵ хабар шудирким, кеча ўрдадин қайтиб келсан, меҳмонхона саҳнида уч нафар йигит ўлтирибдир. Ҳар учави ҳам бизнинг Фарғона кийимида бўлмаган бу йигитларни ариза ёздириғали келганми, деб ўйладим. Салом-аликдин сўнг уларни меҳмонхонага олиб кирдим. Истифҳоми⁶ сабаби ташрифдин сўнг, йигитлардин бири меним ким эканлигини аниқлаб олди, баъда, афсус чекиб, сизнинг можаронгизни сўзлади. Мен тамом ҳайратда қолиб, хуфияларми, деган андишага тушдим. Бу ҳодисани кимдан эшийтдингиз мирзо Анварга қандай алоқангиз бор, деб сўрадим. Опамдан эшитдим, ўзим мирзо Анварнинг оғаси бўламан, деган жавобни берди. Мен таажжубда қолдим; зеро, оғангиз борлигини сиздин эшитмаган эдим. Ўткан хатимда ёзганимча, бу йигитка ҳам опангизга берган жавобни айтдим, яъни, ўзимни оқлаш үчун ҳодисага бирмунча ёлғон аралаштириб сўзладим. Йигит-оғангиз бўлмиш афсус четки, ўн йиллардин бери Кўқонда бўлмаганигини, бухоролиқ бир саркарда эшигида хизмат қилғанигини, қариндошларини кўриши учун Бухородан Самарқандга келиб, у ердаги катта оғасини тополмаганини, ундан Кўқонға ўтиб, бунда ҳам сизга йўлиқолмай қолғанини сўзлади. Баъдаз унинг устидаги шубҳам бир оз зойил⁷ бўлиб, кўнгил кўтардим. Оғангиз бўлмишининг ёнидағи йигитлар бизнинг бу тарафнинг кишисига ўхшамайдирлар. Булар оғангиз бўлмишининг ҳамроҳлари, Кўқонни томоша қилғали келган эмишлар. Сизга оғалиқ даъво қилғучининг исми Қобилбой, туси сизга ўхшаб келса ҳам, ўзи тўла, паҳлавон йигит ва ҳар учави ҳам забардаст кўриндишлар. Ҳарчанд қистасам ҳам, уларни овқатқа тўхтатиб бўлмади. Сиз кечаги

¹ Бебоклик — 1. ҳайнқасмаслик; 2. Мулоҳазасислик.

² Муҳобароти дигар — бундан кейинги ёзишма, аълоқа.

³ Муҳасир — боғлиқ.

⁴ Сад — юз.

⁵ Гариба — ажаб, таажжубли.

⁶ Истифҳом — сўраб билиш.

⁷ Зойил — ёъқолмоқ, аримоқ.

мактубингизда меним сармунший тайинланишидан ташвишланиб, орада муфтилар, Абдураҳмонлар бор, сизга бирар заҳмат етарми, деган андишани ёзисиз. Воқиъан, меним учун бу хавф бор, бундан кўз юмиб бўлмас. Модомики, «садоқатим он ҳазратка офтобдин равшанроқ бўлди, девонда мендин гайри мавсукроқ¹ киши топилмади, баъдаз сармуншийлик менга ҳавола қилинди, холос». Ўткан ҳатимда ёзғанимдек, бу «марҳамат»дан бош тортшиқа ҳеч бир йўл топмадим, агар узр баён қилсан, сизни тутиб беришка бўлған ҳаракатимнинг сохталиги очилиш эҳтимоли бор эди. Чунки хонға садоқат бизнинг «одамлар» фикрича, бирар манфаат тақозосидир. Агар мен хонға «садоқатлик қул» эканман, бу «садоқат» замираиди бир манфаатим бўлмоғи лозимдирким, ул ҳам ўз дўстимни ҳалоги «садоқатимға» қурбон қилиб, эвазига сармуншийлик масҳадини олишимдир. Башарти шу масҳаддин бош тортсан, менга ишончсизлик туғилиши шубҳасиз эди. Бас, шу мажбуриятда мен бу вазифани қабул қилдим. Менга заҳмат етиши тўғрисида сиз ташвиш чека кўрмангиз, модомики, тақдирим шу экан, тагийри² мумкин эмасдир. Бу йўлда қанчалик заҳмат чекимайин ва ҳатто бошим ҳам кетмасин, меним учун қийматлироги инсонга садоқат ва шу садоқатни то ўлгунча қўлдин бермасликдир. Синглисимиз Раънобибига салом айтурсиз. Ота-оналарига ҳеч бир зарар бўлмади, фақат «ҳадя»ларнигина қайтариб олдилар. Охирги сўзим яна эҳтиётлик устида: зинҳорзинҳор ҳар эҳтимолга қарши ҳозир турисин.

Аддои мирзо Султонали.»

Анвар мактубни тугатиб, олдида ёниб турған қора чароққа тутиб, куйдирди.

— Эҳтиёт керак-а, Сафар aka?
— Албатта, мирзам, албатта.
— Бу кеч қоласизми, кетасизми?
— Кетмасам бўлмайди, Султоналингиз хафа қилали, ука.

Анвар кулди.
— Кетсангиз, хат ёзиб туришим керак экан, — деди ва тоқчадан сиёҳ-қалам олди. — Исидингизми, Сафар aka?

— Ҳа, ҳа... Жон кириб қолди, мирзам.

¹ Мавсук — ишончли.

² Тагийир — ўзгартиш.

* * *

... Биз ўткан 51-фаслда Анвар билан Раънони Султоналиниң дарбозасида қўйиб, 52-фаслга сакраган эдик. Шунда чала қолған бир неча аҳволни ҳозир айтиб кечмасак, муҳтарам ўқуғучига Султонали масаласи бир оз онглашилмай қоладирған кўринди. Шундоғки, Анварнинг мажбурият остида Раъно билан келиши Султоналини жуда ҳам шошириб қўйди. Икки орада кучлик муҳаббат борлиғига яна бир карра амалда қаноат ҳосил қылғанидек, уларнинг истиқболини қоронфилиқда кўрди. Яна шу ҳолда матонатини йўқотмай, «дўстинг учун қон ют» мақолидаги каби, уларни қаҳрамонлиқда табриқ этди. Анвар эса фақат ўз истиқболи устидагина қайфириб қолмай — чунки Раъно ва ўзининг истиқболлари мундан кейин ё чик, ё пук эди — аммо икки ўртада бу ботқоққа тойиб кетиши аниқ бўлған Султонали масаласида жиддийроқ ўлади. Зеро, мулла Абдураҳмонга илҳом бўлғанидек Анвар тинчкина Раънони ёниға олиб қочса, албатта Султонали ушланар эди. Мулла Абдураҳмоннинг фикрларидан ташқари, Султоналиниң ўз хотини Рузвонбиби орқалиқ маҳдумнинг уйи билан қилинған китоб алоқаси ҳам бор, энг охирда муфти ва Абдураҳмонларнинг Султоналига кучлик адоватлари... Шу мулоҳазаларини Султоналига баён қилиб, фикр сўраганида, ундан аҳамиятсиз жавоб олди. Чунки дўстлик тақозоси ҳар қандай оғирлиқ қаршисида матонат, кўкрак керишдир, бошинға тоғ йиқилиш эҳтимоли бўлғанда ҳам турған жойингдан силжимасликдир — Султонали шу эски қонун тобиъларидан ягона вакил эди. Лекин Анвар ўз дўстини балоға қўйишни хоҳламади. Ҳар эҳтимолга қарши чора кўришни лозим топиб, ўқуғучига маълум йўлларни Султоналига таклиф қилди. Табиъий, ул кўнди. Шу юёсун эртага ўйналатурған томошаға Султоналиниң хотини ҳам ўргатилди, ҳатто ярим кечада қўшни Каримбой ҳам уйқудан уйғотилиб, бир тилло баробарига ёлғон гувоҳ тикланди ва шу ондан бошлаб Анвар билан Раъно Каримбойнинг уйига чиқиб яшириндилар.

Маълумдирким, эртаси кун ҳар ким ўз рўлини яхши адо қилиб, иш жуда силлиқ ўтди, ҳатто бу ўртада Солиҳ маҳдум ҳам оқланиб қолди. Султонали шу кун кечқурун Тойир акани Сафар бўзчиға юборди. Чунки бу ишда сирдон бўлиш ва Султоналига кўмаклашиш учун энг мувоғиқ ҳам ишончлик киши бирдан-бир Сафар

бўзчи эди. Хуфтан асносида Сафар бўзчи етиб келди, воқиъани эшишиб, дафъатан мирзони яшириш учун шаҳарнинг четроғида бўлған язасининг уйини жўплали. Дарҳол язаси, яъни опасининг уйига югуриб жой ҳозирлатди ва шу кечасидаёқ Анвар билан Раъони элтиб жойлаштиридиким, қолғани ўқуғичимизга маълумдир. Аммо Анварнинг ҳийласи хон ва яқинлариға шундай яхши таъсир қилдиким, биз буни Султоналиниг сармунший белгиланишидан онглаймиз.

* * *

«Қирр-қирр» хат ёзиб борған Анвар, савоғич қалам учини сочиға суйкаб, қаламга ёпишқан лос қилчиғини тушурап экан, Сафар бўзчиға юз ўтириди:

— Мундан сўнғи келишингизда мирзо Султонали ёнингизга бир киши қўшса керак. Сиз шу йигитни бу ерга олиб келасиз, ўзи меним оғам бўладир, хўбми?

— Хўб, мирзам, хўб. Мирза оғайнингизга шуни тойинлаб битсангиз бўлди-да.

— Шундай, мен битяпман.

Анвар яна ёзувға қаради, Сафар бўзчи сандал кўрпасига ўраниброқ ўлтурди. Ташқаридаги ёмғур тинаёзиги, кучлик шамол қўзғалған, ёмғур томчиларни гоҳо том устига тўпиллатиб қаттиғ тушурап, дарича тирқишидан кирган шамол билан қора чароғ чайқалиб-чайқалиб ёнар, айвондаги кампирнинг чифриғидан ғижиллаб чиққан товуш мушук бола мавлаган каби ҳужрага эшитилиб турар эди.

55. БАРИМТА

Кун чошкоҳдан ошиб, Чорсуда ҳалқ олағовири бошланса ҳам, шундаги бўш дўконларнинг бирида уч нафар йигит ҳануз донг қотиб ухлар эди. Чорсуда бўлиб турған тарс-тўполон гўё бу уч йигитни алалар эди. Бошиға биттадан шапарак кир ёстиқ қўйиб, остиға яланқават тақир кўрпача ёзған ва устига гуппи чопонини ёпиб, яна шу ҳолда баҳузур хуррак отиб ухлаган бу уч йигит мусоғирга ўхшар эдилар. Улар шу йўсун роҳат қилиб ётқанда, таҳтабандлик дўкон ёнига ташқаридан бирав келиб тўхтади ва ҳамма товшин қўйиб, бақириб юборди: «Тўхта, ҳовв Наврўзқул!»

Ухлагучиларнинг иккиси пинагини бузмади, аммо дўконнинг тўрида ётқан чувак бир йигит сўчиб, боши-

ни күттарди, уйқулық күз билан атрофига қарағандан кейин, ҳамёза тортди, керишди, сүнгра эңг четда ётғу-чиға күзи тушиб, ёнидағи йигитни туртди:

— Тур, Шариф, тур, пешин бўлубту.

Иккинчи йигит кўзини очди:

— Эй, қўйсанг-чи, Раҳем.

— Тур-да, ахи, ана Қобелбой ҳам кеб тўхтабту.

Шарифбой ёстиқдан бурилиб, ёнидағи учунчи йи-гитка қаради:

— Палаъпат, қачон келган экан?

— Ким билсин... Инисини бо учратдимикин? Қани, уйғот-чи, палаъпатини.

Шарифбой ётқан жойидан қўлини узатиб, Қобил-бойнинг муртидан тортди, Қобилбой финшиб уйғонди:

— Тек ёт, Шариф.

— Инингга йўлиқдинг-чи?

— Йўлиқдим, икавингга салом айтди, — деди Қо-билбой ва юзини улардан четка ўгуриб олди. — Бир оз тинч қўй, ухлайман.

— Эби, эби, — деди Раҳим, — буродаринг аҳволини гапур-да, ахи. Бир падари уйқуки, пешинга чиқин¹ бўлса; кўчага бўлиб ёткан тўпалантни гўшинингта иласанми?

— Кеч келдим, кўб жоврама-чи, Раҳим.

— Қорунни тўғузиб, сўғун, ухла, акун² қорунлар ҳам пиёз бўлиб тўхтабту, нонуштани қайерга қиласамиз, Шариф?

— Чойхонага қиласамиз.

— Қани, сен ҳам кафанингни ёпиниб шунда чиқин ётма, палаънатинг бо ухлаб кетдими?

Иккиси туриб кийина бошладилар. Раҳим узун белбоғини тўғрилар экан, бир қанча чақа ва танглари ерга сочилиб тушти.

— Ўҳӯ, ўҳӯ, сабил, — деди Раҳим пулларни териб.— Худо буларни ҳам кўб кўрди чоғи, акун, Қўқонинг бизга тўғри келмади, иш топилмайде, пул сочиладе, оч қоламиз чоғи, Шариф?

— Қобелбойнинг Қўқонжониға лаънат, — деди Шариф, — лоақал темирчи ҳам шогирд олмайди, бизга бирон иш топиб бермаса, тўппа-тўғри нар ҳар Қобел-нинг устига минамиз.

Буларнинг вақирлашиға уйқуси ўчиб кеткан Қобил,

¹ Чиқин — ... гача.

² Акун (акнун) — энди.

тўнғур-тўнғур бир нарсаларни сўзлаб, ёстиқдан бошини кўтарди.

— Чумчуқдек чирқиллашинглар-да, тожиклар, — деди Қобил. — Ишсиз қолған бўлсаларинг, Тошкандга кетамиз.

— Ана-ана, яна топди гавни, — деди Раҳим. — Валдир-валдир қиласан, Қобелбой акун, Тошканд бориш учун пул қани?

— Пул топилад.

— Пул топилади? — деб кулди Раҳим, — бу бепадар бойбачангизни қара, Шарифбой.

— Пул топилади, — деди яна Қобилбой ва яхтагининг чўнтагига қўл солди. — Паст одамларсан-да: биринг темирчининг ўғли, иккинчинг шустагарнинг¹ боласи...

— Вой-вой, — деди Раҳим, — назари баланд бўёқчининг ўғлидан хафа бўллем!

Қобилбой чўнтагидан бир нарса олиб, уларнинг оёғи остиға ташлади ва ўзи оғзини катта очиб, ҳамёза тортди.

— Ана пул, керак бўлса ол, сендеқ ифлосларни бир йил боқали.

Раҳим билан Шарифбойнинг оёқлари остиға икки тилло келиб тушти, улар бир олтинларға ва бир Қобилбойға қараб қолдилар.

— Эби, кимни ўлдурдинг?

— Ота касбим одам ўлдириш эмас.

— Иниси берган, — деди Шариф. — Кани, ининг билан кўришдингми, Қобел?

— Кўришдим.

— Одами нағз бўлған?

— Одами нағз.

— Акун шу қочиб ёта берайкан-да, — деди Раҳим.— Бирон чора боқсин-да, айтмадинг-чи, ахи?

— Айтдим... Пайт топиб ҳаммамиз Тошканд кетмакчи бўлдик.

— Бале-бале! — деди Раҳим ва Шарифка қараб қошқоқти. — Тошканд кетамиз дегани тексиз² эмас эканда, палаънатингни. Ҳай, иш битти, Қобелбой, Тошкандга юрамиз, ўруsingни ҳам бир кўрайлик.³

¹ Шустагар — мато оҳорловчи.

² Тексиз — бекор.

³ Шу вақтларда Тошканд ўрус кўлида эканлиги унтуилмасин (муал.).

Шариф ерда ётқан икки тиллони олиб Қобилға узатти:

— Ма, тиллонгни киссанға тиқ, Қобел.

Қобил олмади.

— Тилло ўзларингга, икавинг бир тиллодан бўлиб ол.

— Аччигингни қўй, ахи биз сенга даҳанаки айтдикда.

Қобил кулди ва парвосиз кийина берди.

— Олмайсанми, палаънат?

— Ўзларингта деяппан-ку, иним сенларга атаб берди.

— Биздан қарзи йўқ-ку, ахи?

— Тушунмаган одамларсан-да, — деди Қобил. — Иним қочиб ётқан ҳолда уларни меҳмон қилолмадим, деб сенларга шу икки тиллони бериб юборди... Энди тушундингми?

— Вой, палаънат... Ҳали сан бизни ўз пулимиз билан бетимизга урдинг?

Қобил кулди. Улар иккиси бирининг оғзидан бири олиб, Қобилни паст уриб, Анварни мақтаб кетдилар.

— Сан отанг ўғли эмассан, агар отанг ўғли бўлсанг, мирзо Анвардек меҳмондўст бўлайдинг. Мирзо Анвар меҳмоннинг бетини кўрмай, бошидан тилло нисор¹ қилғанда, сан палаънат бизни туконхонаға қамаб қўясан. Буродаринг бўлмаса, Қўқонжонингни қўтариб оғзингга урайдик, мурунингдин мағзи саринг оқиб тушайди!

Қобил бир нарса деб тўнфиллади.

— Э, тўнфиллама, палаънат. Биз пул ошноси эмас, одам ошноси... Сени бозори подшога олиб чиқса, оғзига тиши бор деб саккиз пулга ҳам олмади, ба худо!

Улар шу ҳангаманинг устида эдиларким, Чорсудаги шовқин-сурон ичидан баҳайбат бир ҳайқириқ эшитилди: бозор ола-ғовири бирдан кесилиб, бу учави ҳам ташқарига кулоқ солиб қолдилар:

Эй-й-й-й-й-й...

— Бозор аро ийғилишиб гул терганлар!

Қасам ёдлаб, подшога сўз берганлар!

Мирзо Анвар отлиғ элга маълум киши,

Ўрда ичра қаламкашлиқ эрди иши.

Арзимаган гуноҳига қочди, кетди.

¹ Нисор — сочиш.

*Бундин андак подшоға озор етди.
Унинг дўсти Султонали номлиғ мирзо,
Бу қочишидан чекмакдадир беҳад изо
Мирзо Анвар гуноҳига тойишди зор,
Халойиқни тўхтатишидан мақсадим бор.
Эрта пешин асносида Султонали,
Орсиз Анвар гуноҳига ўлгай, бали.
Жамиятда ҳозир бўлса осий Анвар,
Ёки унинг дўсти ошнасидин бирар.
Гуноҳингга Султонали ўлар, десин,
Эрта пешин вақти, афсус, сўлар десин.
Имонлик қул нафси учун дўстин сотмас,
Гуноҳи йўқ ошносини ўтка отмас.
Кулоқ солған гуноҳсизнинг фарёдиға,
Дард қолмагай, етар ҳар вақт муродига!*

Жарчи тўхтади, шовқин-сурон яна эскича давом етди. Жарнинг давомида қулоғи тиккайиб, кўзи катта очилған Қобилбой сукутка кетди...

— Нега хомуш тўхтадинг, Қобел? Акун жарчинг нима деб вақирлади?

Қобил жавобсиз бошини чайқади.

— Гапур, — деди Шариф. — Мирзо Анвар, осий Анвар, деяпти чори?

Қобил яна жавоб бермади.

— Забонинг бор, ахи, буродарингни тутканлар-чи?

— Йўқ.

— Бўлмаса нега ундаи чикин хомуш тўхтадинг?

— Энди тутмакчилар...

— Энди тутмакчилар? — деб заҳарханда қилди Раҳим. — Дарди харинани тутади.

— Тушунмай ётибсанлар, анови кун биз бир мирзонинг уйига борған эдик-а.

— Ҳай.

— Ана шуни, сен Анварнинг дўсти эдинг, деб ба-
римта¹ ушлаганлар... Эртагача Анвар келмаса, шу Сул-
тоналини ўлдуруар эмишлар...

Жар маъносига энди тушунган йигитларнинг юзида
бирдан ўзгариш кўрилди, кўзларида ғазаб, нафрат ўти
ёнди:

— Бу хон йўқ², бу даюс! — деди Раҳим. — Акун

¹ Баримта — гаров.

² Бу хон эмас... (муал.).

санинг лабингта кесакни ман суртай, ўртогим Шарифни ўлдир? Бу хон йўқ, бу даюс. Азбаройи худо, даюс!

Қобил лабини тишлаб, секинроқ ишоратини қилди. Чунки хайланиб кеткан Раҳим бутун дўконхонани бошиға кийиб бақира бошлади.

— Бу хон йўқ, бу даюс! Вой дар даҳанат хонашада!

— Секин-секин! — деди қўркувлик Қобил ва ўрнидан туриб кетди, — бир фойдаси борми, жинни!

— Вой дар даҳанат хонашада!

Қобил югуриб бориб, дўконхона эшигидан қўчага қаради.

— Кўй акун, даюснинг мени ҳам бўғиз қилсин... Вой дар даҳанат...

Раҳимнинг эскидан шунинг сингари асабий оғриги бор эди. Шариф билан Қобил унинг феълига яхши тушунар, ул бирар ҳақсизликка дуч келса, гарчи масаланинг ўзига тааллуқли бўлмағандан ҳам шунинг сингари жинни бўлиб олар эди. Раҳим уч-тўрт дақиқа сўкуниб, титраб дўконхонани бошиға кўтаргандан кейин тинчиди, Қобил дўконхона эшигини ёпиб, ўртоқлари ёниға келди. Учави бир неча вақт хомуш ўлтурдилар.

— Шу бевафо дунёга бир иш қиласиз, Қобилбой, — деди яна кўзи олаланған Раҳим. — Даюснинг зиндони қайерга?

— Зиндонини нима қиласан?

— Ана ман бор, ана Шариф, ана сан, — деди Раҳим.

— Шу тунга учавимиз бориб ё үлмасиз, ё шу бечорангни рўшнодикка оламиз.

Қобил манглай остидан Шарифка кўз юборди. Шариф кулимсиб, Раҳимга қаради.

— Э, сенгачи бало шуд?¹

— Неч чи, — деди Раҳим. — Акун биз дунёга нима олиб борамез, ҳай ўллук; дунёга ўн тилло пулимиз қолайдими, ё уйга сочини тараб тўхтаған хотунимиз қолайдими?

— Йўқ, қолайтикони йўқ, — деди кулиб Шариф.

— Дастана гир, — деди Раҳим. Шариф билан Қобилга икки қўлини чўзиб, улар иккиси ҳам илжайган қўйи кўлларини бердилар. — Лафзатон якми?

— Як-яқ, Раҳим дав.

— Ҳазилаш нест?

— Нест.

¹ Э, сенга нима бало бўлди?

— Тамом, — деди икки қўлини бўшатиб Раҳим. — Шуд.

Бу аҳдлашишдан сўнг учави ҳам хомуш қолдилар. Ташқарида шовқин-сурон давом этар, узогроқ жойдан қаландарлар талқини эшитилар ва дўкон ёнидафи бир каллапаз зўр бериб ёғлиқ хасипини маҳтар эди. Полос устидаги чўпларни ўйнаб ўлтурган Қобилбой узоқ сувутдан бош кўтарди.

— Меним бир неча ерларга боришим керак экан.

— Қаёнга?

— Кеча мени олиб кеткан бўзчининг уйига, ундан кейин инимнинг олдиға.

— Нима учун?

— Балки Султоналиниң қамалиши ёлғондир, агар чин бўлса, иним билан, албатта, кенгашиш керак. Үрунсиз кучаниб қолмайлиқ-да.

Шариф Қобилнинг сўзини маъқуллаб, бош иргатди.

— Ҳай, кет, — деди Раҳим. — Биз шу ерга бўламиз, ханжарларни чархка тоблаймиз. Кўб тўхтама, палаънат.

Шариф ва Қобил унинг жиддиятидан кулимсишлилар. Қобил дўкондан чиқди.

56. ХАЙР ЭНДИ, РАҶНО!

Хотин-қизлар жинсидан иродаси кучлик, ҳатто эрлардан ҳам жасурроқ шахсларни кўб учратамиз. Шунинг билан бирга, уларни нақадар кучлик иродага молик бўлмасинлар, яна ҳиссийётларига мағлуб кўрамиз. Масалан: ҳикоямиз қаҳрамони Раъононинг жасорати, хонға қарши исёни, ҳатто маъюс қолған Анварни йўлга солиши — ўз замонаси учунгина эмас, бизнинг ҳозирги асримиз учун ҳам лойиқи таҳсин ва Раъно ёшлиқ қизларимизға ибратдир.

Лекин иродаси кучлик шу Раъно ҳозир яна ҳиссёти қўлида мағлуб эди.

Бу кеча Анвар оғаси билан кенгашиб, шу кунлар миёнасида Тошканд кетишни ўзига жазм қилди. Раънога ҳам Кўқон билан видоълашиш оғир сезилмади. Аммо, масала қатъий ҳал қилинғач, Раънода бир тарафдан қўрқунч, иккинчи тарафдан қизиқ яна бир жасорат туғулди; кампир билан биргалашиб ота маҳалласига борар эмиш; ўзи биравнинг йўлагида туриб, кампир орқали онасини айтдириб чиқар эмиш.

Туни билан шуни ўйлаб чиққан Раъно, эрталабдан бери Анварни хафа қилар, ўз сўзида исорор этар эди. Кичкина ҳужранинг сандалида қарshima-қарши ўлтурғучи Анвар ва Раъно бир-бirisидан ўпкалик қиёфатда эдилар.

— Ҳиссиётка қаттиғ берилибсан, Раъно... Ҳар қадамингда сени бир фалокат кутадир, менга қолса аямга ҳам ишониб бўлмас.

— Паранжи ичида борған Раънони таниш учун ҳеч кимда каромат йўқ; аямга нега ишониб бўлмасин?

— Сен қочқан, аянгнинг обрўсини тўккан қизсан...

— Ҳеч, ҳеч... Аямнинг кўнглини мен яхши биламан, аям сиз ўйлаған хотинлардан эмас ҳеч.

— Яхши, йўлда ҳам сени ҳеч ким танимасин, кампир ҳам аянгни алдаб олиб чиқсин, аянгнинг ўзига ҳам ишонайлиқ; яна ҳар ҳолда меним учун шу қасдингдан кечсанг нима бўлади Раъно? Биз Тошкандга бориб еткан кунимизоқ, соғлигимизни ва узримизни айтиб, хат ёзармиз-ку, жоним.

Раъно жавоб бериш ўрнига бирдан йиғлади, анча вақт кўз ёшишини юзи орқалиқ тўкиб турди.

— Балки мен... аям билан абадий кўришмасман.

— Ҳай Раъно, Раъно, — деди Анвар. — Худоёр юз йил яшайди, биз Тошканда ўламиз, деб ўйлайсанми? Ҳайр, кўб бўлса Худоёр яна беш йил яшасин, ваҳоланки, унинг зулми шу йўсун давом этканда, биз чамалаған бу фурсат ҳам кўб; зеро, зулм неқадар кучайса, унинг умри шунча қисқа бўлиши тажрибалар билан событдир. Агар шунгача ҳам сабринг етмаса, бошқа чораси топилар, Раъно, масалан, аянгни Тошкандга чақирамиз ёки гапни бир оз эскиткандан сўнг Кўқонга ўзимиз ҳам келсак бўлади.

Раъно жавобсиз яна кўз ёшишини тўка берди, бу ҳолдан сиқилған Анвар, Раънога бир оз қараб турди:

— Ҳуб, йиғлама. Ҳали бир-икки кунсиз йўлга чиқолмасмиз, бу кун кечаси акам келса, эрта бозорға чиқиб йўл ҳозирлигини кўрса, ҳар ҳолда бириси кун кечқурун жўнашимиз ҳам аниқ эмас. Бинобарин сен ошиқмасанг ҳам бўлади. Ундан сўнг, сенинг ўйлаған йўлинг жуда қалтис, бу тўғрида бошқачароқ тадбир топармиз...

Раъно индамади, бир энтикиб ором ҳавосини ютди ва рўмоли билан кўз ёшишини куритди. Анвар ўпкалик илжайиб Раънони янди. Улар шу ҳолда экан, ҳужра

девори кўча тарафдан уч-тўрт қайта гурс-гурс урилди. Иккисининг ҳам қулоқлари тиккайиб бир-бirisига савол назари юбордилар...

— Бегона киши эмас, — деди бир оздан кейин Анвар. — Мен Сафар ака билан кундузи учун девор уришни шарт қилған эдим... Сен чиқиб кампирга айт, эшикни очсин.

Раъно ҳужрадан чиқди. Бирар дақиқадан кейин ҳавли саҳнига бир неча оёқлар кирди. Бемаҳал йўқлашдан Анварнинг кўнгли ғаш тортиб, келгучини Сафар ака бўлар деб ўйлади. Ҳужра эшиги очилиб, ичкарига бири орқасидан бири — Қобилбой билан Сафарбой кирдилар. Анвар яна онглашilmовчилик ичилда қолди, Сафар аканинг тинчсиз — ҳаяжонли кўзи Анварнинг илгаридан кўриб қўйған бир неча эҳтимолларини хотирлатиб, уларга жой кўрсатди.

— Вақтсиз йўқлашларингиз сабабсиз бўлмас, — деди товшини секинроқ чиқариб Анвар. — Биздан хабар топқандарми?

Сафар ҳамроҳига қараб, икки қўлини қовуштириб енглари ичига олди.

— Йўқ...

— Султоналини қамағанларми? — деб яна сўради Анвар. — Қамағанлардир?

Сафар ва Қобил бир-бирларига қарашдилар.

— Шундай, мирзам, шундай... Бизлар жуда ҳайрон бўлиб қолдик-да.

Анварда қонсизланиш ва кипрак остларида ҳаракат кўрилди.

— Зарари йўқ, қутқарамиз... Қачон қамағанлар?

— Кеча кечқурун... Боя бизнинг уйга Султоналининг хотини келган эди, мен шундан эшилдим. Унинг устига акангиз бориб қолди...

— Сиз кимдан эшилдингиз, ака?

Жарчи хабарини ва бу тўғрида ўртоқлари билан берган қарорини Қобилбой сўзлади. Анвар оғасининг сўзини жиддий эшитиб, бир неча вақт ўйлаб ўлтурди.

— Сиз ва ўртоқларингизнинг ҳамиятларингизга раҳмат... Лекин бу йўл билан Султоналини қутқариш қийинроқ, балки мумкин ҳам бўлмас, деб ўйтайман.

— Агар биз унинг қамалған жойини билсак, нима учун мумкин бўлмасин, Анвар? Ўртоқларим юраксиз йигитлар эмас, бу ёғидан хотиржамъ бўлингиз.

— Раҳмат. Албатта, бу жасоратни юраксиз кишилар

қилолмас. Меним бу жасоратка умидсиз қарашиб сабаби шунинг учунки, бундай шартлик ва нозик ҳабслар¹ аксар ўрданинг ўзидағи овоққа қамалғучи эди.

— Урдаға кириш қийинми?

Анвар бош чайқади.

— Ҳеч мумкин эмас, тун бўйи элли нафар йигит ўрда қўргони остидан айланиб турадир.

Қобилбой маъюс Сафар бўзчиға қаради. Сафар бўзчи зўр бериб мўйлабини тишлаб, узар эди.

— Зиндонға қамаған бўлсалар, эби бор экан-да, тақсир.

— Эби... Зиндонға қамашлари эҳтимолдан узоқ, Сафар aka.

Яна бир неча фурсат сукутда қолдилар. Қобилбой ҳар он тўпписини қайириб, бошини қашир эди. Анвар сандал кўрпасидаги бир ипни узуб олмоқчи бўлғандек қўлини силтар эди.

— Зиндондан хабар олдиришимиз керак экан-да, Анвар?

— Хабар олинса... бўлади.

Қобилбой Анвардан шу жавобни олиб, Сафар бўзчиға юз ўгириди:

— Мирзонинг уйига бир киши юборсақ-да, унинг хотини эрига таом келтирган бўлиб зиндонға борса... Шу қандай бўлар экан, Сафар aka?

— Маъқул, ука, маъқул.

— Сизга-чи, Анвар?

Анвар тўғри ишорасини берди.

— Бояғи андишамизни ҳам айтиб ўтайлик, — деди Қобилбой. — Биз йўлда бир тўғрини мулоҳаза қилиб келдик, Анвар. Сўзнинг рости шуки... Сиз бу уйдан ҳозир кетсангиз маъқул. Ҳарчи одам боласи-да. Ҳалигидек жони кўзига қўриниб иқрор бўлиб кўйса...

Анвар бош чайқаб, кулимсиди.

— Султонали ундей одам эмас, бундан хотиржамъ, — деди Анвар қаноат билан ва бир оз ўйлаб турди... — Аммо Султоналининг хотини, тўғриси, бир оз хавфлироқ; хотин киши эримни кутқараман, деб нодонлиқ қилса, иш расво...

Сафар бўзчи боя Султоналининг хотини келганда, Қобилбойнинг ниятини эшитиб хотиржамъ бўлғанини сўзлади.

— Жуда яхши қилинған, раҳмат... Ҳали унинг уйига

¹ Ҳабс — маҳбус.

киши юборсангиз, яна уқдириш, хотиржамъ қилиш керак, шундай ишонтирилсинки, эрта пешингача ерининг озод бўлишига шубҳаси қолмасин, ҳатто уни бу йўсун алдаса ҳам бўладир. Эрта билангача кутқарилса, хўб, кутқарилмаса Анварнинг ўзи бориб кутқарар эмиш, агар сен шунгача сабр қиласанг, эрингнинг яна жазо тортишига сабаб бўласан, дейилсин.

— Хўб, миразм, хўб.

— Сизга яна бир хизмат, Сафар ака, — деди Анвар, Сафар ҳозирлик ишорасини қилиб, энггашиб олди. — Хизмат шуки, синглингиз мен билан бирга турмаса, сиз олиб кетсангиз...

— Хўб, хўб.

Анвар ўрнидан турди ва ҳозир қайтиб киришини сўзлаб ҳужрадан чиқди. Кўр киши зўр бериб гўза сугурап, кампир чиғириқ чиқарар, Раъно эса, кўзини бир нуқтаға тикиб, сандал ёнида ўлтуравар эди. Анвар ҳавлиниг чеккарогифа бордилар.

— Эшитдингми, Раъно?

— Нимани?

— Уларнинг сўзини?

— Йўқ.

— Бизнинг бу ердалиғимизни сезиш эҳтимоллари бор экан, Султонали қамалған, иқрор қиласа эҳтимол эмиш...

Раънонинг кўзи қавариб кетди.

— Аҳ?

— Кўрқма... Сен ҳозир Сафар ака билан кетасан, мен ҳам бошқа жойға бораман. Йўл ҳозирлигини кўриб битиргунча бир неча кун айрилишиб турмасак бўлмас... Сен бориб кийин.

— Ростданми?

— Ростдан, сен қўрқма, фақат бу бир эҳтиёт, ҳозир Султоналининг қамалишидан бошқа гап йўқ.

— Кийимларим ҳужрада...

— Ҳужрада бўлса улар чиққандан кейин кириб киинарсан.

Иккиси айвонга қайтиб, Анвар ҳужрага кирди.

— Синглингиз ҳозир кийинади, — деди Анвар. — Бирга юриш яхши бўлмас, иккавингиз бир оз илгарида, Раъно орқада борсин.

— Хўб.

— Ундан кейин сиз зиндан хабарини билиб, хуфтон чоги меним олдимға келингиз, Қобил ака.

Қобил ваъда ишоратини бериб, Сафар ака билан ҳужрадан чиқди. Раъно кириб кийина бошлади. Анвар маъюс эди, бир оз шошинқираб кийинган Раънонинг латиф юзига қаттиғ тикилган эди.

— Сиз кимникига борасиз?

— Менми, мен... мен шу яқиндағи биравникига.

— Мен ҳам сиз билан турсам бўлмасмиди?

— Йўқ, хавф бор.

Раъно айрилгуси келмагандек уфлади. Кийиниб бўлиб паранжисини ҳам қўлиға олди, Анвар ҳужранинг бурчагига ўтиб, Раънони ўз ёниға имлади. Раъно келгач, Анвар уни қаттиғ кучоклақ ўпди.

— Акам сенинг ёнинға мендан хабар етказиб турар, сенга бошқа ёрдамлар ҳам қиласар, Раъно.

— Тошкандга тезроқ кетайлик, мен... уч кундан ортиққа кўнмайман.

— Хўб... яна бир ўпай, Раъно.

Раъно табассум ичидаги яна юзини тутиб берди. Анвар бир неча вақт унинг юзидан ажралолмай турди.

— Бўлди... Улар кутишиб қолғандирлар.

Анвар уни бўшатди...

— Пулни сен олиб кет, Раъно, меним эсим йўқ, йўқотиб қўярман.

Раъно бурчакдаги кийиз тахидан бир ҳамён олтинни олди.

— Сизга бир-икки тилло бериб кетайми, балки керак бўлар?

Анвар керак эмас, деб бош чайқади. Яна шу ҳолда Раъно ҳамёндан икки тилло олиб, Анварга кўрсатди:

— Шу икки тиллони холам билан отамға биттадан бериб кетаман?

— Бер, бер... Хайр энди Раъно!

Раъно ҳам, хайр, дегандек бош иргади ва шошиб ҳужрадан чиқди. Раъно айвондагилар билан хайрлашар экан, ҳужрада қолған Анварнинг икки кўзи жиқ ёшқа тўлиб, кўкраги кучлик-кучлик силкинди ва гавдаси ўзига оғирлиқ қилғандек деворга бориб суюнди...

57. ҚЎРҚУНЧ БИР ЖАСОРАТ

Қобилбой бу сўзни эшилқучи қулоқлариға ишомағандек, Анварнинг яқинроғиға сурилди.

— Нима деяпсиз, Анвар, мен яхши онгламадим?

Анвар яна ўша сўзини такрорлади. Қобилбой энди бир оз орқасига қочиб кўзини катта очди ва бир неча вақт қотиб турди...

— Сиз нима қилмоқчисиз, ука. Ўз оёғингиз билан... Йўқ, бу бўлмаған гап. Балки бу — хоннинг унга пописа-сидир, шу ҳийла билан мақсадига етмакчидир... Қўйинг бу гапни, ука, кўйинг...

Анвар ҳамон бояги вазиятда, кўзини бир нуқтаға тикиб, сандал устидаги қофозни оғаси яқинроғиға сур-риб қўйди...

— Башарти пописа бўлмаса?... — деди Анвар. — Хон пописани билмайди, унинг ҳамма ҳаракати жиддий. Шундай, сиз бу хатни эртага унинг қулиға берасиз ва ундан ҳар бир ёрдамингизни аямайсиз.

— Бу ақиллиқ гап эмас, ука...

— Мен энди шунга қарор берганман, — деди Анвар ўзгаришсиз. — Бу азмдан қайтиш йўқ... Фақат, сиз ундан ёрдамингизни аямаслиққа менга сўз берсангиз бўлди.

Қобилбой энтиқди, хатни қўлиға олиб, бир неча фурсат сукутда ўлтурди... Сўнгра бирдан ўрнидан туриб хужрадан чиқа бошлади.

— Йўл бўлсин?

— Кетяппан.

— Хайр, кечирингиз.

Қобилбойдан жавоб бўлмади.

* * *

Кун қиёмга яқинлашқан. Яна бирар соатдан сўнг Султоналини ўлимга олиб чиқар эдилар. Ўрда ҳеч бир ўзгаришсиз, одатий такаллуфида ҳаракатланар, баҳмал ва заррин кийган саркардалар ичкари билан ташқариға тўхтовсиз қатнашиб турар эдилар. Бу кунги девонда бир неча муҳтарамларнинг чақ-чақи билан яна бошқача рух, икки кундан бери яна девон хизматини адо қила бошлаган бир муҳтарам ёш олимнинг мулойим сиймо-си мирзолар орасини яна мунаvvар эткан ва юзидан ғолибият маъноси чакиллаб турған икки муфтининг мутоябаларига ёш олимнинг майин нигоҳи ҳар замон илжаяр эди.

— Унинг учун икки йўл, — дер эди Шаҳодат муфти, — ё аммазодасини топиб бериш, ё ўлим, фақат икки йўл.

— Албатта шундай, — деб унинг сўзини тасдиқ

қилар эди мулла Абдураҳмон. — Топиб берганда ҳам яна жазо бор, бу тарафи ҳам унүтилмасин.

— Яна қандай жазо? — деб ажабланар эди мулла Калоншоҳ,

— Топиб беришни бўйнига олдими, бас, бу сўз Анварни қочирған ҳам ўзим, деган икrorдир.

Бу бийрон жавоб мулла Калоншоҳга ёқинқирамас эди.

— Топиб беришни бўйинга олмаслик, гуноҳсизлик деган сўздир. Дарҳақиқат, Анварнинг қайерга кетканини билмаса, қандай қилсин? Бас, бу ҳолда Султонали қатл қилинадир, гуноҳсиз ўлдириладир... Бунга ким сабаб, унинг қони кимни тутадир? Мен шунисига ҳайронман-да.

Бу сўз қаршидағи икки муҳтарамни лом дедирмай кўйиб, чақ-чақ шу ерда шарт кесилди. Шаръий либос кийдириб, ўз менлигини ишка оширган мулла Калоншоҳ голиб ва мағрур, қўлидағи таҳrirга қаради.

Шундай: шу соат ичида Султоналини ўлим жазосига олиб чиқар эдилар. Ўрдадан ҳар ким унинг нажот топишиға ишонмас; хоннинг олдиға чақирилди — ўлди, башарти гуноҳи бўлиб, икror қилса, яна жазога қолди, вассалом. Аммо Анвар хон ҳузурига келиб ўзини унинг ҳукмига топширадир, чин йигитлик йўли билан дўстини кутқарадир, деган хаёлға ким ишонсин? Кечакарчи кўй гузарларни айланиб, Анварни инсофка чақирди, киши қонига қолмаслик фазилатини тараннум эттириди. Бироқ, Анварнинг бундай «ҳамоқати»га ахлоқан сукут этиб, вижданан музлаган ўрда арбоби ва бошқалар ишонсинми?

Шундай: ўрда арбоби бу кун пешиндан бир оз илгарироқ мужассам бир виждон, тоғюрак бир йигит ва ўлим сари кулиб келгучи бир арслонни ўз тарихида биринчи мартаба кўрди ва тонг ажабда қолди. Бу улуғ жасорат бир неча дақиқаларғача зулм итларини сукутка солди, уларни ишдан тўхтатди. Ўрда арбобларининг маҳкамада ўлтурғанлари эшик ёниға чиқиб, йўлда борғанлари ҳаракатсиз қолиб, парвосиз ҳар ким ёнидан саломлашиб ўткучи арслонни тамоша қилдилар.

Анвар девонхона қаршисиға етканда, нима мақсад биландир даричалар ва эшик ёнидан мўралашқути мирзозоларга умумий бир таъзим ифода қилди ва собит қадам зиналарга оёқ кўйиб, юқорига, хон ҳузурига чиқиб кетди. Пойтахт бўсағасидаги доимий ясовуллардан ўтиб,

дахлизда тұхтади. Чунки бундан нарига ўтиш учун худайчи воситасида хондан рухсат олдириш лозимдир. Бириңчи әшик ёнида құл қовишириб турғучи Дарвеш худайчи таажжуб ва ҳайрат ичиде Анварни қаршилаб, иккінчи хонадаги «жаноб» ҳузурига кетди.

Тахтига такя қылған Худоёр иккі күзи тұғрисиға иккі жаллодни қўйиб, ёнидағы домла шоғовул, Турсун оталиқ, ва ғайри бир неча аъёнлар билан сұхбатлашар эди.

— Пушти паноҳо! — деди худайчи, — хиёнаткор ўз ихтиёри билан келиб, доми адолатингизга таслим бўлмоқчи!

— Хиянаткаринг ким?

— Мирзо Анвар!

Хон сесканиб кетди, ҳамнишинлар ҳам алонғ-жалонғ бўлдилар.

— Келтир!

Худайчи қулиқ қилиб, орқасиға қайтди. Даҳлиздағи Анвар бириңчи хонадаги аъённи ҳайратка солиб, иккинчи танобийнинг бўсағасида, жаллодлар ўртасида тұхтади ва хонға таъзим адо қилди.

Рақибни бу қадар жасоратда кўрган Худоёрнинг кипрак остлари учиб, соқол туклари силкинди ва бир оз сўз тополмағандек тамшаниб турди.

— Сен бизга хиянат қилдинг, ит увли!

Анвар бош ирғатди.

— Иқрорман.

— Тузимни унутдинг!

— Тонмайман.

— Иқрорсен, тонмайсен, ўбдан иш! — деди заҳарханда қилиб хон, — ўлувдан ҳам қайтмайсан!

— Мен сиздан марҳамат сўраб келган эмасман, — деди илжайиб Анвар. — Ўзимни ўлимга бериб, бир гуноҳсизни күтқазиши учун келганиман.

Ҳамнишинлар лабларини тишлидилар. Худоёр истеҳзолик кулди.

— Пусулмончилиқ қигансан-да?

— Албатта, — деди Анвар, — бошқалар киши гуноҳи учун гуноҳсизни тутиб пусулмончилиқдан чиққач, мен пусулмонлиқ билан ўлишни ўбдан билдим.

Бу жавоб Худоёрни қип-қизил туска қўйиб, манглайида терлар кўринди, ғазаб ўти алантага олди.

— Сенинг қифан ишинг пусулмончилиқда борми, ит увли?

— Мусулмончилиқда юзлаб хотин устига, бир камбағал уйланмакчи бўлған қизға ҳам зўрлиқ қилиш борми, қиблаи олам.

— Чиқар буни, жаллод!

Жаллодлар ҳаракатландилар.

— Ханжаримиз қонсираған!

Анвар бош чайқаб кулди.

— Гуноҳсизни меним кўз ўнгимда банддан озод қилинмас экан, Анварни бу ердан чиқара олмаслар, қиблаи олам, — деди ва ўзини ташқариға торта бошлаган жаллодларни арслонларча силтаб юборди, — сизда адолат борми, жаноб?!

Кўркунч бу ҳайқириқ Худоёрни инсофка келтирди. Жаллодларни тўхташқа ва ҳудайчини Султоналини ҳозирлашга буюрди. Кўзи қонланған Анвар икки қўлини ёнига ташлаб Худоёр қаршисида туриб қолди. Ҳамма сукутда... Шундай фурсалларда гуноҳкорни адабсиз сўзлар билан сўқиб турғучи Худоёр ҳам жим. Чунки, аъён назаридаги ҳар бир адабсизлигига Анвар тарафидан кучлик бир ҳақорат олиш эҳтимоли бор. Шайхи Саъдий айтканча, дунёда ҳаётидан қўл ювғунчикек тили узун киши бўлмас. Дарҳақиқат, инсонни разолатка солғувчи унинг манфаати тақозаси, қола берса ўлимдир. Бу иккисидан кечгучига эса на подшоҳнинг қаҳри ва на жаҳаннамнинг қаъри фарқсиздир.

Кўб фурсат ўтмай ҳудайчининг орқасида Султонали кирди, хонға қарши турғунчини таниб, титради... Титрап экан, Анвардан бир оз кейинда туриб хонға таъзим қилди.

— Сиз озод бўлдинғиз, — деди хон, — девонға чиқиб ўз ишинғизға қаранг!

Султонали ихтиёрсизча хон томонға букулиб олди... Анвар «истеҳзоли» вазиятда Султоналига ён қаради:

— Меним қаршимға ишлаб, жанобга неқадар содик қолсангиз ҳам, садоқатингиз сизни нажотка чиқара олмади, билъакс, сиз ўйлағанча мен — инсофсиз сизни қутқардим... Сиз шуни унутмасангиз бўлди, Султонали ака, — деди Анвар ва хонға ишорат қилди. — Қўлимни боғласинлар, чиқариб ўлдирсинлар.

Султонали орқасиға қайтди, қайтар экан, кўзидан бир неча томчи ёши оқиб тушди. Жаллодлардан бири келиб, Анварнинг қўлини орқасиға боғлади. Анварнинг қўли боғланар экан, Мұҳаммад Ниёз домла ўрнидан туриб, хонға қуллик қилди.

— Шу адабсизнинг гуноҳини меним учун кечсинлар.

Хон юзини четка ўирди:

— Пастага чиқарин!

Анвар хонни ва ҳамнишинларини масхаралагандек таъзим адо қилди. Жаллод олдинға тушди, унинг орқасидан Анвар юрди ва орқадан икки нафар қуроллиқ ясавул эргаштилар. Анвар ўзини ўрдага киришида қандай тетик туткан бўлса, ўлим сари чиқишида ҳам ўшандоғ парвосиз эди. Кўзи тушкан таниш ҳар кимса билан «Хайр, хўш» деган каби имлашиб олар эди. Ранги қув ўчиб хушсиз каби ташқи дарбоза ёнида турған Султонали билан ҳам алоҳида видоълашди. Анварнинг қаршидағи маънога тушунган Султоналиниң юраги сув бўлиб оқди ва ҳушсиз, ҳиссиз, Анвар кўздан йўқолғунча қараб қолди...

Янги раства да халқ қайнашар эди. Кўлида ялангоч ханжарини ушлаб, белига ойболтасини қистирған манфур жаллод орқасидан келгучи маҳкумга кўзи тушкан халқдан баъзиси жазо майдониға қараб оғилди ва баъзиси нафратланган кўйи ўзини четка тортди. Жазо майдони янги раста билан ўрда боғининг муюшида бир дор ва остиға қон оқизиш учун қазилған чукурдан иборат эди. Дор остиға келиб етдилар. Бир онда дор атрофига юзлаб йифилган томошабин халқни ясовуллар четланишка буюрдилар. Халқ орқага силжиган бўлиб, яна сиқилиша берди. Дор остида Анварнинг қўли ечилиб, таҳорат олиш учун унга сув берилди. Чунки бу маҳкумнинг қонуний ҳаққи эди. Анвар таҳорат олар экан, жаллод ва ясовуллар ханжар ялангочлаб унинг теврагини қуршаб турдилар. Анвар таҳоратланиб, устидаги тўнини ерга ёзди. Жаллодлар доирани бир оз кенгайтиб, Анвар икки ракаъат намоз ўқуди. Дуодан сўнг Анвар ўрнидан турди, қўлини боғлашқа бериб, атрофига бесаранжом аланғлади. Теваракни сириб олған халқ олдида манфур кўзини мойландириб ўз устига тўп-тўғри қараб турған мулла Абдураҳмонни кўрди. Анвар титради. Абдураҳмон илжайди...

— Кулишқа ҳаққингиз бор, домла, чунки ўч оласиз, — деди Анвар. Бирдан ҳамманинг кўзи Абдураҳмонга тушди. — Фақат сиз ифлослиқ натижасида куласиз, мен... мен тўғрилиқ самарасини ўраман, сиз ифлос виждан билан ғолибсиз, мен соғ виждан билан мағлубман... Мени дор остиға ким келтирди? Виждан эмас-

ми, тақсир?! Сизни бу ерда ким томошабин қилди. Ифлослиқ эмасми, тақсир??

Халқ чүкүр сукутда, ўз орасыда турған «пешво»га киналик күз билан тикилған эди... Жаллод қўли боғланған Анварни дор томонға олиб борди. Анвар ўз ихтиёрича чүкүр ёниға ўлтурди ва ханжарини яниб келган жаллодга қўли билан «озғина тўхтанг» ишоратини қилиб, Абдураҳмон томонға кулди:

— Меним ҳолимни кўрингиз, домла, — деди Анвар кулган юзда, — қўлим боғланған, устимда ханжар ялтирайди. Лекин мен куламан... Нима учун бундай, тақсир? Чунки виждан роҳатда, жон тинч, юракда ишқ... Дуруст, мен кўмилгач, қабрим устида кўкси доғлик қизил лолалар кўкарап... Нимадан бу? Бу — сизнинг каби тубанлар солған из...

Томошабинлар тоқатсизланғандек кўриндилар, Анвар узаниб ётди... Жаллод ханжарини енгига яниб Анвар устига энгашти.

... Энгашти, бироқ орқадан берилған кучлик бир зарб билан Анварнинг устидан ошиб, мукканча чуқурға йиқилди. Жаллоддан беш қадам нарида турған ясовуллар ҳам кўкдаги ханжарлик қўлларини остига букалмай, кимлар биланadir олишиб ётар эдилар ва шу онда кучлик шапалоқ товши эшитилиб, салласи чувалган бир ёш мулла ерга ўлтуриб қолди. Халқ тартибсизланди... Қобилбой Анварнинг дастбандини кесди ва иккиси тартибсизлик ичига кириб йўқолдилар. Куролсизландирилған ясовуллар гурр этиб турли томонға сочиған халқ ичидан дўст-дushmanни ажратолмай гарангсиздилар. Шу вақт бутун аъзоси эски қонларға беланган жаллод чуқурдан чиқишиқа интилар эди...

* * *

Шу воқиъадан икки кун сўнг ярим кечадан вақти, Беш ариқ билан Хўжанд дарбозалари ўртасидағи қўрғон девори остига тўрт нафар кўлага келиб тўхтади... Йигирма икки-йигирма уч кунлик ой ҳали унча кўтарила олмаған, айниқса ой нуриға қўрғон девори тўскун эди. Кўлагалар бирин-бирин қўрғон деворига тирмаша бошлидилар. Биринчи мартаба кунгира ёниға чуқкучи эмаклаб юриб атрофни текширди, текширгучининг бетига ой нури сепилиб, таниш бир юз — Сафар бўзчи зоҳир бўлди. Қўрғон ташқариси кенг дараҳтсиз қир, туманлик — хира ойдин ва узоқдан бир неча туп яланғоч

дарахтлар кўлагаси кўринар эди. Сафар бўзчи ўзидан бир зина қуида турған ҳамроҳларини бирин-бирин ўз ёнига чиқара бошлади. Анвар, паранжилик Раъно, энг охирда қўлида арқон кўтарган Султонали юқорига чиқдилар. Султонали аста-секин кунгира ёнига келиб, остра қаради.

— Саккиз газ бор, — деди шивирлаб Султонали. — Келинг, Анвар...

Анварнинг қўлтуғи остидан арқон солиниб боғланди. Султонали ва Сафар бўзчи Анвар билан қучоқлашиб кўришдилар... Сўнгра Анвар кунгира ёнига келиб, қуиға осилди. Сафар билан Султонали арқонни секин-секин юбориб турдилар.

— Етдим, — деган товуш келди қуидан ва бир оздан сўнг арқон ҳам бўшалди. — Тортинг...

Арқон тортилиб олинди. Паранжиси аралаш Раъно ҳам арқонға боғланди.

— Арқонни қаттиғ ушлаб, оёғингизни деворға тираб тушасиз, Раъно... Энди омон бўлинг, синглим...

— Келин ойимларга салом айтинг сиз ҳам, амаки.

Раъно гоҳ chalғиб, гоҳ тўхтаб, қуиға силжиди. Ерга тушишка бир газ чамаси масофа қолғанда девор остида кутиб турған Анвар уни кўтариб олди.

— Кўйинг, ўзим тушаман.

— Тегимиз ариқ, лойға ботасан.

Анвар шу сўзни айтиб, уч-тўрт қадам босди, Раъно-ни «Тия тойди» ариғининг нариги чеккасига чиқариди. Раъно қўлтуғи остидағи арқонни ечди, арқон девор устига томон соғилиб олди. Анвар яна қўргон девори остиға юриб чиқди ва секин юқорини чақирди:

— Султонали ака!

Кўргон кунгирасидан Султоналиниң кўлагаси қуиға энгашти.

— Эҳтиёт бўлингиз, Султонали ака, — деди Анвар.

— Сиз ҳам шу ҳафтадан кечикманг. Такрор айтаман: зинҳор кўриниш фикрига туша кўрманг.

— Хотиржамъ, хотиржамъ.

Чунки Анварнинг кутилған кунидан бошлаб Султонали ҳам яширинған эди. Гарчи, хон уни қайтадан йўқламаса ҳам, яна шу эҳтиётни мувофиқ кўрган эдилар. Султонали уй ишларини саранжомлаш учун улардан бир ҳафта кейинроқ йўлға чиқмоғчи эди.

Анвар «Тия тойди» ариғидан Раъно ёнига ўтиб, охирги мартаба хайрлашдилар.

- Хайр, Султонали ака, хайр, Сафар ака!
- Хайр, амакилар!
- Оллонинг паноҳига, Анвар!
- Сафаринглар бехатар бўлсин!

Қўргон устидагилардан кимдир бири пиқ-пиқ йифлади. Анвар Раънони олдиға солиб, узоқда кўринган дараҳт кўлагасига қараб юрди. Ер жуда ботқоқ, ҳар бир қадам аранг ердан узилар эди. Йигирма қадам чамаси борғач, Раънонинг кафши лойға тишлашиб оёғ узолмай тўхтади. Икки қадам орқада келган Анвар Раънони кўтариб олди.

— Меним этигим бор, чимга чиққунча жим тур,— деди Анвар.

— Кўргон устида... Кўйинг, уяламан...

Анвар жавоб бермади. Ўттуз қадам чамаси бориб Раънони ерга қўйди ва қўргон устидан ҳануз мўралашиб тургучи кўлагаларга «кетинг» деган каби қўл чайқади. Иккиси яна бошлашиб кетдилар. Улар ўн беш қадам босар-босмас дараҳт кўлагаси остидан икки отлик югуриб чиқди ва бир онда Раънолар ёнига келиб, отлиқдан бириси «тўп» этиб ерга тушти ва жилавни Анварга тўғрилаб турди.

— Акун, сувор бўлинг.

Анвар Раҳим кўмагида отқа минди. Узангидан оёғини чиқариб Раънони чақирди. Раъно — Анвар билан, Раҳим — Шариф билан мингашиб олдилар. Анвар яна Қўргон кунгирасига қаради. Ҳануз икки кўлага кўринар эди. Қамчисини уларга тўғрилаб силкитди, отни йўлға солди. Дараҳт кўлагаси остида соябонлиқ араванинг шотисига такя қылған Қобилбой уларни қаршилади. Раъно от орқасидан аравага ўтди. Анвар ҳам отдан қўниб, аравага Раъно ёнига чиқди. Раҳим ўз отига миниб, Қобилбой аравани йўлға солди. Икки отлик араванинг икки шотиси ёнига кириб қўзғалдилар. Тўғун¹ темирни ердаги майда тошларға уруниб, шақ-шук товуш чиқара бошлади. Арава ва отлиқлар кўлагаси дақиқа сайин кичиклаша борди, бора-бора кенг қирнинг бағрида кўзга кўринмас бўлиб кетди. Фақат, яна бир оз тўғуннинг кучсиз-кучсиз тошқа уриниши эшитилиб турди...

Битди.

¹ Тўғун — фиддиракнинг ташқи гардиши.

Мирзо Анварнинг кейинги ҳаёти тўғрисида

Мен мирзо Анвар ҳикоясини марҳум отамдан эшиткан эдим. Мирзо Анвар Кўқондан қочиб келиб, учтўрт йил чамаси Тошканднинг машхур Эскижўва маҳалласида турған. Ул вақтларда бизнинг ҳавлимиз шу Эскижўвада бўлиб, мирзо Анвар отамга қўшни эмиш.

«Кўқондан бир мирзо кўчиб келиб, фалончининг ҳавлисини ижарага олған эмиш», деган гап чиқиб қолди, — деб ҳикоя қиласр эди чол. — Мен мирзо хабарини эшитсан ҳам, бир ҳафтагача ўзини кўралмадим. Рўза кунларининг бирида биз масжиддан шом намозини ўқуб чиқар эдикким, сўфи: «Ҳаммангизни Худоёрхоннинг миrzоси ифторга таклиф қилған», — деди. Биз йигирма чоғлиқ киши янги қўшнининг уйига бордиқ. Бир уй ва бир айвонга яхши полослар солинган, кўрпачалар ёзилған, ўртада анвоъи дастурхонлар... Биз уйга кириб ўлтургандан кейин эшик ёнида хушсурат бир йигит кўринди. Бизга тавозиъланиб хуш омади айтди. Мирзо Анвар, дегани шу эмиш. Биз ифторга қарадиқ, миrzодан аҳвол сўрадиқ, тошкандлик бўлғумиз келди, деб кулди. Биз — тошкандликлар хўш кўрадиган норин қилдирибдир, хўб едик... Домла билан бир нечалар фотиҳага яқин ташқариға чиқиб кетдилар. Биз нима воқиъ бўлғанига тушунмадик. Орадан бир оз ўткандан кейин яна қайтиб кирдилар. Дастурхонлар йиғилиб иш фотиҳага тўхталған эдиким, домланинг олдига бир коса сув келтириб қўйдилар. Домла никоҳ хутбасини бошлади... Биз ҳайрон бўлдиқ. Хутба охириға етиб, мирзо Анварга бир қизни никоҳладилар; биз, мирзо билан қизнинг ҳаққига дуо қилиб, тарқалишидик. Лекин хилофи одат бу никоҳ ҳар биримизни таажжубга солди. Яна бирар ҳафта ўткач, бир нечамиз мирзо билан таниш бўлиб олдиқ, кейинроқ миrzони улфатчилигимизга ҳам олиб кела бошладиқ ва шунда миrzонинг ўз оғиздан Худоёр билан кечкан можаросини эшитдик, таажжубландик ва минбаъд миrzога ихлосимиз ортди...»

Чолнинг сўзига қарағанда мирзо Анвар Худоёрнинг

кўли етмайдирган Тошканда (ўрус қўл остида) тинч, аммо жуда ҳам фақир яшаған, бойларға мирзолиқ қилса ҳам, даромади доимий бўлмаған. Тошканда туришининг учунчи йилларидан Худоёрдан бир афвнома олиб, қашшоқлиқ жонига теккан мирзо Анвар, ўйлаб турмай, Раъно билан Кўқонға қайтқан. Орадан уч-тўрт ой ўткач, Кўқондан келгучилар мирзонинг ўлдурилганлигини сўзлаганлар. Нега ўлдурилган, эски «гуноҳи» учунми, бошқа сабаб биланми ёхуд «афвнома» ҳам мулла Абдураҳмонларнинг найрангги бўлғанми, отам бу тарафини яхши билмас эди.

Мен ушбу китобка материал йигиш учун Кўқон бордим, яшаған кишилар билан сўзлашиб юрдим: ўзи Худоёр девонида ишламаган бўлса ҳам, Худоёр мирзоларига ҳамаср бўлған бир кекса мирзога учрашдим. Унинг сўзига қарағанда, мирзо Анвар ўлдурилмаган. Худоёрдан сўнг анча йил яшаб, ўз ажали билан ўлган эмиш. Мен ҳайрон бўлиб қолдим ва икки ўртала тараддулланиб, мирzonинг кейинги ҳаётини шу ҳолда битиришка мажбур бўлдим.

Абдулла Қодирий — Жулқунбой

*Тошканд, 15 феврал
1928-нчи йил*

МУНДАРИЖА

| | |
|--|-----|
| Раънонинг эгаси | 4 |
| Амир Умархоннинг канизи | 6 |
| Махдумнинг уйланиши ва мактабдорлиги | 9 |
| Махдумнинг баъзи хислатлари | 11 |
| Оила ва кишилар билан муомала | 13 |
| Нигорхоним | 15 |
| Раъно | 17 |
| Бир ўрдалиқ | 20 |
| Ўпка ва ҳазил | 25 |
| Хайриҳоҳ бир одам | 29 |
| Махдумнинг таҳди | 33 |
| Бахмалбофда фақир бир оила | 39 |
| Танийсанми шу жажжи қизни? | 41 |
| Чин ўртоқ | 44 |
| Махдумнинг бахти | 49 |
| Хоннинг илтифоти | 53 |
| Анварнинг андишаси | 55 |
| Жиловхонада бир жанжал | 59 |
| Ифлос бир мозий | 64 |
| Хушёриқ | 68 |
| Ёрлиқ бериш маросими | 72 |
| Адрес тўн ва иссиф нон «Фожиъаси» | 78 |
| Китоб сўзи | 82 |
| Шоирнинг сирри | 88 |
| Ҳаёт шамъи | 93 |
| Нега ерга қарайсан, Раъно? | 99 |
| Зулм ўчоги | 103 |
| Ҳарам | 106 |
| Оғача ойим | 112 |
| Хоним ойимлар | 117 |
| Қирқ қизлар | 121 |
| Нозик | 127 |
| Янги «хунар» | 132 |
| Хайрул-умури авсатуҳо | 138 |
| Хон кўнгил очмоқчи | 145 |
| Қизиқлар | 149 |

| | |
|--|-----|
| Бирикиш | 155 |
| Фарид күнгли | 158 |
| Бишүй, эй хирадманд | 161 |
| Алдаш учун бола яхши | 165 |
| Чақанғиз сийқа әмасми? | 168 |
| Кув одам экан | 173 |
| Чүлөк қуш | 178 |
| Қоп йүқтедінғизем? | 182 |
| «Фотиҳа — муҳри ҳудодир» | 186 |
| Йигит | 190 |
| Очиқ хат | 196 |
| Тўй арафасида | 200 |
| Рамз | 203 |
| Маъшуқа маҳбаси | 207 |
| Жасур қиз | 211 |
| Дўстлик «каромати» | 214 |
| Чаённинг намойиши | 220 |
| Икки хил садоқат | 226 |
| Баримта | 232 |
| Хайр энди, Раъно! | 238 |
| Кўркунч бир жасорат | 243 |
| <i>Мирзо Анварнинг кейинги ҳаёти тўғрисида</i> | 252 |

**АБДУЛЛА ҚОДИРИЙ
МЕҲРОБДАН ЧАЁН**

**«Шарқ» нашриёт-матбаа
акциядорлик компанияси
Бош таҳририяти
Тошкент — 2007**

*Мұхаррир Улугбек Раҳимов
Мусаввир Нилуфар Ҳидоятова
Бадий мұхаррир Феруза Башарова
Техник мұхаррир Раъно Бобохонова
Саҳифаловчи Mastura Atxamova*

Теришга рұхсат этилди 6.05.2007. Босишиңа рұхсат этилди 12.09.2007.
Бичими 84x108^{1/32}. «Таймс» гарнитураси. Офсет босма. Шартли босма
табоги 13,44. Нашриёт-хисоб табоги 13,28. Адади 5000 нұсха. Буюртма
№3851. Баҳоси келишилгән асосда.

**«Шарқ» нашриёт-матбаа
акциядорлик компанияси босмахонаси,
100083, Тошкент шаҳри, Буюк Турон күчаси, 41.**